

राजमल जैन

के. ए. वी. टी.

श्रीपरमात्मने नमः ।

स्वर्गीय कविन्द्र दानतरायजी विरचित

धर्मविलास ।

(दानतविलास)



प्रकाशक—

श्रीजैनग्रन्थरत्नाकरकार्यालय-बंबई ।

मुद्रक—

निर्णयसागर प्रेस-बम्बई ।



श्रीवीरनिर्वाण संवत् २४४०

छोटी मोटी
ही छोटे रूपमें
छप गये हैं और
नहीं समझी गई ।

जिम्में दानत-

श्री महादेव

श्री महादेव

(श्री महादेव)

Published by Nathuram Premi Proprietor Shri Jain Granth
Ratnakar Karyalaya Hirabag, near C. P. Tank Bombay.

Printed by R. Y. Shedge, at the Niranaya-Sagar Press
23 Kolbhat Lane, BOMBAY.

राजमल जेक मठ

निवेदन।

शिवजी

पाठक शहाशय,

लगभग दो वर्ष पहले इस ग्रन्थके छपानेका कार्य प्रारंभ किया गया था, आज इतने समयके बाद तैयार होकर यह आपके हाथोंमें पहुँचता है। इच्छा थी कि इसके साथ कविवर दानतरायजीका परिचय और उनकी रचनाकी आलोचना आपकी मेंट की जाय; परन्तु इस समय मेरे शरीरकी जो अवस्था है उसके अनुसार यही बहुत है कि यह ग्रन्थ किसी तरह पूरा होकर आपतक पहुँच जाता है। लगभग चार महीनेसे मैं अस्वस्थ हूँ और इस कारण बहुत कुछ सावधानी रखनेपर भी इसमें कहीं कहीं कुछ अशुद्धियाँ रह गई हैं उनके लिए मैं आपसे क्षमा चाहता हूँ। यदि कभी इसके दूसरे संस्करणका अवसर मिला तो ये अशुद्धियाँ भी न रहेंगी और ग्रन्थकर्ताका परिचय और ग्रन्थालोचन भी लिख दिया जायगा।

धर्मविलास बहुत बड़ा ग्रन्थ है। दानतरायजीकी प्रायः सब ही छोटी मोटी रचनाओंका इसमें संग्रह है। परन्तु आप इस ग्रन्थको बहुत ही छोटे रूपमें देखेंगे। इसका कारण यह है इसमेंके कई अंश जुदा छप गये हैं और इस लिए उनकी इसमें शामिल करनेकी आवश्यकता नहीं समझी गई।

इसका एक अंश तो जैनपदसंग्रह (चौथा भाग) है जिसमें दानतरायजीके सबके सब पदोंका संग्रह है। यह हमने जुदा छपवाया है।

दूसरा अंश प्राकृत द्रव्यसंग्रहका पद्यानुवाद है जो द्रव्यसंग्रह सान्वयार्थके साथ साथ छपा है।

तीसरा अंश चरचाशतक है जो इसी वर्ष सुन्दर भाषाटीकासहित प्रकाशित किया गया है।

चौथा अंश भाषापूजाओंका संग्रह है। यह लगभग चार पाँच फार्मका होगा। इसे हम इसीमें शामिल करना चाहते थे; परन्तु सर्वसाधारण पूजाप्रेमी लोगोंके लिए इसका जुदा छपवाना ही उचित समझा गया। इसकी कापी तैयार है। बहुत शीघ्र छप जायगा।

इस तरह इन सब अंशोंके मिलानेसे धर्मविलास पूर्ण हो जायगा।

बम्बई

३०-१२-१३



नाथूराम प्रेमी।

विषयसूची ।

	पृष्ठाङ्क.
१ मंगलाचरण	१
२ उपदेशशतक	१
३ सुबोध पंचासिका	४३
४ धर्मपच्चीसी	४९
५ तत्त्वसार भाषा	५२
६ दर्शनदशक	६०
७ ज्ञानदशक	६४
८ द्रव्यादि चौबोल-पच्चीसी	६८
९ व्यसनत्याग षोडश	८१
१० सरधा चालीसी	८७
११ सुखवत्तीसी	९२
१२ विवेक-वीसी	९६
१३ भक्ति-दशक	१०२
१४ धर्मरहस्य-बावनी	१०६
१५ दानबावनी	११६
१६ चार सौ छह जीवसमास	१२७
१७ दशस्थान चौवीसी	१३०
१८ व्यौहारपच्चीसी	१३९
१९ आरतीदशक	१४९
२० दशबोल पच्चीसी	१५७
२१ जिनगुणमाल सप्तमी	१६४
२२ समाधिमरण	१६७
२३ आलोचनापाठ	१६९

जैनग्रन्थरत्नाकरकार्यालय बम्बईके

छपाये हुए जैनग्रन्थ ।

१	प्रद्युम्नचरित्र-हिन्दी भाषामें बहुत ही बढ़ियां	२॥॥
२	मोक्षमार्गप्रकाश-पं० टोडरमलजीकृत	१॥॥
३	सप्तव्यसनचरित्र-हिंदीवचनिका	॥=)
४	बनारसीविलास-बनारसीदासजीके विस्तृत जीवनचरित्रसहित	१॥)
५	प्रवचनसारपरमागम-कविवर वृंदावनजीकृत अध्यात्मका ग्रन्थ	१)
६	वृंदावनविलास-वृंदावनजीकी समस्त कविताका संग्रह	॥)
७	क्षत्रचूड़ामणिकाव्य-हिन्दी भाषानुवादसहित	॥)
८	भाषापूजासंग्रह-	॥)
९	मनोरमा उपन्यास-बाबू जैनेन्द्रकिशोरजीकृत	॥)
१०	ज्ञानसूर्योदयनाटक-श्रीनाथूरामप्रेमीकृत	॥)
११	तत्त्वार्थसूत्र-बालबोधिनी भाषाटीकासहित	॥)
१२	जैनपदसंग्रह प्रथमभाग-दौलतरामजीकृत, बड़ा अक्षर	।=)
१३	जैनपदसंग्रह दूसरा भाग-भागचंदजीकृत,	।)
१४	जैनपदसंग्रह तीसरा भाग-भूधरदासजीकृत भजन	।)
१५	जैनपदसंग्रह चौथा भाग-द्यानतरायजीकृत भजन	॥=)
१६	जैनपदसंग्रह पांचवाँ भाग-बुधजनजीकृत	।=)
१७	उपमितिभवप्रपंचकथा-पहलाभाग	॥)
१८	उपमितिभवप्रपंचकथा-दूसरा भाग	।)
१९	चर्चाशतक-सरल भाषाटीकासहित	॥)
२०	न्यायदीपिका-सरल भाषाटीकासहित...	॥)
२१	धर्मप्रश्नोत्तर-प्रश्नोत्तर रूपमें धर्मके सब विषयोंका वर्णन है...	२)

२२ नागकुमारचरित-	१२)
२३ यशोधरचरित-	१३)
२४ यात्रादर्पण-यात्रियोंके बड़े ही सुभीतेका है	२)
२५ भाषानित्यपाठसंग्रह-रेशमी जिल्द ॥१॥, साधा	१२)
२६ प्रतिभा उपन्यास-नाथूराम प्रेमीकृत	११)
२७ सूक्तिमुक्तावली-मूल भाषाकविता और टीका	१२)
२८ सज्जनचित्तवल्लभ-मूल, कविता और भा. टी. सहित	२)
२९ परमार्थजकड़ीसंग्रह-१५ जकड़ियोंका संग्रह	२)
३० विनतीसंग्रह-२४ विनतियोंका संग्रह	३)
३१ नित्यनियमपूजा-संस्कृत और भाषा	१)
३२ भक्तामरस्तोत्र-अन्वय अर्थ भावार्थ और हिन्दी कवितासहित	१)
३३ जैनबालबोधक प्रथमभाग-	१)
३४ शीलकथा-भारामल्लजीकृत १) दर्शनकथा	३)
३५ श्रुतावतारकथा-श्रुतस्कंधविधानादिसहित	३)
३६ अरहंतपासाकेवली-पाँसा डालकर शुभ अशुभ जाननेकी रीति	१॥
३७ भक्तामर-हेमराजजीकृत भाषा और मूल संस्कृत	१)
३८ पञ्चमंगल-अभिषेकपाठ और पंचामृताभिषेकपाठसहित	१)
३९ मृत्युमहोत्सव-और समाधिमरण	२)
४० धूर्ताख्यान-पुराणोंकी पोलें	३)
४१ प्राणप्रियकाव्य-भा. टी. सहित	२)
४२ जैनविवाहपद्धति-	३)
४३ क्रियामंजरी-श्रावकोंकी प्रतिदिनकी क्रिया	२)

पता—मैनेजर, जैनग्रन्थरत्नाकर कार्यालय
हीराबाग पो० गिरगांव, बम्बई।



दि. जै. मुनिधर्मसागर ग्रंथ
भांडार अकालम, न.

श्रीवीतरागाय नमः ।

स्व० कविवर द्यानतरायजी विरचित ।

धर्मविलास ।

(द्यानतविलास ।)

मंगलाचरण ।

छप्पय ।

बन्दौं आदि जिनेस, पापतमहरन दिनेस्वर ।
बन्दत हौं प्रभु चंद, चंद दुख तपन हनेस्वर ॥
सांतिनाथ बंदामि, मेघसम सान्तिप्रकासक ।
नमौं नमौं महावीर, वीर भौ-पीर-विनासक ॥
चौवीसौं जिनराजका, धर्म जगतमैं विस्तरौं ।
सुभ ज्ञान भगति वैरागमय, धर्म विलास प्रगट करौ ॥१॥

उपदेशशतक ।

तीर्थकरस्तुति, छप्पय ।

गुण अनंतकरि सहित, रहित दस आठ दोषकर ।
विमल जोति परगास, भास निज आन विषैहर ॥
सकल सुरासुरवृंदवंध, नर इंद्र चंद्र गन ।
राग द्वेष मद मोह क्रोध, छल लोभ सकल हन ॥

महिमा अनंत भगवंत प्रभु,
जगत जीव असरन सरन ।
कर जोरि भविक बंदत चरन,
तारि तारि तारन तरन ॥ १ ॥

सहित अनंत चतुष्ट, नष्ट हुव चारि घाति जब ।
कहत वेद मुख चारि, चारि मुख लखत जगत सब ॥
दहिय चौकरी चारि, चारि संज्ञा बल चुकौ ।
चारि प्राण संजुगत, चारिगति गमन विमुकौ ॥
चहुसंघसरन बंधन हरन, अजर अमर सिवपदकरन ।
कर जोरि भविक बंदत चरन, तारि तारि तारन तरन ॥२॥

सवैया इकतीसा (मनहर) ।

धर्मको बखानत है कर्मनिको भानत है,
लोकालोक जानत है ज्ञानको प्रकासकै ।
ममता तजै खिरी है वानी जो अनच्छरी है,
सुधारूप है झरी है इच्छाविना जासकै ॥
सिंघासन सोहत है सक्र मन मोहत है,
तीनि छत्र चाँसठि चमर ठरै तासकै ।
आनंदकौ कारक है भव्यनकौ तारक है,
ऐसौ अरंहंत देव बंदौ मद नासकै ॥ ३ ॥

रागभाव टाख्यौ तातैं परिगह गहै नाहिं,
दोषभाव जाख्यौ तातैं आयुध न पेखिये ।

१ आहार, भय, मैथुन, परिग्रह । २ काय, श्वासोच्छ्वास, भाषा, आयु ।
३ नष्ट करता है । ४ शस्त्र हथियार ।

मोहभाव माखौ तातैं गहलता दूरि भई,
 अंतराय नासतैं अनंत बल पेखिये ॥
 ज्ञानावरनी विनासि केवल प्रकास भयौ,
 दर्शनावरनी गएँ लोकालोक देखिये ।
 ऐसे महाराज जिनराज हैं जिहाज सम,
 तिनकौ सरूप लखि आपकौं विसेखिये ॥ ४ ॥
 जान्यौ जिनदेव जिन और देव त्याग कीयौ,
 कीयौ सिववास जगवास उदवासकै ।
 पूज्यौ जिनराज सो तौ पूजनीक जिन भयौ,
 पायौ निज थान सब करम विनासकै ॥
 ध्यायौ वीतराग तिन पायौ वीतराग पद,
 भयौ है अडोल फेरि भववन नासकै ।
 जिनकी दुहाई जिन गहौ और देव कोऊ,
 जातैं लहै मोक्ष कभी जगमैं न आ सकै ॥ ५ ॥

सवैया तेईसा (मत्तगयन्द) ।

जो जिनराज भजै तजि राज, वहै शिवराज लहै पलमाहीं ।
 जो जिननाथ करै भवि साथ, सु होत अनाथ सबै गुण पाहीं ॥
 जो जिन ईस नमैं निज सीस, वहै जगदीस तजै परछाई ।
 जो जिनदेव करै नित सेव, लहै शिव एव महा सुखदाई ॥ ६ ॥

छंद मल्लिकमाला ।

देखि भव्य वीतराग कीन घातिकर्म त्याग,
 तास रूप पेखि भाग लज्ज कामरूप ।

— १ छोड़कर । — २ निश्चल । — ३ मत गहो । — ४ अनाथ अर्थात् जिसका कोई
 नाथ न हो, स्वयं सबका नाथ । — ५ पराई अर्थात् पुद्गलकी छायाको छोड़ देता
 है, उससे रहित हो जाता है । अथवा छायारहित (केवली) हो जाता है ।

आठ वर्ष घाटि जोय कोटि पुब्ब आयु होय,

लेत ना अहार सोय जोर है अनूप ॥

इंद औ फनिंद चंद जच्छ औ नरिंद विंद,

तीन काल तास वंदि होत मोखभूप ।

सर्वज्ञेयको प्रमान तुच्छ कालमाहि जान

ताहि वेदिये सुजान छांड़ि दौरघूप ॥ ७ ॥

करखा छन्द ।

सर्व तिहुँ लोक सु अलोक तिहुँकालके,

सहित परजाय निज ज्ञानमाहीं ।

देखियौ जास परतच्छ जिमि करतलै,

तीन हू रेख आंगुरी पाहीं ॥

जासकै राग औ द्वेष भय चपलता,

लोभ जम जरा गद आदि नाही ।

सो महादेव मैं नमौ मन वचन तन,

दीजियै नाथ मुझ मोक्ष ठाहीं ॥ ८ ॥

कुंडलिया ।

बीते जाके घातिया, राग दोष भ्रम नास ।

सुरपति सत वंदत चरन, केवलज्ञान प्रकास ॥

केवलज्ञान प्रकास, भास केवलसुख जाकै ।

दरसन जास अपार, सार बल प्रगथ्यौ ताकै ॥

गुण अनंत धनरास, आस त्रासा भय जीते ।

ताकौ वंदौ सदा, घातिया जाके बीते ॥ ९ ॥

१ यह छन्द अकलंकाष्टकके "त्रैलोक्यं सकलं त्रिकालविषयं" आदि श्लोकका भावानुवाद है ।

छप्पय ।

भरम हरिय मन मरिय, जरिय मद दरिय मदनबल ।
 सकलि फुरिय अघ दुरिय, तुरिय गज तजिय सुरथ दल ॥
 परम लखिय पर नसिय, चखिय निजरस रस विरचिय ।
 धरम वसिय दुख नसिय, खसिय गद जनम मरण तिये ॥

वसु करम दलन भय भय हरन,
 त्रिभुवनपतिनुत तुम चरन ।
 तुम अभय अखय निरमल अचल,
 जय जिनवर असरन सरन ॥ १० ॥

जै जै स्वामी आदिनाथ, मैं तेरा बंदा ।
 जै जै स्वामी आदिनाथ, काटौ भव फंदा ॥
 जै जै स्वामी आदिनाथ, देवोंके देवा ।
 जै जै स्वामी आदिनाथ, मैं कीनी सेवा ॥
 तू जै जै स्वामी आदिजी, मेरी सेवा जानही ।
 तातैं मोपै कीजै कृपा, वासा दीजै पास ही ॥ ११ ॥

करखा ।

करम-धनहर पवन, परम निजसुखभवन,
 भरमतम रवि मदन, तपत-चंदा ।
 कोपगिरि वज्रधर, मान गज हरन हँर,
 कपट वन हर दहन लोभ मंदा ॥

१ स्फुरायमान हुई । २ भाग गये । ३ तुरग-घोड़ा । ४ खिसक गये,
 दूर हो गये । ५ तीन अर्थात् रोग-जन्म और मरण । ६ वादल । ७ घर ।
 ८ कामदेवरूपी तापको शमन करनेके लिये चन्द्रमाके समान शीतल । ९ इन्द्र ।
 १० सिंह । ११ आग ।

(६)

करन अहि मंत्र वर, मरण रिपु हनन सैर,
पतित उद्धरण जिन नाभिनंदा ।

सकल दुख दहन घन, दिपत जस कनक तन
सरव सुर असुर नर चरन वंदा ॥ १२ ॥

दर्शनस्तुति; छप्पय ।

तुव जिनिंद दिट्टियौ, आज पातक सब भजे ।

तुव जिनिंद दिट्टियौ, आज वैरी सब लजे ॥

तुव जिनिंद दिट्टियौ, आज मैं सरवस पायौ ।

तुव जिनिंद दिट्टियौ, आज चिंतामणि आयौ ॥

जै जै जिनिंद त्रिभुवन तिलक,

आज काज मेरो सखौ ।

कर जोरि भविक विनती करत,

आज सकल भवदुख टखौ ॥ १३ ॥

तुव जिनिंद मम देव, सेव मैं तुमरी करिहौ ।

तुव जिनिंद मम देव, नाम तुम हिरदै धरिहौ ॥

तुव जिनिंद मम देव, तुही साहिव मैं वंदा ।

तुव जिनिंद मम देव, मही कुमुदनि तुव चंदा ॥

जै जै जिनिंद भवि कमल रवि, मेरो दुःख निवारिकै ।

लीजै निकाल भव जालतै, अपनो भक्त विचारिकै ॥ १४ ॥

अष्टद्रव्य चढ़ानेका फल, सवैया इकतीसा ।

नीरके चढ़ायैं भवनीर-तीर पावै जीव,

चंदन चढ़ायैं चंद सेवैं दिन रात है ।

अक्षतसौं पूजतै न पूजै अक्ष सुख जाको,
 फूलनिसौं पूजै फूलजातिमें न जात है ॥
 दीजै नइवेद तातै लीजै निरवेद पद,
 दीपक चढ़ायै ज्ञानदीपक विख्यात है ।
 धूप खेये सेती भ्रम दौर धूप खइ जाय,
 फलसेती मोक्ष फल अर्घ अघ घात है ॥ १५ ॥

वर्तमान चौबीसीके नाम, कवित्त (३१ मात्रा) ।

ऋषभ अजित संभव अभिनंदन, सुमति पद्म सुपास प्रभु चंद ।
 पुहपदंत शीतल श्रेयांस प्रभु, वासपूज्य प्रभु विमल सुछंद ॥
 स्वामि अनंत धर्म प्रभु शांति सु, कुंथु अरह जिन मल्लि अनंद ।
 मुनिसुव्रत नमि नेमि पास, वीरेश सकल बंदौं सुखकंद ॥ १६ ॥

सिद्धस्तुति, सवैया इकतीसा ।

ज्ञान भावके विलासी छैदी जिनों भवफाँसी,
 कर्म शत्रुके विनासी त्रासी दुःख दोषके ।
 चेतन दरवभासी अचल सुधामवासी,
 जिनकै है निधि खासी पोषे सुधा चोषके ॥
 मन वच काय नासी सिद्ध खेतके निवासी,
 ऐसे सिद्ध सुखरासी ज्ञाता ज्ञेयकोषके ।
 भव्य जगतै उदासी हैकै मनमें हुलासी,
 तीन काल तिन्हें ध्यासी वासी सुख मोषके ॥ १८ ॥

साधुस्तुति, कुंडलिया ।

पंच महाव्रत जे धरै, पंच समिति प्रतिपाल ।
 पाँचौं इंद्रि वसि करै, पडावसिक गहि चाल ।

१ अचल मोक्ष स्थान । २ जीवादि पदार्थ समूहके । ३ ध्यान करेगा ।

पडावसिक गहि चाल, टाल मंजन कच लुंचे ।
 एक बार ठाड़े अहार, लघु अंवर मुंचे ॥ १७ ॥
 भूमिसैन दंतवन त्याग, निजभावविषै रत ।
 ते बंदौ मुनिराज, धरै जे पंच महाव्रत ॥ १९ ॥

सर्वगुलस्तुति, सुवैया इकतीसा (सर्व गुरु एक लघु) ।

काहसौं ना बोलै, बैना जो बोलै तौ साता दैना,
 देखै नाहीं नैनासेती रागी दोषी होइकै ।
 आसा दासी जानै पाखै माया मिथ्या दूर नाखै,
 राधा हीयेमाहीं राखै सूधी दृष्टी जोइकै ॥
 इंद्रौ कोई दौरै नाहीं आपा जानै आपामाहीं,
 तेई पावै मोख ठाहीं कर्म मैले धोइकै ।
 ऐसे साधू बंदौ प्रानी हीया वाचा काया ठानी,
 जातै कीजै आपा ज्ञानी भर्मै बुद्धी खोइकै ॥ २० ॥

करखा (सर्व लघु, एक गुरु) ।

नगन नैगपर रहत, मैदन मद नहिं गहत,
 मैमत मत नहिं लहत, दहत आसा ।
 कैरनसुख घटत जस, मरन भय हटत तस,
 सरन बुध छुटत पुनि, मद विनासा ॥
 अमल पद लखत जब, समल पद नखत अत्र,
 परम रस चखत तब, मन निरासा ।
 नमत मन वचन तन, सकल भव भय हरन,
 अज अमर पद करन, शिव निवासा ॥ २१ ॥

१ सुमतिरूपी स्त्रीको । २ पर्वतपर । ३ कामदेव । ४ यह मेरा है, इस प्रकार ममत्वबुद्धि । ५ इन्द्रियसुख ।

पंचपरमेशीको नमस्कार, छप्पय ।

प्रथम नमूं अरहंत, जाहि इंद्रादिक ध्यावत ।
 वंदूं सिद्ध महंत, जासु सुमिरत सुख पावत ॥
 आचारज बंदामि, सकल श्रुत ज्ञान प्रकासत ।
 बंदत हों उबझाय, जास बंदत अघ नासत ॥
 जे साधु सकल नरलोकमें, नमत तास संकट हरन ।
 यह परम मंत्र नित प्रति जपौ, विघन उलटि मंगल करन ॥

सबुद्धिकृतजिनस्तुति, करखा ।

राग रंगति नहीं दोष संगति नहीं,

मोह व्यापै न निजकला जागी ।

धातिया खै गयी, ज्ञान परगट भयी,

ज्ञेयकों जानि परदर्व त्यागी ॥

सकल औगुण गये, सकल गुणनिधि भये,

सकल तन जस सुकुल रीति पागी ।

कृपा करि कंतकों मोख पद दीजिये,

कहत है सबुधि जिनपाय लागी ॥ २३ ॥

करखा छंद ।

कहत है सबुद्धि जिननाथ बिनती सुनो,

कंत तौ मूढ समुझै न क्यों ही

घोर संसारके हेत जे विषय हैं,

तिन्हें भोगत चहै सुक्ख स्यौ ही ॥

जाइगौ नर्क तब विषय फल जानसी,

तहां पिछतात सिर धुनै यौ ही ।

देह उपदेश अब रहै जु सुहागमुझ,
छांड़ि जग चलै शिव ओर ल्यौ ही ॥ २४ ॥
कहाँ इस भाँति सुनि चिदानंद वावरे,
कौन विधि नारि पर हियै पैठी ।

कुजसकी खानि दुख दोषकी बहिनि है,
तुमै दुख देति जो महाहेठी ॥

छांड़ि वह संग तुम परम सुख भोगवो,
सुमतिके संग निज हिये वैठी ।

छांड़ि जगवास शिववास पलमै लहौ,
परत हौं पाय कहुं जीव ऐठी ॥ २५ ॥

व्यवहार हितोपदेश वर्णन, सबैया तेईसा (मत्तगयन्द) ।

चेतनजी तुम चेतत क्यों नहिं, आव घटै जिम अंजुलिपानी ।
सोचत सोचत जात सबै दिन, सोवत सोवत रैनि विहानी ॥
“हारि जुवारि चले कर झारि,” यहै कहनावत होत अज्ञानी ।
छांड़ि सबै विषयासुखस्वाद, गहौ जिनधर्म सदा सुखदानी २६
पुन्य उदै गज वाजि महारथ, पाइक दौरत है अगवानी ।
कोमल अंग सरूप मनोहर, सुंदर नारि तहां रति मानी ॥
दुर्गति जात चलै नहिं संग, चलै पुनि संग जु पाप निदानी ।
यौं मनमाहिं विचारि सुजान, गहौ जिनधर्म सदा सुखदानी ॥
मानुष भौ लहिकै तुम जो न, कखौ कछु तौ परलोक करौगे ।
जो करनी भवकी हरनी, सुखकी धरनी इस माहिं वरौगे ॥
सोचत हौ अब वृद्धि लहै, तब सोचत सोचत काठ जरौगे ।
फेरि न दाव चली यह आव, गहौ निज भाव सु आप तरौगे २८

आव घटे छिन ही छिन चेतन, लागि रह्यौ विपयारसहीको ।
फेरि नहीं नर आव तुमैं, जिम छांडत अंध बटेर गहीको ॥
आगि लगैं निकसैं सोई लाभ, यही लखिकैं गहु धर्म सहीको ।
आव चली यह जात सुजान, "गई सुगई अव राखिरहीको"
कुंडलिया ।

यह संसार असार है, कदली वृक्ष समान ।
यामैं सारपनो लखै, सो मूरख परधान ॥
सो मूरख परधान, मानि कुसुमनि नैभ देखै ।
सलिल मथै घृत चहै, शृंग सुंदर खर पेखै ॥
अगनिमाहिं हिमैं लखै, सर्पमुखमाहिं सुधा चह ।
जान जान मनमाहिं, नाहिं संसार सार यह ॥ ३० ॥

कवित्त (३१ मात्रा) ।

तात मात सुत नारि सहोदर, इन्हैं आदि सब ही परिवार ।
इनमैं वास सराय सरीखो, 'नदी नाव संजोग' विचार ॥
यह कुटुंब स्वारथकौ साथी, स्वारथ विना करत है खवार ।
तातैं ममता छांडि सुजान, गहौ जिनधर्म सदा सुखकार ३१
चेतनजी तुम जोरत हो धन, सो धन चलै नहीं तुम लार ।
जाकौ आप जानि पोषत हो, सो तन जरिकैं है हे छार ॥
विषै भोगिकैं सुख मानत हो, ताकौ फल है दुःख अपार ।
यह संसार वृक्ष सेमरकौ, मानि कह्यौ मै कहुं पुकार ॥ ३२ ॥

सवैया इकतीसा ।

सीस नाहिं नभ्यौ जैन कान न सुन्यौ सुवैन,
देखे नाहिं साधु नैन ताकौ नेह भान रे ।

१ पकड़ी हुई बटेरको । २ आकाशके कुसुम अर्थात् फूलोंको । ३ गधेके सींग । ४ ठंडापन । ५ सेमरका वृक्ष जिसका फूल तो सुहावना होता है, पर फलमें निस्सार धुआ निकलता है । ६ त्याग दे ।

बोल्थौ नाहिं भगवान करतैं न दयौ दान,
उरमें न दया आन यौ ही परवान रे ॥
पाप करि पेट भरि पीठि दी न तीय पर,
पाँव नाहिं तीर्थ कर सही सेती(?) जान रे ।
स्याल कहै बार बार अरे सुनि श्वान यार,
इसकौ तू डारि डारि देह निंछखान रे ॥ ३३ ॥

देखो चिदानंद राम ज्ञान दिष्टि खोल करि,
तात मात भ्रात सुत स्वारथ पसारा है ।

तू तौ इन्हें आपा मानि ममता मगन भयौ,
बह्यौ भ्रममाहिं जिनधरम विसारा है ॥

यह तौ कुटुंब सब दुःखहीकौ कारन है,
तजि मुनिराज निजकारज विचारा है ।

तातै गहौ धर्म सार स्वर्गमोक्षसुखकार,
सोई लहै भवपार जिन धर्म धारा है ॥ ३४ ॥

सोचत हौ रैन दिन किहिं विधि आवै धन,
सो तौ धन धर्म विना किनहू न पायौ है ।

यह तौ प्रसिद्ध बात जानत जिहान सब,
धर्मसेती धन होय पापसौ विलायौ है ॥

धर्मके कियेतैं सब दुःखकौ विनास होत,
सुखकौ निवास परंपरा मोख गायौ है ।

तातैं मन वच काय धर्मसौ लगन लाय,
यह तौ उपाय वीतरागजी बतायौ है ॥ ३५ ॥

व्यवसायत्रतुष्क ।

केई सर गावत है केई तौ बजावत है,
 केई तौ बनावत है भांडे मृत्ति सानिके ।
 केई खाक फटके है केई खाक गटके है,
 केई खाक लपटे है केई स्वांग आनिके ॥
 केई हाट बैठत है अंबुधिमें पैठत है,
 केई कान ऐठत है आप चूक जानिके ।
 एक सर नाज काज अपनी सरूप त्याज,
 डोलत है लाज काज धर्म काज हानिके ॥ ३६ ॥
 शिष्यको पढ़ावत है देहको बढ़ावत है,
 हेमको गढ़ावत है नाना छल ठानिके ।
 कौड़ी कौड़ी मांगत है कायर है भागत है,
 प्रात उठि जागत है स्वारथ पिछानिके ॥
 कागदको लेखत है केई नख पेखत है,
 केई कृषि देखत है अपनी प्रवानिके ।
 एक सर नाज काज अपनी सरूप त्याज,
 डोलत है लाज काज धर्म काज हानिके ॥ ३७ ॥
 केई नटकला खेलै केई पटकला वेलै,
 केई घटकला झेलै आप वैद मानिके ।
 केई नाच नाचि आवै केई चित्रको बनावै,
 केई देश देश धावै दीनता बखानिके ॥
 मूरखको पास चहै नीचनकी सेवा चहै,
 चोरनके संग रहै लोक लाज मानिके ।

एक सेर नाज काज अपनो सरूप त्याज,
डोलत हैं लाज काज धर्म काज हानिके ॥ ३८ ॥
केई सीसको कटावें केई सीस बोझ लावें,
केई भूपद्वार जावें चाकरी निदानकै ।
केई हरी तोरत हैं पाहनको फोरत हैं,
केई अंग जोरत हैं हुंनर विनांनकै ।
केई जीव घात करैं केई छंदकों उचरैं,
नानाविधि पेट भरैं इन्हें आदि ठानकै ।

एक सेर नाज काज अपनो सरूप त्याज,
डोलत हैं लाज काज धर्म काज हानिके ॥ ३९ ॥

गृहदुःखचतुष्क ।

रुजगार बनै नाहिं धन तौ न घरमाहिं,
खानेकी फिकर बहु नारि चाहै गहना ।
दौनेवाले फिरि जाहिं मिलै तौ उधार नाहिं,
साझी मिलैं चोर धन आवै नाहिं लहना ॥
कोऊ पूत ज्वारी भयौ घरमाहिं सुत थयौ,
एक पूत मरि गयौ ताकौ दुःख सहना ।
पुत्री वर जोग भई व्याही सुता जम लई,
एते दुःख सुख जानै तिसै कहा कहना ॥ ४० ॥
देहमाहिं रोग आयौ चाहिजै जिया भरायौ,
फाटि गये अंबर चरणदासी हैं नही ।
नारी मन जार भायौ तासौं चित्त अति लायौ,
यह तौ निबल वह देत दुःख अतिही ॥

गृहमाहिं चोर परं आगी लगै सब जरै,
 राजा लेहि लूट बांधै मारै सीस पनही ।
 इष्टकौ वियोग औ अनिष्टकौ संजोग होइ,
 एते दुःख सुख मानै सो तौ मूढमति ही ॥ ४१ ॥
 जेठमास धूप परै प्यास लगै देह जरै,
 कहीं सुनी शादी गमी तहां जायौ चाहिये ।
 वर्षामें चुचात भौन लकरी निवरि गई,
 ताकौं चलाई लैन पाँव डिगौ दुःख लहिये ॥
 शीतके सहायमाहिं अंबर नवीन नाहिं,
 भूख लगै प्रात मिलै नाहिं कष्ट सहिये ।
 जे जे दुःख गृहमाहिं कहाँलौं वखाने जाहिं,
 तिन्हें सुख जानै सो तौ महामूढ कहिये ॥ ४२ ॥
 तिनकौ पुरानो घर कौड़ी सौ न धान जामैं,
 मूसे बिल्ली सांप वीट्ट न्योले जु रहत हैं ।
 भाजन तौ मृत्तिकाके फूटे खाली धान नाहिं,
 टूटी जो खरैरी खाट मलिकौ लहत हैं ॥
 कुटिल कुरूप नारी कानी काली कलहारी,
 कर्कश वचन बोलै औगुन महत है ।
 हाहा मोहकर्मकी विटवना कही न जाइ,
 ऐसौ गृह पाय मूढ त्यागौ ना चहत है ॥ ४३ ॥
 जिंदगी सँहलपै नाहक धरम खोवै,
 जाहिर जहान दीखै ख्वाबका तमासा है ।

कंचीलेके खातिर तू काम बढ करता है,
अपना मुँलक छोड़ि हाथ लिया कांसा है ॥
कौड़ी कौड़ी जोरि जोरि लाख कोरि जोरता है,
कालकी कुँमक आएँ चलना न मासा है ।
सोंइत न फँरामोश हूजिये गुसईयाको,
यही तौ सुखन खूब ये ही काम खासा है ॥ ४४ ॥

कवित्त (३१ मात्रा) ।

हर छिन नाव लेइ साईका, दिलका कुँफर सवै करि दूर ।
पाक वेऐव हमेश भिस्त दे, दोजक-फंद करै चकचूर ॥
हँमां सुमां जहान सब वूझै, नाहीं वूझै वंदै ते कूर ।
वेचि मूल वेचमन साहिव, चँसमों अंदर खड़ा हुजूर ॥ ४५ ॥

जीवके वैरी वर्णन, सर्वैया इफतीसा ।

सफरस फास चाहै रसना हू रस चाहै,
नासिका सुवास चाहै नैन चाहै रूपकों ।
श्रवन शबद चाहै काया तौ प्रमाद चाहै,
वचन कथन चाहै मन दौर धूपकों ॥
क्रोध क्रोध कखौ चाहै मान मान गह्यौ चाहै,
माया तौ कपट चाहै लोभ लोभ कूपकों ।
परिवार धन चाहै आशा विपै-सुख चाहै,
एते वैरी चाहै नाहीं सुख जीव भूपकों ॥ ४६ ॥

वैरी दूर करनेका उपाय ।

जीव जो पै स्थाना होय पांचौं इंद्रि वसि करै,
फास रस गंध रूप सुर राग हरिकै ।

१ परिवार । २ अपना राज्य । ३ भिक्षाका पात्र । ४ चढ़ाई । ५ क्षण-
भर भी । ६ भूल जाना । ७ मलिनता । ८ मोक्ष । ९ नरकका जंजाल । १० हम
तुम सब । ११ आखोंके ।

(१७)

आसन वतावै काय वचकों सिखावै मौन,
ध्यानमाहिं मन लावै चंचलता गरिकै ॥
क्षमा करि क्रोध मारै विनै धरि मान गारै,
सरलसों छल जाँरै लोभदसा टरिकै ।
परिवार नेह त्यागै विपै-सैन छाँड़ि जागै,
तव जीव सुखी होय वैरी वस करिकै ॥ ४७ ॥

नरकनिगोददुःख कथन ।

वसत अनंतकाल वीतत निगोदमाहिं,
अखर अनंत भाग ग्यान अनुसरै है ।
छासठि सहस तीनसै छतीस बार जीव,
अंतर मुहरतमें जन्मै और मरै है ॥
अंगुल असंखभाग तहां तन धारत है,
तहांसेती क्यौं ही क्यौं ही क्यौं ही कै निसरै है ।
इहां आय भूलि गयौं लागि विपै भोगनिमें,
ऐसी गति पाय कहा ऐसे काम करै है ॥ ४८ ॥

निगोदके छतीस कारण ।

मन वच काय जोग जाति रूप लाभ तप,
कुल बल विद्या अधिकार मद करना ।
फरस रसन घान नैन कान मगनता,
भूपति असन नारि चोरका उचरना ॥

१ संख्या प्रमाण; श्रुतज्ञानके अक्षरोंका भाग श्रुतकेवलीके ज्ञानमें देनेपर जो लक्ष्य अर्थात्, उसको अक्षर कहते हैं। उसमें अनन्तका भाग दिया जाय फिर जो लक्ष्य अर्थात्, उसका एक भाग सूक्ष्म निगोद लक्ष्यपर्याप्तकका ज्ञान होता है। २ राजकथा, भोजनकथा, स्त्रीकथा और चोरकथाका कहना ।
ध. वि. २

(१८)

जूवा मांस मद दांरी आखेट चोरी पर,-
नारी विसन क्रोध मान माया लोभ धरना ।
एकांत विनय विपरीत संसय अग्यान,
एई भाव त्यागिकै निगोद पंथ हरना ॥ ४९ ॥

नरकदुःख ।

सीत नर्कमाहिं परै मेरुसम उख गोला,
उख नर्क सीत गोला बीचमें विलायौ है ।
छेदनता भेदनता काटनता मारनता,
चीरनता पीरनता नाना भाँति तायौ है ॥
रोग छयानवै विख्यात एक एक अंगुलमें,
परनारी भोगी आगि-पूतली जलायौ है ।
सागरोंकी धिति पूरी करी तैं अनंती बार,
अजहं न समझै है तोहि कहा भायौ है ॥ ५० ॥
भूख तौ विसैस जो असेस अन्न खाइ जाइ,
मिलै नाहिं एक कन एतौ दुःख पायौ है ।
तृषा तौ अपार सब अंबुधिकौ नीर पीवै,
पावै नाहिं एक वूँद एतौ कष्ट गायौ है ॥
आँखकी पलक मान साता तौ तहां न जाइ,
क्रोधभाव भूरि वैर उद्धत बतायौ है ।
सागरोंकी धिति पूरी करी तैं अनंती बार,
अजहं न समझै है तोहि कहा भायौ है ॥ ५१ ॥

पुण्यपाप कथन, छप्पय ।

कबहुं चढ़त गजराज, बोझ कबहुं सिर भारी ।
कबहुं होत धनवंत, कबहुं जिम होत भिखारी ॥

कवहुं असन लहि सरस, कवहुं नीरस नहिं पावत ।
 कवहुं वसन सुभ सघन, कवहुं तन नगन दिखावत ॥
 कवहुं सुछंद वंधन कवहुं, करमचाल बहु लेखिये ।
 यह पुन्यपाप फल प्रगट जग, राग दोष तजि देखिये ॥५२॥
 कवहुं रूप अति सुभग, कवहुं दुर्भग दुखकारी ।
 कवहुं सुजस जस प्रगट, कवहुं अपजस अधिकारी ॥
 कवहुं अरोग सरीर, कवहुं बहु रोग सतावत ।
 कवहुं वचन हित मधुर, कवहुं कछु वात न आवत ॥
 कवहुं प्रवीन कवहुं मुंगध, विविधरूप जन पेखिये ।
 यह पुन्यपापफल प्रगट जग, राग दोष तजि देखिये ॥५३॥

मिथ्यादृष्टि कथन, सबैया इकतीसा ।

नारीरस राचत है आठों मद माचत है,
 रीझि रीझि नाचत है मोहकी मगनमें ।
 ग्रंथनकों वांचत है विपैकों न वांचत है,
 आपनपो वांचत है भ्रमकी पगनमें ॥
 स्वारथकों जांचत है स्वारथ न जांचत है,
 पाप भूरि सांचत है कामकी जगनमें ।
 पोषत है पांचनकों सहै नर्क आंचनकों,
 ऐसी करतूति करै लोभकी लगनमें ॥ ५४ ॥
 ग्रंथनके पढ़े कहा पर्वतके चढ़े कहा,
 कोटि लच्छि वढ़े कहा कहा रंकपनमें ।

१ स्वच्छन्द, स्वतंत्र । २ मुग्ध, मूर्ख । ३ विषयोंको नहीं छोड़ता है
 ४ आत्मत्वसे वंचित होता है । ५ अपने मतलबके लिये याचना करता है
 ६ आत्महित । ७ संचित करता है । ८ पांचों इंद्रियोंको ।

संजम आचरें कहा मौनव्रत धरें कहा,
तपस्याके करें कहा कहा फिरें वनमें ॥
छंद करें नये कहा जोगासन भये कहा,
दानहूके दये कहा बैठें साधुजनमें ।
जौलौं ममता न छूटै मिथ्याडोरी हू न दूटै,
ब्रह्मज्ञान विना लीन लोभकी लगनमें ॥ ५५ ॥

सवेया तेईसा ।

मौन रहैं वनवास गहैं, वर काम दहैं जु सहैं दुख भारी ।
पाप हरैं सुभरीति करैं, जिनवैन धरैं हिरदे सुखकारी ॥
देह तपैं बहु जाप जपैं, न वि आप जपैं ममता विसतारी ।
ते मुनि मूढ़ करैं जगरूढ़, लहैं निजगेहन चेतनधारी ॥ ५६ ॥

गुरु शिष्यके प्रश्नोत्तर ।

सोचत जात सवै दिनरात, कछु न वसात कहा करिये जी ।
सोच निवार निजातम धारहु, राग विरोध सवै हरिये जी ॥
याँ कहिये जु कहा लहिये, सुवहै कहिये करुना धरिये जी ।
पावत मोख मिटावत दोष, सु याँ भवसागरकौ तरिये जी ५७

वीतरागस्तुति, छप्पय ।

वीतरागकौ धर्म, सर्व जीवनकौ तारन ।
वीतरागकौ धर्म, कर्मकौ करै निवारन ॥
वीतरागकौ धर्म, प्रगट क्रोधादिक नासै ।
वीतरागकौ धर्म, ग्यान केवल परगासै ॥
जय वीतरागकौ धर्म यह, राग दोष जामैं नही ।
संसार परत इस जीवकौ, धर्म सरन जिनवर कही ५८

धर्मका मकरव, सर्वथा दृक्तीया ।

चिंतामनि पोरसा (?) रसायन कलपवृच्छ,
कामधेनु चिंतावेलि पारस प्रमान रे ।
इन्हें आदि उत्तम पदारथ हैं जगतमें,
मिलें एक भय सुख देत परधान रे ॥
परभौ गमन किये चलत न संग कोऊ,
विना पुन्य उदै एऊ मिलत न आन रे ।
धर्मसौं अनेक सुख पावै भव भव जीव,
तातैं गहौ धर्म परंपरा निरवान रे ॥ ५९ ॥

मिथ्यादृष्टिवर्णन ।

असिधारी देव मानैं लोभी गुरु चित्त आनैं,
हिंसामैं धरम जानैं दूरि सो धरमसौं ।
माटी जल आगि पौन वृच्छ पशु पंखी जौन,
इन्हें आदि सेवै कैसें छूटै ते करमसौं ॥
रोम चाम हाड़ विष्टा आदि जे अपावन हैं,
तिन्हें सुचि मानैं आंखि मूंदी है भरमसौं ।
दीरघ संसारी तिन्हें देखि संत चुप्पु धारी,
सवसौं वसाय न वसाय वेसरमसौं ॥ ६० ॥

सम्यग्दृष्टीकी इच्छा, सवैया (मंदिरा) ।

आगमकौ पढ़िवौ जिनबंदन, संगति साधरमीजनकी ।
संजमवंत गुनज्ञ कथा, गहि मौन कथा सठ लोगनकी ॥
सर्वनिसौं हितवैन उचारन, भावन पावन चेतनकी ।
ए प्रगटौ भवभौ मुझ तौ लग, जौलग मोख न कर्मनकी ॥ ६१ ॥

१ पवित्र आत्माकी भावना ।

व्यवहारसम्यक्त्व तथा निश्चयसम्यक्त्व, छप्पय ।

नमों देव अरहंत, अष्टदश दोष रहित हैं ।
बंदों गुरु निरग्रंथ, ग्रंथ ते नाहिं गहत हैं ॥
बंदों करुनाधर्म, पापगिरि दलन वज्र वर ।
बंदों श्रीजिनवचन, स्यादवादांक सुधाकर ॥

सरधान द्रव्य छह तत्त्वकौ, यह सम्यक विवहार मत ।
निहचै विसुद्ध आतम दरव, देव धरम गुरु ग्रंथ नुत ॥६२॥

सोचके छोड़नेका वर्णन, सबैया तेईसा ।

काहेकौ सोच करै मन मूरख, सोच करै कछु हाथ न ऐ है ।
पूरव कर्म सुभासुभ संचित, सो निहचै अपनो रस दै है ॥
ताहि निवारन को बलवंत, तिहूं जगमाहिं न कोइ लसै है ।
तातै हि सोच तजौ समता गहि, ज्यौं सुख होइ जिनंद कहै है ॥

उद्यम वर्णन, सबैया इकतीसा ।

रोजगार विना यार यारसौं न करै प्यार,
रोजगार विना नार नाहर ज्यौं घूरै है ।
रोजगार विना सब गुण तौ विलाय जाय,
एक रोजगार सब औगुनकौं चूरै है ॥
रोजगार विना कछु वात बनि आवै नाहिं,
विना दाम आठौं जाम वैठो धाम झूरै है ।
रोजगार बनै नाहिं रोज रोज गारी खाहिं,
ऐसौ रोजगार एक धर्म कीये पूरै है ॥ ६४ ॥

ज्ञानीचिन्तवन, सबैया तेईसा ।

कर्म सुभासुभ जो उदयागत, आवत हैं जव जानत ज्ञाता ।
पूरव भ्रामक भाव किये बहु, सो फल मोहि भयौ दुखदाता ॥

सो जड़रूप सरूप नहीं मम, मैं निज सुद्ध सुभावहि राता ।
नास करौं पलमें सबकौं अब, जाय वसौं सिवखेत विख्याता ॥
सिद्ध हुए अब होंइ जु होंइगे, ते सब ही अनुभोगुनसेती ।
ताबिन एक न जीव लहै सिव, घोर करौं किरिया बहु केती ॥
ज्यौं तुपमाहिं नहीं कनलाभ, किये नित उद्यमकी विधिजेती ।
यौं लखि आदरिये निजभाव, विभाव विनास कला सुभ एती;

ज्ञानीका बलवर्णन, छप्पत्र ।

धाम तजत धन तजत, तजत गज वर तुरंग रथ ।
नारि तजत नर तजत, तजत भुवपति प्रमादपथ ॥
आप भजत अघ भँजत, भजत सब दोष भयंकर ।
मोह तजत मन तजत, सजत दल कर्म सत्रुपर ॥
अरि चैट्टचट्ट सब कट्टकॅरि, पट्टपट्ट मँहि पँट्ट किय ।
करि अट्ट नँट्ट भँवकट्ट दहि, सट्ट सट्ट सिव सँट्ट लिया ॥६७॥
तजत अंग अरधंग, करत थिर अंग पंग मन ।
लखि अभंग सरवंग, तजत वचननि तरंग मन ॥
जित अनंग थिति सैलसिँग, गहि भावलिंग वर ।
तप तुरंग चढि समर रंग रचि, करम जंग करि ॥
अरि शट्ट शट्ट मद हट्ट करि, सट्ट सट्ट चौपट्ट किय ।
करि अट्ट नट्ट भव कट्ट दहि, सट्ट सट्ट सिव सट्ट लिया ॥६८॥
भरम नष्ट भय नष्ट, कष्ट तन सहत धीर धर ।
वचन मिष्ट गहि रहत, लहत निज धाम पुष्टकर ॥

१ मैं अपने शुद्ध स्वभावमें रक्त हूँ । २ भागते हूँ । ३ चटाचट, चटपट ।
४ काटकरके । ५ पटापट । ६ पृथ्वीपर । ७ पछाड़ दिये । ८ नष्ट ।
९ भवकष्ट । १० पा लिया । ११ शैलश्रंग, पर्वतका शिखर ।

सुद्धदृष्टि लखि दुष्ट, सिष्टकौ हेत विहंडित ।
करम धान करि भिष्ट, भाव उतकिष्ट सुमंडित ॥
सुभ परम मिष्ट समता सुधा, गष्ट गष्ट तिन गष्ट किय ।
करि अष्ट नष्ट भव कष्ट दहि, सष्ट सष्ट सिव सष्ट लिय ॥६९॥
गहत पंच व्रत सार, रहित परपंच करन पन ।
समिति पंच प्रतिपाल, जपत नित इष्ट पंच मन ॥
धरत पंच आचार, पंच विग्यान विचारत ।
लहत पंच सिवहेत, पंच चारित्त चितारत ॥
अरि छष्ट छष्ट परिकष्ट करि, तष्ट तष्ट दहवष्ट किय ।
करि अष्ट नष्ट भवकष्ट दहि, सष्ट सष्ट सिव सष्ट लिय ॥७०॥

मिथ्यात्वादि सिद्धपर्यंत अवस्थाएँ, सवैया इकतीसा ।

मिथ्या भाव भारत हैं सम्यककौ धारत हैं,
अव्रतकौ टारत हैं गारत हैं ममता ।
महाव्रत पारत हैं श्रेणीकौ सँभारत हैं,
वेदभाव जारत हैं लोभ भाव ममता ॥
घातिया निवारत हैं ज्ञानकौ पसारत हैं,
लोकालोककौ निहारें इंद्र आय नमता ।
जोगकौ विडारत हैं मोखकौ विहारत हैं,
ऐसी गति धारें सुख होत अनोपमता ॥ ७१ ॥

सर्वगुस्तुति वर्णन, छंद करखा ।

मोहकौ भानिकै, आपकौ जानिकै,
ज्ञानमै आनिकै, होत गयाता ।

मारकों मारिकै, वामकों टारिकै,
 पापकों डारिकै, पुन्य पाता ॥
 क्रोधकों जारिकै, मानकों गारिकै,
 वंकेकों दारिकै, लोभ हाता ।
 कर्मकों नासिकै, मोखमें वासिकै,
 ताहिकों चित्तमें, भव्य ध्याता ॥ ७२ ॥

उपदेश, सबैया इकतीसा ।

जगतके निवासी जगहीमें रति मानत हैं,
 मोखके निवासी मोखहीमें ठहराये हैं ।
 जगके निवासी काल पाय मोख पावत हैं,
 मोखके निवासी कभी जगमें न आये हैं ॥
 एतौ जगवासी दुखवासी सुखरासी नाहिं,
 वे तो सुखरासी जिनवानीमें वताये हैं ।
 तातें जगवासतें उदास होइ चिदानंद,
 रत्नत्रयपंथ चलें तेई सुखी गाये हैं ॥ ७३ ॥
 याही जगमाहिं चिदानंद आप डोलत है,
 भ्रम भाव धरै हरै आत्मसकतकों ।
 अष्टकर्मरूप जे जे पुद्गलके परिनाम,
 तिनकों सरूप मानि मानत सुमतकों ॥
 जाहीसमै मिथ्या मोह अंधकार नासि गयौ,
 भयौ परगास भान चेतनके ततकों ।
 तहीसमै जानौ आप आप पर पररूप,
 भानि भव-भांवरि निवास मोख गतकों ॥ ७४ ॥

रागदोष मोहभाव जीवकौ सुभावनाहिं,
जीवकौ सुभाव सुद्धचेतन बखानियै ।
दर्व कर्मरूप ते तौ भिन्न ही विराजते हैं,
तिनकौ मिलाप कहो कैसें करि मानियै ॥
ऐसो भेद ज्ञान जाके हिरदै प्रगट भयौ,
अमल अवाधित अखंड परमानियै ।
सोई सु विचच्छन मुक्त भयौ तिहुँकाल,
जानी निज चाल पर चाल भूलि भानियै ॥ ७५ ॥

मूढदशा वर्णन ।

जैसें गजराज कोई पाहनफटिक जोई,
प्रतिविंब लखि सोई दंत दंतसौं अखौ ।
वानर मूठी विसेख पराधीन धरै भेख,
कूपमाहिं सिंह देख सिंह देखके पखौ ॥
कांचभौनमाहिं स्वान सोर करै आप जान,
नलिनीकौ सूवा मान मोहि किन पकखौ ।
तैसें पसु-मोह व्याप परहीकौ कहै आप,
भ्रमसेती आपनपो आपन ही विसखौ ॥ ७६ ॥

जीवकी पूर्वदशा ।

स्वपर न भेद पायौ परहीसौं मन लायौ,
मन न लगायौ निजआतम सरूपसौं ।
रागदोषमाहिं सूतां विभ्रम अनेक गूतां,
भयौ नाहिं बूतां जो निकसौं भवकूपसौं ॥

१ विद्वान् । २ स्फटिक पत्थर । ३ देखकरके । ४ कांचका घर । ५ सोता ।
६ गूथा, उलझा रहा । ७ सामर्थ्य ।

(२७)

अव मिथ्यातम मान प्रगटा प्रबोध-भान,
महा सुखदान आन मोह दौर भ्रूपसां ।
आप आपरूप जान्यां परहीकां पर मान्यां,
आपरस सान्यां टान्यां नेह सिवभ्रूपसां ॥ ७७ ॥

ज्ञानवर्णन ।

सरसां समान सुख नहीं कहें गृहमाहि,
दुःख तौ अपार मन कहाँलौ बताइयै ।
तात मात सुत नारि स्वारथके सगे भ्रात,
देह तौ चलै न साथ और कौन गाइयै ॥
नरभौ सफल कीजै और स्वाद छांड़ि दीजै,
क्रोध मान माया लोभ चित्तमें न लाइयै ।
ज्ञानके प्रकासनकां सिद्धथान वासनकां,
जीमें ऐसी आवै है कि जोगी होइ जाइयै ॥ ७८ ॥

अथोकपुष्पमंजरी छंद ।

रागभाव टारिकै सु दोषकां विडारिकै,
सु मोहभाव गारिकै निहारि चेतनामई ।
कर्मकां प्रहारिकै सु भर्मभाव डारिकै,
सुचर्म दृष्टि दारिकै विचार सुद्धता लई ॥
ज्ञानभाव धारिकै सु दृष्टिकां पसारिकै,
लखौ सरूप तारिकै अपार मुद्धता खई ।
मत्तभाव मारिकै सु मारभाव छारिकै,
सु मोखकां निहारिकै विहारकां विदा दीई ॥

१ ज्ञानसूर्य । २ सुग्धता, अज्ञान ।

भर्मभाव भानिकै सुभावकौं पिछानिकै,
 सुध्यानमाहिं आनिकै सु आन-बुद्धि खै गई ।
 धर्मकौं वखानिकै सुधासुभाव पानिकै,
 सुप्राणभाव जानिकै सुजान चेतनामई ॥
 सुद्धभाव ठानिकै सुवानिकौं प्रवानकै,
 सुरूप सुद्ध मानिकै सु मान सुद्धता नई ।
 अष्टकर्म हानिकै सुदिष्टिकौं प्रधानकै,
 सुग्यानमाहिं आनिकै अग्यानकौं विदा दई ॥८०॥
 चेतना सरूप जीव ज्ञानदृष्टिमें सदीव,
 कुंभ आन आन घीव त्यों सरीरसौं जुदा ।
 तीनलोकमाहिं सार सास्वतो अखंडधार,
 मूरतीककौं निहार नीरकौं बुदैबुदा ॥
 सुद्धरूप बुद्धरूप एकरूप आपभूप,
 आतमा यही अनूप परमजोतिकौं उदा ।
 स्वच्छ आपने प्रमानि रागदोष मोह भानि,
 भव्यजीव ताहि जानि छांड़ि शोक औं मुँदा ॥८१॥
 सुद्ध आतमा निहारि राग दोष मोह टारि,
 क्रोध मान वंक गारि लोभ भाव भानुं रे ।
 पापपुन्यकौं विडारि सुद्धभावकौं सँभारि,
 भर्मभावकौं विसारि परमभाव आनु रे ॥
 चर्मदृष्टि ताहि जारि सुद्धदृष्टिकौं पसारि,
 देहनेहकौं निवारि सेतध्यान ठानु रे ।

१ परबुद्धि । २ सम्यग्दर्शन । ३ बुदबुदा । ४ मोद, हर्ष । ५ नष्टकर ।
 ६ शुकध्यान ।

जागि जागि सैन छार भव्य मोखकों विहार,
एक वारके कहे हजार वार जानु रे ॥ ८२ ॥

छाप्य ।

जीव चेतनासहित, आपगुन परगुन जानै ।
पुगलद्रव्य अचेत, आप पर कछु न पिछानै ॥
जीव अमूरतिवंत, मूरती पुगल कहियै ।
जीव ज्ञानमयभाव, भाव जड़ पुगल लहियै ॥
यह भेद ज्ञान परगट भयौ, जो पर तजि अनुभौ करै ।
सो परम अतिंद्री सुखे सुधा, भुंजत भौसागर तिरै ॥८३॥
यह असुद्ध मैं सुद्ध, देह परमान अखंडित ।
असंख्यातपरदेस, नित्य निरभै मैं पंडित ॥
एक अमूरति निर उपाधि, मेरो छैय नाहीं ।
गुनअनंतज्ञानादि, सर्व ते हैं मुझमाहीं ॥
मैं अतुल अचल चेतन विमल, सुखअनंत मोमैं लसैं ।
जब इस प्रकार भावत निपुन, सिद्धखेत सहजैं वसैं ॥८४॥

सवैया तेईसा ।

केवलग्यानमई परमातम, सिद्धसरूप लसै सिवठाहीं ।
ग्यायकरूप अखंड प्रदेस, लसै जगमैं जग सौ वह नाहीं ॥
चेतन अंके लियै चिनमूरति, ध्यान धरौ तिसकौ निजमाहीं ।
राग विरोध निरोध सदा, जिम होइ वही तजिकै विधि-छाहीं ॥
राग विरोध नहीं उरअंतर, आप निरंतर आतम जानै ।
भोगसँयोगवियोगविषैं, ममता न करै समता परवानै ॥

१ सोना छोड़ । २ सुखरूपी अमृत । ३ पुगलद्रव्य । ४ नाश । ५ चिह्न ।
६ द्वेष । कर्मोंकी छाया ।

आन वखान सुहाइ नहीं, परधान पदारथसौं रति मानै ।
 सो बुधिवान निदान लहै सिव, जो जगके दुख यौं सुख मानै ॥
 ज्ञायकरूप सदा चिनमूरति, राग विरोध उभै परछाहीं ।
 आप सँभार करै जब आतम, वे परभाव जुदे कछु नाही ॥
 भाव अज्ञान करै जबलौं, तबलौं नहिं ग्यान लखै निजमाहीं ।
 भ्रामकभाव बढाव करै जग, चेतनभाव करै सिवठाहीं ॥८७॥

सिंहावलोकन-छप्पय ।

सुनहु हंस यह सीख, सीख मानौ सदगुरकी ।
 'गुरकी आँन न लोपि, लोपि मिथ्यामति उरकी ॥
 उरकी समता गहौ, गहौ आतम अनुभौ सुख ।
 सुख सरूप थिर रहै, रहै जगमै उदास रुख ॥
 रुख करौ नहीं तुम विषयपर, पर तजि परमातम मुनैहु ।
 सुनहु न अजीव जड़ नाहिं निज, निज आतम वर्नन सुनहु ॥
 भजत देव अरहंत, हंत मिथ्यात मोहकर ।
 करत सुगुरु परनाम, नाम जिन जपत सुमन धर ॥
 धरम दयाजुत लखत, लखत निजरूप अमलपद ।
 पदमभाव गहि रहत, रहतै हुव दुष्ट अष्ट मद ॥
 मदर्नबल घटत समता प्रगट, प्रगट अभय ममता तजत ।
 तजत न सुभाव निज अपर तज, तज सुदुःख सिव सुख भजत
 लहत भेदविज्ञान, ज्ञानमय जीव सु जानत ।
 जानत पुगल अन्य, अन्यसौं नातौ भानत ॥

१ अखिरकार । २ हे आत्मन् । ३ आज्ञा । ४ अभिलाषा । ५ समझो ।
 ६ कमलकी तरह अलिप्त रहकर । ७ रहित । ८ कामदेवका जोर । ९ नाश
 करता है ।

(३१)

भानत मिथ्या-तिमिर, तिमिर जासम नहिं कोई ।
कोई विकल्प नाहिं, नाहिं दुविधा जस होई ॥
होई अनंत सुख प्रगट जब, जब प्राणी निजपद गहत ।
गहत न ममत लखि गेय सब, सब जग तजि सिवपुर लहत ॥
जपत सुद्धपद एक, एक नहिं लखत जीव तन ।
तनक परिग्रह नाहिं, नाहिं जहँ राग दोष मन ॥
मन वच तन थिर भयौ, भयौ वैराग अखंडित ।
खंडित आसवद्वार, द्वारसंवर प्रभु मंडित ॥
मंडित समाधिसुख सहित जब, जब कषाय अरिगन खपत ।
खप तनममत्त निरमत्त नित, नित तिनके गुण भवि जपत ॥

ज्ञाता साता कथन, सवैया (सुन्दरी) ।

जिनके घटमैं प्रगथ्यौ परमारथ,
रागविरोध हिये न विधरै ।
करकैं अनुभौ निज आतमकौ,
विषया सुखसौ हित मूल निवारै ॥
हरिकै ममता धरिकै समता,
अपनौ बल फोरि जु कर्म विडारै ।
जिनकी यह है करतूति सुजान,
सुआप तिरै पर जीवन तारै ॥ ९२ ॥

सवैया इकतीसा ।

चेतनासहित जीव तिहुंकाल राजत है,
ग्यान दूरसन भाव सदा जास लहिए ।

१ आत्मामें कर्म आनेका रास्ता । २ आत्मामें नवीन कर्मका न आना ।
३ विस्तरै-फैलै ।

(३२)

रूप रस गंध फास पुदगलकौ विलास,
मूरतीक रूपी विनासीक जड़ कहिए ॥
याही अनुसार परदर्वकौ ममत्त डारि,
अपनौ सुभाव धारि आपमाहिं रहिए ।
करिए यही इलाज जातैं होत आपकाज,
राग दोष मोह भावकौ समाज दहिए ॥ ९३ ॥
मिथ्याभाव मिथ्या लखौ ग्यानभाव ग्यान लखौ,
कामभोग भावनसौं काम जोरजारिकै ।
परकौ मिलाप तजौ आपनपौ आप भजौ,
पापपुन्य भेद छेद एकता विचारिकै ॥
आतम अकाज करै आतम सुकाज करै,
पावै भवपार मोख एतौ भेद धारिकै ।
यातैं हूं कहत हेर चेतन चेतौ सबेर,
मेरे मीत हो निचीत एतौ काम सारिकै ॥ ९४ ॥

अडिल ।

अहो जीव निरग्रंथ, होय विषयन तजौ ।
निरविकल्प निरद्वंद, सुद्ध आतम भजौ ॥
तत्त्वनिमै परधान, निरंजन सोइ है ।
अविनासी अविकार, लखैं सिव होइ है ॥ ९५ ॥

मंदाक्रान्ता ।

देखौ देखौ भविक अधुना, राजते नाभिनंदा ।
घोरं दुःखं भजत भजते, सेवते सौख्यकंदा ॥

जाकौ नामै जपत अमरा, होत ते मुक्तिराजा ।
एई, एई भवदधिविषं, धर्मरूपी जिहाजा ॥ ९६ ॥

शाताका चिन्तवन ।

सिद्धौ सुद्धौ अमल अचलौ, निर्विकल्पौ अवंधौ ।
स्वच्छं भावं अजर अमरौ, निर्भयौ ज्ञानवंधौ ॥
वर्णातीतौ रसविरहितौ, फासभिन्नं अगंधौ ।
सोहं सोहं निज निजविषै, पश्यतो नैव अंधौ ॥ ९७ ॥
बुद्ध्यातीतौ अखल अतुलं, चेतनं निर्विकारौ ।
क्रोधं मानं रहित अछलं, लोभभिन्नं अपारौ ॥
रागं दोषं रहित अखयं, पर्म आनंदसिंधौ ।
सोहं सोहं निज निजविषै, पश्यतो नैव अंधौ ॥ ९८ ॥
अक्षातीतौ गुणगणनिलौ, निर्गदौ अप्रमादौ ।
लोकालोकं सकल लखितं, निर्ममत्तौ अनादौ ॥
सारं सारं अतनु अमनं, शब्दभिन्नं निरंधौ ।
सोहं सोहं निजनिजविषै, पश्यतो नैव अंधौ ॥ ९९ ॥

षट्द्रव्यकथन-सवैया इकतीसा ।

जीव और पुद्गल धरम अधरम व्योम,
काल एई छहौं द्रव्य जगके निवासी हैं ।
एक एक दरवमै अनंत अनंत गुण,
अनंत अनंत परजायके विकासी हैं ॥

१ वर्णरहित । २ देखता नहीं है ।

ध. वि. ३

(३४)

अनंत अनंत सक्ति अजर अमर सवै,
सदा असहाय निजसत्ताके विलासी हैं ।
सर्व दर्ब गेयरूप परभाव हेयरूप,
सुद्धभाव उपादेय यातैं अचिनासी हैं ॥ १०० ॥

द्वादश अधिकार ।

परिनामी दोय जीव पुद्गल प्रदेसी पांच,
कालविना करतार जीव भोगै फल है ।
जीव एक चेतन अकास एक सर्वगत,
एक तीन धर्म और अधर्म भेद लहै ॥
मूरतीक एक पुद्गल एकक्षेत्री व्योम,
नित्य चार जीव पुद्गल विना सु लहै ।
हेतु पंच जीवकौ है क्रिया जीव पुद्गलमें,
जुदे देस आनपच्छ भापत विमल है ॥ १०१ ॥

नवतत्त्वस्वरूप वर्णन ।

जीवतत्त्व चेतन अजीव पुद्गलादि पंच,
कर्मनके आवनकौ आस्रव वखानिए ।
आतम करमके प्रदेस मिलैं बंध कह्यौ,
आस्रव निरोध ताहि संवर प्रमानिए ॥
कर्म उदै देय कछू खिरैं निर्जरा प्रसिद्ध,
सत्तातैं कर्मकौ विनास मोख मानिए ।
एई सात तत्त्व यामैं पुन्य पाप और मिलैं,
एही हैं पदारथ नौ भव्य हिये आनिए ॥ १०२ ॥

बीस स्थानोंके नाम ।

गुणस्थान चौदह जीव-स्थान चौदह पर्यापित,
पट प्राण दस संज्ञा गति चारि चार हैं ।
इंद्री पांच काय पट जोगे पंद्रह वेद तीन,
हैं कपाय चारि ज्ञान आठ परकार हैं ॥
संजम हैं सात चारि दर्शन लेस्या हैं पट,
भव्य दोय जानि पट सम्यक विधार हैं ।
सैनी दोय आहारक दोय उपयोग वारै,
वीसठान आतमाके भाखे गणधार हैं ॥ १०३ ॥

कुबुद्धि वचन (निन्दा स्तुति) करखा ।

कहत है कुबुद्धि सुनि कंत मेरौ कह्यौ,
भूलि जिन जाहु जिननाथ पासै ।
जाहुगे कहेंगे छांड़ि धन धाम तिय,
गहौ तप सहौ दुख भूख प्यासै ॥

१ वादर एकेन्द्रिय सूक्ष्मएकेन्द्रिय द्वीन्द्रिय त्रीन्द्रिय चतुरिन्द्रिय असंज्ञी पंचेन्द्रिय संज्ञी पंचेन्द्रिय इनके, पर्याप्त और अपर्याप्त इसप्रकार १४ जीव समास हैं । २ आहार शरीर इन्द्रिय श्वासोच्छ्वास भाषा मन इसप्रकार छह पर्याप्ति होती हैं । ३ पांच इन्द्रिय मनोबल वचनबल कायबल श्वासोच्छ्वास और आयु इसप्रकार १० प्राण हैं । ४ आहार भय मैथुन परिग्रह ये चार संज्ञा हैं । ५ सत्य मनोयोग असत्य मनोयोग उभय मनोयोग अनुभय मनोयोग इसतरह चार वचन योग और औदारिक काययोग औदारिकमिश्र काययोग वैक्रियिक काययोग वैक्रियिक मिश्र काययोग आहारक काययोग आहारक मिश्रकाययोग कार्माण काययोग इसप्रकार १५ योग हैं । ६ अत्रत देशत्रत सामायिक छेदोपस्थापन परिहारविशुद्धि सूक्ष्मसांपराय यथाख्यात इसतरह सात संयम हैं । ७ मिथ्या सासादन मिश्र औपशमिक क्षायोपशमिक और क्षायिक ये ६ सम्यक्त्वके भेद ८ पति । ९ मत जाओ ।

(३६)

जहांकौ गयौ बाहुँरौ कोई नहीं,
देत वह वास जगवासमासैं ।
खान नहिं पान नहिं टकटकापुरीसम,
मोहि तजि चलौ हौं कहौं कासैं ॥ १०४ ॥

जिनस्तुति वर्णन-सवैया इकतीसा ।

स्याल ज्यों जु रैं अनेक काम तौ सरै न एक,
सिंह होय एक तौ अनेक काज हुही है ।
तारे जो असंख्य मिलैं कहा अंधकार दावैं,
एक भानै-ज्योति दसौंदिसा जोति उही है ॥
पाथर अपार भरे दारद न कहूं टरे,
चिंतामनि एक मन चिंता जिन दुही है ।
तैसैं भगवान गुनखान करुनानिधान,
सब देव आनमैं प्रधान एक तुही है ॥ १०५ ॥

ज्ञाता तथा मूढदशा, छप्पय ।

मिथ्यादृष्टी जीव, आपकाँ रागी मानै ।
मिथ्यादृष्टी जीव, आपकाँ दोपी जानै ॥
मिथ्यादृष्टी जीव, आपकाँ रोगी देखै ।
मिथ्यादृष्टी जीव, आपकाँ भोगी पेखै ॥
जो मिथ्यादृष्टी जीव सो, सुद्धातम नाहीं लहै ।
सोई ज्ञाता जो आपकाँ, जैसाका तैसा गहै ॥ १०६ ॥

ज्ञानकथन, सवैया इकतीसा ।

चेतनके भाव दीय ग्यान औ अग्यान जोय,
एक निजभाव दूजौ परउतपात है ।

लौटकर आया । २ सूर्यका प्रकाश ।

(३७)

तातैं एक भाव गहौ दूजौ भाव मूल दहौ,
जातैं सिवपद लहौ यही ठीक बात है ॥
भावकौ दुखायौ जीव भावहीसौं सुखी होय,
भावहीकौ फेरि फेरै मोखपुर जात है ।
यह तौ नीकौ प्रसंग लोक कहैं सरवंग,
आगहीकौ दाधौ अंग आग ही सिरात है ॥

ज्ञाता आलोचना कथन ।

आत्मा सचेतन है पुगल अचेतन है,
जीव अविनेस्वर सरीर छवि छारसी ।
यह तौ प्रगट भेद आलसी न जानै क्यों हू,
जानै उद्यमीक सो तौ मोखकौं विहारसी ॥
घटमैं दयाविसेख देख और जीवनकौं,
आतमगवेषी बुध झूर मन नारसी ।
जहां देखौ ग्याताजन तहां तौ अचंभौ नाहिं,
आरसीके देखैं उर लागत है आरसी ॥ १०८ ॥

मूढकथन ।

ग्यानके लखनहारे विरले जगतमाहिं,
ग्यानके लखनहारे जगमैं अनेक हैं ।
भाखैं निरपेक्षवैन सज्जन पुरुष केई,
दीखत बहुत जिन्हें वचनकी टेक हैं ॥
चूक परैं रिसखात ऐसे बहु जीव भ्रात,
औसर अचूक थोरे धरें जे विवेक हैं ।

१ जला हुआ । २ जिसका कभी निरन्वय (सर्वथा) नाश न हो

ग्याता जन धोरे मूढमती बहुतेरे नर,
जानै नाहिं ग्यान सर कूपकैसे भेके हैं ॥ १०९ ॥

हितोपदेश वर्णन, मत्तगयन्द ।

ज्ञान सोई जु करै हितकारज,
ध्यान सोई मनकों वसि आनै ।
बुद्ध सोई जु लखै परमारथ,
मीतें सोई दुविधा नहिं ठानै ॥
भूप सोई उर नीत विचारत,
नारि सोई भरता सनमानै ।
घानतें सो न गहै परकौ धन,
पीर सोई परपीरकों जानै ॥ ११० ॥

छन्दशास्त्रके आठगणोंके नाम, स्वरूप, खामी, फल, कवित्त ३१ मात्रा ।

यगन आदिलघु, उदक, देत सुंत,
भगन आदि गुरु, ससि, जस देह ।
रगण मध्य लघु, अगनि, मृत्यु फल,
जगन मध्य गुरु, रवि, गंदगेह ॥
तगन अंतलघु, व्योम, अफल है,
सगन अंतगुरु, पवन, भजेह ।
नगन त्रिलघु, सुर, आयु प्रदाता,
मगन त्रिगुरु भू, लच्छि भरेह ॥ १११ ॥

१ तालाव । २ मैडक । ३ पंडित । ४ मित्र । ५ दयानतदार अर्थात्
ईमानदार और ग्रन्थकर्त्ताका नाम । ६ पराया कष्ट । ७ यगणके आदिमें लघु होता
है, शेष दो वर्ण गुरु होते हैं । ८ यगणका देव जल है । ९ यगण पुत्रका दाता
है । १० रोगोंका घर ।

(३९)

अंतर्लपिका, छप्पय ।

कौन धर्म है सार, आन-मत भजै कि नाही ।
किहि त्यागै है सुजस, भरत हारे किहि ठाहीं ॥
किहि थिर कौन ध्यान, कौन वंदै अघ नासै ।
लोभवंत धन देह, श्रवणतै कहा अभ्यासै ॥

वहु पाप कौनतै बुद्धि सठ,
दया कौनकी धरहि मन ।
मुनिराज कहा कहि भव्य प्रति,
जैनधरम मुन सुमन जन ॥ ११२ ॥

शार्दूलविकीर्तित ।

चैतन्यं अमलं अनादि अचलं, आनंद भावं मयं ।
त्रैलोक्ये अखयं अखंडित सदा, सारं सुजानं स्वयं ॥
राग द्वेष त्रिकर्म सर्व रहितं, स्वच्छं स्वभावं जुतं ।
सोहं सिद्ध विशुद्ध एक परमं, ज्ञानं उपाधिच्युतं ॥११३॥

जीवके नव दृष्टान्त, सबैया इकतीसा ।

जैसौ रैनिदीपक अरुन परकास वन्यौ,
तैसौ परकास सुद्ध जीवकौ वखान्यौ है ।
दधिमाहिं घीव खीरमाहिं नीर पाहनमै,
धात जैसै तैसै जीव पुद्गलमै जान्यौ है ॥

१ इस छप्पयमें किये हुए सब प्रश्नोंके उत्तर जैन धरम मुन
जन इस पदमें निकलते हैं । इस पदके प्रत्येक अक्षरके साथ अन्तमें
मिलानेसे कमसे १२ प्रश्नोंके इस प्रकार १२ उत्तर होते हैं—१ जैन
३ धन, ४ रत्न, ५ मन, ६ मुन(नि), ७ न न, ८ मुन, ९ मन, १०
जन, ११ जैन धरम मुन सुमन जन ।

(४०)

जैसे हेमरूपो और फटिक जु निर्मल है,
तैसे जीव निर्मल सुदिष्टिसौ पिछान्यौ है ।
नव दृष्टान्त करिके जीवको सरूप जान्यौ,
परभाव भान्यौ सुद्ध भाव मन आन्यौ है ॥११४॥

हर्ष-शोकजय मंत्र ।

केई केई बार जीव भूपति प्रचंड भयौ,
केई केई बार जीव कीटरूप धख्यौ है ।
केई केई बार जीव नौग्रीवक जाय वख्यौ,
केई बार सातमें नरक अवतख्यौ है ॥
केई केई बार जीव राघौ मच्छ होइ चुक्यौ,
केई बार साधारन तुच्छ काय वख्यौ है ।
सुख और दुःख दोऊ पावत है जीव सदा,
यह जान ग्यानवान हर्ष सोक हख्यौ है ॥ ११५ ॥

ज्ञानीमहिमा, कुंडलिया ।

समदिष्टी निजरूपकौं, ध्यावत है निजमाहिं ।
कर्मसत्रु छय करत है, जाकै ममता नाहिं ॥
जाकै ममता नाहिं, आप परभेद विचारै ।
छहौं दृव्यतैं भिन्न, सुद्ध निजआतम धारै ॥
करै न राग विरोध, मिलै जो इष्ट अनिष्टी ।
सो सिवपदवी लहै, वहै जो है समदिष्टी ॥ ११६ ॥

उपसंहार ।

बार बार कहैं पुनरुक्त दोष लागत है,
जागत न जीव तूतौ सोयौ मोह झगमैं ।

आतमासेती विमुख गहै राग दोपरूप,
 पंचइंद्रिविपैसुखलीन पगपगमें ॥
 पावत अनेक कष्ट होत नाहिं अष्ट नष्ट,
 महापद भिष्ट भयौ भमै सिष्टमगमें ।
 जागि जगवासी तू उदासी व्हैकै विपयसौं,
 लागि सुद्ध अनुभौ ज्यौं आवै नाहिं जगमें ॥११७॥

ग्रन्थमहिमा ।

जो इसकों सुनै तिसै काननकों हितकारी,
 जो इसकों सुनै तिसै मंगलकों मूल है ।
 जो इसकों पढ़ै ताहि ज्ञान तौ विशेष बढ़ै,
 यादि करै सो तौ पावै भव दधिकौ कूल है ॥
 सकल ग्रंथनिमें सार सार निज आतमा है,
 सुध उपयोगमई ताको जो न भूल है ।
 सोई साध सोई संत सोई सब गुनवंत,
 लहै जु अनंत सुख नासै कर्म धूल है ॥ ११८ ॥

कविलघुता ।

पिंगल न पढ़्यौ नहीं देखी नाममाला कोऊ,
 व्याकरण काव्य आदि एक नाहिं पढ़्यौ है ।
 आगमकी छाया लैकै अपनी सकति सार,
 सैलीके प्रभावसेती स्वर कोट (?) गढ़्यौ है ॥
 अच्छर अरथ छंद जहां जहां भंग होय,
 तहां तहां लीजै सोध ग्यान जिन्हें वढ़्यौ है ।
 वीतराग थुति कीजै साधरमी संग लीजै,
 आगम सुनीजै पीजै ग्यानरस कढ़्यौ है ॥११९॥

सत्रैसौ ठावन मगसिरबदी छटि बही,
 आगरेमें सैली सुखी निजमनधनसौं ।
 मानसिंहसाह औ बिहारीदास ताकौ शिष्य,
 द्यानत विनती यह कहै सब जनसौं ॥
 जिहिविधि जानौ निजआतम प्रगट होइ,
 बीतरागधर्म बढ़ै सोई करौ तनसौं ।
 दुखित अनादिकाल चेतन सुखित करौ,
 पावै सिवसुखासिंधु छूटै दुःख बनसौं ॥ १२० ॥
 वानी तौ अपार है कहांलग बखान करौ,
 गणधर इंद्र आदि पार नहीं पायौ है ।
 तुच्छमती जीव ताकी कौन बात पूछत है,
 जे तौ कछु कहै ते तौ तहां ही समायौ है ।
 अच्छर अरथ वानी तीनौ तौ अनादि मानी,
 करै कहै कौन मूढ़ कहत मैं गायौ है ।
 याही ममतासौं चिरकाल जगजाल रुलै,
 ग्यानी सबदजाल भिन्न आपरूप पायौ है ॥ १२१ ॥

इति उपदेशशतक ।



अथ सुबोध पंचासिका ।

सौर्य ।

ओंकार मझार, पंचपरमपद वसत है ।
 तीन भवनमें सार, बंदों मनवचकायसों ॥ १ ॥
 अच्छरज्ञान न मोहि, छंदभेद समझों नहीं ।
 बुधि थोरी किम होय, भाषा अच्छर-वावनी ॥ २ ॥
 आतम कठिन उपाय, पायौ नरभौ क्यों तजे ।
 राई उदधि समाय, ढूढ़ी फिर नहिं पाइए ॥ ३ ॥
 इहविधि नरभौ कोइ, पाय विपैरससौं रमै ।
 सो सठ अमृत खोय, हालाहल विष आचरै ॥ ४ ॥
 ईसुर भाख्यौ एह, नरभव मति खोवै वृथा ।
 फिर न मिलै यह देह, पछितावौ बहु होइगौ ॥ ५ ॥
 उत्तम नर अवतार, पायौ दुखकरि जगतमें ।
 यह जिय सोच विचार, कछु तोसा सँग लीजिए ॥ ६ ॥
 ऊरधगतिकौ बीज, धर्म न जो नर आदरै ।
 मानुष जौनि लही जु, कूप परै नर दीप लै ॥ ७ ॥
 रिस तजिकै सुन बैन, सार मनुष सब जोनिमें ।
 ज्यौं मुख ऊपर नैन, भान दिपै आकासमें ॥ ८ ॥

छन्द चाल ।

रीझ रे नर नरभौ पाया, कुल गोत विमल तू आया ।
 जो जैनधरम नहिं धारा, सब लाभ विपै सँग हारा ॥ ९ ॥
 लिखि बात हिये यह लीजै, जिनकथित धर्म नित कीजै ।
 भवदुखसागरकाँ तरिए, सुखसौं नौका जो वरियै ॥ १० ॥

लीन विपै डंक अहि भरिया, भ्रममोहतें मोहित परिया ।
 विधिना जव दइ हे घुमरिया, तव नरकभूमि तू परिया ॥ ११ ॥
 ए नर करि धर्म अगाऊ, जव लौं धनजोवन चाऊ ।
 जव लौं नहिं रोग सतावै, तुहि काल न आवन पावै ॥ १२ ॥
 ऐन हें तुव आसन नैना, जव लौं तुव प्रकृति फिरै ना ।
 जव लौं तुव बुद्धि सवाई, करि धर्म अगाऊ भाई ॥ १३ ॥
 ओस जल ज्यां जोवन जै है, करि धर्म जरा फिरि ऐहै ।
 ज्यां वृद्धा बेल थकै है, कछु कारज करि न सकै है ॥ १४ ॥
 औ खिन संयोग वियोगा, खिन जीवन खिन मृत रोगा ॥
 खिनमें धन जोवन जावै, किहिविधि जगमें सुख पावै १५
 अंबर धन जीतव गेहा, गर्जकरन चपल धन एहा ॥
 तन दरपन छाया जानौ, यह बात सदा उर आनौ ॥ १६ ॥

दाल परमार्दाफी ।

अः जम ले नित आव, क्यौं नहिं धर्म सुनीजै ।
 नैन तिमिर नित हीन, आसन जोवन छीजै ॥ १७ ॥
 कमला चलै न पँड, मुख ढाकै परिवारा ।
 देह थकै बहु पोषि, क्यौं न लखै संसारा ॥ १८ ॥
 खन नहिं छोड़ै काल, जो पाताल सिधारै ।
 बसै उदधिके बीच, जो कहुं दूर पधारै ॥ १९ ॥
 गन सुर राखै तोहि, राखै उदधि मथैया ।
 तबहु न छोड़ै काल, दीप पतंग परैया ॥ २० ॥
 घर गो सौना दान, मणि औपध सब यौं ही ।
 मंत्र यंत्र करि तंत्र, काल मिटै नहिं क्यौं ही ॥ २१ ॥

१. हाथीके कानके सरस धन चंचल है ।

नरकतने दुख भूरि, जो तू जीव सम्हारै ।
ताँ न रुचै आहार, अब सब परिग्रह डारै ॥ २२ ॥
चेतन गरभ मँझार, नरक अधिक दुख पायौ ।
वालपनेकाँ खेद, सब जग परगट गायौ ॥ २३ ॥
छिनमें धनकाँ सोक, छिनमें विरह सतावै ।
छिनमें इष्टवियोग, तरुन कवन सुख पावै ॥ २४ ॥

टाल दोहरेकी ।

मन भाई रे, चेत मन भाई रे ॥ टेक ॥
जरापनै दुख जे सहे, मुन भाई रे,
सो क्याँ भूलै तोहि, चेत मन भाई रे ॥
जो तू विषयनमें लग्यौ, मन भाई रे,
आतमहित नहिं होइ, चेत मन भाई रे ॥ २५ ॥
झूठ पाप करि ऊपज्यौ, मन भाई रे,
गरभ वस्यौ वस पाप, चेत मन भाई रे ।
सात धात लहि पापतै, मन भाई रे,
अजहु पापरत आप, चेत मन भाई रे ॥ २६ ॥
नहीं जरा गद आइ है, मन भाई रे,
कहां गयौ जम जच्छ, चेत मन भाई रे ।
जो निचिंत तू हँ रह्यौ, मन भाई रे,
ए सब हँ परतच्छ, चेत मन भाई रे ॥ २७ ॥
टुक सुखकाँ भवदधि पख्यौ, मन भाई रे,
पाप लहर दुख देत, चेत मन भाई रे ।
पकरो धर्म जिहाजकाँ, मन भाई रे,
सुखसाँ पार करेत, चेत मन भाई रे ॥ २८ ॥

ठीक रहै धन सासतौ, मन भाई रे,
होइ न रोग न काल, चेत मन भाई रे ।
तबहू धर्म न छाँड़ियै, मन भाई रे,
कोटि कटै अघजाल, चेत मन भाई रे ॥ २९ ॥
डरपत जो परलोकतै, मन भाई रे,
चाहत सिवसुख सार, चेत मन भाई रे ।
क्रोध मोह विषयनि तजौ, मन भाई रे,
धर्मकथित जिन धार, चेत मन भाई रे ॥ ३० ॥
ढील न करि आरंभ तजौ, मन भाई रे,
आरंभमैं जियघात, चेत मन भाई रे ।
जीवघाततैं अघ बढ़ै, मन भाई रे,
अघतैं नरकनिपात, चेत मन भाई रे ॥ ३१ ॥
नरक आदि तिहु लोकमैं, मन भाई रे,
इह परभव दुखरास, चेत मन भाई रे ।
सो सब पूरव पापतैं, मन भाई रे,
जीव सहै बहु त्रास, चेत मन भाई रे ॥ ३२ ॥

बाल, वीरजीनिदकी ।

तिहु जगमैं सुर आदि दै जी, जो सुख दुखभ सार ।
सुंदरता मनभावनी जी, सो दै धर्म अपार ॥
रे भाई, अब तू धर्म सँभार, यह संसार असार, रे भा० ३३
धिरता जस सुख धर्मतैं जी, पावै रतन भँडार ।
धर्मविना प्राणी लहै जी, दुख नाना परकार ॥ रे भा० ३४
दान धर्मतैं सुर लहै जी, नरक होत करि पाप ।
इहविध जानै क्यां पढ़ै जी, नरकविषैं तू आपा ॥ रे भा० ३५

धर्म करत सोभा लहै जी, जय धनरथ गज वाज ।
 प्रासुकदान प्रभावसों जी, घर आवें मुनिराज ॥ रे भा० ३६
 नवल सुभग मनमोहना जी, पूजनीक जगमाहिं ।
 रूपमधुर वच धरमतेँ जी, दुख कोउ व्यापै नाहिं ॥ रे भा० ३७
 परमारथ यह वात है जी, मुनिकों समता सार ।
 विन मूल विद्यातनी जी, धर्म दया सिरदार ॥ रे भा० ३८
 फिर सुन करुना धर्मसों जी, गुरु कहियै निरग्रथ ।
 देव अठारह दोष विन जी, यह सरधा सिवपंथा ॥ रे भा० ३९
 विन धन घर सोभा नहीं जी, दान विना घर जेह ।
 जैसेँ विपई तापसी जी, धर्म दयाविन तेह ॥ रे भा० ४०

दोहा ।

भाँदू धनहित अघ करै, अघसों धन नहिं होय ।
 धरम करत धन पाइयै, मन मानै कर सोय ॥ ४१ ॥
 मति जिय सोचै किंच तू, होनहार सो होय ।
 जे अच्छर विधिना लिखे, ताहि न मँटे कोय ॥ ४२ ॥
 यह वह बातें बहु करौ, पैठौ सागरमाहिं ।
 सिखर चढ़ौ बस लोभके, अधिकौ पावौ नाहिं ॥ ४३ ॥
 रैन दिना चिता चिंता,—माहिं जलै मति जीव ।
 जो दीया सो पाय है, और न होय सदीव ॥ ४४ ॥
 लागि धरम जिन पूजियै, साँच कहै सब कोय ।
 चित प्रभुचरन लगाइयै, तव मनवांछित होय ॥ ४५ ॥
 बह गुरु हो मम संजमी, देव जैन हो सार ।
 साधरमी संगति मिलौ, जव लौं भव अवतार ॥ ४६ ॥

(४८)

शिवमारग जिन भासियौ, किंचित जानै कोइ ।
अंत समाधिमरण करै, चहुँ गति दुख छय होइ ॥ ४७ ॥
षट् द्वै गुण सम्यक गहै, जिनवानी रुचि जास ।
सो धनसौँ धनवान है, जगमैँ जीवन तास ॥ ४८ ॥
सरधा हिरदैँ जो करै, पढैँ सुनैँ दे कान ।
पाप करम सब नासिकै, पावैँ पद निरवान ॥ ४९ ॥
हितसौँ अरथ बताइयौ, सुगुरु बिहारीदास ।
सत्रह सौँ वावन वदी, तेरस कातिकमास ॥ ५० ॥
ग्यानवान जैनी सबै, वसैँ आगरेमाहिं ।
अंतरग्यानी बहु मिलैँ, मूरख कोऊ नाहिं ॥ ५१ ॥
छय उपशम बल, मैँ कहे, द्यानत अच्छर एहु ।
दोष सुबोधपचासिका, बुधजन सुद्ध करेहु ॥ ५२ ॥

इति सुबोधपंचासिका ।



१ निःशांकित, निःकांकित, निर्विचिकित्सित, अमूढदृष्टि, उपगृह्यन, स्थिति-
करण, वात्सल्य, प्रभावना, ये षट् द्वै अर्थात् आठ सम्यग्दर्शनके अंग हैं ।

(४९)

धर्मपचीसी ।

दोहा ।

भव्य-कमल-रवि सिद्ध जिन, धर्मधुरंधर धीर ।
नमत संत जग-तम-हरन, नमौ त्रिविध गुरु वीर ॥ १ ॥

गोपाई (१५ गाथा ।)

मिथ्याविषयनिमें रत जीव, तातैं जगमें भमै सदीव ।
विविध प्रकार गहै परजाय, श्रीजिनधर्म न नेक सुहाय २
धर्मविना चहुं गतिमें परै, चौरासी लख फिरि फिरि धरै ।
दुखदावानलमाहिं तपंत, कर्म करै फल भोग लहंत ॥ ३ ॥
अति दुर्लभ मानुष परजाय, उत्तम कुल धन रोग न काय ।
इस औसरमें धर्म न करै, फिर यह औसर कवधौं बरै ॥ ४ ॥
नरकी देह पाय रे जीव, धर्म बिना पशु जान सदीव ।
अर्थकाममें धर्म प्रधान, ताबिन अर्थ न काम न मान ॥ ५ ॥
प्रथम धर्म जो करै पुनीत, सुभसंगम आवै करि प्रीत ।
विघन हरै सब कारज सरै, धनसौं चाखौं कौनै भरै ॥ ६ ॥
जनम जरा मृतुके बस होय, तिहूंकाल जग डोलै सोय ।
श्रीजिनधर्म रसायन पान, कवहुं न रुचि उपजै अग्यान ७
ज्यौं कोई मूरख नर होय, हालाहल गहि अमृत खोय ।
त्यौं सठ धर्म पदारथ त्याग, विषयनिसौं ठानै अनुराग ॥ ८ ॥
मिथ्याग्रह-गहिया जो जीव, छांड़ि धरम विषयनि चित दीव ।
यौं पसु कल्पवृक्षकौं तोड़ि, वृक्ष धतूरेके बहु जोड़ि ॥ ९ ॥
नरदेही जानौ परधान, विसरि विपै करि धर्म सुजान ।
त्रिभुवन इंद्रतने सुख भोग, पूजनीक हो इंद्रन जोग ॥ १० ॥

ध. वि. ४

चंद विना निसि गज विन दंत, जैसे तरुण नारि विन कंत ।
 धर्म विना त्यों मानुष देह, तातें करियै धर्म सनेह ॥ ११ ॥
 हय गय रथ बहु पायक भोग, सुभट बहुत दल चमर मनोग ॥
 ध्वजा आदि राजा विन जानि, धर्म विना त्यों नरभौ मानि १२
 जैसे गंध विना है फूल, नीर विहीन सरोवर धूल ।
 ज्यों धन विन सोभित नहिं भौन, धर्म विना त्यों नर चिंतौन ॥
 अरचै सदा देव अरहंत, चरचै गुरुपद करुनावंत ।
 खरचै दाम, धर्मसौं प्रेम, न रचै विषै सफल नर एम ॥ १४ ॥
 कमला चपल रहै थिर नाहि, जोवन कांति जरा लपटाहि ।
 सुत मित नारि नावसंजोग, यह संसार सुपनका लोग ॥ १५ ॥
 यह लखि चित धरि सुद्ध सुभाव, कीजै श्रीजिनधर्म उपाव ।
 यथा भाव जैसी मति गहै, तैसी गति तैसा सुख लहै ॥ १६ ॥
 जो मूरख धिपनांकरि हीन, विषै-ग्रंथ-रत व्रत नहिं कीन ।
 श्रीजिनभाषित धर्म नगहै, सो निगोदकौ मारग लहै ॥ १७ ॥
 आलस मंदबुद्धि है जास, कपटी विषैमगन सठ तास ।
 कायरता मद परगुण ढकै, सो तिरजंच जोनि लहि सकै १८
 आरत रौद्र ध्यान नित करै, क्रोध आदि मच्छरता धरै ।
 हिंसक वैरभाव अनुसरै, सो पापिष्ट नरकगति परै ॥ १९ ॥
 कपटहीन करुणाचितमाहिं, हेय उपादे भूलै नाहिं ।
 भक्तिवंत गुणवंत जु कोय, सरलभाषि सो मानुष होय ॥ २० ॥
 श्रीजिनवचनमगन तपवान, जिन पूजै दे पात्रहिं दान ॥
 रहै निरंतर विषय उदास, सोई लहै सुरग आवास ॥ २१ ॥

(५१)

मानुषजोनि अंतकी पाय, सुनि जिनवचन विपै विसराय ।
गहै महाव्रत दुद्धर वीर, सुकलध्यान थिर लहि सिव धीर २२
धरम करत सुख होय अपार, पाप करत दुख विविधप्रकार ।
बाल गुपाल कहै सब नारि, इष्ट होय सोई अवधारि ॥२३॥
श्रीजिनधर्म मुकतिदातार, हिंसाधरम करत संसार ।
यह उपदेश जानि बड़ भाग, एक धर्मसौं करि अनुराग २४
व्रत संयम जिनपद थुति सार, निर्मल सम्यक भावन वार ।
अंत कषाय विषय कृश करौ, ज्यौं तुम मुकतिकामिनी वरौ २५
दोहा ।

बुधकुमुदनि ससि सुख करन, भवदुख सागर जान ।
कहै ब्रह्म जिनदास यह, ग्रंथ धर्मकी खान ॥ २६ ॥
द्यानत जे वाँचै सुनै, मनमै करै उछाह ।
ते पावै फल सासतौ, मनवांछित फल-लाह ॥ २७ ॥

इति धर्मपचीसी ।



(५२)

तत्त्वसार भाषा ।

दोहा ।

आदिसुखी अंतःसुखी, सिद्ध सिद्ध भगवान ।
निज प्रताप परताप विन, जगदर्पन जग आन ॥ १ ॥
ध्यान दहन विधि-काठ दहि, अमल सुद्ध लहि भाव ।
परम जोतिपद वंदिकै, कहूं तत्त्वकौ राव ॥ २ ॥

चौपाई ।

तत्त्व कहे नाना परकार, आचारज इस लोकमंझार ।
भविक जीव प्रतिबोधन काज, धर्मप्रवर्तन श्रीजिनराज ॥३॥
आतमतत्त्व कह्यौ गणधार, स्वपरभेदतैं दोइ प्रकार ।
अपनौ जीव सुतत्त्व बखानि, पर अरहंत आदि जिय जानि
अरहंतादिक अच्छर जेह, अरथ सहित ध्यावै धरि नेह ।
विविध प्रकार पुन्य उपजाय, परंपराय होय सिवराय ॥ ५ ॥
आतमतत्त्वतने द्वै भेद, निरविकल्प सविकल्प निवेद ।
निरविकल्प संवरकौ मूल, विकल्प आस्रव यह जिय भूल ६
जहां न व्यापै विषय विकार, हूँ मन अचल चपलता डार ।
सो अविकल्प कहावै तत्त, सोई आपरूप है सत्त ॥ ७ ॥
मन थिर होत विकल्पसमूह, नास होत न रहै कछु रूह ।
सुद्ध सुभावविषै हूँ लीनै, सो अविकल्प अचल परवीन ॥८॥
सुद्धभाव आतम दृग ग्यान, चारित सुद्ध चेतनावान ।
इन्हें आदि एकारथ वाच, इनमैं मगन होइकै राच ॥ ९ ॥
परिग्रह त्याग होय निरग्रंथ, भजि अविकल्प तत्त्व सिवपंथा
सार यही है और न कोय, जानै सुद्ध सुद्ध सो होय ॥१०॥

अंतर बाहिर परिग्रह जेह, मनवच तनसौं छांडै नेह ।
 सुद्धभाव धारक जव होय, यथा ग्यान मुनिपद है सोय ११
 जीवन मरन लाभ अरु हान, सुखद मित्र रिपु गनै समान ।
 राग न रोष करै परकाज, ध्यान जोग सोई मुनिराज ॥१२॥
 काललब्धिवल सम्यक वरै, नूतन बंध न कारज करै ।
 पूरव उदै देह खिरि जाहि, जीवन मुक्त भविक जगमाहि ॥
 जैसे चरनरहित नर पंग, चढ़न सकत गिरि मेरु उतंग ।
 ल्यौं विन साध ध्यान अभ्यास, चाहै करौं करमकौं नास १४
 संकितचित्त सुमारग नाहिं, विपैलीन वांछा उरमाहिं ।
 ऐसैं आप्त कहैं निरवान, पंचमकाल विपैं नहिं जान ॥१५॥
 आत्मग्यान दृग चारितवान, आतम ध्याय लहै सुरधान ।
 मनुज होय पावै निरवान, तातैं यहां मुकति मग जान १६
 यह उपदेस जानि रे जीव, करि इतनौ अभ्यास सदीव ।
 रागादिक तजि आतम ध्याय, अटल होय सुख दुख मिटि
 जाय ॥ १७ ॥

आप प्रमान प्रकास प्रमान, लोक प्रमान, सरीर समान ।
 दरसन ग्यानवान परधान, परतैं आन आतमा जान १८
 राग विरोध मोह तजि वीर, तजि विकल्प मन वचन सरीरा
 ह्वै निचिंत चिंता सब हारि, सुद्ध निरंजन आप निहारि ॥१९॥
 क्रोध मान माया नहिं लोभ, लेस्या सत्य जहां नहिं सोभ ।
 जन्म जरा मृतुकौं नहिं लेस, सो मैं सुद्ध निरंजन भेस २०
 बंध उदै हिय लवधि न कोय, जीवथान संठान न होय ।
 चौदह मारगना गुनथान, काल न कोय चेतना ठान २१

फरस वरन रस सुर नहि गंध, वरंग वरगना जास न खंधा
नहि पुदगल नहि जीवविभाव, सो मैं सुद्ध निरंजन राव ॥२२॥
विविध भांति पुदगल परजाय, देह आदि भाषी जिनराया
चेतनकी कहियै व्योहार, निहचै भिन्न भिन्न निरधार ॥२३॥
जैसें एकमेक जल खीर, तैसें आना जीव सरीर ।
मिलै एक पै जुदे त्रिकाल, तजै न कोऊ अपनी चाल ॥२४॥
नीर खीरसौं न्यारौ होय, छांछिमाहिं डारै जो कोय ।
त्यौं ग्यानी अनुभौ अनुसरै, चेतन जड़सौं न्यारौ करै ॥२५॥

दोहा ।

चेतन जड़ न्यारौ करै, सम्यकदृष्टी भूप ।
जड़ तजिकै चेतन गहै, परमहंसचिटूप ॥ २६ ॥
ज्ञानवान अमलान प्रभु, जो सिवखेतमझार ।
सो आतम मम घट वसै, निहचै फेर न सार ॥ २७ ॥
सिद्ध सुद्ध नित एक मैं, ग्यान आदि गुणखान ।
अगन प्रदेस अमूरती, तन प्रमान तन आन ॥ २८ ॥
सिद्ध सुद्ध नित एक मैं, निरालंब भगवान ।
करमरहित आनंदमय, अँभै अँखै जग जान ॥ २९ ॥
मनथिर होत विपै घटै, आतमतत्त्व अनूप ।
ज्ञान ध्यान बल साधिकै, प्रगटै ब्रह्मसरूप ॥ ३० ॥
अँवर घन फट प्रगट रवि, भूपर करै उदोत ।
विषय कषाय घटावतै, जिय प्रकास जग होत ॥ ३१ ॥

१ समान अविभाग प्रतिच्छेदोके धारक प्रत्येक कर्मपरमाणुको वर्ग कहते हैं ।
२ वर्गके समूहको वर्गणा कहते हैं । ३ स्कन्ध । ४ निर्मय । ५ अक्षय ।
६ आकाशमें ।

मन वच काय विकार तत्रि, निरविकारता धार ।
 प्रगट होय नित्र आनसा, परमात्मपद सार ॥ ३२ ॥
 मौनगहित आसन सहित, चित्त चञ्चल खोय ।
 पूरव सत्तामै गलै, नये रुकै सित्र होय ॥ ३३ ॥
 भव्य करै चिरकाल तप, लट्टै न मित्र विन म्यान ।
 म्यानवान ततकाल ही, पावै पद निरवान ॥ ३४ ॥
 देह आदि परद्रव्यमै, समता करै गँवार ।
 भयो परममै लीन सो, बाँधै कर्म अपार ॥ ३५ ॥
 इंद्रविषै मगन रहै, राग दोष घटमाहि ।
 क्रोध मान क्लृपित कुची, म्यानी ऐसी नाहि ॥ ३६ ॥
 देखै सो चेतन नहीं, चेतन देखी नाहि ।
 राग दोष क्रिहिमाँ करौ, हीं मै समतामाहि ॥ ३७ ॥
 थावर जंगम मित्र गियु, देखै आप समान ।
 राग विरोध करै नहीं, सोई समतावान ॥ ३८ ॥
 सब असंखपरदेसजुन, जनमै मरै न कोय ।
 गुणअनंत चेतनमई, दिव्यदिष्टि धरि जोय ॥ ३९ ॥
 निहृचै रूप अमेद है, भेदरूप व्योहार ।
 स्यादवाद मानै सदा, तत्रि रागादि विकार ॥ ४० ॥
 राग दोष क्लेशोदविन, जो मन जल धिर होय ।
 सो देखै नित्ररूपकाँ, और न देखै कोय ॥ ४१ ॥
 अमल सुधिर सरवर मयै, दीसै रतनमँडार ।
 लीं मन निरमल धिरविषै, दीसै चेतन सार ॥ ४२ ॥
 देखै विमलसरूपकाँ, इंद्रियविषै विमार ।
 होय मुक्ति खिन आवमै, तत्रि नरमौ अवतार ॥ ४३ ॥

ध्यानरूप निज आत्मा, जड़सरूप परं मान ।
जड़तजि चेतन ध्याइयै, सुद्धभाव सुखदान ॥ ४४ ॥
निरमल रत्नत्रय धरै, सहित भाव वैराग ।
चेतन लखि अनुभौ करै, वीतरागपद जाग ॥ ४५ ॥
देखै जानै अनुसरै, आपविषै जब आप ।
निरमल रत्नत्रय तहां, जहां न पुन्य न पाप ॥ ४६ ॥
धिर समाधि वैरागजुत, होय न ध्यावै आप ।
भागहीन कैसै करै, रतन विसुद्ध मिलाप ॥ ४७ ॥
विषयसुखनमै भगन जो, लहै न सुद्ध विचार ।
ध्यानवान विषयनि तजै, लहै तत्त्व अविकार ॥ ४८ ॥
अधिर अचेतन जड़मई, देह महादुखदान ।
जो चासौ ममता करै, सो बहिरातम जान ॥ ४९ ॥
सरै परै आमय धरै, जरै भरै तन एह ।
हरि ममता समता करै, सो न वरै पन-देह ॥ ५० ॥
पापउदैकौ साधि, तप, करै विविध परकार ।
सो आवै जो सहज ही, बडौ लाभ है सार ॥ ५१ ॥
करमउदय फल भोगतै, करै न राग विरोध ।
सो नासै पूरव करम, आगै करै निरोध ॥ ५२ ॥

चाँपाई (१५ मात्रा)

कर्मउदै सुख दुख संजोग, भोगत करै सुभासुभ लोग ।
तातै बांधै करम अपार, ग्यानावरनादिक अनिवार ॥ ५३ ॥
जबलौ परमानूसम राग, तबलौ करम सकै नहिं त्याग ।
परमारथ ग्यायक मुनि सोय, रागतजै विनु काज न होय ५४

सुख दुख सहै करम बस साध, करै न रागविरोध उपाध ।
 ग्यानध्यानमें थिर तपवंत, सो मुनि करै कर्मकौ अंत ॥ ५५ ॥
 गहै नहीं पर तजै न आप, करै निरंतर आतमजाप ।
 ताकै संवर निर्जर होय, आस्रव बंध विनासै सोय ॥ ५६ ॥
 तजि परभाव चित्त थिर कीन, आप-स्वभावविषै है लीन ।
 सोई ग्यानवान दृगवान, सोई चारितवान प्रधान ॥ ५७ ॥
 आतमचारित दरसन ग्यान, सुद्धचेतना विमल सुजान ।
 कथन भेद है वस्तु अभेद, सुखी अभेद भेदमें खेद ॥ ५८ ॥
 जो मुनि थिर करि मनवचकाय, त्यागै राग दोष समुदाय ।
 धरै ध्यान निज सुद्धसरूप, बिलसै परमानंद अनूप ॥ ५९ ॥
 जिह जोगी मन थिर नहीं कीन, जाकी सकति करम आधीना
 करइ कहा न फुरै बल तास, लहै न चेतन सुखकी रास ॥ ६० ॥
 जोग दियौ मुनि मनवचकाय, मन किंचित चलि बाहिर जाया
 परमानंद परम सुखकंद, प्रगट न होय घटांमें चंद ॥ ६१ ॥
 सब संकल्प विकल्प विहंड, प्रगटै आतमजोति अखंड ।
 अविनासी सिवकौ अंकूर, सो लखि सांध करमदल चूर ॥ ६२ ॥
 विषय कषाय भाव करि नास, सुद्धसुभाव देखि जिनपास ।
 ताहि जानि परसौ तजि काज, तहां लीन हूजै मुनिराज ॥ ६३ ॥
 विषय भोगसेती उचटाइ, शुद्धतत्त्वमें चित्त लगाइ ।
 होय निरास आस सब हरै, एक ध्यानअसिसौ मन मरै ॥ ६४ ॥
 मरै न मन जो जीवै मोह, मोह मरै मन जनम न होय ।
 ज्ञानदर्शआवर्न पलाय, अंतरायकी सत्ता जाय ॥ ६५ ॥

जैसे भूप नसें सब सैन, भाग जाइ न दिखावै नैन ।
 तैसें मोह नास जब होय, कर्मघातिया रहै न कोय ॥ ६६ ॥
 कीनें चारिघातिया हान, उपजै निरमल केवलग्यान ।
 लोकालोक त्रिकाल प्रकास, एक समैमें सुखकी रास ॥ ६७ ॥
 त्रिभुवन इंद्र नमै कर जोर, भाजै दोषचोर लखि भोर ।
 आवै जु नाम गोत वेदनी, नासि भयै नूतन सिवधनी ॥ ६८ ॥
 आवागमनरहित निरबंध, अरस अरूप अफास अगंध ।
 अचल अबाधित सुख विलसंत, सम्यकआदि अष्टगुणवंत ६९
 मूरतिवंत अमूरतिवंत, गुण अनंत परजाय अनंत ।
 लोक अलोक त्रिकाल विधार, देखै जानै एकहि वार ॥ ७० ॥

सोरया ।

लोकसिखर तनुवात, कालअनंत तहां वसै ।
 धरमद्रव्य विख्यात, जहां तहां लौं धिर रहै ॥ ७१ ॥
 ऊरधगमन सुभाव, तातैं वंक चलै नहीं ।
 लोकअंत ठहराव, आगैं धर्मदरव नहीं ॥ ७२ ॥
 रहित जन्म मृति एह, चरमदेहतैं कछु कमी ।
 जीव अनंत विदेहैं, सिद्ध सकल वंदौं सदा ॥ ७३ ॥
 ते हैं भव्य सहाय, जे दुस्तर भवदधि तरैं ।
 तत्त्वसार यह गाय, जैवंतौ प्रगतौ सदा ॥ ७४ ॥
 देवसेन मुनिराज, तत्त्वसार आगम कह्यौ ।
 जो ध्यावै हितकाज, सो ग्याता सिवसुख लहै ॥ ७५ ॥

१ राजाके मर जानेपर । २ आयुःकर्म । ३ अनंतज्ञान वीर्य सुख दर्शन
 सूक्ष्म अव्यावाय अवगाहन अगुल्लघु । ४ अन्तिम शरीरसे । ५ शरीररहित ।
 ६ मूलग्रन्थ (७४ गाथा) देवसेनसूरिका प्राकृतमें है, उसका यह अनुवाद है ।

(५९)

सम्यकदरसन ग्यान, चारित सिक्कारन कहे ।
नय व्यवहार प्रमान, निहचें तिहुमें आतमा ॥ ७६ ॥
लाख वातकी वात, कोटि ग्रंथकौ सार है ।
जो सुख चाहौ भ्रात, तो आतम अनुभौ करौ ॥ ७७ ॥
लीजौ पंच सुधारि, अरथ छंद अच्छर अमिल ।
मो मति तुच्छ निहारि, छिमा धारियौ उरविषै ॥ ७८ ॥
द्यानत तत्त्व जु सात, सार सकलमें आतमा ।
ग्रंथ अर्थ यह भ्रात, देखौ जानौ अनुभवौ ॥ ७९ ॥

इति तत्त्वसार ।



(६०)

दर्शनदशक ।

ॐ ।

देखे श्रीजिनराज, आज सब विघ्न बिलाये ।
देखे श्रीजिनराज, आज सब मंगल आये ॥
देखे श्रीजिनराज, काज करना कछु नाहीं ।
देखे श्रीजिनराज, हौंन पूरी मननाहीं ॥
तुम देखे श्रीजिनराजपद, भौजल अंजुलिजल भया ।
चित्ताननि पारन कल्पतरु, मोह सबनिसौं उठि गया ॥१॥
देखे श्रीजिनराज, भाज अथ जाहिं दिचंतर ।
देखे श्रीजिनराज, काज सब हौंइ निरंतर ॥
देखे श्रीजिनराज, राज मनवांछित करिए ।
देखे श्रीजिनराज, नाथ दुख कबहुं न भरिए ॥
तुम देखे श्रीजिनराजपद, रोमरोम सुख पाइए ।
धनि आजदिवस धनि अब धरी, माय नाथकाँ नाइए ॥ २ ॥
धन्य धन्य जिनधर्म, कर्मकाँ छिनमैं तोरै ।
धन्य धन्य जिनधर्म, परमपदसाँ हित जोरै ॥
धन्य धन्य जिनधर्म, भर्मकाँ मूल मिटावै ।
धन्य धन्य जिनधर्म, सर्मकी राह बतावै ॥
जग धन्य धन्य जिनधर्म यह, सो परगट तुमनैं किया ।
भवि खेत पाप-तप तपतकाँ, मेघरूप है सुख दिया ॥ ३ ॥
तेज सूरसम कहूं, तपत दुखदायक प्राणी ।
कांति चंद्रसम कहूं, कलंकित मूरति मानी ॥

१ कल्याणकाँ, आत्महितकाँ । २ पापरूपअद्विसे तप्त । ३ सूर्यसदृश ।

वारिधिसम गुण कहूं, स्वारमें कौन भलप्यन ।
 पारससम जस कहूं, आपसम करै न पर-तन ॥
 इन आदिपदारथ लोकमें, तुम समान क्यों दीजिये ।
 तुम महाराज अनुपमदसा, मोहि अनूपम कीजिये ॥ ४ ॥
 तव विलंब नहिं कियौ, चीर द्रोपदिकौ चाढ़्यौ ।
 तव विलंब नहिं कियौ, सेठ सिंहासन चाढ़्यौ ॥
 तव विलंब नहिं कियौ, सियातैं पावक टाख्यौ ।
 तव विलंब नहिं कियौ, नीरैं मातग उवाख्यौ ॥
 इहविधि अनेक दुख भगतके, चूर दूर किय सुख अवैनि ।
 प्रभु मोहि दुःख नासनविषैं, अब विलंब कारन कवना ॥ ५ ॥
 कियौ भौनतैं गौनैं, मिटी आरति संसारी ।
 राह आन तुम ध्यान, फिकर भाजी दुखकारी ॥
 देखे श्रीजिनराज, पापमिथ्यात विलायौ ।
 पूजा थुति बहु भगति, करत सम्यकगुन आयौ ॥
 इस मार्वार संसारमें, कल्पवृक्ष तुम दरस है ।
 प्रभु मोहि देहु भौभौविषैं, यह वांछा मन सरस है ॥ ६ ॥
 जै जै श्रीजिनदेव, सेव तुमही अघनासक ।
 जै जै श्रीजिनदेव, भेवैं पटद्रव्य प्रकासक ॥
 जै जै श्रीजिनराज, एक जो प्रानी ध्यावै ।
 जै जै श्रीजिनदेव, टेव अहमेव मिटावै ॥

१ पराये शरीरको अर्थात् दूसरी धातुओंको । २ पटतर, उपमा ।
 ३ जलमेंसे । ४ हाथी । ५ पृथ्वीमें । ६ घरसे । ७ गमन । ८ मारवाइली
 (वृक्षरहित सूखेदेश) संसारमें । ९ भेद ।

जै जै श्रीजिनदेव प्रभु, हेय करमरिपु दलनकों ।
हूजै सहाय सँघरायजी, हम तयार सिवचलनकों ॥ ७॥

जै जिनंद आनंदकंद, सुरवृंदवंद पद ।
न्यानवान सब जान, सुगुन-मनि-खान आन पद (?) ॥

दीनदयाल कृपाल, भविक भौजाल निकालक ।
आप वृझ सब सूझ, गूझ नहिं बहुजन पालक ॥

प्रभु दीनबंधु करुनामई, जगउधरन तारन तरन ।
दुखरास निकास स्वदासकौ, हमै एक तुम ही सरन ॥ ८ ॥

देखैनीक लखि रूप, बंदि करि बंदनीक हुव ।
पूजनीक पद पूज, ध्यान करि ध्यावनीक धुव ॥

हरष बढ़ाय बजाय, गाय जस अंतरजामी ।
दरब चढ़ाय अघाय, पाय संपति निधि स्वामी ॥

तुम गुण अनेक मुख एकसौं, कौन भाँति बरनन करौं ।
मन वचन काय बहु प्रीतिसौं, एक नामहीसौं तरौं ॥ ९ ॥

चैत्यालय जो करै, धन्य सो श्रावक कहिए ।
तामै प्रतिमा धरै, धन्य सो भी सरदहिए ॥

जो दोनौं विसतरै, संघनायक ही जानौ ।
बहुत जीवकौं धर्म, मूल कारन सरधानौ ॥

इस दुखमकाल विकराल में, तेरौ धर्म जहां चलै ।
हे नाथ काल चौथौ तहां, ईति भीति सब ही टलै ॥ १० ॥

१ गद ऐसा भी पाठ है । २ संदेह । ३ देखनेलायक । ४ अतिवृष्टि
अनावृष्टि आदि सात । ५ इहलोक परलोक भय आदि सात ।

(६३)

दर्शनदसक कवित्त, चित्तसौं पढ़ै त्रिकालं ।
प्रतिमा सनमुख होय, खोय चिंता गृहजालं ॥
सुखमैं निसिदिन जाय, अंत सुरराय कहावै ।
सुर कहाय सिवपाय, जनम मृति जरा मिटावै ॥
धनि जैनधर्म दीपक प्रगट, पापतिमिर छयकार है ।
लखि साहिवराय सु आँखिसौं, सरधा तारनहार है ॥११॥

इति दर्शनदशक ।



ज्ञानदशक ।

कुंडलिका ।

देखें मूरत स्वामिकी, वीतराग ए आप ।
 रागभाव इनकोँ गयो, रही चेतना व्याप ॥
 रही चेतना व्याप, आपकी सोई जानै ।
 गयो भाव पर जान, ग्यान निहचै रर आनै ॥
 ते सोई निजरूप, भूप सिवसुंदर पेलै ।
 म्याता आठौँ जामै, स्वामिकी मूरति देखै ॥ १ ॥
 जिननैँ जिन नैनैँनसौँ, देखौँ दर्बविलास ।
 दरबित अविनासी सदा, उपजैँ उतपति नास ॥
 उपजैँ उतपति नास, तासैँतैँ सत्ता साधी ।
 निजगुन गुनी अभेद, वेद सुखरीत अराधी ॥
 साधक साध उपाध, व्याध तजि दीनी तिननैँ ।
 आप आपरसमगन, लगन लौँ कीनी जिननैँ ॥ २ ॥
 मानी क्रोधी कौन है, विनैँ छिमाधर कोय ।
 मान विनैँ चितधारतैँ, जीवभाव नहिँ होय ॥
 जीवभाव नहिँ होय, जोय विकल्प उपजावै ।
 नामकथन भ्रमैँछाप, आप निरनाम कहावै ॥
 नय परमान निछेप, लेपकी कौन कहानी ।
 आप आप निरैँवाच, राच हूमनैँ यह मानी ॥ ३ ॥
 मैँ मैँ काहे करत है, तन धन भवन निहार ।
 तू अविनासी आतमा, विनासीक संसार ॥

१ प्रहर । २ उपाधव्यवहारसे । ३ अनपुत्र है, मिया है । ४ निरान्य-
अवश्य ।

विनासीक संसार, सार तेरौ तोमाहीं ।
 आप आप सिरमौर, और उपमा जग नाही ॥
 विन जानै चिरकाल, जाल जग फिरौ बहुत तैं ।
 मुद्ध बुद्ध अविरुद्ध, आतमा सो मैं सो मैं ॥ ४ ॥
 करता किरिया कर्मकौ, करै जीव व्योहार ।
 निहचै रतनत्रयमई, है अभेद निरधार ॥
 है अभेद निरधार, धारना ध्यान न जाकैं ।
 साहज सेवक एक, टेक यह बरतैं ताकैं ॥
 आप आपमें आप, आपकौ पूरन धरता ।
 सुसंवेद निजधरम, करम किरियाकौ करता ॥ ५ ॥
 ग्यानी जानै ग्यानमें, नमें वचन मन काय ।
 कायम परमारथविषै, विषै-रीति विसराय ॥
 विषै रीति विसराय, राय चेतना विचारै ।
 चारै क्रोध विसार, सार समता विसतारै ॥
 तारै औरनि आप, आपकी कौन कहानी ।
 हानी ममता-बुद्धि, बुद्धिअनुभातैं ग्यानी ॥ ६ ॥
 सोहं सोहं होत नित, साँस उसासमँझार ।
 ताकौ अरथ विचारियै, तीन लोकमें सार ॥
 तीन लोकमें सार, धार सिवखेतनिवासी ।
 अष्टकर्मसाँ रहित, सहित गुण अष्टविलासी ॥
 जैसाँ तैसाँ आप, थाप निहचै तजि सोहं ।
 अजपा-जाप सँभार, सार सुख सोहं सोहं ॥ ७ ॥

(६६)

दरव करम नोकरमतेँ, भावकरमतेँ भिन्न ।
विकल्प नहीं सुबुद्धकै, सुद्ध चेतनाचिन्न ॥
सुद्ध चेतनाचिन्न, भिन्न नहिँ उदै भोगमैँ ।
सुखदुख देहमिलाप, आप सुद्धोपयोगमैँ ॥
हीरा पानीमाहिँ, नाहिँ पानी गुण ह्वै कव ।
आग लगैँ घर जलैँ, जलैँ नहिँ एक नभदरव ॥ ८ ॥

जो जानैँ सो जीव है, जो मानैँ सो जीव ।
जो देखैँ सो जीव है, जीवैँ जीव सदीव ॥
जीवैँ जीव सदीव, पीव अनुभौरस प्राणी ।
आनँदकंद सुवंद, चंद पूरन सुखदानी ॥
जो जो दीसैँ दर्ब, सर्व छिनभंगुर सो सो ।
सुख कहिँ सकैँ न कोइ, होइ जाकौँ जानैँ जो ॥ ९ ॥

सब घटमैँ परमात्मा, सूनी ठौर न कोइ ।
बलिहारी वा घटकी, जा घट परगट होइ ॥
जा घट परगट होइ, धोइ मिथ्यात महामल ।
पंच महाव्रत धार, सार तप तपैँ ग्यानवल ॥
केवल जोत उदोत, होत सरवग्य दसा तब ।
देही देवलँ देव, सेव ठानैँ सुर नर सब ॥ १० ॥

१ पुद्गल पिण्डको द्रव्यकर्म कहते हैं । २ कर्मके उदयको जो सहकारी द्रव्य वह नोकर्म द्रव्य है । ३ पुद्गलपिण्डमें आत्मगुण घातनेकी जो शक्ति तो भाव कर्म है । ४ मन्दिर ।

(६७)

द्यानत चक्री जुगलिये, भवँनपती पातौल ।
सुर्गइंद्र अहमिंद्र सब, अधिक अधिक सुख भाल ॥
अधिक अधिक सुख भाल, काल तिहुं नंत गुनाकर ।
एकसमै सुख सिद्ध, रिद्ध परमातमपद धर ॥
सो निहचै तू आप, पापविन क्यौं न पिछानत ।
दरस ग्यान थिर थाप, आपमै आप सु द्यानत ॥ ११ ॥

इति ज्ञानदशक ।



(६८)

द्रव्यादि चौबोल-पचीसी ।

उत्तर ।

द्रव खेत अरु काल, भाव द्रव पट तत्त्व नव ।
न्वायक दीनदयाल, सो अरहंत नमो सदा ॥ १

इच्छां गिनती । सर्वदा इच्छांसा ।

जघन एक धर्मद्रव्य, काठानू असंख्यात,
तातें अनंते अभव्य, सव्य दव्य गहे हें ।
ताहीतें अनंते सिद्ध, बंदीं मन वच काय,
सिद्धतें अनंते जीव, निगोदमें लहे हें ॥
यातें अनंते निगोद, पांचांड्रीआस्रवतें,
अनंते सो परमानू, उतकिष्टे कहे हें ।
यही द्रव्य भेद है, जघन्य मध्य उतकिष्ट,
सरधा करतें, सरधानी सरदहे हें ॥ २ ॥

उत्तरां गिनती ।

जघन एक आकासकां प्रदेश अनूसम,
सर्व दर्वदेसनिर्को धानदान देत है ।
आठ परदेस मेरुतळें जीव लुवै नाहिं,
जघनं निगोद देह असंख्यात खेत है ॥
अंगुल जो हाथ घनुष कोस जोजनभेद,
सैनी औ प्रतर लोक दर्वकां निकेत है ।

१ चतुर्गतिनिगोदमें । २ निरनिगोदमें । ३ उच्चपचासकनिगोदियाकां
जघन्यावगाहना । ४ ऐक्येणां ।

(६९)

लोकतँ अनंत है अलोकसेत उतक्रिष्ट,
ज्योमसौ अमल मेरो आतमा सचेत है ॥ ३ ॥

कालकी गिनती ।

जघन काल एक ही समैको है वर्तमान,
तीन समै अनाहार आवली उसास है ।
घरी दिन मास वर्ष पूरवांग आदि भेद,
इकतीस ताके अंक डेढ़सौ विलास है ॥
पल सागर छभेद नाना भांति और एक
ताहीतँ अनंतता अतीत समै रास है ।
याहीतँ अनंत गुण समै हैं अनौगतके,
काल उतक्रिष्ट सब ग्यानमें प्रकास है ॥ ४ ॥

भावकी गिनती ।

भावको जघन्य कहाँ सूच्छम निगोदियाको,
एक समै एक अंस खुल्या निरौवर्न है ।
तीनसँ चौतीस स्वास छह हजार वारै वार,
जनम मरन करै अंत बेर मर्न है ॥
भयौ है कलेस घोर खुली है तनक कोर,
दूजे समै वढ़ै ग्यान विधिकौ आचर्न है ।

१ मरने बाद जीव जबतक आहारवर्गणाको ग्रहण नहीं करता है, उस समयतक उसे अनाहारक कहते हैं । २ व्यवहारपत्य उदारपत्य अदापत्य इसीतरह व्यवहार सागर उदारसागर अदासागर । ३ खानेवाला काल । ४ सूक्ष्मनिगोद लक्ष्यपर्याप्तक जावके उत्पन्न होनेके प्रथम समयमें सबसे छोटा हमेशा प्रकाशमान और त्रिसुद्धा दोर्द कर्म दकनेवाला नहीं है ऐसा ज्ञान होता है, उसको निराव-रण कहते हैं । ५ ज्ञानावरणादि कर्मोंका ।

(७०)

मति श्रुति औधि^१ मनपरजै अनेक भेद,
उतकिष्टो केवल सरव संसै हर्न है ॥ ५ ॥

छह द्रव्यके वारह अधिकार ।

परिनामी दोय जीव पुगल प्रदेसी पांच,
काल विना करतार जीव भोगै फल है ।
जीव एक चेतन आकास एक सर्वगत,
एकें तीन धर्म औ अधर्म नभदल है ॥
मूर्तीक एक पुदगल एक छेत्री व्योम,
नित्य चार जीव पुदगल विना सु लहै ।
हेत पंच जीवकों है क्रिया जीव पुगलमें,
जुदे देस आन पच्छ भासतु विमल है ॥ ६ ॥

छह द्रव्यकी और प्रदेशोंकी संख्या ।

धर्म औ अधर्म एक दर्ब देस असंख्यात,
व्योम एक है ताके परदेस अनंत हैं ।
काल असंख्यातके प्रदेस असंख्यात जुदे,
चेतन अनंत एकके असंख नंत हैं ॥
पुगल अनंतानंत दर्ब तीन भाँति देस,
संख भी असंख भी अनंत भी महंत हैं ।
एही छहों दर्ब लोक आगै और है अलोक
देत हौं त्रिकाल धोक जामें झलकंत हैं ॥ ७ ॥

१ अवधि ज्ञान । २ एक हालतको छोड़कर दूसरी हालतमें जानेवाले ।
३ बहुत प्रदेशवाले । ४ एक अर्थात् अखंड द्रव्य । ५ मिथ्या दर्शन अविरति
प्रमाद कषाय और योग ये बंध कारण हैं । ६ यह कवित्त पृष्ठ ३४ में भी
आ चुका है ।

(७१)

निगोद जीवसंख्या ।

खंघ हैं निगोद गोल लोकतैं असंख गुणे,
एक खंघ अंडर असंख लोक कहे हैं ।
एक एक अंडरमें आवास असंख लोक,
पुलवी आकासमें असंख लोक लहे हैं ॥
एक एक पुलवी असंख लोक हैं सरीर,
एक तन सिद्धसौं अनंत जीव गहे हैं ।
आठ थानमाहिं नाहिं भरे तीन लोकमाहिं
आप जान दया आन ग्याता सरदहे हैं ॥ ८ ॥

क्षेत्रका भेद, परमाणुसमप्रदेशसे योजनतक ।

अनंते परमानूकौ खंघ सन्नासन्न नाम,
त्रटरैन त्रसरैन रथरैन सुने है ।
कुरुहरि हैमवत भर्त वाल लीख तिल,
जौ अंगुल वारै भेद आठ आठ गुने हैं ॥
अंगुल चौवीस हाथ चार हाथकौ है चाप,
चाप दो हजार कोस चौ जोजन मुने हैं
पंच सत गुना महा जोजनकौ पैलकूप,
चंदत हौं ग्यान जिन संसै सब धुने हैं ॥ ९ ॥

१ लोकसे असंख्यात गुणे स्कंध होते हैं । २ एक एक स्कंधमें उससे असंख्यात लोकगुणे अंडर हैं इसीतरह सर्वत्र जानना । ३ पृथिवी, जल, तेज वायु, केवली, आहारक, देव और नारकियोंके शरीरमें निगोद नहीं रहते हैं । ४ अनन्त परमाणु समूहके स्कंधको सन्नासन्न कहते हैं (यद्यपि अनन्ते परमाणु, पुंजको अवसन्नासन्न और आठ अवसन्नासन्नको एक सन्नासन्न कहते हैं, तथापि यहां उसकी विविक्षा नहीं है) ५ सन्नासन्नसे आठगुना त्रटरैन । ६ कुरुक्षेत्रके जीवोंके बाल रथरैनसे आठ गुणे हैं, इसी प्रकार हरिक्षेत्रमें समझना । ७ व्यवहारपल्यका गड्डा ।

जंबूद्वीपसे आगेके द्वीपसमुद्र कितने २ गुणे हैं ?

जंबू एक लाख दो दो दोनों ओर छौनोर्दधि,
सब पांच सूची गुनी पचीस फलाइए ।
दीप एकलौ निकार चौबीस समुद्रधार,
जंबूसौं चौबीस गुणे उदधि घटाइए ॥
धातखंड चार चार सब सूची तेरहकी,
गुनौ सौ उनहत्तरि पचीस घटाइए ।
जंबूसेती एक सौ चवाल गुनौ धातखंड
आगें दधि दीप यौं ही जिनवानी गाइए ॥ १० ॥

गोशूनसे लेकर लोकाकाशतक क्षेत्रभेद ।

विवहारपल्ल रोम एक एक रोमनिपै,
असंख्यात कोट वर्ष समै रोम राखिए ।
यह पैल उद्धार कोराकोरी पचीसगुनौ,
एते दीप सागरकौ राज् अभिलाखिए ॥

१ लवण समुद्र । २ एक समुद्र या द्वीपके सिरेसे लेकर दूसरे सिरे तककी रेखाके प्रमाणको जो कि फेन्द्रमें होकर जाती है सूची कहते हैं । इसप्रकार १ लाख जंबू द्वीप, दोनों तरफ दो दो लाख लवणसमुद्र सब मिलकर पांच लाख, इसको इसीको गुणनेसे पचीस हुए । इसमेंसे जंबूद्वीपकी एक लाखसूचीको घटानेपर जंबूद्वीपसे लवणसमुद्र चौबीस गुणा भया । इसीप्रकार लवणसमुद्रके दोनों तरफ चार चार धातकी खंड है, सब मिलकर १३ हुए । इसको इसीसे गुणनेसे १६९ हुए । इसमेंसे पचीस घटानेसे १४४ गुना जंबूद्वीपसे धातकी खंड भया । इसी प्रकार सर्वत्र जानना । ३ व्यवहार पल्लके प्रत्येक रोमके ऊपर असंख्यातकोट वर्षके समय प्रमाण रोम रखनेसे उद्धार पल्ल्य होता है । ४ उद्धार पल्ल्यसे पचीसगुने (अडाई सागर प्रमाण) सब द्वीप समुद्र होते हैं । इतने प्रमाणहीको एक राज् कहते हैं ।

सातराज् लोकसेनी उन्चासराज्निकी,
 लोककी प्रसर दोनी गुणी लोक आधिप ।
 भेद खेतके अनेक भेद कहा कोई एक,
 करिके विवेक आय सांतरस आधिप ॥ ११ ॥

समयके केर प्रवेक कालके ।

असंख्यात समे एक आयली बखानी म्यानी,
 संग आयली मिलेन होन एक स्यास है ।
 सैंतीससे तिहचरि स्यास एक मुहरन,
 तीस एक दिन दिन तीस एक मास है ॥
 चारै मास वर्षे लाख चरामी पूरवांग,
 गुणाकर सौ पूरव आंग भेद रास है ।
 नर्कस्वर्ग अवस्थित गुनथान सागरना,
 ग्यानमें प्रकास दर्श देखो घट वास है ॥ १२ ॥

कालके चार भेद और कल्पसंज्ञा ।

चारि तीने दोय एक कोराकोरी दधि चौथा,
 बीयालीस घाट दो वियालीस हजार है ।
 तीन दोय एक पत्य आय कोर पूरवकी,
 बीसां सौ बीस वर्षे नर त्रिजंच धार है ॥

१ सात राज् प्रमाण जगच्छणी होती है । २ उन्चास राइका लोक प्रसर होता है । ३ चौरासी लाखको चौरासी लाखसे गुणा करनेसे पूरव होता है । ४ प्रथम सुखमा सुखमा काल चार कोड़ाकोड़ी सागरका होता है । ५ दुसरा सुखमा काल तीन कोड़ाकोड़ी सागरका । ६ तीसरा सुखमा दुखमा दो कोड़ाकोड़ी सागरका । ७ चौथा सुखमा सुखमा ४२००० वर्षकम एक कोड़ाकोड़ी सागरका । ८ पांचवां सुखमाकाल २१ हजार वर्षका, इसी तरह छठा सुखमा सुखमा भी होता है । ९ चौथे कालमें उत्कृष्ट आयु एक किराह पूरे वर्षकी होती है । १० पंचममें १२० वर्षकी । ११ छठेमें बीस वर्षकी ।

(७४)

तीन दोय एक दिन बीतें लेत हैं अहार,
एक बार दोय बार बहु बार कार हैं ।
अवसर्पिनी छह काल उत्सर्पिनी उलटी,
बीस कोराकोर भन्यौ प्रभुजी उद्धार है ॥ १३ ॥

पत्य सागर और निगोद ।

कूप रोम सौ सौ वर्ष विवहार पत्य बीज,
तातैं असंख्यातकौ उधार पत्य नाम है ।
यातैं असंख्यात गुणौ पत्य अद्धा उतकिष्ट,
दस कोरा कोरीकौ इक सागर स्वाम है ॥
बीस कोरा कोरी दधि ताकौ एक कल्प नाम,
ता मध्य चौबीसी दोय तिनकौ प्रनाम है ।
निकलि निगोद दो हजार-दधि इहां रहै,
पावै सिव नाहीं जावै वही सही ठाम है ॥ १४ ॥

भाव चेतना तीन प्रकार, पांचो ज्ञानके मूल भाव पांच, उत्तर भाव त्रेपन ।

भावं एक चेतनसौं तीन कर्म फल ग्यान,
ग्यान एक पंच भेद भाषत मुनीस हैं ।

१ कल्पकाल । २ एक योजन (चारकोस) लंबे चौड़े कूपमें एक दिनसे सात दिन तकके भेड़के बच्चेके जिनका कि कैचीसे दूसरा खंड न हो सके ऐसे भरे हुए बालोंमेंसे एक २ बालको सौ २ वर्षमें निकाले । जितने वर्षोंमें खाली होवे, उसे व्यवहार पत्य कहते हैं । ३ दस कोड़ा कोड़ी पत्यका सागर होता है । ४ सागर । ५ दो हजार सागर । ६ आत्मगुण । ७ कर्मचेतना, कर्म-फलचेतना, ज्ञानचेतना (सम्यग्दृष्टिके होनेवाली) ।

(७५)

मति तीनसै छतीस श्रुत ग्यान भेद वीस,
अंग अंग-वाहज पूरव सौ चालीस हैं ॥
औधि तीन पेट भेद मर्नपरजै दो भेद
केवल अभेद पांच भाव सिद्ध ईस हैं ।
मूल पंच भावके तरेपन उत्तर भाव,
वंदत हों एक जहा सर्व भाव दीस हैं ॥ १५ ॥

त्रेपनभाव और चौदह गुणस्थान ।

मिथ्या गुणस्थान भाव, चौतीस वत्तीस दूजे,
तीजेमें तेतीस, चौथे छत्तीस बखानिए ।

१ बहु, बहुविध, क्षिप्र, अतिःसूत अनुक्त, ध्रुव इनके उलटे एक, एकविध, अक्षिप्र, निःसूत, उक्त, अध्रुव, इनको अवग्रह ईहा अवाय धारणासे गुणा करनेसे ४८ हुए । इनको पांच इन्द्रिय छटे मनसे गुणा करनेसे २८८ हुए । व्यंजनविग्रह चक्षुः और मनसे नहीं होता, इस लिये चार इन्द्रियोंसे गुणा करनेसे ४८ हुए । सब मतिज्ञानके भेद ३३६ हुए । २ पर्याय पर्यायसमास (सूक्ष्मनिगोद लब्धपर्यायसकका) अक्षर, अक्षरसमास, पद, पदसमास, संघात, संघातसमास, प्रतिपत्तिः, प्रतिपत्तिसमास, अनुयोग, अनुयोगसमास, प्राश्रुतप्राश्रुतः प्राश्रुतप्राश्रुतसमास, प्राश्रुत, प्राश्रुतसमास, वस्तु, वस्तुसमास, पूर्व, पूर्वसमास, ये २० भेद श्रुतज्ञानके हैं । ३ अंगवाह्य । ४ देशावधि, परमावधि, सर्वावधि । ५ अनुगामिनी, अननुगामिनी, वर्धमान, हीयमान, अवस्थित, अनवस्थित । ६ ऋजुमति, विपुलमति । ७ कुमति, कुश्रुत, विभंगावधि, चक्षुर्दर्शन, अचक्षुर्दर्शन, दान, लाभ, भोग, उपभोग, वीर्य, पांच लब्धि, चार गति, चार कषाय, तीन लिङ्ग, मिथ्यादर्शन, अज्ञान, असंयत, अस्तिद्ध, छै लेश्या, जीवत्व, भव्यत्व और अभव्यत्व ये चौतीस भाव मिथ्यात्व गुणस्थानमें हैं । ८ दूसरे गुणस्थानमें, मिथ्यादर्शन अभव्यत्व छोड़कर ३२ भाव होते हैं । ९ पिछले ३२ में अवधिदर्शन और मिलानेसे ३३ होते हैं । १० तीन अज्ञानकी जगह तीन सम्यग्ज्ञान और औपशमिक क्षायोपशमिक क्षायिक सम्यक्त्व मिलानेसे ३६ होते हैं ।

(७६)

पाँच छटें सातें, इकतीस आठें अठाईस,
नौमें अठाईस दसैं बीस प्रमानिए ॥
ग्यारहैं इकवीस वारैं बीसैं तेरैं चौदह,
चौदहमें तेरैं सिद्धमाहिं पाँच जानिए ।
सम्यक दरस ग्यान जीवत अनंत बल,
दर्व दिष्ट सासतो सुभाव आप मानिए ॥ १६ ॥

सामान्य विशेष २१ स्वभाव ।

असंत नासत नित्य अनित्य अनेक एक,
भव्य औ अभव्य भेद औ अभेद परम है ।
चेतन अचेतन अमूरत मूरत सुद्ध
असुद्ध विभाव एक परदेस धर्म है ॥
बहु परदेस उपचार दस ए विसैस
पहली तुकके ग्यारैं ते समान धर्म हैं ।

२ नरक, देव गति और तीन अशुभ छेद्या पदानेसे तथा असंय-
तकी जगह संयत होनेसे ३१ होते हैं । इसी प्रकार छटमें सातवेंमें संयत-
संयतकी जगह क्षायोपशमिक चारित्र तथा तिष्यगतिकी जगह मनःपर्यंत
ज्ञान ओहनेसे ३१ होते हैं । २ शुभ आदिकी दो छेद्या क्षायोपशमिक सम्यक्त्व
पदानेसे २८ होते हैं । ३ आदिकी तीन कथाय तीन वेद पदानेसे २२ भाव होते हैं
४ सुश्रम लोभकेविना २१ भाव होते हैं । ५ औपशमिक सम्यक्त्व पदानेसे २० होते
हैं । ६ तीन दर्शन तीन ज्ञान पदानेसे १८ होते हैं । ७ एकछेद्या पदानेसे १३
भाव होते हैं । ८ अनंतज्ञान वीर्य दर्शन मुख जीवत्व ये पाँच भाव सिद्धोंमें
हैं । ९ अस्तित्व नास्तित्व नित्यत्व अनित्यत्व अनेकत्व एकत्व भव्यत्व अभव्यत्व
भेद अभेद और परम (पारणामिक भावकी प्रधानतासे) ये द्रव्योंके ग्यारह सामान्य
स्वभाव हैं और चेतन अचेतन मूर्त अमूर्त शुद्ध अशुद्ध विभाव एकप्रदेश अनेक-
प्रदेश और उपचरित ये द्रव्योंके दस विशेष स्वभाव हैं ।

(७७)

जीवके इकीस पुद्गल वीस धर्माधर्म
नभ सोलै.काल पंद्रै जानै होत सर्भ है ॥ १७ ॥

द्रव्य क्षेत्र काल अल्प बहुल तथा इनके सदृशोंके नाम समवाय ।

अणूसों अनंत काल समैसों अनंत खेत,
नभसों अनंतानंत भाव ग्यान मानिए ।

दर्वसों समान धर्म दर्य औ अधर्म दर्य
खेतसों समान पंच पैताला बखानिए ॥

कालसों समान आय सागर तेतीस तहां
सर्वारथसिद्ध नर्क माघवी प्रवानिए ।

भावसों समान ग्यानरूप है सरय जीव
एक आदि भेद बहु आगमतें जानिए ॥ १८ ॥

पद द्रव्य नव तत्त्वके द्रव्य क्षेत्र कालभावका जुदा २ प्रमाण ।

दर्वकौ प्रमान, जीव सिद्धसों अनंत गुणों,
खेतकौ प्रमान जीव लोकतें अनंत है ।

कालकौ प्रमान, जीव अनूसों अनंत गुणों,
भाव नभसों अनंतानंत ज्ञानवंत है ॥

पांच दर्व नव तत्त्व, इनके प्रमान चार,
पंचसंग्रै ग्रंथमाहिं, भापो विरतंत है ।

इहां कहै भेद बड़े धिरता न कौन पढ़ै,
जाही ताही भांति आप जानै सोई संत है ॥ १९ ॥

१ चेतनस्वभाव मूर्तस्वभाव अशुद्धस्वभाव विभावस्वभाव और उपचरितस्वभाव
ये पांच पदानेसे धर्मादि तीनमें सोलह रहते हैं । २ अनेक प्रदेश घटानेसे
कालमें पन्द्रह स्वभाव हैं । ३ गोमठसारका दूसरा नाम पंचसंप्रद भी है ।

(७८)

छहों द्रव्य लोकमें हैं ।

छहों दर्व भरे लोक, कोई कहै कछु नाहि,
अहं शब्दसेती जीव जानियै प्रतच्छ है ।
पुगल प्रगट देह धन आदि दीसत हैं,
धर्मविना सिद्ध चले जाहिगे कुपच्छ है ॥

अधरम दर्व विना थिरता सहाय कौन,
मास वर्ष बोदा नया, कालहीसों लैच्छ है ।
व्योम विना रहैं कहां, सरधा मुकत मूल,
मोखपुरपंथी ताहि यह राह दच्छ है ॥ २० ॥

छहों द्रव्य क्षेत्र काल भाव उत्पाद व्यय ध्रौव्य स्वभाव विभाव ।

दर्व सत्तारूप आपखेतै परदेस माप,
काल समै मरजादा, भावें मूल सत्त है ।
चार-मई आप तिहुं काल सर्व दर्व लसै,
गुन द्रव्य परजाय होत नास व्यक्त है ॥

चारोंके सुभाव ग्यात ध्रौव्य व्यय उतपात,
सुभाव विभाव जीव जड सेतं रक्त है ।
पांचनिसौं कौन काज अपनौ विभाव त्याज,
कीजियै इलाज सुद्ध भाव बड़ी भक्ति है ॥ २१ ॥

१ आत्मामें अहं (मैं) ऐसा स्वसंवेदन प्रत्यक्ष होता है । २ पुराना । ३ देखा जाता है । ४ धर्म धर्मांमें अभेद विवक्षासे सत्स्वरूप पदार्थके देश ही स्वद्रव्य हैं । ५ आकाशमें स्थित अपने देशांश ही स्वक्षेत्र है । ६ निजगुणांश (ऊर्ध्वांश पर्याय) स्वकाल है । ७ निज ज्ञानादिगुण स्वभाव हैं । ८ स्वभावपरिणमन शुद्ध जीवस्वरूप है । ९ विभावपरिणमन पुद्गलका भाग है । यहां केवल पुद्गल पर्यायकी ही विवक्षा है । १० सफेद ।

शी १ श्री १

पद्द्रव्यके दश सामान्य गुण और सोलह विशेष गुण ।

अस्त वस्त दरव अगुरू-लघु परमेय,
परदेस चेतन अचेतन अमूरती ।
मूरतीक समान दस हैं गुन दर्वनके,
जुदे जुदे आठ आठ भापे बुध-पूरती ॥
ग्यान दर्स सुख बल वर्न रस गंध फास,
गति थिति अवगाह वरतना मूरती ।
चेतन अचेतन अमूरत विसेस सोलै,
दोके पट चौके तीनँ जानै आप सूरती ॥ २२ ॥

पद्द्रव्य पंचास्तिकाय ।

जीव पुग्गल धरम अधरम व्योम पंच,
अस्तिकाय काल मिलै पट द्रव्य कहिए ।
एक एक दरवमै अनंत अनंत गुन,
अनंत अनंत परजाय सक्ति लहिए ॥
ब्रह्मा करै विष्णु धरै ईस हरै कभी नाहिं,
तिहुं काल अविनासी स्वयं-सिद्ध गहिए ।

१ अस्तित्व, वस्तुत्व, द्रव्यत्व, अगुरूलघुत्व, प्रमेयत्व, प्रदेशत्व, चेतनत्व, अचेतनत्व, अमूर्तत्व, और मूर्तत्व दश गुण द्रव्योंके सामान्य हैं । २ चलनेमें सहा-कारीपना । ३ रुकनेमें सहायपना । ४ अन्यवस्तुको अपनेमें जगहका देना । ५ वस्तुके रूपान्तर करनेमें सहाय होना । ६ जीवके ज्ञान दर्शन सुख वीर्य चेतनत्व और अमूर्तत्व ये छै विशेष गुण हैं । अजीवके स्पर्श रस गंध वर्ण मूर्तत्व और अचेतनत्व ये छै विशेष गुण हैं । ७ धर्ममें गतिहेतुत्व अमूर्तत्व अचेतनत्व हैं । अधर्ममें स्थितिहेतुत्व अमूर्तत्व अचेतनत्व है । आकाशमें अवगाहहेतुत्व अमूर्तत्व अचेतनत्व है । कालमें वर्तनाहेतुत्व अमूर्तत्व अचेतनत्व हैं ।

(८०)

सब भेद जानौ जड़ मिलेकौं जुदा ही मानौ,
आप आप-विषै देखै तातैं दुःख दहिए ॥ २३ ॥

अन्त मंगल । कवित्त (३१ मात्रा)

दरव प्रछन्न काल कालानू, खेत प्रछन्न अलोक प्रदेश ।
भाव ग्यान केवल मिथ्याती, काल अतीत अनागत भेस ॥
दरव खेत अरु काल भाव सब, देखौ जानौ तुमहि जिनेस ।
हाथ जोरि बंदना करत हौं, हर मेरौ संसार कलेस ॥२४॥
कवित्त बनाए सबनि सुनाए, मन आए गाए गुन ग्यान ।
चरचा कूप अनूपम वानी, हंस भूप चिद्रूप-निसान ॥
गोमटसार धार धानतनै, कारन जीव-तत्त्वसरधान ।
अच्छर अरथ अमिल जो देखौ, लेखौ सुद्ध छिमा उर आन ॥

इति द्रव्य चौबोल पच्चीसी ।



(८१)

व्यसनत्याग षोडश ।

सर्वैया तेईसा (मतगयन्द) ।

पापकौ ताप कलेस असेस,
निसेस यथा छिनमाहिं हरें हैं ।
देव नमैं गन-मौलि दिपैं,
मनि नील मनौ अलि सेव करैं हैं ॥
नाम ही सांत करै जिनकौ,
तिनकौ जस इंद्र कहा उचरैं हैं ।
सांतिप्रभू जिन-रायके पाय-
पयोज भजैं भवतैं निकरैं हैं ॥ १ ॥

ग्यारह प्रतिमा । सर्वैया इकतीसा ।

दंसनविसुद्ध वरै वारै व्रतसौं न टरै,
सामायिक करै धरै पोसह विधानकै ।
सरब सचित्त टारि छारिकै निसा अहार,
सदा ब्रह्मचार धार निरारंभ ठानकै ॥
परिगह त्याग देत पापसीखसौं न हेत,
याके काज किया लेत ना भोजन दानकै ।
श्रावक ग्यारह पालैं पहलैं विसन टालैं,
एक हू न प्रतिमा है एक विस्त्वानकै ॥ २ ॥

कवित्त (३१ मात्रा) ।

ग्यारै प्रतिमा भिन्न भिन्न सब, कहीं सातमैं अंगमँझार
ताके सरब भेद लखि कीनैं, आचारजों श्रावकाचार ॥

१. चन्द्रमाके समान । २. भौरा । ३. पाद-पयोज=चरणकमल । ४. प्रोषण-
प्रतिमा ।

ध. वि. ६

(८२)

अंग देखिकै ग्रंथ पेलिकै, जानौ सकल गृही-व्योहार ।
संजम नीव मनुष-भौ-सोभा, विसन त्याग-विधिकहूँ विचार ३

सप्तव्यसनोके नाम । अडिह छन्द ।

जूवा आमिष, मदिरा दारी छोरिए ।
आखेटक चोरी, पर-तियहित तोरिए ॥
महा-सूर ए सात, विषम-दुख दैनको ।
सात नरकनै भेजे, जग-जिय लैनको ॥ ४ ॥

जूवा व्यसन । कवित्त (३१ मात्रा) ।

अजस-धाम सबविसनस्वाम, इक नरक गौनको सौनै निहार
सकल-आपदा-नदी-सैल यह, पाप विरछको वीज विचार ॥
धन सुभ धर्म सर्भ सब खंडै, मंडै झूठ वचन-व्योहार ।
द्यूत भूत वस ऊत परै मति, परगट देख देख संसार ॥ ५ ॥

सवैया इकतीसा ।

आरति अपार करै, मार सांचसौं विगार,
जस सुख दर्व पुन्य प्रभुता विनास है ।
जीतेको त्रिपति नाहिं हारे पै न गांठिमाहिं,
लेत है उधार देत महा दुःखरास है ॥
और कौन बात तातको न इतवार जात,
नारिको नहीं सुहात मात हून पास है ।
चौपड़ हू त्याग धर्मध्यान लाग वडभाग,
आयु तौ तनक सोऊ होत सदा नास है ॥ ६ ॥

१ वैश्यागमना । २ शिकार । ३ अक्रीतिका घर । ४ जानेके लिये । ५ जीना,
सोडिया । ६ पर्वत । ७ विश्वास ।

आमिष-व्यसन ।

पानी पाक गंदी देह लोकमाहिं कहै ऐह,
 पाकसेती पाक गंधसेती गंध होत है ।
 जलसेती मेवा नाज उत्तम सरव साज,
 भूत-भयौ मांस कैसँ उत्तम उदोत है ॥
 हिंसा विना वनै नाहिं करकै नरक जाहिं,
 सहैज भयौ अनंत जीवकौ निगोत है ।
 नाम लैनौ छूवनौ देखनौ नाहिं संतनिकाँ,
 अंगीकार कौन वात वैधै नीच गोत है ॥ ७ ॥
 फिरत अनादि-काल एक एक जीवनिसौं,
 तात मात सुत नारि नाते बहु भए हैं ।
 एक जीव घात कियै सब ही कुटुंब हल्यौ,
 हिंसाके भावनिसौं निज हू मर गए हैं ॥
 जोई जीव मरै सोई क्रोधकी लगनसेती,
 मारै भव भव ताहि वैर-भाव छए हैं ।
 जीतवता चाही जिनाँ जीवौकौं विराधे नाहिं,
 भांति भांति पोष सुख आपनिकाँ लए हैं ॥ ८ ॥

मदिरा-व्यसन ।

कवित्त (३१ मात्रा)

मदिरा पीय मातसौं कु-नैजर, महानिलज ताकाँ कहि कोय ।
 देखौ और राहमैं चाटै, स्वान पूतमुख मीठा होय ॥

१ पवित्र । २ अपवित्र । ३ प्राणीसे पैदा हुआ । ४ आप ही आप हुआ
 अर्थात् स्वयं मरे हुए प्राणीका मांस । ५ बुरी नजर-कामवासना ।

और लैन आयौ कहि हमकौ, दीजै इसतैं अधिका होय ।
ऐसौ मद को गहै विचच्छन, भांग खाय नहिँ उत्तम सोय ॥१॥

वेदया-व्यसन ।

मत्तगयन्द सर्वया ।

माँसकौं खात सुहात सदा मद, वात मृपा तन नीचनि भैंटा ।
कीरत दाहक जी रत चाहक, दामकी गाहक ज्याँ गुर-चीटा ॥
कूर सुभाव उपाव विना नर, अंबर हूवत लेत हैं छीटा ।
नकसखी लख आन मिलै, गनिका कहँ जेम कुहारीकौ धीटा ॥

शिकार-व्यसन ।

सर्वया इकतीसा ।

दर्व नाहिँ हरै पर नरसौं न वात करै,
वेदया मदकौ न काज जूवा नाहिँ जानती ।
पंज ऐव सरै विना सदा दाँत धरै तिना,
पुरसौं दई निकास वनवास ठानती ॥
कछू नहीं पास भय-त्रास रच्छासौं निरास
सबकौ सहाय दिछीपति तोहि मानती ।
साहनिका साह पातसाह महंमदसाह
साहवसौं मृगी दीन वीनती बखानती ॥ ११ ॥

चोरी-व्यसन ।

भावौ कोई दर्व हरौ भावौ कोई प्रान हरौ,
दोज हैं समान केई मूढ़ यौ कहत हैं ।

१ शराव । २ झूठ । ३ छुआ हुआ । ४ मनमें संभोग चाहनेवाली । ५ जैसे
गुड़पर चींटे आ लगते हैं । ६ यदि किसीने वेदया का बखर छू जावे, तो उसे
छीटा लेने पड़ते हैं—लान करना पड़ते हैं । ७ कुल्हारीमें जो लकड़ी पीई
जाती है, उसे बीटा या बेंट कहते हैं । ८ चाहै ।

राजमल जन

ॐ ५ ६ ७

(८५)

दर्व लैन काज प्रान दैन जात रनमाहिं,
याकौ नाव जीतवसौं जीतव रहत हैं ॥
प्रान हरें एक नास दर्वसौं कुटव त्रास,
प्रानसेती दर्व-दुःख अति ही महत हैं ।
यातें चोर भाव निरवार है दयानतदार
सत्तकी पदवी सार सज्जन लहत हैं ॥ १२ ॥

परस्त्रीव्यसन ।

साधनिनै त्रिया जात लखी सुता सुसौ मात
हीनसक्त सब छांडि व्याही एक वरी है ।
रावनकौ देखौ सब परनारि सेई कव,
अवलाँ अकीरति दसौं दिसामैं भरी है ॥
चोरी दोष जिहमाहिं संतान रहत नाहिं,
हाकिमकौ दंड पंच फिटकार परी है ।
एते दुःख इहां आगैं पूतली नरक जहां,
कच्छ-लंपटी है कौन जाकी बुद्धि खरी है ॥ १३ ॥

सातों व्यसन जूआसे उत्पन्न होते हैं ?

* कंधों यह स्वामी ? नहीं सर्फरी गहन जाल
खेलत सिकार ? कभी मांस चाह भएतैं ।

१ दयानतदार अर्थात् ईमानदार । २ पुत्री । ३ बहिन । ४ हीनशक्ति होनेके कारण—ब्रह्मचर्यकी सामर्थ्य न होनेके कारण । ५ कथरी । ६ मछली पकड़नेका जाल ।

* एक राजाको जूआ खेलनेकी आदत पड़ गई थी । उसे छुड़ानेके लिए उसका मंत्री साधुका वेप धरकर आया । साधुका जब राजा भक्त हो गया, तब एक दिन राजाने उससे जो प्रश्न किये और उनके जो उत्तर पाये, वे सब इस कवित्तमें वर्णित हैं ।

(८६)

मांस हूँ भखत ? कभी दारूकी खुमारीमांहीं
सुरापान करो ? कभी वेश्या-घर गएतैं ॥
वेश्या हूँ गमन ? परनारी जोपै मिलै नाहिं
परनारी भोगो ? कभी दाम चोर लएतैं ।
चोरी हूँ करत ? कभी जूवे माहिं हार होय
सबै गुन भरे नष्ट भाव परनएतैं ॥ १४ ॥

एक एक व्यसनके पारक पुरुष ।

छापय ।

पंडपूत दुख द्यूत, भूप बक मांस दुखी भुव ।
जादौं मदजल छार, चारदत्त वेश्यावस हुव ॥
ब्रह्मदत्त कु सिकार धार, सिवभूत चोर विध ।
रावन तिय अविवेक, एक इक विसन गई रिध ॥
ए सात विसन दुखमूल जग, सात नरक करतार हैं ।
करि सात तत्त्व सरधान दत्त, लच्छन पार उतार हैं ॥ १५ ॥
सात विसन इक थूल, भूल परनामनिकेरी ।
जब जब चलै कुराह, वाहि तब फेरि सबेरी ॥
जथासकति व्रत धरौं, करौं नरभौं सफला इम ।
धन जोवनकौ चाव, आव चंचल चपला जिम ॥
यह विसनत्याग श्रावक कथा, निज परहित ध्यानन कही ।
सुनि विसन राग दुखखानि है, मानहिंगे सज्जन सही ॥ १६ ॥

इति व्यसनत्याग श्लोक ।

सरधा चालीसी ।

दोहा ।

वंदाँ हो परमातमा, जगग्यायक जगभिन्न ।
दरपन सब परगट करै, होय न सबसाँ चिन्न ॥ १ ॥

नास्तिक निन्दा ।

पट मत मानँ ईसकाँ, जाप ध्यान तप दान ।
महा निंदमत नास्तिक, सदा पापकी खान ॥ २ ॥

नास्तिकके चार प्रश्न ।

कहै जीव नाहीं कहीं, पुन्य पाप नहीं दोय ।
सुरग नरक दोनाँ नहीं, करि फल लहै न कोय ॥ ३ ॥

चाँपादे ।

नास्तिकप्रश्न—लोहमई इक मंदिर करौ,
छिद्र बिना तामें नर धरौ ।
ताकाँ काढ़ो जव मरि जाय,
किहि मग जीव गयाँ समझाय ॥ ४ ॥

उत्तर—ता मंदिरमें राखौ ढोल, ताहि बजावौ करौ किलोल ।
बाहर मुनिये छेक न होय, तैसेँ जीव दरब है लोय ॥ ५ ॥

प्रश्न—फिरि बोल्याँ-इक प्राणी लेय, ताकाँ तौलौ ठीक करेय ।
मूए पीछें तोलौ सोय, घटे नहीं जी कैसेँ होय ॥ ६ ॥

उ०—मसक एकमें भरिए वायँ, मुखकाँ बाँधि तौल मन लाय ।
पाँने काढ़ि फिरि तौलि सुजान, घटे नहीं त्याँ चेतनमान

प्रश्न—चोर! एक ले दो खँड करौ, सौ हजार लाखौं विसतरौ।

जुदे जुदे देखौ निरधार, दीसै नहीं कहीं जिय सार ८

उत्तर—अरनैकी लकड़ी ले वीर, टूंक किरोर करौ किन धीर

बिना घसै न अगनि परगास, त्याँ आतम अनुभौ अभ्यास

प्रश्न—भूजल अगन पवन नभ मेल, पांचौं भए चेतना खेल।

ज्यों गुड़ आदिकतें मद होय, मद ज्यों चेतन थिर नहिं कोय

दोहा ।

उत्तर—पांचौं जड़ ए आप हैं, जड़तें जड़ ही होय ।

गुड़ आदिकतें मद भयौ, चेतन नाही सोय ॥ ११ ॥

भू जल पावक पौन नभ, जहां रसोई जान ।

क्यों नहिं चेतन ऊपजै, यह मिथ्या-सरधान ॥ १२ ॥

प्रश्न—जल बुदबुदवत जीव है, उपजै और विलाय ।

देह साथ जनमै मरै, जैसे तरवरछाय ॥ १३ ॥

चौपाई ।

उत्तर—बालक मुखमें थनकोँ लेय, दावै अंचे दूध पिवेय ।

जो अनादिकौ जीव न होय, सीखबिना क्यों जानै सोय १४

मरिक्के भूत होंय जे जीव, पिछली बातें कहै सदीय ।

सिर चढ़ि बोलै निज घर आय, तातें हंस अमर ठहराय १५

प्रश्न—पुन्य पाप भापै जगमाहिं, पै काहनै देखे नाहिं ।

भिड़हाँ चाल चलै संसार, समझै कोई समझनिहार १६

१ जंगलकी । २ जहां रसोई बनती है, वहां पांचों भूत एकत्र होते हैं ।
३ भेड़चाल, जहां एक भेड़ जावे, वहां उसके पीछे सब जाती हैं ।

उत्तर—एक भूप सुख करें अनेक, पेट भरि सकै नार्ही एक ।
परगट दीखै धोखा कौन, चार वरन छत्तीसौं पाँन ॥१७॥
प्रश्न—सुरग नरक नार्ही निरधार, जिन देखे सो कहौ पुकार ।
खंजर वेग? कहैं सब लोग, लरकै डरपावैं हित जोग ॥१८॥
करिकैं धरम सुरग गयौ, कह्यौ न फिरि जिह आय ।
भयौ पापतैं नारकी, क्यौ नहिं आयौ भाय ॥ १९ ॥

चौपाई ।

उत्तर—पापी पकरथौ औगुनकार, पगवेरी गल संकल धार ।
घेरैं रहैं निकास न होय, त्यों आवै नहिं नारक कोय ॥२०॥
न्हाय सुगंध वसन सुम-माल, नेत्रज दीप धूप फल थाल ।
पूजन चलयौ दिसाकौं जाय, तैंसैं नहिं आवै सुरराय ॥२१॥
तुम निचिंत तप करौ न धीर, हम तप करैं धरैं मन धीर ।
जौ परलोक न हम तुम सोय, है परलोक तुमैं दुख होय २२
प्रश्न—खेती कीनी सुपनैमाहिं, पै काहनैं खाई नाहिं ।
कोई काटै कोई खाय, कोई हाथ धरैं मरि जाय ॥ २३ ॥
उत्तर—कोई काहूकौं दे दाम, ताहीपै मांगै अभिराम ।
जोई खाय पेट ता भरै, जहर खाय है सोई मरै ॥ २४ ॥

दोहा ।

जो काहूकौ धन हरै, मारै काहू कोय ।

जनम जनम सो क्रोधतैं, हरै प्राण धन दोय ॥२५॥

१ जातियां । २ यदि परलोक नहीं है तो हम तुम बराबर है, और यदि कहीं हुआ तो तुम्हें दुख भोगना पड़ेगा हम आनन्दसे रहेंगे ।

(१०)

चौपाई ।

जो तरु बोवै सो फल होय, नरतैं नर पसुतैं पसु होय ।
करै सुपावै बोवै लुनै, परगट बात लोग सब सुनै ॥ २६ ॥

दोहा ।

जीव धरम परलोक फल, चारौं हैं निरधार ।
तातैं सरवग सेइयै, वांछितफलदातार ॥ २७ ॥

चौपाई ।

मिथ्यातीकी शंका—सरवग कहा कहां है सोय,
देखो सुनो न हमनै कोय ।

ऐसे मिथ्या वचन सुनेय, जैनी हित लखि उत्तर देय २८
समाधान—इस पिरथी इस कालमँझार,

न कहौ तौ तुम वच सत सार ।

और लोक अरु कालमँझार, है सरवग सब जाननहार २९

शंका—तीन लोक तिहुं कालनि माहिं,

हम जानै हैं सरवग नाहिं ।

समाधान—तुम जाने तिहुं जग तिहुं काल,

तुम ही सरवग दीनदयाल ॥ ३० ॥

दोहा ।

जब यह वचन प्रगट सुन्यौ, जान्यौ जिनमत सार ।

छांड़ि नासतिक निपुन नर, कर जोरे सिर धार ॥ ३१ ॥

अथ पंच मतवालोंके वचन ।

चौपाई ।

कोई कहै छहौं मतमाहिं, निज निज क्रिया करैं सिव जाहिं ।

जैसे एक महल षट द्वार, छहौं राह पहुचै नर नारि ॥ ३२ ॥

(९१)

दोहा ।

उत्तर—कहै लाख नौंका वरू(?), सबको एक दुवार ।
बहुत भेद मतकल्पना, एक जैन सिवकार ॥ ३३ ॥

चौपाई ।

अंधे पांच खरे इक ठौर, आगै गज इक आयौ दौर ।
एक एक अँग सबनै गहा, सो सरधान जीवमै लहा ॥ ३४ ॥
सूँड़ि पकरि गज मूसल होय, छाज कानतै मानै कोय ।
माना थंभ पकरि पग अंग, पेट पकरि चौतरा अभंग ॥ ३५ ॥
पूँछ पकरि लाठी सरदहा, पाँचौनै गजभेद न लहा ।
झगरै लरै करै बहु रार, समझाए सब देखै नहार ॥ ३६ ॥

उपदेश वर्णन ।

सरवग देव सुगुरु निरग्रंथ, दया धरम तीनों सिवपंथ ।
पहली यह सरधा थिर करौ, पीछै सकति देखि व्रत धरौ ३७

दोहा ।

अंतरतत्त्व सु आप लखि, बाहर दया निहार ।
दोनों धरि करि हूजियै, सिव-वनिता-भरतार ॥ ३८ ॥
निकटभव्य जे पुरुष हैं, तिनकाँ यह उपदेस ।
दीरघ-संसारी सुनै, धारै अधिक कलेस ॥ ३९ ॥
द्यानत जिनमत न्याय लखि, किए छंद चालीस ।
पढै सुनै तिनके हियै, सरधा विस्वावीस ॥ ४० ॥

इति सरधाचालीसी ।

(९२)

अथ सुखवत्तीसी ।

दोहा ।

सिद्ध सरव बंदौ सदा, सुखसरूप चिद्रूप ।
जाकी उपमा देनकौं, वसत न तिहुँजगभूप ॥ १ ॥

सिद्धोंका सुखवर्णन ।

चौपाई ।

जो कोई नर औगुनधार, नख सिख बंध वैध्यौ निरंधार ।
एक सिधिल कीनै सुख होय, सब दूटै ता सम नहिं कोया ॥२॥
वाय पित्त तप कफ सिर-वाह, कोढ़ जलोदर दम अरु दाह ।
एक गए कछु साता गहै, सरव गए परमानंद लहै ॥ ३ ॥
एक साख्र जो पढ़ै पुमान, कछु संदेह होय हैरान ।
ताकौं समझै हरष अपार, क्यों न सुखी सब जाननहार ॥४॥

दोहा ।

नरक गरभ जनमन मरन, अधिक अधिक दुख होय ।
जहाँ एक नहिं पाइयै, सुखिया कहियै सोय ॥ ५ ॥

नरकदुःख ।

तन दुख मन दुख खेत दुख, नारक असुर करंत ।
पांचौं दुख ये नरकमै, नारक जीव सहंत ॥ ६ ॥

तिर्य्यंचदुःख ।

भूमि खोदि जल गरम करि, अग्नि दाह दुख जोय ।
पौन वीजना तरु कटै, त्रस निरोध दुख होय ॥ ७ ॥

चौपाई ।

छुधा तृषा करि पीड़ित रहै, गलमै फाँस सीस तप सहै ।
मार खाय अरु मोल बिकाय, विन विवेक पसुगति दुख दाय ८

(९३)

खर्ग मृग मीन दीन अति जीव, मारैं हिंसक भाव सदीव ।
तेहू मरैं महा दुख पाय, भौ भौ वैर चलयौ संग जाय ॥९॥

मनुष्यगतिदुःख ।

हीन होय अरु गर्भ विलाय, जनमत मरैं ज्वान मर जाय ।
इष्ट वियोग अनिष्ट संयोग, महादुखी नर व्यापै सोग ॥१०॥
मृतनि हगनि महा दुख वीर, द्रव्य उपावन गहर गंभीर ।
चाहदाहदुख कह्यौ न जाय, धन्न सिद्ध अविनासी काय ११

दोहा ।

रूखा भोजन करज सिर, और कलहिनी नार ।
चौथे मैले कापड़े, नरक निसानी चार ॥ १२ ॥
उद्दिम विन अरु मांगना, बेटी चलनाचार ।
सब दुख जिनके मिट गए, तेई सुखी निहार ॥ १३ ॥

चौपाई ।

रस-लोहू-अरु मांस वखान, मेद हाड़ अरु मज्जा जान ।
वीरज सांत धात नहिं जहां, सुद्ध सरूप विराजैं तहां ॥१४॥

दोहा ।

कान आंख मुख नाक मल, मूत पुरीप पसेवै ।
सातौ मल जाकैं नहीं, सोई सुखिया देव ॥ १५ ॥

देवगतिदुःख ।

चौपाई ।

हीन होय पर-संपत्ति देख, मरन वार दुख करै विसेन्न ।
देव मरै एकेंद्री होय, जनम मरन बसि डौलै सोय ॥१६॥

१ पक्षी । २ पाखाना । ३ पसीना ।

चारधौं गतिमै दुःख अपार, पांचपरावर्तन संसार ।
करम काटि जे सिव-पुर गए, तिनके सुख कौनै वरनए ॥१९७

सिद्धस्वरूपवर्णन ।

दोहा ।

तीन लोकके सीसपै, ईस रहै निरधार ।
छहौं दरस मानै सदा, एक अंग लखि सार ॥१९८

चौपाई ।

सुर-नर-असुर-नाथ थुति करै, साध तपै सो पद मन धरै ।
ध्यावै ब्रह्मा विष्णु महेस, विन जानै बहु करै कलेस ॥१९९॥
जो जो दीसै दुख जगमाहिं, ताकौ एक अंस हू नाहिं ।
जा दुखकौ सुख जानै जीव, सरव करम तन भिन्न सदीव ॥२०॥
इह भव भै पर भव भै दोय, रोग मरन भै सबकौ होय ।
रच्छक नहीं चोर भै महा, अकस्मात जीतै सुख लहा ॥२१॥
देसभूप परभूप विगार, बहु वरसै वरसै न लगार ।
मूसे तोते टीड़ी वधै, सात ईति विन सब सुख सधै ॥२२॥
फरस दंति रस मीन पतंग, रूप गंध अलि कान कुंरंग ।
एक एक वस खोवै प्रान, पांचौं नहीं सुखी सो मान ॥२३॥
व्यापै क्रोध लराई करै, व्यापै काम नारि वस परै ।
व्यापै मोह गहै दुख भूर, जहां नहीं सो सुख भरपूर ॥२४॥
दोष अठारह जिनकै नाहिं, गुन अनंत प्रगटे निजमाहिं ।
अमर अजर अज आनंदकंद, ग्यायक लोकालोक सुछंद ॥२५॥
व्यापै भूख जलै सब अंग, व्यापै लोभ दाह सरवंग ।
तन दुरगंध महादुखवास, जहां नहीं सोई सुखरास ॥ २६ ॥

१ द्रव्य क्षेत्र काल भाव भव । २ हाथी । ३ मछली । ४ मौरा । ५ हरिण ।

(९५)

दोहा ।

अमल अनाकुल अचल पद, अमन अवचन अकाय ।
ग्यानस्वरूप अमूरती, समाधान मन ध्याय ॥ २७ ॥

चौपाई ।

नरक पसू दोन्यौं दुखरूप, बहु नर दुखी सुखी नरभूप ।
तातैं सुखी जुगलिए जान, तातैं सुखी फनेस बखान ॥२८॥
तातैं सुखी सुरगकौ ईस, अहमिंदर सुख अति निस दीस ।
सब तिहुँ काल अनंत फलाय, सो सुख एक समै सिवराय २९

दोहा ।

परम जोति परगट जहां, ज्यौं जलमैं जलबुंद ।
अविनासी परमातमा, निराकार निरदुंद ॥ ३० ॥
सिद्धनिके सुख को कहै, जानै विरला कोय ।
हमसे मूरख पुरुपकौं, नाम महा सुख होय ॥ ३१ ॥
द्यानत नाम सदा जपै, सरधासौं मनमाहिं ।
सिववांछा वांछाविना, ताकौं भौदुख नाहिं ॥ ३२ ॥

इति सुखवत्तीसी ।



(९६)

विवेक-बीसी ।

छन्दः ।

जनम जरा नृति अरति, राग भै दोष मोह मद ।
चित्त विलै नीद, भूख तिस सोग स्वेद गद ॥
खेद अठारै चूरि, दूरि घातिया भगाए ।
गुन अनंत भगवंत, छवालिस परगट गाए ॥
देवाधिदेव अरहंत पद, सुर-नर-पति पूजा करै ।
वंदाँ त्रिकाल तिहुँ जोगसाँ, विघनपुंज छिनमैं हरै ॥ १ ॥

इत्यादि प्रथमः ।

कीरतिकी रति नाहिं, मान कविता न करनको ।
ग्यान गान गुदरान (?) जैन परवान धरनको ॥
बापद संपद सबै, फत्रै पुगलके माहीं ।
मैं निज मुद्ध विमुद्ध, सिद्ध सम दूजौ नाहीं ॥
इम आठ पहर जाकी दसा, गुसा खात हू ग्यानलै ।
द्यानत सोई ग्याता महा, कहा करै जमराज भै ॥ २ ॥
ग्यानकूप चिद्रूप, भूप सिवरूप अनूपम ।
रिद्ध सिद्ध निज वृद्ध, सहज ससमृद्ध सिद्ध सम ॥
अमल अचल अविकल्प, अजल्प, अनल्प मुखाकर ।
मुद्ध बुद्ध अविद्ध, सुगुन-गन-मनि-रतनाकर ॥
उतपात-नास-धुव साध सत, सत्ता दरव सु एकही ।
द्यानत आनंद अनुभौ दसा, वात कहनकी है नहीं ॥ ३ ॥
क्रोध कर्मपै करै, मूलसेती इह भानौ ।
मान महा परचंड, त्रिजगपति हों किह मानौ ॥
कपट-खान परधान, स्वाद अनुभौ न बतावै ।

लोभी दूजौ नाहिं, सुगुन धन दै न दिखवै ॥
 नै करै चहुँ-गति गमनकौ, दया विसन लीनौ पकर ।
 तव करम चाहके हुकमतै, चहुँथौ मुक्ति गढ़ ग्वालियरा ॥४॥
 तिय मुख देखनि अंध, मूक निध्यात भननकौ ।
 बधिर दोष पर सुनन, लुंज पटकाय हननकौ ॥
 पंगु कुतीरय चलन, सुन्न हिय लोभ धरनकौ ।
 आलसि विषयनिमाहिं, नाहिं बल पाप करनकौ ॥
 यह अंगहीन किहू कामकौ, करै कहा जग वैठकै ।
 ब्यानन तात आठौ पहर, रहै आप धर पैठकै ॥ ५ ॥
 होनहार सो होय, होय नहिं अन-होना नर ।
 हरय सोक क्यों करै, देख सुख दुःख उदैकर ॥
 हाथ कष्ट नहिं परै, भाव-संसार बढावै ।
 मोह करमकौ लियो, तहां सुख रंच न पावै ॥
 यह चाल महा मूरखतनी, रोय रोय आपद सदै ।
 ग्यानी विभाव नामन निपुन, ग्यानरूप लखि सिव लद्वै ॥६॥
 अरचै नित अरहंत, सुगुरूपदंपकज चरचै ।
 परचै तत्त्वनिमाहिं; धरम कारज धन तरचै ॥
 पात्र दान नित दैहिं, लैहिं व्रत निरमल पालै ।
 झुधित त्रिपित जन पोख, मोखमारगमल टालै ॥
 धरमी सजानसौं हित धरै, इन गृहस्थ श्रुति बुध करै ।
 जे मोह-जालमें फँसि रहै, ते चहुँगति दुख-दौ जरै ॥ ७ ॥
 तत्त्व दोष परकार, सु-पर भाष्यौ जिन-स्वामी ।
 पर अरहंत सरूप, पुन्यकारन जग नामी ॥
 आप तत्त्व दो भेद, सहित विकल्प निरविकल्प ।
 निरविकल्प निरबंध, बंध विकल्प ममता जव ॥

(९८)

निजदरब भाव नोकर्मसौ, भिन्न सरूप विवेक है ।
सरधान आन दुख दान सब, द्यानत अनुभौ टेक है ॥८॥
निहचै अरु विवहार, ताल दो हाथन बाजै ।
दरबतने परजाय, सौंठ गुड़ मारत भाजै (?) ॥
उदै उद्यमी भाव, दौय कर मथ घी लहियै ।
ग्यान क्रियासौं मोख, पंग अँध मिलि पथ गहियै ॥
इमि स्यादवाद नै समझकै, तत्त्वज्ञान निहचै किया ।
द्यानत सोई ग्याता पुरुष, बाहर मन अंतर दिया ॥९॥
भोग रोगसे देखि, जोग उपयोग बढ़ायौ ।
आन भाव दुख दान, ग्यानकौ ध्यान लगायौ ॥
सकलप विकल्प अल्प, बहुत सब ही तजि दीनै ।
आनँदकंद सुभाव, परम समतारस भीनै ॥
द्यानत अनादि भ्रमवासना, नास कुविद्या मिट गई ।
अंतर बाहर निरमल फटक, झटक दसा ऐसी भई ॥१०॥

पंचभेद धर्मवर्णन ।

एक दया उर धरौ, करौ हिंसा कछु नाहीं ।
जति श्रावक आचरौ, मरौ मति अब्रतमाहीं ॥
रतनत्रै अनुसरौ, हरौ मिथ्यात अँधेरा ।
दसलच्छन गुन वरौ, तरौ दुख-नीर सवेरा ॥
इक सुद्ध भाव जल घट भरौ, डरौ न सु-पर-विचारमै ।
ए धर्म पंच पालौ नरौ, परौ न फिरि संसारमै ॥ ११ ॥

सच्चा साधु ।

सोई साँचौ साध, व्याध भै नाहीं जाकै ।
सोई साँचौ साध, आध व्यापै ना ताकै ॥

(९९)

सोई साँचौ साध, बाध लाहेकौं जानै ।
सोई साँचौ साध, लाध आपौ भौं भानै ॥
सोई जोगी भोगी नहीं, ताहीकी ल्यौ लाइए ।
सोई गयाता ध्याता वही, सोई साता पाइए ॥ १२ ॥

छप्पय (सर्व लघु) ।

सदय हृदय नित रहत, कहत नहिं असत वचन मुख ।
दत्त अनदत्त नहिं गहत, चहत नहिं छिन मनमथ-सुख ।
सब परिगह परिहरत, करत थिर मन वच तन तिय ।
दुख सुख अरि मित जनम, मरन सम लखत हरख हिय ॥
सहत सुवल धर परिसह सरव, दरव अमल पद मन धरत ।
तजि थविरकलप जिनकलप तनि, धनि मुनिवर सिवतिय
वरत ॥ १३ ॥

दयाविचार ।

अंगहीन धन भी न, लीन बहु रोग लोग हुव ।
जीवभाव परभाव, चहै जीवन न मरन धुव ॥
तीन लोककौ राज लेय, नवि देय प्रान छिन ।
यह विचार मनमाहिं, राजकौं हरै मोह विन ॥
ऐसे प्यारे निज प्रानकौ, दान समान सु दान नहिं ।
तप सील भाव सब ही रहै, सुखसौं करुना ग्यान महिं १४
सुरग राग व्रत नाहिं, नरक अति दुखी भयंकर ।
पसु विवेक नहिं रंच, मनुष तप विरत जयंकर ॥
सो तैं नरभौ पाय, कियौ परमारथ कछु ना ।
नाम तिहारौ बड़ौ, राय चेतन पर चछु ना ॥
जिनधर्म रसायन पायकै, जिन अपना कारज किया ।
सो धन्य पुरुष संसारमै, तिन ही नर-लाहा लिया ॥ १५ ॥

(१००)

बहिर भाव सब खोय, होय अंतर आतम सम ।
परमातम लख भ्रात, वात यह वड़ी अनूपम ॥
देव धरम गुरु जान, आन सरधान अकंपत ।
पूजा दान विधान, करौ सफली घर संपत ॥
अरु बहुत वात कहियै कहा, ग्यान क्रियामैं मन धरौ ।
तुझ वीती रीती आव सब, अवै समझि कारज करौ ॥१६॥
एक वूंद लहि सीप, अमल मुकताफल होई ।
एक वूंद गहि सर्प, महाविष उपजै सोई ॥
एक वूंद तरु कंदलि, सुद्ध कर्पूर विराजै ।
ताते तए मँझार, तासकौ नाम न पाँजै ॥
इम स्वाति वूंद बहु भेदसौं, संगति फल परवानियै ।
तिम सुगुरु वचन नर भेदसौं, भेद अनेक पिछानियै ॥१७॥

एक सौ सैंतालिस शुभाशुभाक्रियाओंका लाग ।

मन वच तनसौं एक, एक मन वच इक मन तन ।
इक वच तन इक वचन, एक मन जान एक तन ॥
जोगभेद ए सात, सात कृत कारित अनुमत ।
उनंचास त्रिध वरत, मान सु अतीत अनागत ॥
इक सौ सैंतालिस सब क्रिया, पुन्य पाप ममता तजौ ।
निज परमानंद समरस दसा, आप आपमैं नित भजौ १८

कुकवि सुकवि वर्णन ।

कुमति रात तम नैन, प्रगट मारग नहिं पावै ।
कुकवि कुच्छुत रज डारि, अंध भौ-वन भरमावै ॥

(१०१)

सुकवि ग्यान रवि जोति, मुकतिकौ पंथ चलावै ।
भविनि राह दिखलाय, आप सिव पदवी पावै ॥
जिम मोह मिटै वैराग बढ, सो बानी उर लेखियै ।
धनि द्यानत तारन तरन जग, सुगुरु जिहाज बिसेखियै १९

अन्तमंगल ।

नमौ देव अरहंत, सिद्ध बंदौ जग ग्यायक ।
आचारज उवझाय, साधु तीनों सुखदायक ॥
पंच समान न आन, ध्यान तिनकौ करि लीजै ।
और उपाव न कोय, मनुष-भौ लाहो लीजै ॥
द्यानत विवेकवीसी सदा, पढ़ौ महागुनकार है ।
निज आनंदमगन सदा रहौ, सब ग्रंथनकौ सार है ॥२०॥

इति विवेकवीसी ।



(१०२)

भक्ति-दशक ।

सवैया इकतीसा ।

रिपभ अजित संभौ अभिनंदन सुमति,
पदम सुपास चंदाप्रभु जिन गाईयै ।
सुविधि सीतल श्रेयांस वासुपूज्य विमल,
अनंत धरम सांति कुंथु उर भाईयै ॥
मल्लि मुनिसुवरत नमि नेमि पारसजी,
वर्धमान सुखदान हिये आन ध्याईयै ।
आदि मेर दक्खिनके वर्तमान वीस कहे,
नाए सीस निस दीस रिद्धि सिद्धि पाईयै ॥ १ ॥

आदिनाथ तीर्थकरके भवान्तर ।

जयवर्मा दिच्छाबल विद्याधर महाबल,
दूजे स्वर्ग ललितांग वज्रजंघ दानी जू ।
भोगभूमिमाहिं जाय सम्यक दरस पायौ,
स्त्रीधर ईसानमें सुविधि भूप ध्यानी जू ॥
सोलहैं सुरग इंद्र वज्रनाभि चक्री भए,
सर्वारथसिद्धि वसे आदिनाथ ग्यानी जू ।
वसे मोखदेस जाय द्वादस अवस्था पाय,
गावै मनवचकाय द्यानत कहानी जू ॥ २ ॥
गरभ जनम तप ग्यान निरवान भोग,
लोग कहैं महाजोग धारयौ वन जाय जी ।
वादी सिच्छ विक्रिया अवधि सुत मनपर्जे,
केवली गनेस धरे को तज्यौ वताय जी ॥

चामकी अपावन महा दुर्गध नारि छारि,
 मोख नारि कंठ लाई सीलवान राय जी ।
 द्यानत चरित्र तेरे हमकों पवित्र करौ,
 बड़ेई विचित्र राग विनांत्यो बुलाय जी ॥ ३ ॥
 चोरीकौ अघोरी धोरी वारमें दया दयाल,
 कियौ है निरंजन तैं अंजनके नामतैं ।
 पांडोंसे जुवारी अविचारी राजरिद्धि हारी,
 किरपा तिहारी सिव धारी भव धामतैं ॥
 कीचक सौ नीच चाही द्रौपदी सती जीवीच,
 सौऊ तौ लियौ नगीच धोय कीच कामतैं ।
 द्यानत अचंभ कहा तपसों वैकुण्ठ लहा,
 अधम उधारन हौ स्वामी जी प्रनामतैं ॥ ४ ॥
 धरममें अलसानौ खान पानकों सयानौ,
 कहालौ बखानौ सब जानौ वात हमरी ।
 चाहत हौ मोष वरचौ दोषनिकै कोष पोष,
 कोटीधुज भयौ चाहौ गांठमें न दमरी ॥
 दया भक्ति नई कई (?) पामरी तिहारी दई,
 घरमें है उठौ नाहिं डारि लोभ कमरी ।
 द्यानत कहाऊं दास यह तौ बड़ौ लिवास,
 कीजियै उदास नास जाय आस चैमरी ॥ ५ ॥
 बड़े धनवान इंद धरनिंद चक्रवर्त्ति,
 जेऊ जाहि जाचैं ऐसे साहब हमारे हैं ।

फरसतें न्यारे रस न्यारे रूप गंध न्यारे,
 सबदतें न्यारे पै सब जाननहारे हैं ॥
 जैसा कोई भाव धरै तैसा सोई फल वरै,
 आरसी सुभाव रागदोषसेती न्यारे हैं ।
 पास कछु राखें नाहिं दाता मनवांछितके,
 ऐसे देव जानें जिन पातिग विदारै हैं ॥ ६ ॥

सब सुख लायक सरव गेय ग्यायक,
 सकल लोकनायक हौं धायक करनके ।
 मैंन फैन नासत हौं नैन ऐन भासत हौं,
 वैन हु प्रकासत हौं पापके हरनके ॥
 कर्म भर्म चूरत हौं पर्म धर्म पूरत हौं,
 हुनर बतावत हौं भौ-जल तरनके ।
 ध्यानतके ठाकुर हौं दासपै कृपा कर हौं,
 हर हौं हमारे दुख जनम मरनके ॥ ७ ॥
 देखौं जिनराज जिन राजकौ गुमान देखौं,
 मान देखौं देव मान मान पाईयत है ।
 जपके कियैतें जप तपकौ निधान होत,
 ध्यानके कियैतें आन ध्यान ध्याईयत है ॥
 नामके लियैतें पर नामकी न रहै चाह,
 चाहके कियैतें चाह दाह धाईयत है ।
 ऐसे जिन साहबके ध्यानत मुसाहब,
 भए हैं पद पूज दूज चंद गाईयत है ॥ ८ ॥

(१०५)

अहं अरहंत अरिहंत भगवंत संत,
ब्रह्मा विष्णु शिव जिन वीतराग बुद्ध हौं ।
दाता देव देवदेव परब्रह्म सुरसेव,
मुनीस रिसीस ईस जगदीस सुद्ध हौं ॥
अनादि अनंत सार सरवग्य निराकार,
जित-मार निराधार साहव विसुद्ध हौं ।
भगवान गुनखान जती ब्रती धनी नाथ,
राजा महाराजा आप ध्यानत सुबुद्ध हौं ॥ ९ ॥
ग्रंथ हें अपार सब केतक पढ़ेगा कव,
जामें ना परंगी सुधि तामें पंचि मरि है ।
दान जोग लच्छ लच्छ कोरि जोरि पापनितें,
तिनहीकी थापनितें दुर्गतिमें परि है ॥
संजम अराध तीनों जोग साध पुन्य महा,
चित्तके चलायें घट दुःकृतसों भरि है ।
ध्यानत जो पूछै मोहि प्राणी सावधान होय,
वीतराग नाव तोहि वीतराग करि है ॥ १० ॥
आवके वरस घनै ताके दिन केई गनै,
दिनमें अनेक स्वास स्वासमाहिं आवली ।
ताके बहु समै धार तामें दोष हें अपार,
जीव भावके विकार जे जे वात वावली ॥
ताकौ दंड अब कहा लैन जोग सक्ति महा,
हौं तौ बलहीन जरा आवति उतावली ।
ध्यानत प्रनाम करै चित्तमाहिं प्रीत धरै,
नासियै दया प्रकास दासकी भवावली ॥ ११ ॥

इति भक्तिदशक ।

धर्मरहस्ययावनी ।

मंगलाचरण । सर्वथा वेदरा (मत्तगयन्द) ।

पंचनिर्म कहीये परमेशुर, पंच हु अच्छर नाम दियेतें ।
 'ओंनम'कार सधे सिर ऊपर, पंचनितें उतपत्ति कियेतें ॥
 लोक अलोक त्रिकालमें नाहिं, कोई तिनकी सम देख हियेतें ॥
 आठहिरिद्धि नवाँ निधि सिद्धिकाँ, द्यानत पाइये गाय लियेतें ।
 भौं-अरि हंत भए अरिहंत, जपें नित संतनिके दुख-जाता ।
 सिद्धि भई निज रिद्धिकी सिद्धकाँ, नाम गहें लहें सेवक साता ।
 साधत मोखकाँ तीर्नहु साध मैं, साध अराधमें द्यानत राता ।
 ए पद इष्ट महा उतकिष्ट सु, मंगल मिष्ट सुदिष्टकै दाता ॥२॥
 जा पदमें सब केवली द्यानत, जानत सो अरहंत हियेतें ।
 जा पद सुद्ध सर्वे जिय रिद्धिकाँ, पाइये सिद्धकाँ नाम लियेतें ॥
 जी गुण धानक सातके वंदिय, सूरि गुरु मुनि जाप दियेतें ।
 घोर उदंगल संचक वंचक, पंचक मंगलचार कियेतें ॥ ३ ॥

अरहंतस्तुति ।

गर्भ छमास अगाऊ रचे पुर, जन्म सुरासुर मेरु न्हुलावें ।
 देव रिसीस विरांगि करें थुति, ग्यानविभौ हम कौन वतावें ॥
 आपनि जातकी बात कहा सिय, बातनितें परकाँ पहुँचावें ।
 पंचकल्याणक धानक द्यानत, जानत क्यौं न महा सुख पावें ॥
 केवलग्यान अखंडगवान, महासुखखान सुवीरज पूरा ।
 द्यानत इंद नरिंद फनिंदनि, वंदित घाति किये चकचूरा ॥
 चौतिस आठ नमौं गुन पाठ, दुवादस कोठनिकाँ हित पूरा ।
 भौं-अरिहंत सु मो अरिहंतहु, नाम जपौं तुम ठाम हजुरा ॥५॥

१ आचार्य, उपाध्याय, सर्वसाधु ।

(१०७)

मानुषतैँ धृति देव करैँ बहु, देवनितैँ अति इंद्र बखानैँ ।
इंद्रनितैँ स्रुतकेवलि भासत, केवलितैँ गनजी अधिकानैँ ॥
ताहूपैँ ओर न पुव्व किरोरन, काल गये हम कौन समानैँ ।
द्यानत पाय परैँ सिर नाय, विसेस वताय कहा हम जानैँ ॥६॥

आदिनाथस्तुति ।

आदि नरेसुर आदि मुनीसुर, आदि जिनेसुर आदिवतारी ।
सागर कोर किरोर अठारह, आरज रीति कुरीति निवारी ॥
स्वर्ग विलासकैँ मोख निवासकैँ, राह चलाय कुराह विदारी ।
द्यानत देव पसू नर को कहि, नारककौँ सुखकारक भारी ॥७॥

चंद्रप्रभस्तुति ।

पावन वावन चंदन मोहके, द्रोहकी दाह हरैँ न हरैँ तू ।
ताप लियैँ रविरूप उजासक, सांत अरूप प्रकास करैँ तू ॥
द्यानत चंद असंखतैँ जोति, अनंत गुनी प्रभु चंद धरैँ तू ।
अद्भुत राग विरागि कहावत, रागनिके घर रिद्धि भरैँ तू ॥८॥

शान्तिनाथस्तुति ।

सांति जिनेस निसेस दिनेसतैँ, तेज विसेस सुरेस न बोलैँ ।
कामपदी वर चक्र-विभौधर, आपनि रिद्धि कहैँ किह तौलैँ ॥
बंदत चर्न निकंदत मर्न सु, वर्न दुई भव-बंधन खोलैँ ।
द्यानत हाथ गहौँ किन नाथ, रहैँ तुम साथ नहीं भव डोलैँ ॥९॥

नेमिनाथस्तुति ।

नेमकुमारसौँ पेम किएँ विन, केम कहौँ सुख हे मन पावैँ ।
आनंद-लायक भौ-गद-घायक, स्यौ-पद-दायक ताहि न ध्यावैँ ।
तीरथ दूरि अनेकनि धावत, गावत जीभ कहा घसि जावैँ ।
द्यानत आप समान करैँ तोहि, चाहत और कहा सु वतावैँ १०

(१०८)

पार्श्वनाभस्तुति ।

पारसकों भजि आरसकों तजि, जा रसका रसता रस पाये ।
कार सजाय सु आरस पाय, सुधारस काय-जरा जरि जाये ॥
पारस पास कुधात विनास, सुधात प्रकास धरी न लगाये ।
नागिनि नाग किए बड़ भाग सु, दानत ओर न कौन गिनाये ॥

महावीरस्तुति ।

वीर महा महावीर जिनेसुर, गौतम मान-धनेसुर नाए ।
बालक चालमें सील धरेसुर, खंदना देखत बंध सुलाए ॥
मैडक हीन किए अमरेसुर, दान सबै मन-चांछित पाए ।
द्यानत आज लौं ताहीकौ मारग, सागर है सुख होत सबाए ॥

सिद्धस्तुति ।

सिद्धकीरिद्धि प्रसिद्ध कहा कहूं, सूच्छम औधहु ग्यानी न जानें ।
लोक अलोक त्रिकाल समाय, गए किम थूलकौ मान प्रदानें ॥
बैन न आवत बुद्धि न पावत, चित्तमें प्रीतिसौं नाम हू आनैं ।
द्यानत ठानत जा पदकौं तप, सो पद आप ही दें भगवानें १३

आचार्यस्तुति ।

पंच अचार विना अतिचार, करावनहार सु पांच हु धारी ।
चारि हु ग्यान दुआदस बान, रचें परवान लहें रिधि भारी ।
वैकुल सुद्ध करैं प्रतिबुद्ध सु, द्यानत भव्यनके उपकारी ।
तास अचारजके पद-चारज, मंगल-कारज धोक हमारी । १४।

उपाध्यायस्तुति ।

ग्यारह अंग सु चौदह पूरव, आप पढ़ें सु पढ़ें सब, यातैं ।
जीव अपार परे भवधार, निहार विचार दयामय वातैं ॥
आतम ग्यान सहैं दुख जान, करैं धुति ग्यान सुबुद्ध कहातैं ।
द्यानत ते उबझायनि पायनि, गांयनिके गुन गाय हियातैं १५

(१००)

शवेमाधुप्रवृत्ति ।

भीतन-भोग नज्जी महि जोग, सँजोग वियोग समान निहारै ।
चंदन लावत गर्भ कडावत, पुष्प चढ़ावत स्वर्ग प्रहारै ॥
देहसौं भिक्षुकर्यं निज निज, न भिक्षु परीगहर्षे सुख धारै ।
ज्ञानत साध समाधि अराधिक, मोह निवारिके जोति विधारै ।
भू जल पायकः वृच्छ शरी रनि, मेघ बभ युग आवुह सारै ।
रीत नहीनठ त्रीपम सुभर, पायक वृच्छतले निग टारै ।
पञ्च परे नहिं ध्यान टरे, शिव-याहकः चाहकी दाह विहारै ।
ज्ञानत साध समाधि अराधिक, मोह निवारिके जोति विधारै ।

शानकप्रवृत्ति ।

संरगन सुज गहं प्रत सुज, विरज समाधिककी विधि टाले ।
पोसह ठान सचित अमान, तर्ज निगि खान सु सील सँधारै ॥
आरंभ छंड परिग्रह छंडन, पापकी बात कहें न तिकारै ।
ज्ञानत भोजन छेहिं उछंड, इकादस भूमि सरायक चाले १८
शाठ धरें गुनमूल दुआदस, श्रुत गहं तप द्वादस सारै ।
चारि हु दान पिधें जलछान, न राति भखें समाता-रस लारै ॥
भ्यारह भेद लहें प्रतिमा सुभ, दर्शन भ्यान चरित अरारै ।
ज्ञानत श्रेपन भेद फिया यह, पालत टालत कर्म-उपारै ॥१९॥

जिनवाणीप्रवृत्ति ।

देव गुरु सुभ धर्मकाँ जानिये, सम्यक आनिये मोखनिसानी ।
सिद्धनितें पहलें जिन मानिये, पाठ पढ़ें हूजिये सुतग्यानी ॥
सूरज दीपक मानक चंद्रतें, जाय न जो तम सो तम हानी ।
ज्ञानत मोहि कृपाकर दो घर, दो कर जोरि नसों जिनवानी ॥

ईपसबाद(१) व थाव महा जड़, काव्य-कला कधि सीस धरी है।
 विस्व असक्त विरक्त किए तिन, देख विसेख मिया पसरी है ॥
 रूम बड़े सुनि ताप चढ़े तिन, दान हारी उधरी न धरी है ॥
 धानत धात कहा यह भात, क्रिया तुमसें सिय नारि बरी है ॥

प्रतिमा-गाथास्य ।

धेवहु श्रीअरहंतके धिंधकीं, धात पखानके भव्य पनाए ।
 धेन बिना सिय राह घतायत, आसन ध्यान अनोपम गाए ॥
 धानत आन सिंगार न सोहत, मोहत तीन हु लोक सदाए ।
 पूजन गायन ध्यावन को कहि, देखत ही पद वांछित पाए ॥ २२ ॥
 केवलग्यानि इहां न सुखेतमें, सिद्ध प्रसिद्ध न आँखिन पेखे ।
 सूरि गुरु महाधीर मनै किय, साध नजीक न जाय विसेखे ॥
 धानि विसुद्ध लसे न धसै बुध, धानत सीख यही उर लेखे ।
 पंच-निकारक भौ जल तारक, प्रात उठै प्रतिमा मुख देखे ॥ २३ ॥

वर्षमस्तुति ।

इंद फनिंद नरिंदतैं कामतैं, रूप अनूप कछौ नहिं जाई ।
 दीपक मानिक चंदकी सूरकी, जोतितैं देहकी जोति सवाई ॥
 चंदतैं चंदनहतैं कपूरतैं, पालेतैं सीतल धानि बतवाई ।
 धानत ए गुनकौ नहिं पार सु, केवलग्यानि की कौन बड़ाई २४
 रंचक राग नहीं जिनरायके, सर्व परिग्रह त्याग दिया है ।
 दोष कहा कहियै बिन कारन, आयुध एक न संग लिया है ॥
 साम्यतया निज ग्यानु भया सब, कर्म विनास प्रकास किया है ।
 आनंदकंद महा सुख साहब, धानतनैं तकि याद किया है २५

ध्यान ।

पाँवनिसौं कछु पावनौं नाहिं है, याहीतैं आवन जान तजा है ।
 हाथनिसौं करना कछु काम न, लंबै किए कर आप भजा है ॥

आखिनसों सघ देखि लियो प्रभु, नाक अनी लव ध्यान सजा है
काननिसों सुननों न लियो वन, बांधि निराकुल ध्यान धजा है

अर्थाच्छकदरा ।

लोगनिसों मिलनों हमकों दुख, साहनिसां मिलनों दुख भारी ।
भूपतिसों मिलनों मरनें सम, एक दसा मोहि लागत प्यारी ॥
बाहकी दाह जलें जिय मूरख, वे-परवाह महा सुखकारी ।
न्यानत याहीतें ग्यानी अबंछक, कर्मकी चाल सबै जिन टारी

महावीर गगनानकी यन्द्नाके लिए धेणिकका गमन ।

ग्यान प्रधान लहा महावीरनें, सेनिक आनंद भेरि दिवाई ।
मत्त मतंग तुरंग बड़े रथ, न्यानत सोभत इंद्र सवाई ॥
बांभन छत्रिय वैस जु सूद, सु कामिनि भीर घटा उमड़ाई ।
कान परी न सुनें कोऊ वान सु, धूरके पूर कला रवि छाई २८

आदिनाथकी ध्यानावस्था ।

प्रीपम काल जलै भुवि जाल, खरे गिरि सीस सिलापर स्वामी ।
ईधन कर्म उदासकी पौनतें, ध्यानकी आगि जलै अभिरामी ॥
ता निकलौ कन जाम उभै दिन, सीस दिपै छविसों रवि नामी ।
आदि जिनेसुर हौ परमेसुर, बंदत पायँ करौ सिवगामी ॥ २९

चार प्रकारके गनुष्य ।

न्यानत उत्तम आतम चिंत, करै न डरै जमराज बलीतें ।
मध्यम पूजन दान करै, निकरै दुरगीत (?) अँधेर गलीतें ॥

१—कायोसर्गायताज्ञो जयति जिनपतिर्नाभिसूनुर्महात्मा,
मध्याह्ने यस्य भास्वानुपरि परिगतो राजते सोममूर्तिः ।
पञ्चे कर्मन्धनानां अतिबहुदहतो दूरमौदास्यवात-
स्फूर्जैश्चानवहोरिष रश्चिरतरः प्रोक्षतो विस्फुलिङ्गः ॥

—पद्मानन्दपञ्चविंशतिका ।

(११२)

अद्धम जी रुजगार बखानत, ठानत पेटमें आगि वलीतै ।
अद्धम अद्धम पाप उपार्जत, गाज उठै मुख वात चलीतै ॥३०॥

भावनाचतुष्क ।

धावर जंगम जीव सबै, समता धरि आप समान बखानै ।
दर्सन ग्यान चरित्त गुनाधिक, देख विसेख विनै अति ठानै ॥
भूख त्रपादि महा दुखवंतनि, संत भयौ करुना मन आनै ।
साम्य दसा विपरीतनसौ बुध, द्यानत चार विचच्छन जानै

ज्ञाताको उपदेश ।

मैल भरयो दुरगंध महाजल, गंग सुगंग प्रसंग हुएतै ।
काठ अपार निहारि भयौ दब, लागत नैकसी आग फुएतै ॥
द्यानत क्यों नहिं देखहु वारिधि, वारिदकौ जल वूँद चुएतै ।
आतमतै परमातम होत है, वाती उदोत है दीप बुएतै ॥३२॥
जाहीकौ ध्यावत ध्यान लगावत, पावत है रिसि परम पदीकौ ।
जा थुति इंद्र फनिंद नरिंद, गनेस करै सब छांडि मदीकौ ॥
जाहीकौ वेद पुरान बतावत, धारि हरै जमराज वदीकौ ।
द्यानत सो घट माहिं लखौ नित, त्याग अनेक विकल्प नदीकौ

ज्ञातादशा ।

धातनके घर नीव महा वर, सोच नहीं छिनमें ढहिजातै ।
पुत्र पवित्र सु मित्र विचित्र न, चित्र जहां लखिए जम खातै ॥
द्यानत इंद्र फनिंद नरिंदकी, संपत कंपत काल-कलातै ।
हांनन दीननकै सुख कौन, प्रवीन कहा विपयारसर रातै ? ॥३४॥

१—सत्त्वेषु मैत्री गुणेषु प्रमोदं क्लिष्टेषु जीवेषु कृपापरत्वम् ।

माध्यस्थ्यभावं विपरीतवृत्तौ सदा ममात्मा विदधातु देव ॥

—अमितगतिस्मृति ।

बात कहँ न गहँ हट रंचक, वाद विवाद मिटै सब यातँ ।
 कान सुनँ बहु वान मुनँ लह, हंस सुभाव सुकारज रातँ ॥
 बोलत डोलत पापनि छोलत, खोलत मोख किवार धकातँ ।
 द्यानत संतनकी यह रीत, दया रस पीत अनीतनि यातँ । ३५।

मूढदशा ।

पापकी बातनि प्रातकी प्रातलौं, जापकी बात न एक घरी हू ।
 खानकौं आप सु वाप सुता सुत, दानके भाव न नैक लरी हू ॥
 भौन चुनावनकौं गहना धरि, जैनके भौन न ईट परी हू ।
 ता पर चाहत हौं सुख द्यानत, जानत मोहिन मौति मरी हू ॥
 भूख गई घटि, कूख गई लटि, सूख गई कटि, खाट पखौं है ।
 वैन चलाचल नैन टलावल, चैन नहीं पल, व्याधि भखौं है ॥
 अंग उपंग थके सरवंग, प्रसंग किए जन नाक सखौं है ।
 द्यानत मोह चरित्र विचित्र, गई सब सोभ न लोभ टखौं है ॥
 बालक बालखियालिनि ख्याल, जुवानि त्रियान गुमान भुलानैं
 मे घरवार सबै परिवार, सरीर सिंगार निहार फुलानैं ॥
 वृद्ध भए तन वृद्धि गए खसि, सिद्धत काम न खाट तुलानैं (?) ।
 द्यानत काय अमोलक पाय, न मोख दुवार किवार खुलानैं ॥
 प्रात उठै सुमथै विकथा रस, कै जल छान तमाखु भरावै ।
 रात ही जात तगाद उगाहनि, भोजन त्यार भए हिग खावै ॥
 सोच करै रुजगारके कारन, काम कहा किहके घर जावै ।
 संकट चूरत मंगल मूरत, द्यानत पारसनाथ न गावै ३९ ।
 जामहिं खाध किधौं विटिता, सठ ता रुजगार लगेई रहै है ।
 जामहिं नित्त नफा सब जानत, ताहि लग्यौ यह नाहिं कहै है ॥
 स्वारथ देस विदेस भमै धन, कर्मवसात लहै न लहै है ।
 द्यानत आतम स्वारथ है ढिग, आलस त्याग करौ न चहै है ४०

हाट बनायकें बाट लगायकें, टाट विछायकें उद्यम कीना ।
 लैनकौं बाढ़ सु दैनकौं घाट, सुवाँटनि फेरि ठगे बहु दीना ॥
 ताहमें दानकौ भाव न रंचक, पाथरकी कहूँ नाव तरी ना ।
 ध्यानत याहीतें नर्कमें वेदनि, कोर किरोरन ओर सही ना ॥
 खानकौं आतर ध्यानकौं कातर, मान महातर-डार चहे हँ ॥
 दैनकौं आरस लैन महा रस, बैन कहा रस रीति गहे हँ ॥
 काम अनाहक दामके गाहक, राम अचाहक चाह महे हँ ॥
 ध्यानत या कलिकालके पंडित, ग्यान नहीं उर, पाठ पहे हँ ॥
 उपदेश ।

कोध फसे गति नर्क बसे दुख, नाग डसे फिर कोप कला रे ।
 माया लए तिरजंच गए बहु, कष्ट सए फिर माया बला रे ॥
 ध्यानत कामके भावनि भाव, निवाह न होय कुलोभ जला रे ।
 त्यागि कपाय छिमा सुखदाय, सुनाय कहूँ अब दाव भलारे ॥
 नर्कनिमाहिं कहे नहिं जाहिं, सहे दुख जे जब जानत नाहीं ।
 गर्भमझार कलेस अपार, तलैं सिर था तब जानत नाहीं ॥
 धूलके बीचमें कीच नगीचमें, नीच क्रिया सब जानत नाहीं ।
 ध्यानत दाव उपाव करौ जम, आवहिगौ अब जानत नाहीं ॥
 उद्यम ।

अंबर डार अडंबर टार, दिगंबर धार सु संवर कीना ।
 मंगल आस उदंगल नास, सु जंगल वास सुधातम भीना ॥
 कोह निवारिकें लोह विडारिकें, मोह विदारिकें आपप्रवीना ।
 कर्मकौं भेदिकें परमकौं वेदिकें, ध्यानत मोखविषैं चित दीना ॥
 निंदक नाहिं छमा उरमाहिं, दुखी लखि भाव दयाल करैं हँ ।
 जीवकौ घात न झूठकी वात न, लैहि अदात न सील धरैं हँ ॥
 गर्व गयो गल नाहिं कहूँ छल, मोम सुभावसौं जोम हरैं हँ ।
 देहसौं छीन हँ ग्यानमें लीन हँ, ध्यानत ते सिवनारि वरैं हँ ॥

देवतें आय बड़ा कुल पाय, हुए भुवि राय सदा सुख कीर्न ।
 सेवग जोगनि जाचक लोगनि, दान सबै मनवंचित दीर्न ॥
 त्यागकें मौन भये सिव सौन, करै श्रुति कौन महा रसभीर्न ।
 साधके पायनमें सिर नाय, कहै जस होत हैं पापतें हीर्न ॥४७

साधुके अष्टगुण ।

भूमि समान छमा गुनवान, अकास सरूप अलेप रहे हैं ।
 निर्मलज्यौं जल आग ज्यौं तेज, सदा फलदायक वृच्छ गहे हैं ॥
 पापमहातमनासक सूरज, आनंददायक चंद्र लहे हैं ।
 मेघ समान सबै विध पोषक, आठ महा गुण साध कहे हैं ४८
 जो दुख देख विसेख दुखी जन, तामहिं धोरजसां थिर ठाढ़े ।
 ग्रीषम सैल सिला तरु पावस, सीतमें चौपथ भावनि गाढ़े ॥
 वज्र परै न समाधि टरै निज, आतम लौ रत आनंद वाढ़े ।
 द्यानत साधनकौ जस को कहि, नंदत पाप महा वन दाढ़े ४९
 एककौ देखनि जात सबै जग, केई देखें केई देख न पावैं ।
 एक फिरै नित पेटके काज, मिलै नहिं नाज दुखी विललावैं ॥
 सो यह पुन्यरु पाप प्रतच्छ, न राग विरोध सुधी सम भावैं ।
 द्यानत आतम काज इलाज, सुखी जनमाहिं सुखी कहलावैं ।
 वैठि सभा रस रीति सुनाय, कला कवि गायकें मूढ़ रिझावैं ।
 ऐसे अनेक भरे भुवि लोकमें, आपनि डूवत और डुवावैं ॥
 ते धनि जे परमातम ग्यान, बखान सुमारगमाहिं लगावैं ।
 द्यानत ते विरले इस कालमें, आपमें आप जथारथ ध्यावैं ५१
 धर्म पचास कवित्त उभैजुत, भक्ति विराग सुग्यान कथा है ।
 आपनि औरनिकौ हितकार, पढ़ौ नर नारि सुभाव तथा है ॥
 अच्छर अर्थकी भूल परी जहाँ, सोध तहां उपकार जथा है ।
 द्यानत सज्जन आपविषै रत, हो यह वारिधि शब्द मथा है ५२

इति धर्मरहस्यवावनी ।

(११६)

दान बावनी ।

छप्प ।

बंदों आदि जिनिंद, वृत्त-तीरथ परगास्यौ ।
नमौ स्त्रियांस नरिंद, दान-तीरथ अभ्यास्यौ ॥
दोऊ चक्र अवक्र, धर्मरथकों लहि नामी ।
सिवपुर पुर बहु गए, जाहिं जै हैं आगामी ॥
ए बड़े पुरुष संसारमें, कौन महातम ऊचरै ।
सोई जानौ मानौ चतुर, विरत दान रुचिसौं करै ॥१॥

सवैया इकतीसा ।

सबके अंतरजामी तीनलोकपति स्वामी,
आदिनाथ प्रभु नामी गामी सिव भौनके ।
तिनकों दियौ अहार हथिनापुर मझार,
ताके गुन कहैं सार ऐसे गुन कौनके ॥
उज्जल सरद धन चंद जस व्यापि रह्यौ,
लोकमें सुगंध फैलि जाय चलैं पौनके ।
तेई सिरीअंस मोहि, लोभकौ विधंस करौ,
धरौ हियै ग्यान हरौ दुख आवागौनके ॥ २ ॥
कुरुवंती-भूप-भनिमालमधि नायक है,
सिरीअंस दानेस्वर दानीमें गिनाईयै ।
चार मासके उपास किये आदिनाथ तास,
दियौ जी गिरास जास कैस जस गाईयै ॥
आनंद भयौ अकास वरसे रतन रास,
तवतैं पृथ्वीकों वसुधा कहि बुलाईयै ।

(११७)

सो दिन अजौं लौं चिद्ध अखैतीज है प्रसिद्ध,
कौनसी न रिद्ध सिद्ध नाम लेत पाईयै ॥ ३ ॥

सवैया तेइसा । (मत्तगमन्द)

दुल्लभ मानुष भौ सु विभौ जुत, पाय कहा गरवाय अनारी ।
आव कला कमला पट पेखनि, देखनिकौं चपला उनहारी ॥
लोभ महा तम कूप परे तिन, देखि दया हम चित्त विचारी ।
तास निकारन कारन बैन, कहै पकरौं निकरौं मतिधारी ॥४॥
उत्तम नारि सपूत कुमार, भयौ धन सारतैं मोह बढ़यौ है ।
वार न पार समुद्र विपैं सुभ, दान विधान जिहाज चढ़यौ है ॥
खेवट भावसौं प्रीति भई तव, भीति गई सुख राह पढ़यौ है ।
धर्म जिहाज इलाज विना, दुख वारिधितैं जिय कौन कढ़यौ है ।

भाङिह ।

बहुत जीव हितकार, सार धन संग्रहा ।
पात्र दान विधि जान, सफल गिरही कहा ॥
पावै सुभगतिद्वार, धारकैं दानकौं ।
ज्यौं वारिधि तरि जाय, पायकैं यानकौं ॥ ६ ॥

सवैया तेइसा ।

देस विदेस कलेस अनेक, करोर उपाय कमाय रमा रे ।
नारि सुहात न पूत ददात न, आपनि खात न जोरि जमा रे ॥
ऐसौ महा धन प्यारौ लहा जन, संत कहैं सुनि बैन हमारे ।
ता इक दान सु गति(?)विना दुख, चेति अचै फिरि नाहिं समारे

कवित्त ।

भोजन आदिमाहिं जो जन धन, नित प्रति खात जात है सोया
ताकौं सुपनै विषै न दरसन, ताते तए वूँद अवलोय ॥

(११८)

मुनिवर दान जोग सुभ खरच्यौ, सोई दरव लहै परलोय ।
इक बट वीज सुखेत बोयकै, फल अनेक पावै सब कोय ॥८॥
जिन अहार दीनों मुनिवरकों, तिननै धर्यौ मोखपुर माहिं ।
निज हू अमर नगर घर कीनों, उच्च संगतैं धोखा नाहिं ॥
जैसें राज चुनै जिनमंदिर, तिनकै साथहि ऊरध जाहिं ।
दैहिं दान अभिमान लोभ तजि, धन चंचल है ढरती छाहिं ९

अडिह ।

जो धोरौ हू दान भगतिसौं देत है ।
साधुनिकौं सु अनंतगुनौ फल लेत है ॥
जैसें खेतमझार वीज कछु डारियै ।
तातैं अति बहु पुंज प्रतच्छ निकारियै ॥ १० ॥

कवित्त ।

जिननै दान दियो साधुनिकौं, निरमल मनवच काय लगाय ।
तिननै पुन्य वीज उपराज्यौ, जातैं भौ वारिधि तरि जाय ॥
ताकी इंद करै अभिलापा, कव मै दैहुं मनुज भव पाय ।
तू क्याँ ढील करत है प्रानी, जानी वात देहि मन लाय ॥११॥

अडिह ।

मोख हेत रतनत्रै, मुनिवर धरत हैं ।
काय सहाय उपाय, सु भोजन करत हैं ॥
मुनिकौं दान भगतिसौं, जिन स्रावक कख्यौ ।
तिन गृह जननै, सिव मारगमै लै धर्यौ ॥ १२ ॥

कवित्त । (३१ मात्रा)

जप तप संजम सील विविध वृत, स्रावककै संपूरन नाहिं ।
आरंभ झूठ वचन चंचल मन, पाप पुंज वाढै घर माहिं ॥

दान एक पूरौ सब गुनमें, देकें सुरग लोकमें जाहिं ।
 मन वच काय सुद्ध है दीजे, कीजे नहिं वांछा तिह ठाहिं १३
 भौन-सैलतें दान तनक जल, सरता जेम बड़े विसतार ।
 लछमी सलिल बड़े दिन दिनप्रति, सुजसफेन सिवदधिलग सार
 सम्यकवंत पुरुष सरधासों, दियौ दान सुभ पात्र विचार ।
 बात कहत नहिं वस्तु लहत है, 'देय लेय' परगट व्यौहार १४
 धरि परिगहकौ भार माहिं नहिं, थिरता परमात्मकौ ग्यान ।
 सिव विन तीनों अर्थ सधत हैं, साधै साध चार सुख दान ॥
 चारौ हाथ बीच हैं जाके, देय प्रीतिसौं पात्रै दान ।
 "भवन दान वन माहिं तपस्या," यह तौ परगट बात जहान १५
 सोरठा ।

सिव-पुर-पंथी साध, नाम रटै पातग हटे ।
 चारौ दान अराध, तिरै जगत अचिरज कहा ॥१६॥
 सवैया तेईसा । (मत्तगयन्द)

भौन कहा जहां साध न आवत, पावन सो भुव तीरथ होई ।
 पाय प्रछालकै काय लगायकै, देहकी सर्व विथा नहिं खोई ॥
 दान करचौ नहिं पेट भख्यौ वहु, साधकी आवन वार न जोई ।
 मानुष जोनिकौ पायकै मूरख, कामकी बात करी नहिं कोई १७
 देव कहा जहां भाव विकार, भजौ कि न देव विरागमई है ।
 साधु कहा जिसकै नहिं ग्यान, गुरु वह जास समाधि भई है ॥
 धर्म कहा जिसमै करुना नहिं, धर्म दया अघरीति खई है ।
 दानविना लछमी किह कारन, 'हाथ दई तिन साथ लई है' १८
 कवित्त । (३१ मात्रा)

गुन बहु भए ग्यान नहिं पायौ, बहुत भोग नहिं वृत्त लगार ।
 धनकौ पाय दान नहिं दीनौ, गुन धन भोगनिकौ धिक्कार ॥

तीन जगत बस करन हरन दुख, धरम मंत्र न जपे सुखकार ।
 'बहते पानी हाथ न धोवै', फिरि पछिताय होय का सार ॥ १९ ॥
 पात्र दानमें जो धन खरचै, इह पर भौ सुख त्रिविध प्रकार ।
 आप देस परदेस भोगवै, राजलच्छमी कहिये सार ॥
 दान बिना इह भौमें दारिद्र, पर भौ दुरगति दुःख अपार ।
 दान समान न आन पुन्य कछु, देहि ढील मति करे लगार २० ॥
 काय पायके व्रत नहिं कीनै, आगम पढ़ि नहिं मिटी कपाय ।
 धनको जोरि दान नहिं दीनाँ, कहा काम कीनाँ इह आय ॥
 लीनाँ जनम मरनके कारन, रतन हाथसाँ चलाँ गमाय ।
 तीनाँ वात फेरि कथ पावै, साखग्यान धन नर-परजाय २१ ॥

सर्वथा इकतीसा (मनहर) ।

पापको इलाज त्याज पुन्य काजके समाज,
 खात है परायौ नाज आनंदको खेत है ।
 ग्यानको जगावत है मानको भगावत है,
 पारको लगावत है, जैनधर्म केत है ॥
 मानुष जनम पाय, तप कीजे मन लाय,
 भौसागर सुखसेती, तरिवेको सेत है ।
 बुराँ धन घरमाहिं, पूजा दान वनै नाहिं,
 दुर्गतिके दुख हाँहिं तासाँ कहा हेत है ॥ २२ ॥

अच्छि (२१ मात्रा) ।

श्रीजिनचरनकमलकी पूजा ना करी ।
 देखि संयमी दान भगति नहिं आदरी ॥
 धाममाहिं वसि काम, कहा तैनै किया ।
 गहरे जलमें, नरभौको पानी दिया ॥ २३ ॥

भौ सागरमें भमत, कठिन नरभौ लहै ।
भौ-तन-भोग विराग, धन्य जो तप गहै ॥
जौ न वने तौ घरमें, अनुव्रत पालियै ।
पात्रदानविधि, दिन दिन अधिक संभालियै ॥२४॥
चल्यौ धामतैं गाम, बहुत तोसा लिया ।
राहमाहिं दुख नाहिं, सदा सुख तिन किया ॥
भवतैं पर-भव जात, दान व्रत जो धरै ।
अद्भुत पुन्य उपाय, साहवी सो करै ॥ २५ ॥

सवेया तेईसा (मत्तगयन्द) ।

या जगमें नर भोग विधारन, कीरत कारन काम बनावै ।
पाप उदैमहिं जोग वनें नहिं, आपकाँ दुःखकी वेलि बढावै ॥
दैनके भाव सदा अति उत्तम, दान दियै बहु-पुन्य कमावै ।
दानकाँ देत है भाव समेत है, सो जगमें जनम्यौ कहलावै २६

गीता ।

निज सत्रु जो घरमाहिं आवै, मान ताकाँ कीजियै ।
अति ऊंच आसन मधुर वानी, बोलिकैं जस लीजियै ॥
भगवान सुगुन-निधान मुनिवर, देखि क्याँ नहिं हरखियै ।
पड़गाहि लीजै दान दीजै, भगति वरखा वरखियै ॥२७॥

कुंडलिया ।

दान देत है साधकाँ, नित प्रति प्रीति लगाय ।
जा दिन मुनि आवै नहीं, दुख मानै अधिकाय ॥
दुख मानै अधिकाय, पुत्र मृतुतैं अति भारी ।
अहो कर्म दुर्भाग्य, बात तैं कहा विचारी ।
विफल आज दिन गयो, भयो नहिं धर्महेत है ।
चित उदार तजि लोभ, साधकाँ दान देत है ॥ २८ ॥

(१२२)

सवैया इकतीसा ।

साधनकाँ दान देय सो तौ फल-पुंज लेय
ताकाँ लखि अभिलाखै सो भी फल पावै है ।
चंदकांत मनि देखौ सुधा झरै चंद देखि,
भावना ही फलै जो कै नीकै मन भावै है ॥
धन होतै साध पाय दान देत जो न मूढ़,
धरमी कहावै आप मायाकाँ वढ़ावै है ।
विजली कपट परलोक सुख-गिरि फोड़ै
जापै दान वनि आवै मोहि सो सुहावै है ॥ २९ ॥

अडिह (२१ मात्रा) ।

ग्रास अर्ध चौथाई नित प्रति दीजियै ।
जथा सकति ज्यौं आपन भोजन कीजियै ॥
आवत है जम भील न ढील लगाइयै ।
मनवांछित धन साध समा कव पाइयै ॥ ३० ॥

दोहा ।

मिथ्याती पसु दानरुचि, भोग भूमि उपजंत ।
कल्पवृच्छ दस सुख लहै, क्यौं न लेत नर संत ॥ ३१ ॥

कवित्त (३१ मात्रा) ।

जैसेँ खान निधान पाय तजि, और ठौर खोदै अग्यान ।
तैसेँ घरमें दैन जोग सब, नैननि देखै मुनि गुन खान ॥
दानबुद्धि जाकेँ नहिँ उपजै, तासाँ महा मूढ़ को आन ।
पुन्य जोगतै द्रव्य कसायौ, सो न लगायौ उत्तम धान ॥ ३२ ॥
ज्यौं नर रतन गमाय जलधिमें, दूढ़ै भागाँ पावै कोय ।
त्यौं चिरकाल भमत भवसागर, कठिन मनुष भौ प्रापति सोय

(१२३)

दैननि जोग सँजोग दरवकौ, दान देय नहिं मूरख जोय ।
बढ़ै सछिद्र जिहाज रतन लै, सागर पार कौन विधि होय ३३
चौपाई ।

जो धनवान करै नहिं दान, इह भौ जस पर भौ सुख खान ।
ता नरकौ साहव है और, सेवक भेजौ रच्छा-ठौर ॥ ३४॥
सवैया तेईसा ।

संजममैं तन-भोग लखै पन, इंद्रनसौं रन जीतवौ चाहै ।
ध्यान विषै मन चाह रहै वन, कोप नहीं छन सांत दसा है ॥
पूजा विषै मन पोख दुखी जन, दान विषै धनकौं निरवाहै ।
धर्म लगै लछमी अपनी वह, आन लहै धन औरनका है । ३५।
पुन्य घटै विघटै लछमी घर, दान दियै न घटै धन भाई ।
सोच निवारहु कूप निहारहु, काढ़ततै जल बाढ़त जाई ॥
पात्रकौं दान निरंतर ठान, हियै सरधान महासुखदाई ।
खाय गयौ वह खोय गयौ नर, लेय गयौ जिह और खिलाई ३६

कवित्त (३१ मात्रा) ।

खान पान पट भौन गौनमैं, लोभ अकीरतवान बखान ।
पूजामाहिं नाहिं जल फल सुभ, दीजै नीरस दानविधान ॥
इह परलोक थोक सुख चूरै, महालोभ पूरै दुखदान ।
लोभी होइ लोभ तजि भाई, देय हाथ ले साथ निदान ॥ ३७॥

सवैया तेईसा ।

लच्छि भई न भई घरमैं, नरमैं उपगार महा मन ढीलौ ।
जन्म भयौ न भयौ तिनकौ, जिनकौ चित नाहिं दया रस गीलौ ।
संखकी भांति मुए जगमैं, जिनकौ कोऊ नाम सुनै नहि कीलौ ।
दोष नहीं पर नाउ न लैं जन, लेत हि होत अहारकौ हीलौ ३८

(१२४)

रोडकी ।

स्वान पेट निज भरै, भूप हू पेट भरै है ।
कहा बड़ाई भई, खाय दुरगंध करै है ॥
पात्रदान नित देइ, लेइ नर-भौ-फल तेई ।
अंत रहै कछु नाहिं, नाम तिनकौ जग लेई ॥ २९ ॥

कवित्त (३१ मात्रा) ।

इंद्र फनिंद नरिंदन स्वामी, गामी सिवमारगके साथ ।
लोक अलोक सकल परकासत, निरमल रतनत्रै आराध ॥
तिनकी धिरता होत असनतै, दै भोजन करि भगति अगाध ॥
यह गृहि-धर्म कौन नहिं चाहै, एक दान विन सबै उपाध ॥ २९ ॥

अडिह ।

घरा घरामें द्रव्य, पैड़ इक ना टलै ।
परिजन मरघट थाप, आप घरकों चलै ॥
भली विचारी लकड़ी, जो साथै जलै ।
आगें दीरघ राह, घरम कीनों फलै ॥ ४१ ॥
जस सौभाग्य सल्प, सूर सुख कुल भला ।
जाति लाभ सुभ नाम, विभौ पंडित कला ॥
सरव संपदा पात्र, दानतै पाइयै ।
जतन करौ किन जीव, बहुत क्या गाइयै ॥ ४२ ॥

सवैया तेईसा ।

भौन करौं सुत नारि वरौं, धन गाहिं धरौं कठिनी महिं खैहौं ।
काम घने इतने करने, अब दान सदा मनचंचित दैहौं ॥
लोभ मलीन प्रवीन लखै निज, जानहुंगा जब ही कर लैहौं ।
सोचत सोचत आय गई थिति, तौ न कहै अबकै मरि जैहौं ॥ ४३ ॥

धूमकों जीवन है जगमें कहा, आप न खाय मखाय न जई ॥
 दुर्वकें बंधनमाहिं बंध्यौ इह, दानकी बात मुँह कीई काँई ॥
 तातैं बहौ गुन कागमें देखिये, जात कुलायकें योकरन पाँई ॥
 लोभबुरौ सब औगुनमें इक, ताहि तत्रे लिमकों इम सानें ॥
 दीनकों दीजिये होय दया मन, सीतकों दीजिये प्रीति अदुई ॥
 सेवक दीजिये काम करे बहु, साहव दीजिये आदर पाँई ॥
 सबुकों दीजिये वैर रहै नहिं, भादकों दीजिये करुणै माँई ॥
 साधकों दीजिये मोखके कारन, हाथ दियो न अकारय अँई ॥

आदि ॥

दाता पुरुषनि पास, नाम है जात है ।
 रहौं सूर घर माहिं, मुहाग विलान है ॥
 विद्या पंडित धाम, साँति दुन्न को मुई ।
 लछी कृपनकों पाय, महा साता गई ॥ ४६ ॥

कवित्त (३१ मात्रा) ।

उत्तम पात्र साध सिवसाधक, मध्यम पात्र सरावग सार ।
 जघन पात्र समकिती अविरती, विन समकित कुपात्र व्रत-धार
 समकित विरत-रहित अपात्र हैं, पाँच भेद भाखे निरधार ।
 उत्तम मध्यम जघन भेदसाँ, एड़े पंटे पात्र विचार ॥ ४७ ॥
 उत्तम मध्यम जघन पात्रतैं, तीनों भोगभूमिसुख होय ।
 लहै कुभोग कुपात्र दानतैं, दान अपात्र दिये दुख होय ॥
 बीज सु खेत डारि फल खइये, ऊसर डारि बीजमति खोय ।
 तातैं मन वच काय प्रीतिसाँ, पात्रदान दीजौ सब कोया ॥ ४८ ॥

१ शूरं स्वजामि वैश्व्यादुदारं लज्जया पुनः ।
 सापन्त्यात्पण्डितमपि तस्मात्कृपणमाश्रये ॥

सास्त्र अभै आहार ओषधी, चारौ दान बड़े संसार ।
 निहवै सुरग मुक्तिके दाता, दाता भुगता देखि निहार ॥
 गो गज राज वाजि दासी रथ, कनक भूमि तिल मंदिर नारि ।
 दसौ कुदान पापके कारन, देत लेत सो नरक मझार ४९
 जो दीजै चैत्याले कारन, भूमि आदि बहु वस्तु अपार ।
 तामें श्रीजिनविं विराजै, चमर छत्र सिंहासन सार ॥
 पूजा करै पढ़ै जिनवानी, चारौ संघ मिलै निरधार ।
 बहुत काललौ वदै जैनमत, धरम मूल पर-भौ-सुखकार ॥५०॥
 दान बखान किया हमनै यह, कृपन दुःख सवकौ सुखदाय ।
 पाय चमेली अलिगन गुंजै, काग न जानै गुन समुदाय ॥
 चंद्र किरनितै कुमुदनि विकसै, पाथर कौन भांति हरखाय ।
 भान तेज दसदिसि उजियारौ, एक उलू दुख नाहिं उपाय ५१
 रतनत्रै आभरन विराजै, वीरनंदि गुरु गुनसमुदाय ।
 तिनकै चरन कमल जुग सुमिरत, भयौ प्रभावग्यान अधिकाय ।
 तव श्रीपद्मनंदिनै कीनै, दान प्रकास काव्य सुखदाय ।
 पद्मनंदिपद वंदि बनाई, दानवावनी ध्यानतराय ॥५२॥

(१२७)

चारसौ छह जीवसमास ।

दोहा ।

बंदौं नेमि जिनंद पद, सब जीवन सुखदाय ।
बालब्रह्मचारी भए, पसुगनबंध छुड़ाय ॥ १ ॥
जीवसमास अनेक विध, भाखे गोमटसार ।
नेमिचंद गुरु वंदिकैं, कहूं एक अधिकार ॥ २ ॥

चौपाई ।

पृथ्वीकाय दुभेद वखान, कोमल माटी कठिन पखान ।
पानी पावक पौन विचार, नित्य इतर साधारन धार ॥३॥
सातौं सूच्छम सातौं थूल, इनकै चौदै भेद कवूल ।
कहीं प्रतेककाय दो जात, परतिष्ठत अप्रतिष्ठत भ्रात ॥४॥

दोहा ।

दूब बेलि छोटा विरख, वड़ा विरख अरु कंद ।
पंच भेद परतेकके, लखत नाहिं मतिमंद ॥ ५ ॥
जब इनमाहिं निगोद हैं, तब परतिष्ठत जान ।
जब निगोद नहिं पाइए, अपरतिष्ठ तब मान ॥ ६ ॥
जाति दसौं परतेककी, वे चौदह चौबीस ।
परज अपरज अलवधसौं, भेद बहत्तरि दीस ॥ ७ ॥
वे ते चौ इंद्री त्रिविध, परज अपरज अलवध ।
विकलत्रैकै भेद नव, हिंसा करै निषिद्ध ॥ ८ ॥

चौपाई ।

करम भूमि तिरजंच विख्यात, गर्भज सनमूर्छन दो जात ॥
गरभज परज अपरज प्रवीन, अलवध हू सनमूर्छन तीना ॥९॥

(१२८)

सैनी पंच असैनी पंच, दसों भेद जलचर तिरजंच ।
दसों भेद थलचर पसुकाय, दसों व्योमचर उड़ें सुभाय १०
करम भूमि तिरजंच मझार, तीस भेद भाखे निरधार ।
भोग भूमि अथ सुनौ सुजान, थलचर नभचर दो सरधान ११
परज अपर्जापति दो भेद, चारि भेद जानौं बिन खेद ।
उत्तम मधम जघन भूतनै, वारै भेद जिनागम भनै ॥ १२ ॥

दोहा ।

पंचेद्री तिरजंचके, कहे छियालिस भेद ।
तेरै भेद मनुष्यके, समझौं गरभ उछेद ॥ १३ ॥

चौपाई ।

उत्तम भोगभूमि सुख खान, उत्तम पात्रदानफल जान ।
मध्यम जघन भोग भुव दौय, चौथे कुभोग भू नर जोय १४
पंचम मलेछ खंड मझार, छठे आरज गरभज सार ।
परज अपरज दुवादस जान, अलवधि नर इनमैं नहिं मान १५

अडिह ।

नारि जोनि थन नाभि, कांखमैं पाइए ।
नर नारिनकै, मल मूतरमैं गाइए ॥ १६ ॥
मुरदेमैं संमूर्छन, सैनी जीयरा ।
अलवध परजापती, दया धरि हीयरा ॥ १७ ॥

सोरठा ।

नरक पटल उनचास, परज अपरजापत कहे ।
जीवसमास प्रकास, सातौमैं अट्टानवै ॥ १८ ॥

चौपाई ।

त्रैसठ पटल सुरगके पाठ, भुवनपती दस व्यंतर आठ ।
जोतिस पांच छियासी भए, परज अपरजापति गति लए १९

(१२९)

श्लोक ।

नरक माहिं अंठानवै, पसु इक सौ तेईस ।
नर तेरे सब देखै, सतक बहत्तरि दीस ॥ २० ॥

श्लोक ।

परजापत एक सौ, छियासी जानिये ।
अपरजास एक सौ, अठ्यासी मानिये ॥
अलबध परजापत्त जीव, चौंतीस हें ।
चव सत पट पर करुना, करै मुनीस हें ॥ २१ ॥

श्लोक ।

नियत एक चेतनमई, भेद सरव व्यौहार ।
निहचै अरु व्यौहारका, जाननहारा सार ॥ २२ ॥
सुदया समता आपभै, यह परदया विचार ।
द्यानत सुपरदया करै, ते बिरले संघार ॥ २३ ॥

इति चारसी-अष्ट-जीवसमाप्त ।



(१५०)

वृषाध्यानचौबीसी ।

छाप्य ।

रिपभदेय रिपदेय, धीर गंभीर धीर धुनि ।
चार बीस जगदीस, ईस तोईस युगुन गुनि ॥
सुरग-ठाम निज नाम, मात पुर तात धरन तन ।
आव काय सुभ चिन्त, मुक्त आसन दस धरनन ॥
जस गाय पुन्य उपजाय बुधि, पाय फरौ मंगल अमर ।
सिर नाय नमौ जुग जोर कर, भो जिनिंद भव-ताप-हरा ॥२॥

वृषभदेय ।

रिपभदेय रिपिनाथ, वृषभ लच्छन तन सोई ।
नाभिराय-कुल-कमल, मात मरुदेधी मोई ॥
चौरासी लख पुव्य आव, सत पंच धनुष तन ।
नगर अजोध्या जनम, कनक वपु धरन हरन मन ॥
सर्यार्थसिद्धतै गमन पद, -मासन केवल ग्यान वर ।
सिर नाय नमौ जुग जोरि करि, भो जिनिंद भव-ताप-हरा ॥३॥

अजितनाथ ।

अजित अजित रिपु अजित, हेम तन गज लच्छन भन ।
पिता राय जितसष्ट, अत्र (१) खरगासन आसन ॥
लाख बहत्तरि पुव्व, आव पुर जनम अयोध्या ।
धनुष चारिसै साठि, गाढ़ बच बहु प्रतिबोध्या ॥
तजि विजय थान परधान पद, बसे विजैसैना उदर ।
सिर नाय नमौ ॥ ३ ॥

(१३१)

संभयनाथ ।

संभय संभय-हरन, पुरी मार्येसी जानी ।
मात सुपेना रूप, भूप दिदुराज प्रयानी ॥
खरगासन सुग्य स्यादि, आदि प्रीयकर्त आण ।
चिन्न तुरंग उतंग, रंग कंचनम गाण ॥
धिति माठि लाख पूरव भुगति, धनुष चारिसं लखि चतुरा
सिर नाय नमो ॥ ४ ॥

अभिनन्दन ।

अभिनन्दन अभिनन्द, कन्द मुख भूप स्वयंवर ।
माता सिद्धारथा, कथा सुवरन तन मनहर ॥
तीन सतक पंचास, धनुष तन नगरि विनीता ।
पुव्व लाख पंचास, तास कपि लांछन मीता ॥
खरगासन विजय विमानतें, करम नास परकास कर ।
सिर नाय नमो ॥ ५ ॥

सुमतिनाथ ।

सुमति सुमतिदातार, सार वस वैजयंत मन ।
भूप मेघरथ तात, मात मंगला कनक तन ॥
पुव्व लाख चालीस, ईस तन धनुष तीनसै ।
चक्रवाक लखि चिन्न, खरग आसन सुख विलसै ॥
छहमास अगाऊ गरभतें, भयो विनीता सुर-नगर ।
सिर नाय नमो ॥ ६ ॥

पद्मप्रभ ।

पद्म पद्म भवि भमर, पद्म लांछन सुखदाई ।
धरन भूप गुनकूप, सरूप सुसीमा माई ॥

(११२)

अंतम ग्रीवक वास, दुसै पंचास चाप तन ।
खरगासन बहु सकत, रक्त तन हरख करन मन ॥
धिति तीस लाख पूरव पुरी, कौसंबी सब जन सुपर ।
सिर नाय नमौं ॥ ७ ॥

सुपार्थनाथ ।

देत सुपास सुपास, पंच ग्रीवकतै आए ।
सुपरतिष्ठ भूपाल, पृथीसैना मन भाए ॥
नगर बनारस धाम, स्वाम खरगासन राजै ।
चिन्न साधिया बीस, लाख पूरव धिति छाजै ॥
तन हरित वरन दोसै धनुष, सुर द्वारै चौसठ चमर ।
सिर नाय नमौं ॥ ८ ॥

चंद्रप्रभ ।

चंद्रप्रभू प्रभ चंद्र, चंद्रपुर चंद्र चिन्न गन ।
महासैन विख्यात, मात लछमना स्वेत तन ॥
वैजयंततै आय, काय खरगासनधारी ।
आव पुव्व दस लाख, भए सबकौ सुखकारी ॥
डेड़सै धनुष तन भविक जन, हंस पाय तुम मानसर ।
सिर नाय नमौं ॥ ९ ॥

पुष्पदन्त ।

सुबुधि सुबुधि करतार, सार प्रानतके धानी ।
महा भूप सुग्रीव, जीव जयवामा रानी ॥
उज्जल वरन सरीर, धीर खरगासन जानौ ।
काकंदीपुर साख, लाख दो पूरव मानौ ॥

(१३३)

तन धनुष एक सौ भौ-रहित, सहित चिन्न जलचर मकर ।
सिर नाय नमौं ॥ १० ॥

शीतलनाथ ।

शीतल शीतल वचन, भद्रपुर आरन स्वर वर ।
दिढरथ तात विख्यात, सुनंदा माता अवतर ॥
नवै धनुषकौ देह, धीर कंचनमय गायौ ।
आव पुव्व इक लाख, खरगआसन सुख पायौ ॥
श्रीवृच्छ चिन्न केवल प्रगट, भिन्न भिन्न भाख्यौ सुपर ।
सिर नाय नमौं ॥ ११ ॥

श्रेयांसनाथ ।

भज श्रेयांस श्रेयास, स्वर्ग सोलमके वासी ।
विष्णुराज महाराज, मात नंदा परकासी ॥
असी चाप तनमाप, आप गैडेकौ लच्छन ।
खरगासन भगवान, सिंहपुर कनक वरन तन ॥
चौरासी लाख वरस भुगत, दुख-दावानल-भेध-झर ।
सिर नाय नमौं ॥ १२ ॥

वासुपूज्य ।

वासुपूज्य वसुपूज्य, भूप वसु विधिसौ पूजौ ।
दसम लोकतै आय, रकत सुभ काय न दूजौ ॥
सत्तर चाप सरीर, धीर चंपापुर आए ।
लंछन महिष मनोग, जोग पदमासन गाए ॥
धिति लाख वहत्तरि वरसकी, जयावती माता सुमर ।
सिर नाय नमौं ॥ १३ ॥

(१३४)

विमलनाथ ।

विमल विमल अवलोक, लोक द्वादस वस स्वामी ।
कंपिहापुर आय, काय कंचन जग नामी ॥
कृतवर्मा भूपाल, भाल जयस्यामा माता ।
सूकर चिन्न निसान, साठि धनु तन अति साता ॥
धितिसाठि लाख वरसन सुखी, खरगासन सवतै जुवरा
सिर नाय नमौं ॥ १४ ॥

अनंतनाथ ।

सुगुन अनंत अनंत, अंत सुर सोल जिनेस्वर ।
सिंधसेन नृपराय, माय जयस्यामाके घर ॥
कनक वरन परगास, तास पंचास चाप तन ।
आव लाख है तीस, ईसकौ सेही लंछन ॥
खरगासन कौसलपुर जनम, कुसल तहां आठौं पहरा
सिर नाय नमौं ॥ १५ ॥

धर्मनाथ ।

धर्म धर्म परकास, वास सरवारथसिध भुव ।
भान राज जस ख्यात, मात सुप्रभादेवी हुव ॥
खरगासन निहपाप, चाप चालीस पंच तन ।
आव लाख दस वरस, सरस कंचनमय है तन ॥
लखि वज्र चिन्न सुभ रतन पुर, पार न पावै सुर निकर ।
सिर नाय नमौं ॥ १६ ॥

शान्तिनाथ ।

सांति जगत सब सांति, भोगि सरवारथसिधि रिधि ।
कामदेव तन कनक, रतन चौदहौं नवौं निधि ॥

(१३५)

विश्वसैन नृप तात, मात ऐरा मृगलंछन ।
हथनापुरमें आय, काय चालीस धनुष तन ॥
धिति लाख वरस आसन पदम, नाम रटें अघ जाय दर ।
सिर नाय नमौं ॥ १७ ॥

कुंभनाथ ।

कुंधु कुंधु रखवार, सार सरवारधसिधि वस ।
हस्तिनागपुर आय, काय चामीकर हर सस ॥
सूरसैन नृप जैन, ऐन स्त्रीकांता सुभ मन ।
पंचानवै हजार, वरस पैंतीस धनुष तन ॥
खरगासन लंछन छाग सुभ, तारे जिन वैराग धर ।
सिर नाय नमौं ॥ १८ ॥

अरनाथ ।

अर अरि-करि-हर सिंघ, जयंत विमान जानि जन ।
भूप सुदरसन सार, मित्रसैना माता मन ॥
हस्तिनागपुर आय, चाप तन तीस विराजै ।
धिति चौरासी सहस, वरस कंचन छवि छाजै ॥
खरगासन लंछन मीन सुभ, वैन जलद सर-भविक भर ।
सिर नाय नमौं ॥ १९ ॥

महिनाथ ।

मल्लि करम-रिपु-मल्ल, धान अपराजित जानौ ।
मिथिलापुर अवतार, सार घट चिन्न पिछानौ ॥
कुंभराज महाराज, खरगआसन सरदहियै ।
धनुष पचीस सरीर, सहस पचपन धिति लहियै ॥

(१३६)

देवी प्रजायती कनक तन, अमल अचल अधिकल अजर
सिर नाय नमो० ॥ २० ॥

मुनिमुप्रत ।

मुनिमुप्रत प्रत वर्ग, स्वर्ग प्रानतकै थानी ।
भूप मुमित्र पवित्र, मित्र सुभ सोमा रानी ॥
राजगृहीमें आय, काय कज्जल छवि छाजै ।
वरस सहस थिति तीस, बीस तन चाप विराजै ॥
लच्छन कछुआ आसन खरग, दीनदयाल दया नजर ।
सिर नाय नमो० ॥ २१ ॥

नमिनाथ ।

नमि नमि सुरनरराज, राज सरवारथसिधि कर ।
विजयराज महाराज, विष्पला रानी उर धर ॥
आव वरस दस सहस, पुरी मिथिला सुखदाई ।
पंद्रै धनुष सरीर, खरगआसन लौं लाई ॥
तन कनक वरन लच्छन कमल, ग्यान भान हर भ्रम तिमर
सिर नाय नमो० ॥ २२ ॥

नेमिनाथ ।

नेमि धरम-रथ-नेमि, जयंत विमान वास किय ।
समुदविजै महाराज, सिवादेवी जानौं जिय ॥
नगर द्वारिका नाम, स्याम तन जन-मन-हारी ।
आव वरस इक सहस, चाप दस रजमति छाँरी ॥
खरगासन आसन मोखकौ, संख चिन्न हरिवंस-नर ।
सिर नाय नमो० ॥ २३ ॥

(१३७)

पार्श्वनाथ ।

पास पास अघ नास, वास प्राणत करि आए ।
अस्वसैन अवदात, मात वार्मा मन भाए ॥
नगर बनारसि थान, जान फनि लच्छन नामी ।
आव एक सौ वरस, खरग आसन सिवगामी ॥
तन हरित वरन नव कर धरन, वज्र प्रगट संवर सिखरा
सिर नाय नमों ॥ २४ ॥

वर्धमान ।

वर्धमान जस वर्ध, मान अच्युत विमान गति ।
नगर कुंडपुर धार, सार सिद्धारथ भूपति ॥
रानी प्रियकारनी, वनी कंचन छवि काया ।
आव वहत्तर वरस, जोग खरगासन ध्याया ॥
तन सात हाथ मृग नाथपति, तुमते अवलौ धरम जर ।
सिर नाय नमों जुग जोरि कर, ० ॥ २५ ॥

समुच्चय चौबीस तीर्थकर ।

रिपभ अजित संभव अभिनंदन सुमति पदम सम ।
जिन सुपास प्रभु चंद, सुविधि सीतल स्त्रेयांस नम ॥
वासपूज्यजी विमल, अनंत धरम पंदरमा ।
सांति कुंथु अर मल्ल, सु मुनिसोविरत वीसमा ॥
नमि नेमि पास वीरेस पद, अष्ट सिद्धि नौ रिद्धि धर ।
सिर नाय नमों ॥ २६ ॥

पांच कुमारतीर्थकर ।

वासुपूज्य सुरपूज्य, मल्ल विधिमल्लजयंकर ।
नेमि देह जम नेम, पास भौ-पास-छयंकर ॥

१ दो पुस्तकोंमें 'ब्राह्मी' पाठ है ।

(१३८)

महावीर महावीर, धीर पर-पीर-निवारन ।
बड़े पुरुष संसार, सार संपत्ति सुखकारन ॥
ए पंच कुमरपदई सुमर, कठिन सील बालक उमर ।
सिर नाच नमौं ॥ २७ ॥

कल्पवृच्छ कल्पतै, चित्तै चिंतामनि मन ।
पारत हू परसतै, करै हित एक जनम जन ॥
भगत अकल्प अचित, अपरस तिहारी नामी ।
भौ भौ सब सुख देहि, कौन उपमा है स्वामी ॥
हौं निपट सिधिलताके विषै, चपल चित्त निसदिन फिकर ।
सिर नाच नमौं ॥ २८ ॥

महापुरान प्रवाँन, जान आठौं विध वरनन ।
बासठ ठान बखान, जान दो लच्छन आसन ॥
होय कोय संदेह, नेह करि तहां निहारौ ।
सुद्ध छंद सो सुद्ध, फेरिकै कवित समारौ ॥
हौं अल्पबुद्धि बुद्धनविषै, एक बात लीनी पकर ।
सिर नाच नमौं ॥ २९ ॥

जै जै मल ब्रह्मचरिज, अटल बल सकल बनाए ।
एक एक जिन स्वाम, नाम दस दस गुन गाए ॥
सुनत सुनत चित चुनत, धुनत दुख-संतत प्राणी ।
थानतराय उपाय, गाय जिन पाय कहानी ॥
गद जनम जरा मृतु नहिं भगत, भगति एक ओपध विगरा ।
सिर नाच नमौं जुग जोरि कर, भो जिनंद भवतापहर ३०

इति दशस्थानचौबोत्ती ।

(१३९)

व्यौहार-पचीसी ।

अरहंतस्तुति-सर्वेया इकतीसा ।

सरवग्यपदधारी तीनलोकअधिकारी,
क्रोध लोभ परिहारी ऐसौ महाराज है ।
सबको समान गिना राग दोष भाव बिना,
पास नहिं तिना सक्र सौको सिरताज है ॥
ताहीको बखान्यौ धर्म सोई सांचौ सोई परम,
औरको कह्यौ अधर्म झूठको समाज है ।
सिवपुर वाटके बटाउनिकों संघल है,
सुखको दिवैया महाकौलमाहिं नाज है ॥ १ ॥

दयाधर्मस्वरूप ।

साध और स्रावक सकलव्रत जातें पळे,
गलै जास बिना सुख संपतिकी जननी ।
धर्मतरुमूल पाप धूल पुंज महा पौन,
विद्या उपजावनको बड़ी एक गननी ॥
उच्च मोख भौनकी नसैनी इच्छपद देनी,
जैनी प्रान-दया करौ दोषनिकी हननी ।
अदयाको नाम दसौं दिसामाहिं सुंन गिना,
दया पुंन बिना एक बात हू न बननी ॥ २ ॥
दान दिथै कहा सिद्धि ध्यान कियै कहा रिद्धि,
पाठ पढ़ै कहा वृद्धि जीवनको जोरिकै ।

१ बटोही-मुसाफिर । २ कलेबल-पाथेय । ३ दुभिक्षके समयमें । ४ अ-
नाज-अन्न.

(१४०)

कविता पखान करी लोगनिमें रीझ परी,
तपमाहिं बुझि धरी चंचलता छोरिकै ॥
एक बिना सबै हेय, ऐसी दया क्यों न लेय,
छहौं धर्ममाहिं ध्येय पाप डोरि तोरिकै ।
कोमलता हियेकी सहेली आप ही अकेली,
स्वर्गकी नवेली निधि करै दुख बोरिकै ॥ ३ ॥

महालोभदशा ।

पाय दो अटपटात जान हू थकत जात,
कटि हू पिरात गात घात बात बनी है ।
छाती छवि छीज गई पीठ हू सकुच भई,
हाथ हलै चलै नई जरा पौन घनी है ॥
बैन गह्यौ रूप और आंखि लाज तजी ठौर,
कांन वांन सुनै काँन आन बनी अनी है ।
काल असवारीपै हुस्यारी मृत वासनकी, (?)
डूबै जहां बांस तहां पोरी किन गनी है ॥ ४ ॥

दानस्वरूप ।

अजस विहार करै वारिधि हू जाय परै,
आपदा प्रसंग हरै विस्त (?) एक हू कहां ।
क्रोधकी न जौन होय लोभकी न पौन होय,
नरककौ न गौन होय कौन कहै दुख तहां ॥
पापकौ विनास होय भोगभूमिवास होय,
स्वर्गमें निवास होय शत्रु को रहै जहां ।
साधनकै दानतै निधान-पुंज व्योम देत,
या समान दूसरौ न मोटौ गुन है इहां ॥ ५ ॥

(१४१)

समानता ।

दानकों विसन जाँप ग्यानमें रिस न काँपे,
खानकों न तिसना पं भिसना सरलता ।
सोमता सुभाव लियें जोमकी न बात हियें,
मोमरीति लई गई मानकी गरलता ॥
भोगनसाँ विरमात जोगनसाँ निजरात,
लोगनकी सुनत बात दोपमें न लरता ।
रोस रीति भाननकाँ तोप प्रीति ठाननकाँ,
मोखफल खाननकाँ बई है वर लता ॥ ६ ॥

शोकनिवारण ।

पीतम मरेकाँ सोच करे कहा जीव पोच,
तजे तें अनते भव सो कछू सुरत है ।
एक आवै एक जाय ममतासाँ विललाइ,
रोज मरे देखे सुने नैक ना झुरत है ॥
पूतसाँ अधिक प्रीत वह ठाने विपरीत,
यह तौ महा अनीत जोग क्याँ जुरत है ।
मरनाँ है सूझे नाहिं मोहकी गहलमाहिं,
काल है अवैया स्वास नाँवति घुरत है ॥ ७ ॥

धनतृष्णानिवारण ।

एकनकै सैकड़े हजार लाख कोटि दर्ब,
रोज आवै रोज जाहि ताहि ना खबर है ।
एकें हाट हाट माहिं वाट वाट विललाहिं,
कौड़ी कन पावै नाहिं नैक ना सवर है ॥

(१४२)

सुभासुभ परतच्छ चच्छसौ विलोकत है,
पाप धन जोरि धन भानकौ अवर है ।
धन परजन तन सबसौ निराला आप,
सुच्छ लखै दच्छ कर्म नासकौ जवर है ॥ ८ ॥

ममतानिवारण ।

भोगक कियेतै पापकर्मकौ संजोग भूरि,
संजम धरेतै पुन्य कर्मकौ निवास है ।
धनकै बढ़ेतै मोह भावनकी बढ़वार,
आसकै निरोधसेती बोधकौ प्रकास है ॥
परगह भार गहै आरंभ अपार होय,
संग-निरवार करै दयाकौ विलास है ।
द्यानत कुडुंच माहिं ममता छूटै है नाहिं,
एकरूप भए सम सुखता अभ्यास है ॥ ९ ॥

आशा ।

केई विषै भोग पाय त्यागै मन वचं काय,
हैकै मुनिराय पाय वंदनीक भए हैं ।
केई विषैमै निवास चित्तमै रहै उदास,
ग्यानकौ प्रकास भववास पर गए हैं ॥
किनहीकै विषै नाहिं वांछा हू न उरमाहिं,
चाह दाह हीन आप-लीन परनए हैं ।
हमै विषै योग उपयोग सुद्ध दोनौं नाहिं,
वृथा आस-पास परे दोषनिसौ छए हैं ॥ १० ॥
देस देस धाए गढ़ वांके भूपती रिझाय,
धल हू खुदाए गिरि ताए पारा ना मखौ ।

(१४३)

सागरकों तरि धाए मंत्र हू मसान ध्याए,
पर घर भोजन ससंक काक ज्यों कस्यो ॥
बड़े नाम बड़े ठाम कुल अभिराम धाम,
तजिकें पराए काम करे काम ना सस्यो ।
तिसना निगोड़ीनें न छोड़ी बात भौंड़ी कोऊ,
मति हू कनांड़ी कर कांड़ी धन ना सस्यो ॥ ११ ॥

दृष्ये शोकत्यागके छद्म दृष्टान्त ।

आंव फल छाहिं खरवृजे फल छाहिं नाहिं,
नीवमाहिं फल नाहिं छाहिं ही सहाय है ।
आक फूल छाहिं नाहिं कंटक थूहर माहिं,
कांटे हैं बंधू राह आए दुखदाय है ॥
पुन्य पाप उतकिष्ट मध्यम जघन्य भेद,
जैसा उदै तैसा धन दारा सुत पाय है ।
हरख सोक कीर्ये कहा वीज बोय बृच्छ लहा,
दावा तजि साखी होय आव वीती जाय है ॥१२॥

बाद विवादमें मत पद्ये ।

साधरमी जन माहिं जो चरचा बनै नाहिं,
भेषधारी सिप्यनिमें कहें जे अवन हैं ।
सेतपटधारी जे पुजारी लोके ठूंहिये हैं,
वांभन वैरागी औ संन्यासी जे कठन हैं ॥
मीमांसक आदि जात जिनसों मिले न बात,
राग दोष किये घात ग्यानके पतन हैं ।
समता सरूप धरौ ऐंच लैचमें न परौ,
ग्रंथ नाय करौ हरौ दोष भरे जन हैं ॥ १३ ॥

(१४४)

शीतकालपरीपह ।

कंज मुरझात कपिहूकौ मद गल जात,
दहत वृच्छनि पात रंक रोम खरे हैं ।
सीतकी विधा अपार पानी जमै बारबार,
पौन लगै तीर धार लोक दुख भरे हैं ॥
तप-भौनमाहिं साधि ध्यान ऊषमा अराधि,
नदी तट चौपथमै कर्मनिसौं अरे हैं ।
जोगी बड़े धीर वीर पावै भव नीर तीर,
देहु मोखलच्छि हियै भद्र भाव धरे हैं ॥ १४ ॥

ग्रीष्मकालपरीपह ।

ग्रीष्मकौ तेज सूर गरमी परत भूर,
सूकत है जलपूर धूर पांवकौं धरे ।
धूप है अगनिरूप लू फुलिंगकौ सरूप,
दिनमै दुखी अनूप रात नींद को करे ॥
भूमिकी तपतिसौं दसौं दिसा तपै है सैल-
सिलापर निराधार खरे साध भै हरे ।
ग्यान जोत उर धार तमकी हरनहार,
वंदत हौं पाय जातैं मेरे भव भय टरे ॥ १५ ॥

वर्षाकालपरीपह ।

स्याम घटा अति घोर वरसै करत सोर,
रहै नाहिं एक ओर मूसलसी धार हैं ।
मानौं जल पियौ छार सोई वम्यौ है अपार,
नदी दारै टूटि टूटि खरते पहार हैं ॥
कारी निस वीजली गरज और झंझा पौन,
तामैं साध वृच्छ तलैं ठाड़े निरधार हैं ।

(१४५)

आप सुद्ध ध्यावत हैं कर्मकों बहावत हैं,
तेई भोख पावत हैं नमों सुखकार हैं ॥ १६ ॥

शापकी कर्मकारिता ।

सीत ताप पावसकों सहैं धीर वीर होय,
भेदग्यान भए बिना आपसों विकल है ।
तीन कर्म सेती भिन्न सदा चेतना ही चिन्न,
ताकी न खबरि कैसें जगसों निकल है ॥
बरसों लों भूल धोय न्यारिया सुखी न होय,
धातकी पिछान बिना दाम एक न लहै ।
आप ग्यान जानत है साम्य भाव आनत है,
घोर तप ठानत है कर्मसों विकल है ॥ १७ ॥

हितोपदेश ।

भस्यौ तू अनंती बार सम्यक न लह्यौ सार,
तातैं देव धर्म गुरू तीनों ठहराय रे ।
लाग रह्यौ धन धाम इनसों है कहा काम,
जपै क्यों न जिन नाम अंत सो सहाय रे ॥
क्रोध है कठिन रोग छिमा ओषधी मनोग,
ताकौ भयौ है सँजोग संगत उपाय रे ।
पूरब कमायौ सो तौ इहां आय खायौ अब,
करि मन लाय जो पै आगैं जाय खाय रे ॥ १८ ॥
वाग चलनैकौं त्यार ढीलौ तीरथ मझार,
झूठ कहनकौं हुस्यार सांच ना सुहाय रे ।
देखत तमासा रोज दर्सनकौं नाहिं खोज,
विकथा सुनन चोज साखकौं रिसाय रे ॥

ध. वि. १०

(१४६)

खान पानकों खुस्याल व्रत सुनै विकराल,
खावककी कुल चाल भूलौ बहु भाय रे ।
पूरव कमायौ सो तौ इहां आय खायौ अव,
करि मन लाय जो पै आगें जाय खाय रे ॥ १९ ॥

उद्यमी पुरुष । अनंगशेखर छन्द ।

मिथ्यात जात घातकें सुधा सुभाव रातकें,
अवृत्तकों निपातकें सुवृत्तकी दसा वरी ।
कुराग दोस नासकें कुआसकौ निरासकें,
प्रसांतता प्रकासकें उदास रीत आदरी ॥
सरीर प्रीत छारकें अनेक रिद्धि डारकें,
सुसिद्धिकों निहारकें स्वरिद्धि सिद्धि लौं धरी ।
अकर्म कर्म है गया सुग्यान ग्यानमै भया,
महा स्वरूप देखकें सुवंदना हमौं करी ॥ २० ॥
छुधा त्रिपा न भै करै न सीत तापसौं डरै,
न राग दोषकों धरै न काम भोग भोगना ।
त्रिभेद आप धारकें त्रिकर्मसौं निवारकें,
त्रिजोगसौं विचारकें त्रिरोगका मिटावना ॥
अराधना अराधकें कपायकों विराधकें,
सु सामभाव साधकें समाधका लगावना ।
वहाय पाप पुंजकों जलाय कर्म कुंजकों,
सुमोख माहिं जाहिंगे इहां न फेर आवना ॥ २१ ॥

भगवानसे यथार्थ विनती । सबैया-इकतीसा ।

तारक स्वरूप तेरौ जानत है मन मेरौ,
ध्यान माहिं घेरौ धिरै नाहिं को उपाय है ।

(१९७)

तात मात भ्रात नात सात-धात-जात गात,
हमसँ निराले सदा चित्त क्यों लुभाय है ॥
क्रोध मान माया लोभ पांचों इंद्रियों सोभ,
महा दुखदाय जीव काहे ललचाय है ।
न्याय तौ तिहारे हाथ ध्यानन त्रिलोकनाथ,
नावत हौं माय करौ जो तुमँ सुहाय है ॥ २२ ॥

शिक्षा ।

चाह रहै भोगनिसँ लागत है लोगनिसँ,
वेऊ तौ फकीर तोहि कैसँ सुख करँग ।
जाकी छाहिँ छिन माहिँ चाह कट्ट रहै नाहिँ,
ताहिँ क्यों न सेवै तेरे सब काम सरँग ॥
ग्रीषम तपत सैल नीचैँ बहु जलकुंड,
धाराधर आए विन कौन ताप हरँग ।
गंगा जमना अनेक नदी क्यों न चली जाहु,
चातककौँ स्वाति बूंद महाराज झरँग ॥ २३ ॥
आए तजि कौन धाम चलिबौँ है कौन ठाम,
करते हौँ कौन काम कट्ट हूँ विचार है ।
पूरव कमाय लाय इहां आय स्वाय गए,
आगँकौँ खरच कहा बांध्यौँ निरधार है ॥
विना लियैँ दाम एक कोस गामकौँ न जात,
उतराईँ दियैँ विना कौन भयौँ पार है ।
आजकाल विकराल काल सिंह आवत है,
मैं कह्यौँ पुकार धर्म धार जो तू चार (१) है ॥ २४ ॥

(१५८)

धर्मनहिना ।

धर्म नास्त करै ताकी धर्म भी विनास्त करै,
धर्म रच्छा करै ताकी धर्म रच्छा करै है ।
दुखी करै दुख जाय सुखी करै सुख पाय,
नके दुःखतै निकाल मोख माहिं धरै है ॥
धर्म करै जय होय पाप करै छय होय,
नास्त हँ सब लोय ताहि क्यों विसरै है ।
आगिमें जलत नाहिं पानीमें गलत नाहिं,
जगमें जैवंत सदा धर्म धरै तरै है ॥ २५ ॥
चाहत धन संतान नई देह मिलै आन,
डरै कालसेती सदा तनहीमें रहै है ।
वांछा अरु भय दोऊ भाव भख्यौ दीसत है,
नाना भांति सुख देखि साता नहिं लहै है ॥
पाप देखि रोवै पाप खोवै नाहिं महामूढ़,
स्वान-वान डारि कोऊ सिंह-वान गहै है ।
ध्यानत व्यौहारकी पचीसी पढ़ौ संत सदा,
ध्यान बुद्धि थिर होय आन नाहिं वहै है ॥ २६ ॥

इति व्यवहारपंचांसी ।



(१४९)

आरतीदशक ।

इह विध मंगल, आरती कीजै ।
पँच परम पद भजि, सुख लीजै ॥ इह० ॥ टेक ॥
प्रथम आरती, श्रीजिनराजा ।
भव-जल-पार उतार जिहाजा ॥ इह० ॥ १ ॥
दूजी आरति, सिद्धन केरी ।
सुमिरन करत मिटै भवफेरी ॥ इह० ॥ २ ॥
तीजी आरति सूरि मुनिंदा ।
जनम मरन दुख दूरि करिंदा ॥ इह० ॥ ३ ॥
चौथी आरति श्रीउवझाया ।
दर्सन देखत पाप पलाया ॥ इह० ॥ ४ ॥
पंचमि आरति साध तुमारी ।
कुमतिविनासन सिव अधिकारी ॥ इह० ॥ ५ ॥
छठी ग्यारह प्रतिमाधारी ।
स्रावक वंदौ आनँदकारी ॥ इह० ॥ ६ ॥
सातमी आरती श्रीजिनवानी ।
द्यानत सुरग मुक्तिकी दानी ॥ इह० ॥ ७ ॥

जिनराजकी आरती ।

आरती श्रीजिनराज तुमारी ।
करम दलन संतन-हितकारी । टेक ॥
सुर नर असुर करत तुम सेवा ।
तुम हि देव देवनिकै देवा ॥ आरती० ॥ १ ॥

(१५०)

पंच महाव्रत दुद्धर धारै ।

राग दोष परनाम विडारै ॥ आरती० ॥ २ ॥

भवभयभीत सरन जे आए ।

ते परमारथ पंथ लगाए ॥ आरती० ॥ ३ ॥

जो तुम नाम जपै मन माहीं ।

जनम मरन भय ताकाँ नाहीं ॥ आरती० ॥ ४ ॥

समोसरन संपूरन सोभा ।

जीते क्रोध मान छल लोभा ॥ आरती० ॥ ५ ॥

तुम गुन हम कैसे करि गावैं ।

गनधर कहत पार नहिं पावैं ॥ आरती० ॥ ६ ॥

करुणासागर करुणा कीजै ।

ध्यानत सेवककाँ सुख दीजै ॥ आरती० ॥ ७ ॥

मुनिराज-आरती ।

आरती कीजै श्रीमुनिराजकी ।

अधम उधारन आतम काजकी ॥ टेक ॥

जा लच्छीके सब अभिलाखी ।

सो साधनि कर्दम वत नाखी ॥ आरती० ॥ १ ॥

सब जग जीति लियौ जिन नारी ।

सो साधनि नागिन वत छारी ॥ आरती० ॥ २ ॥

विषयन सब जग वारै कीनै ।

ते साधनि विष वत तजि दीनै ॥ आरती० ॥ ३ ॥

भूकाँ राज चहत सब प्रानी ।

जीरन तून वत त्यागत ध्यानी ॥ आरती० ॥ ४ ॥

(१५१)

सत्रु मित्र दुख सुख सम मानै ।
लाभ अलाभ बराबर जानै ॥ आरती० ॥ ५ ॥
छहौं काय पीहर व्रत धारै ।
सबकौ आप समान निहारै ॥ आरती० ॥ ६ ॥
यह आरती पढ़ै जो गावै ।
द्यानत मनवांछित फल पावै ॥ आरती० ॥ ७ ॥

नेमिनाथ तीर्थकरकी आरती ।
किह विध आरति करौ प्रभु तेरी ।
अगम अकथ जस बुधि नहिं मेरी ॥ टेक० ॥
समुदविजै सुत रजमति छांरी ।
यौं कहि थुति नहिं होय तुम्हारी ॥ किह० ॥ १ ॥
कोट खंभ वेदी छवि सारी ।
समोसरन थुति तुमतै न्यारी ॥ किह० ॥ २ ॥
चारग्यानजुत तिनके स्वामी ।
सेवकके प्रभु यह वच खामी ॥ किह० ॥ ३ ॥
सुनकै वचन भविक सिव जाहीं ।
सो पुदगलमै तुम गुन नाहीं ॥ किह० ॥ ४ ॥
आतम जोति समान बताऊं ।
रवि ससि दीपक मूढ़ कहाऊं ॥ किह० ॥ ५ ॥
नमत त्रिजगपति सोभा उनकी ।
तुम सोभा तुममै निज गुनकी ॥ किह० ॥ ६ ॥
मानसिंघ महाराजा गावै ।
तुम महिमा तुम ही बनि आवै ॥ किह० ॥ ७ ॥

(१५२)

निश्चय आरती ।

इह विध आरति करौं प्रभु तेरी ।
अमल अबाधित निज गुन केरी ॥ टेक ॥
अचल अखंड अतुल अविनासी ।
लोकालोक सकल परगासी ॥ इह० ॥ १ ॥
न्यान दरस सुख बल गुन धारी ।
परमात्म अविकल अविकारी ॥ इह० ॥ २ ॥
क्रोध आदि रागादि न तेरे ।
जनम जरा मृतु कर्म न नेरे ॥ इह० ॥ ३ ॥
अवपु अवंध करन-सुखनासी ।
अभय अनाकुल सिवपदवासी ॥ इह० ॥ ४ ॥
रूप न रेख न भेख न कोई ।
चिनमूरति मूरति नहिं होई ॥ इह० ॥ ५ ॥
अलख अनादि अनंत अरोगी ।
सिद्ध विसुद्ध सु आत्मभोगी ॥ इह० ॥ ६ ॥
गुन अनंत किम वचन वतावै ।
दीपचंद भवि भावन भावै ॥ इह० ॥ ७ ॥

आत्माकी आरती ।

करौं आरती आत्मदेवा ।
गुन परजाय अनंत अभेवा ॥ टेक ॥
जामैं सब जग वह जगमाहीं ।
वसत जगतमैं जग सम नाहीं ॥ करौं० ॥ १ ॥
ब्रह्मा विष्णु महेसुर ध्यावैं ।
साधु सकल जिहके गुन गावैं ॥ करौं० ॥ २ ॥

बिन जानैं जिय चिर भव डोलै ।
 जिहि जानैं छिन सिव-पट खोलै ॥ करौं ॥ ३ ॥
 ब्रती अब्रती विध व्यौहारा ।
 सो तिहु काल करमतै न्यारा ॥ करौं ॥ ४ ॥
 गुरु सिख उभै वचन करि कहिए ।
 वचनातीत दसा तिस लहिए ॥ करौं ॥ ५ ॥
 सुपर भेदकौ देखि उछेदा ।
 आप आपमैं आप निवेदा ॥ करौं ॥ ६ ॥
 सो परमातम पद सुखदाता ।
 होहि विहारीदास विख्याता ॥ करौं ॥ ७ ॥

गौरी राग, आरती ।

कहा लै पूजा भगत वढ़ावैं ।
 जोग वस्तु कहातैं लै आवैं ॥ टेक ॥
 छीरउदधि जलमेरु न्हुलावैं ।
 सो गिरि नीर कहां हम पावैं ॥ कहा० ॥ १ ॥
 समोसरनविधि सरव बनावैं ।
 सो न बनै मुख क्या दिखलावैं ॥ कहा० ॥ २ ॥
 जल फल स्वर्ग लोकतैं ल्यावैं ।
 सो हमपैं नहिं कहा चढ़ावैं ॥ कहा० ॥ ३ ॥
 नाचैं गावैं वीन बजावैं ।
 सो न सकति किम पुन्य उपावैं ॥ कहा० ॥ ४ ॥
 द्वादसांग सूत जो थुत गावैं ।
 सो हम बुद्धि न कहा बतावैं ॥ कहा० ॥ ५ ॥
 चार ग्यान धर गनधर गावैं ।
 सो थिरता नहिं चपल कहावैं ॥ कहा० ॥ ६ ॥

(१५४)

द्यानत प्रीतिसहित सिर नावै ।
जनम जनम यह भक्ति कमावै ॥ कहा० ॥ ७ ॥

वर्धमानकी आरती, राग गौरी० ।

करौं आरती वर्धमानकी ।
पावापुर निरवान थानकी ॥ टेक ॥
राग विना सब जग-जन तारे ।
दोष विना सब कर्म विडारे ॥ करौं० ॥ १ ॥
सील धुरंधर सिव-तिय-भोगी ।
मनवचकायन कहियै जोगी ॥ करौं० ॥ २ ॥
रत्नत्रयनिधि परिगह डारी ।
ग्यान-सुधा-भोजन व्रत-धारी ॥ करौं० ॥ ३ ॥
लोकअलोकव्यापि निज माहीं ।
सुखमय इंद्री सुख दुख नाहीं ॥ करौं० ॥ ४ ॥
पंचकल्याणकपूज्य विरागी ।
विमल दिगंबर अंबरत्यागी ॥ करौं० ॥ ५ ॥
गुनमनिभूषण भूषण स्वामी ।
जगत उदास जगंतरजामी ॥ करौं० ॥ ६ ॥
कहै कहां लौं तुम सब जानौ ।
द्यानतकी अभिलाख प्रमानौ ॥ करौं० ॥ ७ ॥

वृषभनाथकी आरती ।

कहा ले आरती भगत करै जी ।
तुम लायक नहिं हाथ परै जी ॥ टेक ॥
छीर जलधिकौ नीर चढ़ायौ ।
कहा भयौ मै भी जल लायौ ॥ कहा० ॥ १ ॥

(१५५)

उज्जल मुक्ताफलसौं पूजौ ।
हम पै तंदुल और न दूजौ ॥ कहा० ॥ २ ॥
कलपवृच्छ-फलफूल तुम्हारे ।
सेवक क्या ले भगति विथारै ॥ कहा० ॥ ३ ॥
तनसौं चंदन अगर न लागै ।
कौन सुगंध धरै तुम आगै ॥ कहा० ॥ ४ ॥
नख सम कोटि चंद रवि नाही ।
दीपक जोति कहो किह माहीं ॥ कहा० ॥ ५ ॥
ग्यानसुधाभोजन व्रतधारी ।
नेवज कहा करै संसारी ॥ कहा० ॥ ६ ॥
द्यानत सकत समान चढ़ावै ।
कृपा तिहारीतै सुख पावै ॥ कहा० ॥ ७ ॥
परमात्माकी आरती ।
मंगल आरती आतमराम ।
तन मंदिर मन उत्तम ठाम ॥ टेक ॥
सम रस जल चंदन आनंद ।
तंदुल तत्त्व-सरूप अमंद ॥ मं० ॥ १ ॥
समैसार फूलनकी माल ।
अनुभौ सुख नेवज भरि थाल ॥ मं० ॥ २ ॥
दीपक ग्यान ध्यानकी धूप ।
निर्मल भाव महा फलरूप ॥ मं० ॥ ३ ॥
सुगुन भविक जन इक रंग लीन ।
निहचै नौधा भगति प्रवीन ॥ मं० ॥ ४ ॥
धुनि उत्साह सु अनहद ग्यान ।
परमसमाधिनिरत परधान ॥ मं० ॥ ५ ॥

(१५६)

बाहज आतम भाव वहाव ।
अंतर ह्यै परमातम ध्याव ॥ मं० ॥ ६ ॥
साहव सेवक भेद मिटाय ।
द्यानत एकमेक हो जाय ॥ मंगल० ॥ ७ ॥
मंगल आरती ।

मंगल आरती कीजै भोर, विघनहरन सुख करन किरोर ॥१
अर्हत सिद्ध सूरि उवझाय, साध नाम जपियै सुखदाय ॥ मंगल०
नेमिनाथ स्वामी गिरनार, वासुपूज्य चंपापुर धार ।
पावापुर महावीर मुनीस, गिरिकैलास नमौ आदीस ॥ मंगल०
सिखर समेद जिनेसुर वीस, वंदौ सिद्धभूमि निसदीस ।
प्रतिमा स्वर्ग मर्त्य पाताल, पूजाँ कृत्य अकृत्य त्रिकाल ॥ मंगल०
पंचकल्याणक काल नमाम, परमौदारक तन गुणधाम ।
केवल ग्यानआतमाराम, यह पटविध मंगलअभिराम ॥ मंगल०
मंगल तीर्थकर चौवीस, मंगल सीमंधर जिन वीस ।
मंगल श्रीजिनवचन रसाल, मंगल रत्नत्रय गुणमाल ॥ मंगल०
मंगल दसलच्छन जिनधर्म, मंगल सोलैकारन परम ।
मंगल वारै भावन सार, मंगल चार संघ परकार ॥ मंगल० ॥ ७ ॥
मंगल पूजा श्रीजिनराज, मंगल सास्त्र पढ़ै हितकाज ।
मंगल सतसंगति समुदाय, मंगल सामायिक मन लाय ॥ मंगल०
मंगल दान सील तप भाव, मंगल मुक्तवधूकौ चाव ।
द्यानत मंगलआठौं जाम, मंगल महाभक्तिजिनस्वामा ॥ मंगल०

इति आरतीदशक ।

(१५७)

दशबोल पचीसी ।

मंगलाचरण, छप्पय ।

एक सरूप अभेद, दोय विध विधि-निषेधमै ।
रतनत्रै करि तीन, चार विध दर्वादिकमै ॥
पंचम गति सुचि ठौर, आप पटकारक राजै ।
सातौं भैकरि भिन्न, आठ गुनसहित विराजै ॥
नव नो-कपाय दस बंध हरि, तास रूप हिरदै धरौं ।
पूजौं ध्याऔं गाऔं सदा, जिह तिह विध भव जल तरौं ॥

एक बोलके चौबीस भेद ।

बंदौं वानी एक, एक ध्यानी अधनासक ।
एक दरव आकास, एक केवल सब भासत ॥
परमानू इक चलै, एक कालानू परसै,
एक समै निरअंस, एक तीर्थकर दरसै ॥
इक गुरु निरग्रंथ जिहाज सम, एक दया-मारग भला ।
इक समै जीव रिजुगति करै, एक आप अनुभौ कला ॥२॥
एक प्रान चौदहैं बंध, इक तेरम जिनवर ।
एक मेर मरजाद, एक मिथ्यात घातकर ॥
जघन देह इक समै, राजु चौदै अनु जावै ।
धर्म अधर्म विमान, एक वसि सिव पद पावै ॥
सुत ग्यान करम विन इक समै, जीव तत्त्व नौ परिनमै ।
इक नभ प्रदेश बहु देसकाँ, ठौर देत जिनवचनमै ॥ ३ ॥

दो बोलके चौबीस भेद ।

नमौं दुविध जिनराय, जीव निरजीव वखानै ।
सिद्ध और संसार भेद, त्रस थावर जानै ॥

कही प्रतेक निगोद, नित्त ईतर साधारन ।
 सूच्छम थूल वखान, पंचइंद्री मन विन मन ॥
 आगम अध्यातम कथन सुन, सुपर भेदकौ परनए ।
 धिरकल्प त्यागि जिन कल्प धरि, केवल ग्यान दरस भए ।
 बंदौ बंदसरूप, साध सावग सुखदायक ।
 नित्त अनित्त प्रवान, गुनी गुन सबके ग्यायक ॥
 पुन्य पाप परकासि, तास फल सुख दुख भाखै ।
 रूप अरूप निहार, दोय परिगह नहिं राखै ॥
 दो भेद ग्यान वरनन करै, दरव भावसौं पूजियै ।
 निहचै व्यौहार सँभार मन, दोय दयामय हूजियै ॥५॥

तीन बोलके चौबीस भेद ।

तीन साध आराध, वचन मन काय लायकर ।
 तीन पात्र सरधान, तीन विध आतम मन धर ॥
 तीन लोककौं जान, काल तीनों अवधारौ ।
 संख असंख अनंत, दरव गुन परज विचारौ ॥
 संसै-विमोह-विभ्रमरहित, ध्यान ध्येय ध्याता मुनौ ।
 करतार करम किरिया समझि, ग्यान ग्येय ग्याता मुनौ ६
 सामायिक तिहुँ वार, तीन सब सल्ल नसाजं ।
 तीनों दरसन मोह, जनम मृत जरा मिटाजं ॥
 तजि तीनों अग्यान, तीन समकित मन आनौं ।
 तीन समै अनहार, देवगुरुधर्म प्रवानौं ॥
 लखि भाव पारनामी त्रिविध, तीन करमसौं भिन्न है ।
 तजि राग दोष अरु मोहकौं, तीन चेतना चिन्न है ॥७

(१५९)

चार बोलके चौबीस भेद ।

चतुरानन भगवान, दान विध च्यारि ब्रतावैं ।
च्यारि अराधन धारि, च्यारि अरथनिकाँ पावैं ॥
च्यारि संघ आराधि, च्यारि विध वेद बखानैं ।
नमैं च्यारि विध देव, च्यारि निच्छेपै जानैं ॥
बहु घाति करम चकचूर करि, जरि संग्या चारौं गई ।
चहु ध्यान बखान विधानसौं, च्यारि भावना मन भई ॥
सहित अनंत चतुष्ट, च्यारि चौकरी विनासी ।
च्यारि कषाय जलाय, च्यारि विकथा नहिं भासी ॥
ग्रान च्यारि परकार, च्यारि दरसन परगासक ।
पुगलके गुन च्यारि, नारि चहु सील विनासक ॥
सहि च्यारि जात उपसर्गकौं, च्यारि भेद मन वस किया ।
तिन बंध च्यारि परकार हरि, चहु गतिकौं पानी दिया ॥

पांच बोलके चौबीस भेद ।

नमौं पंच पद सार, पंच इंद्री वस कीजै ।
पंच लवधिकौं पाय, पंच स्वाध्याय पढीजै ॥
चारित पंच विचारि, पंच परमाद विसारौ ।
अंतराय विध पांच, पांच मिथ्यात निवारौ ॥
पांचौं सरीर ममता तजौ, नीद पांच नहिं कीजियै ।
धरि पंच महाव्रत भावसौं, पंच समिति चित दीजियै ॥
सिद्ध पंच ही भाव, पांच पैताले जानौ ।
पंचाचार विचार, पंच सिक्कारन मानौ ॥

पंच जोतिषी देव, पंच गोलें साधारण ।
पट्ट पंचासतिकाय, मूलके भाव पंच गन ॥
भव पंच परावरतनि निकलि, पंच नरक दुखसौं डरौ ।
बहु भेद पंच थावर समझि, पंच कल्याणकपद धरौ ११

छह बोलके चौबीस भेद ।

नमौं छमतमैं सार, दर्ब पट्ट भेद प्रकासक ।
वाहज तप पट्ट भेद, भाव तप पट्ट दुखनासक ॥
पट्ट अनायतन तजौ, हानि पट्ट वृद्धि अगुरु लघु ।
पुंगलकै पट्ट भेद, क्रिया पट्ट गेह माहिं अघ ॥
पट्ट नरक जाय नारी कुमति, पट्ट विध समकित वरनयौ ।
पूजादि कर्म पट्ट पापहर, पडावसिकसौं सुख भयौ ॥१२॥
पट्ट मंगल वंदामि, छहौं परजापति जानौ ।
पट्ट सैना चक्रेस, संघनन पट्ट परवानौ ॥
संसथान पट्ट जान, छविधि परजै नै धारौ ।
छहौं काल परवान, काय पट्ट दया विचारौ ॥
जिय मरन वेर पट्ट दिसि चलै, पट्ट लेस्या जो धारि है ।
पट्ट अवधि ग्यानके भेद पट्ट, विध निहचै व्यौहार है १३

सात बोलके चौबीस भेद ।

सात नरक भयकार, व्यसन सातौं तज भाई ।
सात खेत धन खरचि, प्रकृति सातौं दुखदाई ॥
सक्र सात विध सैन, रतन सब सात कृष्ण घर ।
सात अचेतन रतन, सात चेतन चक्रेसर ॥

(१६१)

लखि सात धातमय तन असुचि, मौन सात विध धारकें ।
दाता गुन सातों सात विध, अंतरायकों टारकें ॥१४॥
सात भंग सरधान, जान तन जोग सात हैं ।
समुद्घात हैं सात, सात संजम विख्यात हैं ॥
तीन जोग विध सात, सात तन मैल बखानें ।
सात स्वरनके भेद, सीलव्रत सातों जानें ॥
निज नाम सात सातों उदधि, यहां सात ही खेत हैं ।
प्रभु नाम ईति सातों टलें, सात तच्च सिवहेत हैं ॥१५॥

आठ बोलके चौबीस भेद ।

आठ मूलगुन पाल, आठ मद तजौ सयानें ।
सम्यक आठों अंग, ग्यानके आठ बखानें ॥
आठ ठौर न निगोद, आठ गुन सुरगन छाजें ।
आठ जुगलके देव, आठ विध व्यंतर राजें ॥
पूजियै आठ विध देव जिन, आठों अंग नवाइयै ।
देहरे आठ मंगल दरव, आठ पहर लौं लाइयै ॥१६॥
आठों प्रवचन धार, जोगके आठ अंग हैं ।
आठ रिद्धि दातार, फरसके आठ भंग हैं ॥
आठ समै दंडादि, आठ उपमान बखानें ।
आठ भेद सत आदि, आठ लौकांतिक जानें ॥
अंगुल उत्तमभुव रोम वसु, आठ प्रातहारज भले ।
सब आठ ध्यान-पावकविषै, काठ करम आठों जले ॥१७॥

नव बोलके चौबीस भेद ।

नवौ पदारथ धार, दरसनावरनी नौ विधि ।
नौ नै नैगम आदि, चक्रधारीकें नौ निधि ॥

१ पृथ्वी, जल, तेज, वायु, केवलीका शरीर, तथा आहारक ये छह और
देव नारकीके शरीर, इन आठ स्थानोंमें निगोदजीव नहीं होते हैं ।

ध. वि. ११

(१६२)

नौ नारायण जानि, मानि नौ हैं बलभद्र ।
प्रतिनारायण नवों, नवों नारद हरि हितकर ॥
नौ नै गुण परजै दरवकी, आव बंध नौ बार हैं ।
नौ गुणधानकके भेद नौ, समकित नौ परकार हैं ॥१८॥
छायक गुण नौ नमों, सील नौ बारि संभारौ ।
प्रायश्चित नौ भेद, सांत रस नौमैं धारौ ॥
नौ त्रैवक उर धार, नौ नउत्तरे भरे बुध ।
जोनि-भेद नौ जान, मान मंगल नौ पद सुध ॥
नौ गुणधानक नव कोरि मुनि, नौ गुरु अच्छर अंक सव ।
नौ दानतनी विध जानकैं, नौधा भगति विना गरव १९

दश बोलके चौबीस भेद ।

पूजौं दस अवतार, जनम दस गुण जिन साहब ।
घाति घाति दस सुगुण, दसों समकित भाखे सव ॥
इंद्र आदि दस भेद, भवनवासी दस जानैं ।
पुगल दस परजाय, सूत्र दस भेद बखानैं ॥
दस दोपरहित आलोचना, काम कुचेष्टा दस तजै ।
भुव आदि जीवके भेद दस, वैयावृत दस विध भजै २०
दसों दिसा मन रोकि, ग्रान दस भिन्न चेतना ।
दरवतने दस भेद, संग दस साथ लेत ना ॥
दस विध हैं दिगपाल, निरजरा दस विध जानी ।
दसों विसेख सुभाव, अंक दस सिवपदवानी ॥
दस विध कुदान फल नरक दुख, दस सामानिक गुण दरव
सुभ समोसरनमैं दस धुजा, धरमध्यान दस विध सरव ॥

पद नय ।

असत कथन उपचार, जीवकौं जन धन जानौ ।
असत विना उपचार, काय आतमकौं मानौ ॥

सांच कथन उपचार, हंसकों राग विचारौ ।
सांच विना उपचार, ग्यान चेतनकों धारौ ॥
निहचै असुद्ध नर भेदनै, रागसरूपी आतमा ।
आदेय सुद्ध निहचै समझि, ग्यानरूप परमातमा ॥२२॥
व्यवहार और निश्चय नयसे द्रव्य कर्म, भाव कर्म, शुद्ध भावका कर्ता कौन है ?
दरव करमकों करै, जीव व्यौहार व्रतावै ।
दरव करम पुद्गलसरूप, निहचै नै गावै ॥
भाव करम करतार, धार व्यौहार सु पुद्गल ।
भाव करम आतमारूप, निहचै नैकौ बल ॥
दोनों असुद्ध जिय मोहमै, पुग्गल खंध लगावना ।
अनुभवौ सुद्ध पुद्गल अनू, जीव ग्यानमय भावना २३

शिक्षारूप ध्यान ।

न रचौ विपयनि माहिं, करौ परचौ इनमै नर ।
खरचौ दरव सुखेत, सदा अरचौ श्रीजिनवर ॥
चरचौ वारंवार, अतरचौ (?) मन सुखदायक ।
पुद्गल धर्म अधर्म, व्योम जम जड़ जी ग्यायक ॥
सव अकृत अनादि अजर अमर, गुन परजाय दरवमई ।
प्रतिभासै केवल आरसी, माहिं मोहि सरधा भई ॥२४॥

कविकृत लघुता ।

वृषभसैन गुनसैन, गोतम नरोत्तम गनधर ।
सकल पाय सिर नाय, पुन्य उपजाय बुद्धि वर ॥
कहे कवित हितकार, सार जहां हीन अधिक अति ।
छमा वरौ सुख करौ, दोष मति धरौ विपुलमति ॥
यह शब्द ब्रह्म वारिधि लहर, गनत पार को पाय है ।
ग्यानत ग्यानी आतम मगन, यह पुद्गल-परजाय है २५

इति दश-बोल-पचीसी ।

(१६४)

जिनगुणमालसप्तमी ।

अशोकपुष्पमंजरी (एक गुरु एक लघुके क्रमसे ३१ वणें)

मान थंभ देख औ सरोवरी भरी विसेख,
खातका गभीर पेख पुष्प वारि राज हीं ।
रूपकोट नाटसाल भाग दो बनै विसाल,
वेदिका धुंजा सताल माल आदि छाजहीं ॥
हेमकोट कल्पवृच्छ वाग सोहने प्रतच्छ,
रत्नपुंज धाम आवली मनोग गाजहीं ।
वज्र कोट चार पौल वार कोट सोल भीत,
बीच वेदिका त्रिपीठ संभुजी विराजहीं ॥ १ ॥

जन्मके दश गुण । सवैया इकतीसा ।

बल तौ अतुल वीर स्रमकौ न होय नीर,
हितमित वानी सब प्रानीकौ सुहावनी ।
आदि संस्थान है गभीर संहनन धीर,
रूपकी सोभा अनूप सवकौ रिझावनी ॥
सहस आठ लच्छन सरीर लोहू है खीर,
देहकी सुगंध और गंधकौ लजावनी ।
मलकौ न लेस लीयै उपजै दसौं जिनेस,
मेर करै न्हौन सो सुरेस भक्त भावनी ॥ २ ॥

घातिया कर्मके नाशसे दश गुण ।

जोजन सौ सौ सुभिच्छ व्योम चलै अंतरिच्छ,
चारौ मुख चारौ दिस सब विद्यापत हैं ।
जीवकौ न बध होय उपसर्ग नाहीं कोय,
कौलाहार लेत नाहिं ग्यानसुधा-रत हैं ॥

(१६५)

निर्मल सरूप माहिं तनकी न परै छाहिं,
नख केस बढै नाहिं आंख ना लगत हैं ।
घातिया करम नासि दसौं गुन परगास,
जिनकी भगत कीयै पाप-भै भगत हैं ॥ ३ ॥

देवोक्त चौदह गुण ।

अरध मागधी भापा सबै रितु फल फूल,
सिंह स्याल प्रीति रीति आरसी अवनि है ।
पौन बुहारै मेघ जल कन सुगंध झारै,
पाय तलै कंज धारै आनंद सबनि है ॥
निर्मल गगन और दसौं दिसा उज्जल हैं,
फलै खेत सोभै भूमि धर्म चक्र मनि है ।
आठौं मंगलीक सार सुर करै जैजैकार,
चौदैं अतिसय तेरै देवकृत धनि है ॥ ४ ॥

आठ प्रातिहार्य ।

फूल सनमुख वरखत मानौ वंदनिकौ,
देव दुंदुभीके वाजै भाजै पापभार जी ।
सिंघासन तीनसेती तीनलोकसाहब हौ,
तीन छत्र कहै रतनत्रय दातारजी ॥
जानौ अच्छर सुपेद चौसठि चमर दुरै,
औ कहा असोक वृच्छ हू असोक धारजी ।
भामंडल आरसी है वानी सुधा-धारसी है,
नमौ आठ प्रातिहारजके सिरदारजी ॥ ५ ॥

अनंतचतुष्टय ।

लोकालोक दर्व गुन परजाय तिहूँ काल,
टांकी ज्यौ उकेर राखै ग्यानमै प्रकास है ।

(१६६)

चंद भान असंख्याततै अनंतगुनी जोति,
सोऊ नाहिं लगै ऐसै दर्सनकी रास है ॥
निराबाध साखतौ अनाकुल अनंत सुख,
अंस हू न लोकमाहिं इंद्री सुखभास है ।
सत इंद्रसेती जोर बलकौ नहीं है ओर,
अनंतचतुष्टै नाथ बंदौ अघ नास है ॥ ६ ॥

छियालीस गुणवर्णन ।

दसौं जनमत सार दसौं घात घात कर,
चौदैं सुरकृत प्रातिहारज आठौं गहे ।
अनंतचतुष्टै कहिवतकौं छियालीस हैं,
गुन हैं अनंत तेरे ग्यानी ग्यानमैं लहे ॥
तारनकौं मान मेघ धारके प्रवांन और,
संभूरमनि-लहर तातैं अधिके कहे ।
कौन भांति भाखे जाहिं थिरता औ बुद्धि नाहिं,
द्यानत सेवकने न्यारे न्यारे सरदहे ॥ ७ ॥

इति जिनगुनमालसप्तमी ।



समाधिमरण ।

जोगीरासा ।

गौतम स्वामी बंदों नामी, मरनसमाधि भला है ।
 मैं कव पाऊं निसदिन ध्याऊं, गाऊं वचन कला है ॥
 देवधरम गुरु प्रीति महा दिह, सात विसन नहिं जानै ।
 तजि वाईस अभच्छ संयमी, वारह व्रत नित ठानै ॥ १ ॥
 चक्की उखरी चूल बुहारी, पानी त्रस न विराधै ।
 बनिज करै परद्रव्य हरै नहिं, कर्म छहों इम साथै ॥
 पूजा साख गुरुकी सेवा, संजम तप बहु दानी ।
 पर उपगारी अल्प अहारी, सामायिकविधग्यानी ॥ २ ॥
 जाप जपै तिहुं जोग धरै थिर, तनकी ममता टारै ।
 अंतसमै वैराग सँभारै, ध्यानसमाधि विचारै ॥
 आग लगै अरु नाव जु डूवै, धर्मविघन जत्र आवै ।
 चार प्रकार अहार त्यागिकै, मंत्रसु मनमें ध्यावै ॥ ३ ॥
 रोग असाध्य जरा बहु दीखै, कारन और निहारै ।
 बात वड़ी है जो वनि आवै, भार भवनको डारै ॥
 जो न वनै तौ घरमें रहिकै, सबसौं होइ निराला ।
 मात पिता सुत तियको सोंपै, निज परिगह अहि काला ॥४॥
 कुछ चैत्यालै कुछ सावक जन, कुछ दुखिया धन देई ।
 छिमा छिमा सबसौं करि आछै, मनकी सत्य हनेई ॥
 सत्रुनिसौं मिलि निज कर जोरै, मैं बहु करी बुराई ।
 तुमसे पीतमको दुख दीनै, ते सब वकसौं भाई ॥ ५ ॥
 धन धरती जो मुखतै मांगै, सो सब दे संतोखै ।
 छहों कायके प्रानी ऊपर, करुना भाव विसेखै ॥

नीचें घर बैठे इक जागै, कुछ भोजन कुछ पै ले ।
 दूधाधारी क्रमक्रम तजिकै, छाछि अहार पहै लै (?) ॥६॥
 छाछि त्यागिकै पानी राखै, पानी तजि संथारा ।
 भूमिमाहिं धिर आसन मांडै, साधरमी ढिग प्यारा ॥
 जब तुम जानौ यह न जपै है, तव जिनवानी कहियौ ।
 यौ कहि मौन लियौ सन्यासी, पंच परमपद गहियौ ॥७॥
 च्यारौ आराधन मन ध्यावै, वारै भावन भावै ।
 दस लच्छन मुनिधर्म विचारै, रत्नत्रय मन लावै ॥
 पैतिस सोलै पट पन चारौ, दो इक वरन विचारै ।
 काया तेरी दुखकी ढेरी, ग्यानमई तू सारै ॥ ८ ॥
 अजर अमर निज गुनगन पूरौ, परमानंद सुभावै ।
 आनंदकंद चिदानंद साहब, तीन जगतपति ध्यावै ॥
 छुधा तृपादिक हौहिं परीपह, सहै भाव सम राखै ।
 अतीचार पांचौं सब त्यागै, ग्यानसुधारस चाखै ॥ ९ ॥
 हाड़ चाम रहि सूकि जाय सब, धरमलीन तन त्यागै ।
 अदभुत पुंन उपाय सुरगमैं, सेज उठै ज्यौं जागै ॥
 तहाँसौं आवै सिवपद पावै, विलसै सुकल अनंता ।
 ब्यानत यह गति होहि हमारी, जैनधर्म जैवंता ॥ १० ॥

इति समाधिमरण ।

आलोचनापाठ ।

प्रथम नमों अरहंतानं, दुतिय नमों सिद्धानं जी ।
 त्रितिय नमों आइरियानं, नमों उवज्झायानं जी ॥
 पंच नमों लोए सब्ब, साहूनं गुन गाऊं जी ।
 चारों मंगल अरहंत, सिद्ध साधु धर्म ध्याऊं जी ॥ १ ॥
 चारों उत्तम लोकमें, जिन सिद्ध साधु सुधर्म जी ।
 चारों सरन गहौ जिनवर, सिद्ध साधु धर्म परम जी ॥
 वृषभ चंद्रप्रभ सांतजिनं, वर्धमान मन वंदों जी ।
 हुई होहिंगी चौवीसी, सब नमि पाप निकदों जी ॥ २ ॥
 श्रीजिनवचन सुहावने, स्याद्वाद अविरुद्धं जी ।
 तीन भवनमें दीपक वंदों, त्रिकरण सुद्धं जी ॥
 प्रतिमा श्रीभगवंतकी, स्वर्ग मर्त्य पातालं जी ।
 कृत्य अकृत्य दुभेदसों, वंदन करों त्रिकालं जी ॥ ३ ॥
 पूरव पाप जु मैं कियौ, कृत कारन अनुमोदं जी ।
 मन वच काय त्रिभेदसों, सब मिथ्या होदं (?) जी ॥
 आगैं पाप जु होयगौ, उनंचास विध नासों जी ।
 वर्तमान अघ छै करौ, तुम आगैं परकासों जी ॥ ४ ॥
 सर्व जीवसों मित्रता, गुनी देखि हरखाऊं जी ।
 दीन दया सठसों समता, चारों भावन भाऊं जी ।
 प्रभु पूजूं जुग भेदसों, गुरुपदपंकज सेऊं जी ।
 आगम अभ्यासों सदा, रतनत्रै नित वेऊं जी ॥ ५ ॥
 अच्छर मात्र अरथ अनमिल, भूलि कह्यौ सु खिमाऊं जी ।
 प्रात दोपहर सांझकौं, अर्ध रात्रमें भाऊं जी ॥
 ध्यानत दीनदयालनौ, भौ भौ भगति सु दीजै जी ।
 अंत समाधिमरन करौ, राग विरोध हरीजै जी ॥ ६ ॥

इति आलोचनापाठ ।

(१७०)

एकीभावस्तोत्रभाषा ।

दोहा ।

वंदौ श्रीजिनराजपद, रिद्धिसिद्धिदातार ।
विघनहरन मंगलकरन, दारिद दलन अपार ॥

चौपाई ।

मिथ्याभावकरमवैध भयौ, दुरनिवार भव भव दुख दयौ ।
सो सब नास भगतितै होय, रहै न प्रभु दुखकारन कोय ॥१॥
ग्यान जोत अघतमछयकार, अघट प्रकासि कहै गनधार ।
मो मन-भवन वसै तुव नाम, तहां न भरम तिमिरकौ कामर ।
पूजा गदगद वच मन काय, करौ हर्ष-जल वदन नहुवाय ।
विषयव्याल चिरकाल अपार, भाजै तज तन वंचइ द्वार ३
प्रथम कनकमय भू सब करौ, भविक भाग सुरतै अवतरौ ।
चित-गृह ध्यान-द्वार तुम आय, करौ हेम तन चित्र न काय ४
विन स्वारथ सब जग सुखदाय, जानौ सर्व दर्व परजाय ।
भगति रची चित-सज्या मोहि, तुम वस दुख-गन कैसे होहि ५
भम्यौ जगत बनमै चिरकाल, उपज्यौ खेद अगनि विकराल ।
तुम नय-सुधा-सीत-वावरी, पुन्य उदै लहि सब तप हरी ॥६॥
गमन प्रभाव कमल हूँ देव, परमल श्रीजुत कनक अभेव ।
मो मन परसै तुम सब काय, क्यों न मिलै मुझ सब सुख आया
विधि वन तजि सिवसुख घर कियौ, मदन-मानछिनमै हर लियौ
पीत-पात्र वच सुधा पिवंत, विषै रोगरिपु-त्रास हनंत ॥८॥
तुम ढिग मानसथंभ जु रहै, रतनरासि बहु सोभा लहै ।
देखत मान रोग छय होय, जद्यपि है पाहनमय सोय ९

१ श्रीवादिराजसूरिके संस्कृत एकीभावस्तोत्रका भावानुवाद । २ वसीठा-
सर्पका बिल । ३ वावरी-वापी ।

(१७१)

तुम मूरति-गिरि सपरस वार्य, लगै कर्मरजपुंज पलाय ।
ध्यान तोहि उर कमल मझार, होइ परमपद जग निस्तार १०
भव भव पायौ दुःख अपार, चादि करत लागै असि-धार ।
तुम सब जान प्रधान कृपाल, करी भगति अब होहु दयाल ११
पापी स्वान अंतकी वार, लह्यौ स्वर्ग-सुख सुनि नौकार ।
जपौ अमल मन तुम भगवान, अचरज कहा वरौ सिवथान ॥
तुम प्रभु सुद्ध ग्यान-दृगवंत, ताली-भगति विना जो संत ।
मोह जरे दृढ़ मोख-किवार, खोल सकै न लहै सुख सार ॥१३॥
मुक्ति-पंथ अघ तम बहु भख्यौ, गढ़े कलेस विपम विसतख्यौ ।
सुखसौं सिवपद पहुंचै कोय? जो तुम वच मन दीप न होय ।
कर्म धरा आतम निधि भूरि, दवी केवी पावै नहिं कूर ।
भगति कुदाल खोद लैं संत, विलसै परमानंद तुरंत ॥१५॥
स्यादवाद हिमगिरिसौं चली, तुम पद परसि उदधि सिव रली ।
भगति गंगमैं मो मन न्हाय, क्यौं न पाप मल कलुष तजाय १६
परमातम थिरपद सुखमई, मैं सदोष तुम सम बुध ठई ।
यदपि असत यह ध्यान तुम्हार, तदपि सुवांछित फलदातार
वचन उदधिसव जग विसतख्यौ, स्याद लहरि मिथ्यामल हख्यौ ।
थिर मन द्वादसांगमैं धरै, ग्यान सुधा पी जम-भय हरै १८
भूपन वसन कुसुम असि गहैं, सोभा रंचक देव न लहैं ।
तुम निपरिग्रह अभै मनोग, कौन काज भूपन असि जोग १९
तुम सोभा नहिं इंद्र जु नयौ, एका अवतारी सो भयौ ।
लोकनाथ भौ-वारिधि पोत, मुक्ति-कंत इह विध थुति होत ॥

(१७२)

ए थुतिवचन सु पुदगलरूप, नहिं व्यापै तुम गुन चिद्रूप ।
तद्यपि भगति सुधा जो गहै, मनवांछित फल सुरतरु लहै २२
राग दोष बिन परम उदास, चाहरहित अरु सब जग दास ।
भुवनतिलक तुम द्विग रिपु नसै, यह प्रभुता कहिं आन न लसै ॥
जस गावैं सुरनारि अपार, ग्यानरूप ग्यायक संसार ।
द्वादसांग पढ़ि मोह न रहै, थुति करि सुगमपंथ सिव लहै २३
अनंतचतुष्टयरूप निहाल, ध्यावै मन रुचि सहित त्रिकाल ।
पुन्यवान सुभ मारग होइ, तीर्थकर पद विलसै सोइ ॥२४॥
इंद्र सेव करि पार न लहै, गनधरादि सब गुन नहिं कहै ।
हम मति तनक कियौ कछु एहु, भगतनि सिव सुरतरु सम देहु
दोहा ।

सबद काव्य हित तर्कमै, वादिराज सिरताज ।
एकीभाव प्रगट कियौ, द्यानत भगति जहाज ॥ २६ ॥

इति एकीभावस्तोत्र ।

राजमल जैन
वी. ए. वी. टी.



(१७३)

स्वयंभूस्तोत्र ।

चौपदे ।

राजविपै जुगलन सुख किया, राज त्याज भवि सिवपद दिया ।
स्वयंबोध स्वंभू भगवान, वंदौ आदिनाथ गुनखान ॥१॥
इंद्र छीरसागर जल लाय, मेर नहुलाए गाय वजाय ।
भदनविनासक सुखकरतार, वंदौ अजित अजितपदधार २
सुकल ध्यान करि करम विनास, घाति अघाति सकल दुखरास
लह्यौ मुक्तिपद सुख अविहार, वंदौ संभव भवदुखदार ३
माता पच्छिम रैन मझार, सुपनै सोलै देखे सार ।
भूप पूछि फल सुन हरखाय, वंदौ अभिनंदन मन लाय ४
सब कुवादवादी सिरदार, जीते स्यादवाद धुनि धार ।
जैनधरमपरकासक स्वाम, सुमतिदेव पद करौ प्रनाम ५
गरभ अगाऊ धनपति आय, करी नगरसोभा अधिकाय ।
वरखे रतन पंदरै मास, नमौ पदमप्रभु सुखकी रास ॥६॥
इंद्र फनिंद्र नरिंद्र त्रिकाल, वानी सुनि सुनि हौंहि खुस्याल ।
वारै सभा ग्यानदातार, नमौ सुपारसनाथ निहार ॥७॥
सुगुन छियालिस हँ तुम माहिं, दोष अठारै कोऊ नाहिं ।
मोह महातमनासक दीप, नमौ चंद्रप्रभु राख समीप ॥८॥
वारै विध तप करम विनास, तेरै भेद चरित परकास ।
निज अनिच्छ भवि इच्छकदान, वंदौ पहुपदंत मन आन ९
भवि सुखदाय सुरगतै आय, दसविध धर्म कह्यौ जिनराय ।
आप समान सबनि सुख देह, वंदौ सीतल धरि मन नेह १०
संमता सुधा कोपविषनास, द्वादसांग वानी परकास ।
चारि संघ आनंददातार, नमौ स्त्रिअंस जिनेसुरसार ११
रतनत्रय सिर मुकुट विसाल, सोभै कंठ सुगुनमनिमाल ।
मुक्त-नारि-भरता भगवान, वासुपूज्य वंदौ धरि ध्यान १२

परम समाधिसरूप जिनेस, ग्यानी ध्यानी हितउपदेस ।
 करम नास सिवसुख विलसंत, वंदौ विमलनाथ भगवंत १३
 अंतर वाहर परिगह डार, परम दिगंबर व्रतकाँ धार ।
 सरव जीव हित राह दिखाय, नमौ अनंत वचन मन काय ।
 सात तत्त्व पंचासति काय, अरथ नवौ छ दरव बहु भाय ।
 लोक अलोक सकल परकास, वंदौ धर्मनाथ अधनास १५
 पंचम चक्रवात्ति निधि भोग, कामदेव द्वादसम मनोग ।
 सांतिकरन सोलम जिनराय, सांतिनाथ वंदौ हरखाय १६
 बहु थुति करै हरख नहिँ होय, निदैं दोष गहँ नहिँ सोय ।
 सीलवान परब्रह्मस्वरूप, वंदौ कुंथुनाथ सिवभूप ॥ १७ ॥
 वारै गन पूजै सुखदाय, थुति वंदना करै अधिकाय ।
 जाकी निज थुति कवहु न होय, वंदौ अर जिनवर पद दोय ।
 परभौ रतनत्रै अनुराग, इस भौ व्याह समै वैराग ।
 वाल ब्रह्म पूरनव्रतधार, वंदौ मल्लिनाथ जितमार ॥ १९ ॥
 विन उपदेस स्वयं वैराग, थुति लौकांत करै पग लाग ।
 'नमः सिद्ध' कहि सब व्रत लैहिँ, वंदौ मुनिसुव्रत व्रत दैहिँ २०
 स्यावक विद्यावंत निहार, भगतिभावसौँ दियौ अहार ।
 वरखै रतनरासि ततकाल, वंदौ नमि प्रभु दीनदयाल २१
 सब जीवनके वंदी छोर, राग दोष दो बंधन तोर ।
 रजमति तजि सिव तियकाँ मिले, नेमिनाथ वंदौ सुखनिले ।
 दैत्य कियोँ उपसर्ग अपार, ध्यान देखि आयौ फनिधार ।
 गयौ कमठ सठ मुख करि स्याम, नमौ मेरु सम पारसस्वाम ।
 भौसागरतैं जीव अपार, धरमपोतमैं धरे निहार ।
 डूबत काढ़े दया विचार, वरधमान वंदौ बहु वार ॥२४॥
 दोहा ।
 चौबीसौँ पदकमलजुग, वंदौ मन वच काय ।
 द्यानत पढ़ै सुनै सदा, सो प्रभु क्यौँ न सुहाय ॥ २५ ॥
 इति स्वयंभूस्तोत्र ।

(१७५)

पार्श्वनाथस्तवन ।

भुजङ्गप्रयात ।

नरिंदं फनिंदं सुरिंदं अधीसं ।
सतिंदं सुपूजं भजं नाइ सीसं ॥
मुनिंद्रं गनिंद्रं नमं जोरि हाथं ।
नमौ देवदेवं सदा पार्सनाथं ॥ १ ॥
गजेंद्रं मृगेंद्रं गह्यौ तू छुटावै ।
महा आगतं नागतं तू बचावै ॥
महानीरतं जुद्धतं तू जितावै ।
महारोगतं बंधतं तू खुलावै ॥ २ ॥
दुखी दुःखहर्ता सुखी सुःखकर्ता ।
सवै सेवकोंको महानंदभर्ता ॥
हरै जच्छ राच्छस्स भूतं पिसाचं ।
विषं डाकिनी विघ्नके भै अवाचं ॥ ३ ॥
दरिद्रीनिकौ तैं भले दान दीनैं ।
अपुत्रीनिकौ तैं भले पुत्र कीनैं ॥
महा संकटोंतैं निकालै विधाता ।
सवै संपदा सर्वकों देह दाता ॥ ४ ॥
महा चोरकौ वज्रकौ भै निवारै ।
महा पौनके पुंजतैं तू उवारै ॥
महा क्रोधकी आगकौ मेघधारा ।
महालोभ सैलेसहीं वज्र भारा ॥ ५ ॥
महा मोह अंधेरकौ ग्यान भानं ।
महा कर्म-कांतारकौ दौ प्रधानं ॥

(१७६)

किये नाग नागी अधोलोकस्वामी ।
हृद्यौ मान तैं दैत्यकौ है अकामी ॥ ६ ॥
तुही कल्पवृच्छं तुही कामधेनं ।
तुही दिव्य चिंतामनिं नास ऐनं ॥
पसू नर्कके दुःखसेती छुड़ावै ।
महा स्वर्गमै मोच्छमै तू बसावै ॥ ७ ॥
करै लोहकौं हेम पाखान नामी ।
रटै नाम सो क्यों न हो मोखगामी ॥
करै सेव ताकी करै देव सेवा ।
सुनै वैन सो ही लहै ग्यान मेवा ॥ ८ ॥
जपै जाप ताकौं कहा पाप लागै ।
धरै ध्यान ताके सवै दोष भागै ॥
बिना तोहि जानै धरे भौ घनेरे ।
तिहारी कृपातैं सरे काज मेरे ॥ ९ ॥

सोरठा ।

गनधर इंद्र न करि सकैं, तुम विनती भगवान ।
द्यानत प्रीत निहारिकैं, कीजै आप समान ॥ १० ॥

इति पार्श्वनाथस्तोत्र ।



(१७७)

तिथिपोड़शी ।

दोहा ।

वानी एक नमौ सदा, एक दरव आकास ।
एक धरम अधरम दरव, पड़िवा सुद्ध प्रकास ॥ १ ॥

चौपद ।

दोज दुभेद सिद्ध संसार, संसारी त्रस थावर धार ।
सु-पर-दया दोनों मन धरौ, राग दोष तजि समता करौ ॥२॥
तीज त्रिपात्र दान नित भजौ, तीन काल सामायिक सजौ ।
वै उत्पात ध्रौव्य पद साध, मन वच तन थिर होय समाधा ॥३॥
चौथ चार विध ध्यान विचार, चाख्यौ आराधना सँभार ।
मैत्री आदि भावना चार, चार बंधसौं भिन्न निहार ॥ ४ ॥
पांचै पंच लवधि लहि जीव, भज परमेष्ठी पंच सदीव ।
पांच भेद स्वाध्याय बखान, पांचौ पैताले पहचान ॥ ५ ॥
छट छै लेस्याके परनाम, पूजा आदि करौ पट काम ।
पुगलके जानौ पट भेद, छहौं काल लखिकै सुख वेद ॥ ६ ॥
सातै सात नरकतै डरौ, सात खेत धन जलसौं भरौ ।
सातौं नय समझौ गुनवंत, सात तत्त्व सरधा करि संत ॥७॥
आठै आठ दरसके अंग, ग्यान आठ विध गहौ अभंग ।
आठ भेद पूजौ जिनराय, आठ जोग कीजै मन लाय ॥ ८ ॥
नौमी सील-वाड़ि नौ पाल, प्रायश्चित नौ भेद सँभाल ।
नौ छायिक गुन मनमै राख, नौ कपायकी तजि अभिलाख ॥
दसमी दस पुगल परजाय, दसौं बंध हर चेतनराय ।
जनमत दस अतिसै जिनराज, दस विध परिगहसौं क्या काज
ग्यारसि ग्यारै भाव समाज, सब अहमिंदर ग्यारै राज ।
ग्यार जोग सुरलोक मझार, ग्यारै अंग पढ़ै मुनि सार ११

ध. वि. १२

(१७८)

बारसि बारै विध उपजोग, बारै प्रकृति दोषकी रोग ।
बारै चक्रवर्ति लखि लेहु, बारै अब्रतकौ तजि देहु ॥ १२ ॥
तेरसि तेरै स्रावक थान, तेरै भेद मनुज पहचान ।
तेरै रागप्रकृति सब निंद, तेरै भाव अजोगि-जिनंद ॥ १३ ॥
चौदस चौदै पूरव जान, चौदै वाहिज अंग वखान ।
चौदै अंतर परिगह डार, चौदै जीवसमास विचार ॥ १४ ॥
मावस सम पंद्रै परमाद, करम भूमि पंद्रै अनाद ।
पंच सरीर पंद्रै रूप, पंद्रै प्रकृति हरै मुनिभूप ॥ १५ ॥
पूरनमासी सोलै ध्यान, सोलै स्वर्ग कहे भगवान ।
सोलै कपाय राह घटाय, सोल कला सम भावनि भाय १६
सब चरचाकी चरचा एक, आतम आतम पर पर टेक ।
लाख कोटि ग्रंथनकौ सार, भेद-ग्यान अरु दयाविचार १७

दोहा ।

गुनविलास सब तिथि कहीं, हैं परमारथरूप ।
पढ़ै सुनै जो मन धरै, उपजै ग्यान अनूप ॥ १८ ॥

इति तिथिपोइशी ।



(१७९)

स्तुतिवारसी ।

दोहा ।

तुम देवनिके देव हौ, सुखसागर गुनखान ।
मूरति गुन को कहि सकै, करौं कष्ट थुति गान ॥ १ ॥
फले कलपतरुवेलि ज्यौं, बंछित सुर नर राज ।
चिंतामनि ज्यौं देत है, चिंतित अर्थसमाज ॥ २ ॥
स्वामी तेरी भगतिसौं, भक्त पुन्य उपजाय ।
तीन अरथ सुख भोगवै, तीनों जगके राय ॥ ३ ॥
तेरी थुति जे करत हैं, तिनकी थुति जग होय ।
जे तुम पूजै भावसौं, पूजनीक ते लोय ॥ ४ ॥
नमस्कार तुमकौं करै, विनयसहित सिर नाय ।
वंदनीक ते होत हैं, उत्तम पदकौं पाय ॥ ५ ॥
जे आग्या पालै प्रभू, तिन आग्या जगमाहिं ।
नाम जपै तिस नामना, जग फैलै जस छाहिं ॥ ६ ॥
सफल नैन मेरे भये, तुम मुख सोभा देख ।
जीभ सफल मेरी भई, तुम गुन नाम विसेख ॥ ७ ॥
सफल चित्त मेरौं भयौ, तुम गुन चिंतित देव ।
पाय सफल आयें भये, हाथ सफल करि सेव ॥ ८ ॥
सीस सफल मेरौं भयौ, नमौं तुमै भगवान ।
नर-भौं लाहा मै लहा, चरनकमल सरधान ॥ ९ ॥
गनधर इंद्र न जात हैं, तुम गुनसागर पार ।
कौन कथा मेरी तहां, लीजै प्रीत निहार ॥ १० ॥
तातैं वंदौं नाथजी, नमौं सुगुनसमुदाय ।
तीर्थकर पदकौं नमौं, नमौं जगत सुखदाय ॥ ११ ॥
पूजा थुति अरु वंदना, कीनी निज मन आन ।
द्यानत करुना भावसौं, कीजै आप समान ॥ १२ ॥

इति स्तुतिवारसी ।

(१८०)

यतिभावनाष्टक ।

सवैया इकतीसा ।

जगत उदास आपकों प्रकास संग नास,
धर सुभ व्रत रास बनवास बसे हैं ।
मोह कर्मको प्रभाव संकल्प विकल्प भाव,
सबको अभाव करि अंतरको धसे हैं ॥
प्राणायाम विध साध ध्यानरीतिकों अराध,
पौन मन ग्यान थिर एक रूप लसे हैं ।
परमानंद लीन धीर मेर ज्यों अचल वीर,
नमों साध पायनिकों देखें दुख नसे हैं ॥ १ ॥
मनको निरोध इंद्रि सांपको जहर सोध,
सासोस्वास पौन सोऊ थिर भाव करी है ।
सूनी कंदरामें पैठि वैठि पदमासनसों,
सिध अभिलाखा अभिलाख सब हरी है ॥
तजि राग दोष व्याध समता चेतन साध,
धीरजसों अंतर सरूप दिष्टि धरी है ।
ऐसी दसा होयगी हमारी कव भगवान,
सोई पुरुपारथ है सोई धन धरी है ॥ २ ॥
धूलि करि मंडित न मंडित है अंधेरसों,
वैठि पदमासन खड़ासन अटल है ।
तत्त ग्यान सार गहि मौन सांत मुद्रा धारि,
अध खुले नैन दिष्टि नासिका अचल है ॥
बाहर वैरागरूप अंतर निरंजन लौ,
खाजकों खुजावैं मृग जानकै उपल है ।

ऐसी दसा होयगी हमारी तब जानहिंगे,
 नरभव पाय पायौ सुकृतकौ फल है ॥ ३ ॥
 सुन्यवास घर वास छिमा नारिसौ अभ्यास,
 दसौ दिसा अंबर संतोष महा धन है ।
 सैल-सिला सेज सार दीप चंद्रमा निहार,
 तपका व्यौहार सब मैत्री परिजन है ॥
 ग्यान सुधा भोजन है अनुभौ-सरूप सुख,
 ऐसी साँज परसेती कहा परोजन है ।
 एक दसा लई महाराजकी अवस्था भई,
 समता कहा है महा लोभकौ सदन है ॥ ४ ॥
 जगमें चौरासी लाख जोनिकौ फिरनहार,
 नर अवतार महा पुन्य उदै पावै है ।
 उत्तम सुकुल दिढ़ काय आयु पूरनता,
 बुद्धि साख-ग्यान भागसेती वनि आवै है ॥
 तिसपै वैराग होय तप तपै कृती सोय,
 सोऊ ध्यान सुधापान करै लव लावै है ।
 कंचन महल पर मनिमै कलस धर,
 आतमतै सोई परमात्म कहावै है ॥ ५ ॥
 ग्रीषम सिखर सीस पावसमें तरु तलै,
 सीत काल चौपथमें देह नेह हख्यौ है ।
 वज्र परै त्रासनसौ आगके प्रकासनसौ,
 प्रानके विनासनसौ ध्यान नाहिं टख्यौ है ॥
 जप जोग तप धारि भेदग्यानकौ संभारि,
 चंचलता चित्त मारिकै समाध वख्यौ है ।

समरस-धाम अभिराम साध राजत है,
ऐसे कव हौंहिं हम ऐसौ मन कखौ है ॥ ६ ॥
विवहारमाहिं तत्त्व वैनद्वार आवत है,
निहचै विसुद्धरूप न्यारौ है उपाधसौं ।
चिदानंद जोतकौ उदोत अंतरंग भयौ,
ताहीमें मगन सदा भीजै है समाधसौं ॥
सोई धन सोई धाम सोई सोभ सोई काम,
सोई प्रीत सोई सुख सिद्धता अराधसौं ।
ऐसे मुनिराज मम काज करौ दोष हरौ,
निज मुद्रा देहु हम छूटै आध व्याधसौं ॥ ७ ॥
पाप-अरि-हार चक्र सक सिव-सुखकार,
धीरज बढै अपार वंछित दातार जी ।
भागै भोग कारे नाग प्रगतै महा विराग,
साधभावनाअष्टक पढौ तिहुं वार जी ॥
चिदानंद भावमै पदमनंद राजत है,
भक्तिवस भव्यनकौ कीनौ उपगारजी ।
भूल चूक सोधि लेहु हमै मति दोष देहु,
द्यानत या मिससेती लीनौ नाम सार जी ॥ ८ ॥

दोहा ।

द्यानत जिनके नामतै, पाप धूरि हो दूरि ।
तिन साधनकी भावना, क्यौं न लहै सुख भूरि ॥ ९ ॥
इति यतिभावनाष्टक ।

(१८३)

सज्जनगुणदशक ।

सर्वथा इकतीया ।

तरोंकी कलम सिंधु स्याही भूमि कागदपे,
सारदा सहस कर सदा लिखे नाथ जी ।
तुम गुनकौ न पार ग्यानादि अनंत सार,
कर्म धन हान निरावर्ण भान आथ (?) जी ॥
तिनमें कौ कोई एक गुनदूकौ कोई अंस,
हमें देहु सज्जन कहायें संत साथ जी ।
तुम हौ कृपाल प्रतिपाल दीनके दयाल,
द्यानत सेवक वंदै हाथ लाय माथ जी ॥ १ ॥
धन तौ तनक पाय दानकौ पन न जाय,
काय है निवल व्रत धीरजसौं धरें हैं ।
बुद्धि थोरी जिय माहिं पै अभ्यास किये जाहिं,
वात नाहिं कहें जो पै कहें सोई करें हैं ॥
कैसे किन कष्ट परें सज्जनतासौं न टरें,
ग्रीषममें चंद्र किरन अमृत ही झरें हैं ।
साहवसेती हजूर भोगनसौं रहें दूर,
सुख भरपूर लहें दुःखमूर हरें हैं ॥ २ ॥
वात कहा दुष्टनिकी सांपकौ सुभाव लियें,
गुन दूध दियें विष औगुन धरत हैं ।
ऐसे बहु जीव गुन दोष गुन दोष करें,
गालागाली मुजरेसौं मुजरा करत हैं ॥
धनि आम ईखसे हैं मारें फल पीड़ें रस,
चंद्र जैसे जनदुख-तापकौं हरत हैं ।

पर उपगारी गुन भारी सो सराहनीक,
और सब जीव भव भोंवर भरत हैं ॥ ३ ॥
एकनिकै पुन्य उदै पुन्यकर्मबंध होय,
एकनिकै पुन्य उदै पापबंध होत है ।
एकनिकै पाप उदै पापकर्मबंध होय,
एकनिकै पाप उदै बंधै पुन्य गोत है ॥
उदै सारू कौन बात उदै कहैं मूढ़ भ्रात,
आलस सुभावी जिनके हियैं न जोत है ।
उद्यमकी रीत लई परमारथ प्रीत भई,
स्वारथ विसारैं निज स्वारथ उदोत है ॥ ४ ॥
विद्यासौं विवाद करैं धनसौं गुमान धरैं,
बलसौं लराई लरैं मूढ़ आधव्याधमैं ।
ग्यान उर धारत हैं दानकौं संभारत हैं,
परमै निवारत हैं तीनों गुन साधमैं ॥
पर दुख दुखी सुखी होत हैं भजनमाहिं,
भवरुचि नाहीं दिन जात हैं अराधमैं ।
देहसेती दुबले हैं मनसेती उजले हैं,
सांति भाव भरैं घट परैं ना उपाधमैं ॥ ५ ॥
पोषत है देह सो तौ खेहकौ सरूप वन्यौ,
नारि संग प्यार सदा जार-रंग राती है ।
सुतसौं सनेह नित 'देह देह' किया करै,
पावै ना कदाचि तौ जलावै आन छाती है ॥
दामसौं वनावै धाम हिंसा रहै आठौं जाम,
लछमी अनेक जोरै संग नाहिं जाती है ।

(१८५)

नामकी विटंबनासाँ खाम काम लागि रह्यो,
साहबकाँ जानि विन होत ब्रह्मवार्ता है ॥ ६ ॥
काहू न सताये छल छिद्र न बनाये सब-
हीके मन भाये परमारथ सुनावना ।
लोभकी न वाय होय क्रोधकी न भाव जोय,
पांचौं इंद्री संवर दिगंबरकी भावना ॥
अरचाकी चाल लिये चरचाकाँ ख्याल हिये,
साधनिकी संगतिमें निहचैसाँ आवना ।
मौन धर रहे कहै सुखदाई मीठे वैन,
प्रभुसेती लव लाय आपकाँ रिझावना ॥ ७ ॥
वृच्छ फलै पर-काज नदी औरके इलाज,
गाय-दूध संत-धन लोक-सुखकार है ।
चंदन घसाइ देखौ कंचन तपाइ देखौ,
अंगर जलाइ देखौ सोभा विसतार है ॥
सुधा होत चंदमाहिं जैसें छांह तरु माहिं,
पालेमें सहज सीत आतप निवार है ।
तैसें साधलोग सब लोगनिकाँ सुखकारी,
तिनहीकाँ जीवन जगत माहिं सार है ॥ ८ ॥
पूजा ऐसी करें हमै सब संत भला कहै,
दान इह विध दैहिं लैहिं मुझ नामकाँ ।
सास्त्रके संजोग कर लोग आवै मेरे घर,
वात अच्छी कहूं मोहि पूछै सब कामकाँ ॥
प्रभुताकी फांसमें फस्यौ है जगवासी जीव,
अविनासी वृक्ष नाहिं लाग्यौ धन धामकाँ ।

(१८६)

धारी तैं अनंती जोनि नाम गह्यौ कौन कौन,
तेरी नाम चेतन तू देखि आप ठामकौं ॥ ९ ॥
भाड़ा दे वसत जैसेँ भौनमें लसत ऐसेँ,
आपकौं मुसाफिर ही सदा मान लेत है ।
धाय-नेह बालक ज्यौं पालक कुटंब सब,
ओषध ज्यौं भोगनिकौं भोगत सचेत है ॥
नीतिसेती धन लेय प्रीतिसेती दान देय,
कव घर छूटै यह भावनासमेत है ।
औसरकौं पाय तजि जाय एक रूप होय,
द्यानत वेपरवाह साहवसौं हेत है ॥ १० ॥
पंडित कहावत हैं सभाकौं रिझावत हैं,
जानत हैं हम बड़े यही बड़ी मार है ।
पूरव आचारजौंकी वानी पेख आप देख,
मैं तौ कछु नाहिं यह बात एक सार है ॥
भापत हौं कौन ठाम ठानत हौं कौन काम,
आवत है लाज दूजी बात सिरदार है ।
तीजी बात वैन सब पुद्गल दरवरूप,
द्यानत हम चिद्रूप लखैं होत पार है ॥ ११ ॥

इति सज्जनगुणदशक ।



(१८७)

वर्तमान-त्रीसी-दशक ।

कवित्त (३१ मात्रा) ।

सीमंधर परथम जिन साहच, अंत अजितधीरज परमेस ।
भविक जीव मन-पदम विकासन, मोह तिमिरकाँ हरन दिनेस ।
समोसरन वारै जोजन धनु, पनसै पूरव कोड़ गनेस ।
बीसों जिन अब हैं विदेहमें, वंदि निकंदाँ पाप कलेस ॥ १ ॥
जंबु सुदरसन मेर मध्यतैं, पूर्वविदेह आठमा थान ।
सीता नदी तासतैं उत्तर, नील सिखरतैं दच्छिन आन ॥
देवारन वनके समीप है, पुंडरीकनी नगरी मान ।
तामैं श्रीदेवाधिदेव सीमंधर स्वामि नमौ धरि ध्यान ॥ २ ॥
जंबु सुदरसन मेर मध्यतैं, पछिम विदेह आठमा ओर ।
सीतोदाकी उत्तरकी दिसि, नील सिखरतैं दच्छिन जोर ॥
भूतारन वनके समीप है, नगरी विजय वचन न कठोर ।
परमपूज जुगमंधर सूरज, भजै भजैगे पातिग चोर ॥ ३ ॥
जंबु सुदरसन मेर मध्यतैं, पूर्व विदेह आठमा थान ।
सीता नदी तासतैं दच्छिन, निपध सैलतैं उत्तर जान ॥
देवारन वनके समीप है, पुरी सुसीमा सुखकी खान ।
करुनासिंधु सुवाहु जिनेसुर, सेऊं मनवांछित-फल-दान ॥ ४ ॥
जंबु सुदरसन मेर मध्यतैं, पच्छिम दिसि अट्टम सुभ खेत ।
सीतोदातैं दच्छिनकी दिस, निपध सैलतैं उत्तर चेत ॥
भूतारन वनके समीप है, नगरी वीतसोक सुखहेत ।
बाहु प्रभू सिवराह वतावत, वंदत पाऊं परम निकेत ॥ ५ ॥
विजय मेरतैं चार इही विध, अचल मेर चव इसी प्रकार ।
मंदर मेर चार याही विध, विद्युतमाली इह विध चार ॥

(१८८)

अट्टम धान नदी गिर वन पुर, पूरववत्त सोलै जिन सार ।
अनुक्रम नाम फेर अरु कछुना, वंदौ वीसौं सुखदातार ॥६॥
सवैया इकतीसा ।

सीमंधर जुगमंधर औ सुवाहु वाहुजी,
सुजात स्वयंप्रभजी नासौ भव-फंदना ।
रिखभानन अनंत वीरज सौरीप्रभजी,
विसाल वज्रधार चंद्राननकौ वंदना ॥
भद्रवाहु स्त्रीभुजंग ईस्वरजी नेमि प्रभू,
वीरसेन महाभद्र पापके निकंदना ।
जसोधर अजितवीरज वर्तमान वीसौं जी,
ध्यानतपै दया करौ जैसें तात नंदना ॥ ७ ॥

कवित्त (३१ मात्रा) ।

जहां कुदेव कुलिंग कुआगम,-धारक जीव छहौं नहिं कोय ।
तीन वरन इक जैन महामत, तहां पट्ट मतकौ भेद न होय ॥
चौथा काल सदा जहां राजै, प्रलैकाल कव हीं नहिं जोय ।
तप करि साध विदेह होत सो, भूविदेह सरधैं बुध सोय ॥८॥
इक सौ साठ विदेह विराजै, वीसौं तीर्थकर नित ठाहिं ।
कौन जिनेस्वर कौन थानमै, यह व्यौरा सब जानै नाहिं ॥
ध्यानत जाननि कारन कीनै, हंसौ मती हौं सठ बुधि माहिं ।
जिह तिह भांति नाम जिन लीजै, कीजैसवसुखदुखमिटिजाहिं ।

दोहा ।

वीसौं तीर्थकर उहां, इहां न जानै कोय ।
सरधा निहचै मन धरै, सम्यक निरमल होय ॥ १० ॥

इति वर्तमानवीसौ-दशक ।

(१८९)

अध्यात्मपंचासिका ।

दोहा ।

आठ करमके बंधमें, बाँधे जीव भववास ।
करम हरे सब गुन भरे, नमों सिद्ध सुखरास ॥ १ ॥
जगत माहिं चहु गतिविषैं, जनम-मरन-वस जीव ।
मुक्ति माहिं तिहु कालमें, चेतन अमर सदीव ॥ २ ॥
मोख माहिं सेती कभी, जगमें आवै नाहिं ।
जगके जीव सदीव ही, कर्म काटि सिव जाहिं ॥ ३ ॥
पूर्व कर्म उदोततैं, जीव करै परनाम ।
जैसेँ मदिरा पानतैं, करै गहल नर काम ॥ ४ ॥
तातैं बाँधे करमकों, आठ भेद दुखदाय ।
जैसेँ चिकने गातपै, धूलि पुंज जम जाय ॥ ५ ॥
फिर तिन कर्मनिके उदे, करै जीव बहु भाव ।
फिरकै बाँधे करमकों, यह संसार सुभाव ॥ ६ ॥
सुभ भावनतैं पुन्य है, असुभ भावतैं पाप ।
दुहु आच्छादित जीव सो, जान सकै नहिं आप ॥ ७ ॥
चेतन कर्म अनादिके, पावक काठ वखान ।
खीर नीर तिल तेल ज्यौं, खान कनक पाखान ॥ ८ ॥
लाल बंध्यौ गठरी विषैं, भान छिप्यौ घन माहिं ।
सिंह पींजरेमें दियौ, जोर चलै कछु नाहिं ॥ ९ ॥
नीर बुझावै आगिकौं, जलै टोकनी (?) माहिं ।
देह माहिं चेतन दुखी, निज सुख पावै नाहिं ॥ १० ॥
जदपि देहसौं छुटत है, अंतर तन है संग ।
सो तन ध्यान अगनि दहै, तब सिव होय अभंग ॥ ११ ॥

रागदोषतैं आप ही, परै जगतके माहिं ।
ग्यान भावतैं सिव लहै, दूजा संगी नाहिं ॥ १२ ॥
जैसैं काहू पुरुषकौ, दरव गढ़ा घर माहिं ।
उदर भरै कर भीखसौं, व्यौरा जानैं नाहिं ॥ १३ ॥
ता दिनसौं किनही कहा, तू क्यों मागै भीख ।
तेरे घरमें निधि गढ़ी, दीनी उत्तम सीख ॥ १४ ॥
ताके वचन प्रतीतिसौं, हरख भयौ मन माहिं ।
खोदि निकाले धन बिना, हाथ परै कछु नाहिं ॥ १५ ॥
त्यौ अनादिकी जीवकैं, परजै-बुद्धि वखान ।
मैं सुर नर पसु नारकी, मैं मूरख मतिमान ॥ १६ ॥
तासौं सदगुरु कहत हैं, तुम चेतन अभिराम ।
निहचै मुकति-सरूप हौ, ए तेरे नहिं काम ॥ १७ ॥
काल लब्धि परतीतिसौं, लखौ आपमें आप ।
पूरन ग्यान भये विना, मिटै न पुन्य न पाप ॥ १८ ॥
पाप कहत हैं पापकौं, जीव सकल संसार ।
पाप कहैं हैं पुन्यकौं, ते विरले मति-धार ॥ १९ ॥
वंदीखानामैं पखौं, जातैं छूटै नाहिं ।
विन उपाय उद्यम कियैं, त्यौं ग्यानी जग माहिं ॥ २० ॥
सावुन ग्यान विराग जल, कोरा कपड़ा जीव ।
रजक दच्छ धोवै नहीं, विमल न लहै सदीव ॥ २१ ॥
ग्यान पवन तप अगनि विन, देह मूस जिय हेम ।
कोटि वरषलौं राखियै, सुद्ध होय मन केम ॥ २२ ॥
दरव-करम नोकरमतैं, भाव करमतैं भिन्न ।
विकल्प नहीं सुबुद्धिकैं, सुद्ध चेतनाचिन्न ॥ २३ ॥

(१९१)

च्यारों नाहीं सिद्धकै, तू च्यारोंके माहिं ।
च्यारि विनासैं मोख है, और वात कछु नाहि ॥२४॥
ग्याता जीवन-मुक्त है, एकदेस यह वात ।
ध्यान अगनि करि करम वन, जलै न सिव किम जात॥
दरपन काई अधिर जल, मुख दीसै नहिं कोय ।
मन निरमल थिर विन भयै, आप दरस क्यों होय२६
आदिनाथ केवल लह्यौ, सहस वरस तप टान ।
सोई पायौ भरतजी, एक महरति ग्यान ॥ २७ ॥
राग दोष संकल्प हैं, नयके भेदविकल्प ।
दोय भाव मिटि जायं जब, तव सुख होय अनल्प २८
राग विराग दुभेदसौं, दोय रूप परनाम ।
रागी भ्रमिया जगतके, वैरागी सिवधाम ॥ २९ ॥
एक भाव है हिरनकै, भूख लगै तिन खाय ।
एक भाव मंजारकै, जीव खाय न अघाय ॥ ३० ॥
विविध भावके जीव बहु, दीसत हैं जग माहिं ।
एक कछु चाहै नहीं, एक तजै कछु नाहिं ॥ ३१ ॥
जगत अनादि अनंत है, मुक्ति अनादि अनंत ।
जीव अनादि अनंत हैं, करम दुविध सुनि संत ॥३२॥
सवकै करम अनादिके, कर्म भव्यकै अंत ।
करम अनंत अभव्यकै, तीन काल भटकंत ॥ ३३ ॥
फरस वरन रस गंध सुर, पाचौ जानै कोय ।
बोलै डोलै कौन है, जो पूछै है सोय ॥ ३४ ॥
जो जानै सो जीव है, जो मानै सो जीव ।
जो देखै सो जीव है, जीवै जीव सदीव ॥ ३५ ॥

जानपना दो विध लसै, विपै निरविपै भेद ।
 निरविपई संवर लहै, विपई आस्रव वेद ॥ ३६ ॥
 प्रथम जीवसरधानसौं, करि वैराग उपाय ।
 ग्यान क्रियासौं मोख है, यही वात सुखदाय ॥ ३७ ॥
 पुद्गलसौं चेतन बंध्यौ, यह कथनी है हेय ।
 जीव बंध्यौ निज भावसौं, यही कथन आदेय ॥ ३८ ॥
 बंध लखै निज औरसौं, उद्दिम करै न कोय ।
 आप बंध्यौ निजसौं समझ, त्याग करै सिव होय ॥ ३९ ॥
 जथा भूपकौं देखिकै, ठौर रीतिकौं जान ।
 तव धन अभिलाखी पुरुष, सेवा करै प्रधान ॥ ४० ॥
 तथा जीव सरधान करि, जानै गुन परजाय ।
 सेवै सिव धन आस धरि, समतासौं मिलि जाय ॥ ४१ ॥
 तीन भेद व्यवहारसौं, सरव जीव सम ठाम ।
 बहिरंतर परमातमा, निहचै चेतनराम ॥ ४२ ॥
 कुगुरु-कुदेव-कुधर्मरत, अहंबुद्धि सब ठौर ।
 हित अनहित सरधै नहीं, मूढनमैं सिरमौर ॥ ४३ ॥
 आप आप पर पर लखै, हेय उपादे ग्यान ।
 अब्रती देशव्रती महा-व्रती सबै मतिमान ॥ ४४ ॥
 जा पदमैं सब पद लसै, दरपन ज्यौं अविकार ।
 सकल विकल परमातमा, नित्य निरंजन सार ॥ ४५ ॥
 बहिरातमके भाव तजि, अंतर आतम होय ।
 परमातम ध्यावै सदा, परमातम ह्वै सोय ॥ ४६ ॥
 बूंद उदधि मिलि होत दधि, वाती फरस प्रकास ।
 त्यों परमातम होत हैं, परमातम अभ्यास ॥ ४७ ॥

(१९३)

सब आगमकौ सार जो, सब साधनकौ धेव ।
जाकाँ पूजै इंद्र सौ, सो हम पायौ देव ॥ ४८ ॥
सोहं सोहं नित जपै, पूजा आगम सार ।
संतसंगतिमै बैठना, एक करै व्यौहार ॥ ४९ ॥
अध्यात्म पंचासिका, माहिं कह्यौ जो सार ।
व्यानत ताहि लगे रहौ, सब संसार असार ॥ ५० ॥

इति अध्यात्मपंचासिका ।



अक्षर-बावनी ।

ॐकार सरव अच्छरकौ, सब मंत्रनकौ राजा जी ।
 तीन लोक तिहुं काल सरव घट, व्यापि रह्यौ सुखकाजा जी ॥
 श्रीजिनवानी माहिं बतायौ, पंच परमपदरूपी जी ।
 बानत दिढ़ मन कोई ध्यावै, सोई मुकत-सरूपी जी ॥१॥
 अमर नाम साहिबका लीजै, काम सबै तजि दीजै जी ।
 आतम पुग्गल जुदे जुदे हैं, और सगा को कीजै जी ॥
 इस जग मात पिता सुत नारी, झूठा मोह बढ़ावै जी ।
 ईत भीत जम पकड़ मंगावै, पास न कोई आवै जी ॥२॥
 उसका इसका पैसा ठगि ठगि, लछमी घरमें लावै जी ।
 ऊपर मीठी अंतर कड़वी, बातें बहुत बनावै जी ॥
 रिन ले सुख हो देते दुख हो, घरका करै संभाला जी ।
 रीस विरानी करै देखिकै, बाहिर रचै दिवाला जी ॥३॥
 लिखै झूठ धन कारन प्रानी, पंचनमें परवानी जी ।
 लीन भयौ ममतासौं डोलै, बोलै अमृत वानी जी ॥
 ए नर छलसौं दर्व कमाया, पाप करम करि खाया जी ।
 ऐन मैन (?) नागा हो निकला, तागा रहन न पायाजी ॥४॥
 ओस वूंद सम आव तिहारी, करि कारज मनमाहीं जी ।
 औसर जावै फिरि पिछतावै, काम सरै कछु नाहीं जी ॥
 अंतर करुनाभाव न आनै, हिंसा करै घनेरी जी ।
 अहि सम हो परजीव सतावै, पावै दुखकी ढेरी जी ॥५॥
 काम धरमके करै अधूरे, सुख लोरे भरपूरे जी ।
 खाया चाहै आंब गंडेरी, बोवै आक धतूरे जी ॥

गुरुकी सेवा ठानत नार्हीं, ग्यान प्रकास निहारे जी ।
घरमें दान देय नहिं लोभी, बंछे भोग पियारे जी ॥ ६ ॥
नेक धरमकी बात न भावै, अधरमकी सिरदारी जी ।
चरचामाहिं बुद्धि नहिं फैले, विकथाकी अधिकारी जी ॥
छिन छिन चिंता करै पराई, अपनी मुधि विसराई जी ।
जामन मरन अनेक किये तैं, सो मुध एक न आई जी ॥७॥
झूठे सुखकौं सुख कर जाना, सुखका भेद न पाया जी ।
निराकार अविकार निरंजन, सौ तैं कवहुं न ध्याया जी ॥
टेक करै वातनिकी प्राणी, झूठे झगडै ठानै जी ।
ठौर ठिकाना पावै नार्हीं, संजम मूल न जानै जी ॥ ८ ॥
डरै आपदासौं निसवासर, पाप करम नहिं त्यागै जी ।
डूढै बाहिर स्वारथ कारन, परमारथ नहिं लागै जी ॥
निसदिन बाँध्यौ आसाफासी, डोलै अचरज भारी जी ।
तव आसा बंधनसौं छूटै, होय अचल सुखकारी जी ॥ ९ ॥
थिरता गहि तजि फिकर अनाहक, समता मनमें आनौ जी ।
दरसन ग्यान चरन रतनत्रै, आतमतत्त्व पिछानौ जी ॥
धरम दया सब कहैं जगतमें, पाळै ते बड़भागी जी ।
नेम विना कछु वनि नहिं आवै, भाव न होय विरागी जी १०
पंच परम पद हिरदै धरियै, सुरग मुकतिके दाता जी ।
फिरो अनंत वार चहु गतिमें, रंच न पाई साता जी ॥
बिनासीक संसारदसा सब, धन जोवन धनछार्हीं जी ।
भूला कहां फिरत है प्राणी, कर थिरता मन माहीं जी ११
मंत्र महा नौकार जपौ नित, जपै तिहुं जग इंद्रा जी ।
यही मंत्र सुनि भए नाग जुग, पदमावति धरनिंद्रा जी ॥

(१९६)

राखौ संम्यक सात विसन तजि, आठ मूल गुन पालौ जी ।
लगन लगाय प्रथम प्रतिमासौं, वारै वरत संभालौ जी ॥१२॥
वह मन महा चपल थिर कीजै, सामायिक रस पीजै जी ।
सिव अभिलाख धरौ पोसहव्रत, भोजन सचित न कीजै जी ॥
षट निसभोजन नारी संगत, तजिकैं सील संभारौ जी ।
सब आरंभ परिग्रह भाई, अघ उपदेस संभारौ जी ॥१३॥
हरिममता सब धन परिजनकी, करि निरभै भुव वासा जी ।
लेहु अहार उदंड-विहारी, तजि कायाकी आसा जी ॥
छिन छिन आतम आतम पर पर, यही भावना भाऊं जी ।
वावन अच्छर पढ़ौ अर्थसौं, अथवा मौन लगाऊं जी ॥ १४॥
सुद्ध असुद्ध भाव दो तेरे, सुभ अरु असुभ असुद्धं जी ।
असुभ भाव सरवथा विनासौ, सुभमैं हो प्रतिबुद्धं जी ॥
सुद्ध भाव जिह बिध वनि आवै, सोई कारज धारौ जी ।
द्यानत जीवन निपट सहल है, जगतैं आप निकारौ जी ॥१५॥

इति अक्षरवावनी ।



(१९७)

नेमिनाथ-बहचारी ।

अडिल्ल ।

बंदों नेमि जिनंद, चंद निरधार हँ ।
बचन किरन करि, भ्रम तम नासनिहार हँ ॥
भवि चकोर बुध कुमुद, नखत मुनि सुक्खदा ।
ग्यान-सुधा भौ-तपत, नास पूरन सदा ॥ १ ॥

मथुरामैं हरि कंस, विधंस किया जबै ।
समुदविजै दस भ्रात, किस्न हलधर सबै ॥
जरासिंधसौं डरि, सौरीपुरकाँ चले ।
आए सागर तीर, चतुर सब ही मिले ॥ २ ॥

होनहार श्रीनेम, जिनंद प्रभावतैं ।
नारायनकौ पुन्य, हली लखि चावतैं ॥
आयौ देव तुरंत, द्वारिका पुर किया ।
महावली लखि राज, किस्नजीकाँ दिया ॥ ३ ॥

गरभ छमास अगाऊ, धनपति आइयौ ।
जनक भवन तिहुं काल, रतन बरसाइयौ ॥
कनक रतनमैं, अति सोभा पुरकी करी ।
मात सिवादेवी सोई, बहु सुख भरी ॥ ४ ॥

सोलै सुपने देखे, पच्छिम रातमैं ।
गज पावक अभिराम, उठी सो प्रातमैं ॥
समुदविजै पै जाय, सुपन फल सुन लिया ।
तिहुजगपति सुत होसी, अति आनंद किया ॥ ५ ॥

(१९८)

कमलवासिनी देवी, सब सेवा करें ।
पंद्रह मास रतन, बरसासौं घर भरें ॥
आसन कांप्यौ इंद्र, जनम जिनकौ भयौ ।
पेरावति चढ़ि आए, सब सुर सुख लयौ ॥ ६ ॥
गजपै कोड़ सताइस, अपछर नाचहीं ।
देवी देव चहूं विध, मंगल राचहीं ॥
इंद्रानी प्रभु लाय, इंद्र करमैं दियौ ।
गज चढ़ि छत्र चमर बहु, मेर गमन कियौ ॥ ७ ॥
पांडुक सिल सिंघासनपै, प्रभु थापियौ ।
सहस अठोतर कलस, धार जै जै कियौ ॥
पूजा अष्ट प्रकार, करी अति प्रीतिसौं ।
नेमिनाथ यह नाम, दियौ गुन रीतिसौं ॥ ८ ॥
मात पिताकौं सौंप, निरत बहु विध भया ।
देवकुमारन थाप, आप थानक गया ॥
खान पान पट भूषन, देवपुनीत हैं ।
भए कुमर दस गुन, तिहुं ग्यान सुरीत हैं ॥ ९ ॥
सारथ-वाह रतन ले, चक्रीपै गयौ ।
जरासिंधु मन कोप, कृस्न ऊपर भयौ ॥
हरि पूछै तब आय, जीत प्रभु कौनकी ।
वदन खुसी लखि, जान्यौ हम जै हौनकी ॥ १० ॥

सोरठा ।

जरासिंधुकौं जीत, सुर नर खग सब वसि करे ।
सौल सहस तिय प्रीत, तीन खंड राजा भये ॥ ११ ॥

भूप कुमार सब साथ, इक दिन कृष्ण सभा गये ।
 उठे सबे नरनाथ, सिंघासन बंटे प्रभू ॥ १२ ॥
 बात चली बलरूप, एक कहें पांडों वड़े ।
 एक कहें हरि भूप, कंस जरासंध जिन हते ॥ १३ ॥
 बलभद्र तिह ठाम, कहें त्रिजग तिहुं कालमें ।
 मति लो झूठा नाम, नेमिनाथ सम बल नहीं ॥ १४ ॥
 कृष्ण कहै तिह वार, स्ववल दिखाऊं स्वामिजी ।
 सुनि आई सब नारि, लखें झरोखेमें खरीं ॥ १५ ॥
 नेमि सहज कर वाम, दई कनिष्ठा अंगुली ।
 मेर अचल ज्यों स्वाम, कृष्ण हलाय सक्यौ नहीं ॥ १६ ॥
 नारायण सत भाय, कहै जोर अपनो करौ ।
 ताही अंगुली लाय, कृष्ण उठाय फिराड्यौ ॥ १७ ॥
 छोड़ि दियौ ततकाल, दीनदयाल दयाल है ।
 बोल्यौ कृष्ण खुप्याल, राज हमारौ अटल है ॥ १८ ॥
 नाम भजै जैकार, देव पहुप-वरपा करै ।
 गुण थुति करि बहु वार, विदा किये प्रभु मान दे ॥ १९ ॥
 हरिकौं फिकर अपार, राज सुधिर मेरौ कहां ।
 जब लौं नेमिकुमार, मन सोचै देखौ हली ॥ २० ॥

मोतीदाम ।

बल तव हरिकौं समझावै, इन तिहुं-जग-राज न भावै ।
 कछु कारन देखि धरैगे, दिच्छा सिधनारि बरैगे ॥ २१ ॥
 तव रितु वसंत सुभ आई, सब भागि चले मिलि भाई ।
 नेमीस्वर हरि बल सारे, परिजन तिय संग सिधारे ॥ २२ ॥

क्रीड़ा बहु करि वनमोहीं, हरि तिय भेजी प्रभु पाहीं ।
 सब नाचै गाय बजावै, होली सम ख्याल मचावै ॥ २३ ॥
 बोली जंबवंती नारी, तुम व्याह करौ सुखकारी ।
 प्रभु रंच भए न सरागी, सुचि जल न्हाए बड़ भागी ॥ २४ ॥
 यह धोती धोय हमारी, सुनि जंबवती रिस धारी ।
 मैं कृष्णतनी पटरानी, तिन हू न कही ए वानी ॥ २५ ॥
 जिन संख धनुष फनि साधे, ए काम कठिन आराधे ।
 जब तुम तीनों करि आवौ, तब धोती वात चलावौ ॥ २६ ॥
 सुनि बोली रुकमनी रानी, सो दिन तू क्यों विसरानी ।
 प्रभु कृष्ण उठाय फिरायौ, तब धोती धो गुन गायौ ॥ २७ ॥
 जब नेमीस्वर मन आई, जल रेखा सम गरमाई ।
 अहिसेजा धनुष चढ़ायौ, नासासौं संख बजायौ ॥ २८ ॥
 सुर असुरन अचिरजकारी, अदभुत धुनि सुनि नर नारी ।
 भई धूम देसमें भारी, डरि कंपन लाग्यौ मुरारी ॥ २९ ॥
 जांबवंती विध सुनि आयौ, प्रभुकों हरि सीस नवायौ ।
 तुम सम तिहु जग बल नाहीं, जिन खुसी गए घरमाहीं ॥ ३० ॥

चौपई ।

तब हरि उग्रसैनसौं भाखी, राजमती कन्या अभिलाखी ।
 उत्तम नेमिकुमर वर दीजै, समदविजै नृप समदी कीजै ३१ ॥
 उग्रसैन नृप सुनि हरखाया, नेमिकुमार जमाई पाया ।
 छट्ट सुकल सावन ठहराया, व्याह लगन नृप भौन पठाया ३२ ॥
 कुल आचार दुहं घर कीने, मंगल कारज आनंद भीने ।
 दान अनेक सबनि सुखदानी, बहु ज्यौनार बहुत विध ठानी ॥

(२०१)

चली वरात विविध विसतारी, गान नृत्य वादित्र अपारी ।
जादौ छप्पन कोड़ि तयारी, और भूप बहु विध असवारी ३४
रथ ऊपर श्रीनेमि विराजै, छत्र चमर सिंघासन छाजै ।
देवपुनीत दरव सब सोहैं, सुर नर नारिके मन मोहैं ॥ ३५ ॥
पसु पंखी घेरे वन माहीं, सवनि पुकार करी इक ठाहीं ।
तुम प्रभु दीनदयाल कहाओ, कारन कौन हमें मरवाओ ३६ ॥
यह दुख-धुनि सुनि नेमिकुमारं, सारथिसां पृच्छी तिह वारं ।
प्रभु तुम व्याह निमित्त सब घेरे, संग मलेच्छ भूप बहुतेरे ३७ ॥
कंटक-भै पैनही पग माहीं, जीवसमूह हनैं डर नाहीं ।
पर प्राननि करि प्रान भरै हैं, प्राणी दुरगति माहिं परै हैं ॥ ३८ ॥
धिग यह व्याह नरकदुखदानी, ततछिन छोड़ि दिये सब प्राणी
खुसी सरव निज थान सिधारे, प्रभु तुम वंदी छोर हमारे ३९ ॥
कुल हरिवंस पुनीत विराजै, यह विपरीत तहां क्यों छाजै ।
राज-काज हरि यह विधि ठानी, प्रभु मनमें वातैं सब जानी ४०

चौपड़े, दूजी ढाल ।

प्रभु भावैं भावन निहपाप, भवतनभोग अथिर थिर आप ।
चहु गति सब असरन सिव सर्न, सिद्ध अमर जग जंमन मर्न ॥
एक सदा कोई संग नाहिं, निहचै भिन्न रहै तन माहिं ।
देह असुच सुच आतम परम, नाव छेक जल आस्रव कर्म ॥ ४२ ॥
संवर दिह वैराग उपाव, तप निर्जरा अवच्छक भाव ।
लोक छदरव अनादि अनंत, ग्यान भान भ्रम तिमर हनंत ४३
काम भोग सब सुख लभ लोय, एक सुद्ध पद दुरलभ सोय ।
लौकांतिक आए तिह घरी, कुसुमांजली दे बहु थुति करी ४४ ॥

१ देवोपनीत-दिव्य । २ जूतियाँ ।

चतुर निकाय देव सब आय, छीरोदधि जल कलस नहुलाय ।
 सीस मुकुट पट भूपन माल, मुकति वधू-वर वने रसाल ॥४५॥
 चढ़ि सुखपाल चले भगवंत, सुर नर खग जै जै उचरंत ।
 मात सिवादेवी बिललाय, दौरि पालकी पकरी आय ॥४६॥
 भई मूरछा सुधि बुधि खोय, ज्यौं ल्यौं कीनी चेतन सोय ।
 अहो पुत्र तुम कुल सिंगार, मुझ दुखियाकौ को आधार ॥४७॥
 जीव भ्रम्यौ जग दुःख अपार, जनम मरन कीने बहु वार ।
 निज पर भौ भाखे समझाय, गरभवास अब वस्यौ न जाय ४८
 तुम माता, चाहो सुख मोहि, हमें दुखी लखि दुखिया होहि ।
 मैं जग तरौं वरौं सिव नार, सुत गुन सुनि तुम हरखौ सार ४९
 हल बलभद्र कहैं बहु भाय, राज करौ हम सेवैं पाय ।
 राज विनासी सो किह काज, हम पायौ परमातमराज ॥५०॥

दोहाकी ढाल ।

जै जै स्वामी नेमिजी, नमौं स्वपद दातार हो ।
 आप स्वयंभूनैं धरी, दिच्छा गढ़ गिरनार हो ॥ ५१ ॥
 एक सहस नृप साथ ले, सिद्धरूप उर धार हो ।
 इंद्र करी थुति बंदना, सब मिलि वारंवार हो ॥ ५२ ॥
 बेलासौं उठि पारना, प्रासुक खीर अहार हो ।
 वरदत नृप घरमैं भए, पंचाचरज अपार हो ॥ ५३ ॥
 खग मृग ले फल फूल सो, बंदैं सीस नवाय हो ।
 जाकै दरसन देखतैं, जनम बैर मिटि जाय हो ॥ ५४ ॥
 छप्पन दिनमैं पाइयौ, केवल ग्यान अपार हो ।
 समोसरन धनपति कियौ, कहत न आवै पार हो ॥ ५५ ॥

रजमति अति विललायकै, ग्यारह प्रतिमा धार हो ।
 सबै आरजामें भई, गेननी पद सिरदार हो ॥ ५६ ॥
 सूरज सम तम नासकै, ससि सम वचन प्रकास हो ।
 मेघ समान सुखी करे, सुरतरु सम गुणरास हो ॥ ५७ ॥
 हरि वल सब पूजा करै, पूजै इंद्र समस्त हो ।
 गनधर ठाढ़े थुति करै, पावै वंछित वस्त हो ॥ ५८ ॥
 नारायन बलदेवनै, पूछी प्रभुसौं वात हो ।
 द्वारापुर अरु किसनकी, कितनी थिति विख्यात हो ॥ ५९ ॥
 मदके दोष प्रभावतै, द्वीपायन नर-नाह हो ।
 इनतै वारै वर्षमै, नगर द्वारिकादाह हो ॥ ६० ॥
 हरिकौ जरदकुमारकौ, वाण लगैगौ आय हो ।
 तातै संजम लीजियै, धर वासा दुखदाय हो ॥ ६१ ॥
 किसन दई पुर घोषणा, दिच्छा लो नरनारि हो ।
 मै काहू रोकौ नहीं, नेमि-वचन उर धारि हो ॥ ६२ ॥

दोहाकी दूसरी ढाल ।

ह्ये स्वामी भौ जल पार उतार हो । (आंचली)
 सतभामा रुक्मिनि सबै जी, प्रदमनि आदि कुमार ।
 बहुतनिनै दिच्छा लई जी, जान अथिर संसार हो ॥ ६३ ॥
 नगर जरन हरिकौ मरन जी, कहै बढै विसतार ।
 बलभदर दिच्छा धरी जी, भयौ सुरग अवतार हो ॥ ६४ ॥
 पांचौ पांडौनै लई, दिच्छा सहित कुटंब ।
 सुन सुन निज परजायकौ जी, जान्यौ जगत बिटंब हो ॥ ६५ ॥

नाम कहा लौं मैं कहूं जी, धनि धनि नेमिकुमार ।
बंदी छोरे परमजती जी, सब जग तारनहार हो ॥ ६६ ॥
सुगुन अनंत महंत हौ जी, प्रगट छियालिस भास ।
दोष अठारै छय गये जी, लोकालोक प्रकास हो ॥ ६७ ॥
बहु नारी प्रतिबोधिकैं जी, भेजीं सुरगति सार ।
रजमति तिय लिंग छेदिकैं जी, सोलै सुरग मझार हो ॥ ६८ ॥
बहुतनकौं सुरपद दियौ जी, बहुतनकौं सिवठाम ।
तीन सतक तेतीस संग जी, भये अमर सुखधाम हो ॥ ६९ ॥
तन कपूर ज्यौं खिर गया जी, रहे केस नख धार ।
सुगंध दरव धरि अगन सुर जी, मुकट नम्यौ तिह वार हो ७० ॥
कथा तिहारी मुनि कहैं, हमनैं लीनौ नाम ।
दो अच्छर नर जे जपैं जी, सीझैं वेंछित काम हो ॥ ७१ ॥
सांचे दीन दयाल हौ जी, द्यानत लौ तुम माहिं ।
अपनौ पन प्रतिपाल हौ जी, चिंता व्यापै नाहिं हो ॥ ७२ ॥

इति नेमिनाथवहत्तरी ।



(१०५)

वज्रदंत कथा

चौपदे ।

बैठी वज्रदंत भूपाल, माली लायीं फूल रसाल ॥ (टेक) ।
कमल माहिं मृत भ्रमर निहार, चक्री मन कंथ्यौ तिह वार १ ॥
नासा वसि इन खोई देह, मैं सठ कियौ पंचसौं नेह ॥ २ ॥
मति सुत अवधि ग्यानकौ पाय, मैं न कियौ तप मोख उपाय ३
भव तन भोगनिकौ धिक्कार, दिच्छा धरौं वरौं सिव नारा ४ ॥
सुतकौं सर्व संपदा देय, सो वैरागी राज न लेय ॥ ५ ॥
पुत्र हजार सबनसौं कहा, वौन जेम किनहू नहिं गहा ॥ ६ ॥
आपनि मुक्त होत हौ भूप, हमकौं क्यौं डोवौ जगकूप ॥ ७ ॥
पोतेकौं दे राज समाज, आपन चले मुक्तिके काज ॥ ८ ॥
पिता तीर्थकरके ढिग जाय, नव निधि रत्न तजे दुखदाय ॥ ९ ॥
तीस सहस नृप पुत्र हजार, साठि सहस रानी संग धार ॥ १० ॥
आप मुक्ति सब सुगतिमझार, द्यानत नमौं सुपद दातार ११

इति वज्रदंतकथा ।

(२०६)

आठ गणछन्द ।

दोहा ।

वरधमान सनमति महा, वीर अति महावीर ।
वीर पंच जिस नाम सो, नमौ अंत जिन धीर ॥ १ ॥

सोरठा ।

सब संसार अनित्य, नित्य एक परमात्मा ।
वंदि कहूं सुन मित्त, आठ छंद गन आठके ॥ २ ॥

यगण ।

अकर्ता च कर्ता अभुक्ता च भुक्ता,
अनेका अनित्ता निता एक उक्ता ।
मरै ऊपजै ना मरै ना पजै है,
सदा आतमा स्वांग ऐसे सजै है ॥ ३ ॥

रगण ।

चेतना आन है आन देही यही,
तेयपै भेद ज्यौं भेद जानौ सही ।
त्यागियै देहके नेहकी थापना,
देखियै जानियै आतमा आपना ॥ ४ ॥

तगण ।

जो देह सो देह जो ग्यान सो ग्यान,
संबंधके होततैं होत ना आन ।
जो भेदविग्यान धारंत धीवंत,
सो नास भौ-वास स्यौ-वास वासंत ॥ ५ ॥

भगण ।

केवल दर्सन ग्यान विराजत,
लोक अलोक लखैं गुण छाजत ।
कर्म ढक्यौ नहिं आप पिछानत,
सो परमात्म क्यौं नहिं जानत ॥ ६ ॥

(२०७)

जगण ।

न राग न दोष न बंध न मोष,
सदा अपने गुणमंडित कोष ।
सुभाव रमै पर भावनि खोय,
तिसै परमात्मकौ पद होय ॥ ७ ॥

सगण ।

जिसकी थुति इंद्र करै हरखै,
जिसके गुण साध सदा परखै ।
जिसको नित वेद वतावत है,
सु तुही निजमैं किन ध्यावत है ॥ ८ ॥

नगण ।

धरम गगन जम अधरम,
वध अवध पुदगल करम ।
पर विरहत सुपदसहत,
सुगुन गहत सु सुख लहत ॥ ९ ॥

मगण ।

सत्तोहं तत्तोहं गेयोहं ग्याताहं,
ग्यानोहं ध्यानोहं ध्येयोहं ध्याताहं ।
पमोहं धर्मोहं समोहं बुद्धोहं,
रिद्धोहं वृद्धोहं सिद्धोहं सुद्धोहं ॥ १० ॥

सोरठा ।

वारै अच्छर छंद, चार सहस अरु छयानवै ।
द्यानत हम मतिमंद, भेद कहां लौं कहि सकै ॥ ११ ॥

इति आठगणछंद ।


धर्म-चाह गीत ।

मैं देव नित अरहंत चाहूं, सिद्धको सुमिरन करौं ।
 मैं सूरि गुरु मुनि तीन पदमें, साध पद हिरदै धरौं ॥
 मैं धरम करुनामई चाहूं, जहां हिंसा रंच ना ।
 मैं साखग्यान विराग चाहूं, जासमें परपंच ना ॥ १ ॥
 चौबीस श्रीजिनराज चाहूं, और देव न मन वसै ।
 जिन बीस खेत विदेह चाहूं, वंदतैं पातिग नसै ॥
 गिरनार सिखर समेद चाहूं, चंपापुर पावापुरी ।
 कैलास श्रीजिनधाम चाहूं, भजत भाजै भ्रम-जुरी ॥ २ ॥
 नौ तत्त्वका सरधान चाहूं, और तत्त्व न मन धरौं ।
 षट् दरव गुन परजाय चाहूं, ठीक तासों भै हरौं ॥
 पूजा परम जिनराज चाहूं, और देव नहीं सदा ।
 तिहुं कालका मैं जाप चाहूं, पाप नहिं लागै कदा ॥ ३ ॥
 सम्यक्त दरसन ग्यान चारित, सदा चाहूं भावसौं ।
 दसलच्छनी मैं धरम चाहूं, महा हरप बढ़ावसौं ॥
 सोलहौं कारन दुखनिवारन, सदा चाहूं प्रीतिसौं ।
 मैं नित अठाई परव चाहूं, महा मंगल रीतिसौं ॥ ४ ॥
 मैं वेद चाख्यौं सदा चाहूं, आदि अंत निवाहसौं ।
 पाए धरमके चारि चाहूं, अधिक चित्त उछाहसौं ॥
 मैं दान चाख्यौं सदा चाहूं, भौन वसि लाहा लहूं ।
 मैं चारि आराधना चाहूं, अंतमें एही गहूं ॥ ५ ॥
 मैं भावना वारहौं चाहूं, भाव निरमल होत है ।
 मैं वरत वारै सदा चाहूं, त्याग भाव उदोत है ॥

(२०९)

प्रतिमा दिगंबर सदा चाहें, ध्यान आसन सोहना ।
सब करमसों में छुटा चाहें, सिव लहीं जहां मोह ना॥३॥
में साहमीकौ संग चाहें, मीत तिनहीकौं करौं ।
में परबके उपवास चाहें, सब आरंभ परिहरौं ॥
इस दुखम पंचम काल माहीं, कुल सरावग में लहा ।
सब महाव्रत धरि सकूं नाहीं, निबल तन मने गहा ॥७॥
यह भावना उत्तम सदा, भाऊं सुनौ जिनराय जी ।
तुम कृपानाथ अनाथ द्यानत, दया करनी न्याय जी ॥
दुख नास कर्म विनास ग्यान, प्रकास मोकौं कीजियै ।
करि सुगतिगमन समाधिमरन, भगति चरनकी दीजियै ॥८॥

इति धर्मचाहगीत ।



घ. वि. १४

(२१०)

आदिनाथस्तुति ।

देखता ।

- तुम आदिनाथ स्वामी, वंदौं त्रिकाल नामी ।
तुम गुन अनंत भारी, हम तनक बुद्धिधारी ॥ १ ॥
श्रुति कौन भांति गावैं, यह बुद्धि कहां पावैं ।
तुम ही सहाय हूँजौ, प्रभु सम न देव दूँजौ ॥ २ ॥
सर्वार्थसिद्धिवासी, तिहुं ग्यान सुखविलासी ।
गर्भ मास पट अगाऊ, सुर कियौ नगर चाऊ ॥ ३ ॥
भवि भाग जोग आए, सुर मेरपै नहुलाए ।
नाभिरायके दुलारे, मरुदेविके पिधारे ॥ ४ ॥
जब आठ बरस धारे, अनुविरत सब संभारे ।
पट लाख पुव्व आए, लखि सवनि सुक्ख पाए ॥ ५ ॥
नाभिराय चित विचारी, संतानवृद्धिकारी ।
तुम परम गुरु सबनके, हम नाम गुरु भवनके ॥ ६ ॥
कहना हमारा कीजै, पानिग्रहन करीजै ।
प्रभु मोह उदै वृझा, चुप रहे भाव सूझा ॥ ७ ॥
तब इंद्र भी आया ही; दो भूप सुता व्याही ।
भए एक सौ कुमारं, दो सुता गुन अपारं ॥ ८ ॥
सब आप ही पढ़ाए, हुन्नर सबै सिखाए ।
जब कलपवृच्छ भागे, सब नाभि चरन लागे ॥ ९ ॥
नृप ले सवनिकौं आए, प्रभुकौं वचन सुनाए ।
यह प्रजा राखि लीजै, सबहीकौं सुखी कीजै ॥ १० ॥
प्रभु कालधिति विचारी, गई भोगभूमि सारी ।
तब ही सुधर्म आए, पट कर्म सब लगाए ॥ ११ ॥

(२११)

कलसाभिपेक कीनों, नाभिनें स्वराज दीनों ।
बीस लाख पुत्र आए, तब प्रजापति कहाए ॥ १२ ॥
सब दान सबको दीनें, सब लोग सुखी कीनें ।
कियौ राज सुख उदारं, सब भोग बहु प्रकारं ॥ १३ ॥
प्रभु भोग तजत नाहीं, इंद्र फिर चित्त माहीं ।
तब अपछरा पठाई, सो नाचिके विलाई ॥ १४ ॥
लखि जगत-धिति विनासी, भए पुत्र लख तिरासी ।
वैराग भाव भाए, लौकांत इंद्र आए ॥ १५ ॥
दियौ भरत राजभारं, किय भूप सब कुमारं ।
चौ सहस्र भूप सार्थं, भए जती जगतनाथं ॥ १६ ॥
षट मास जोग दीनों, तन अचल मेर कीनों ।
सब साथतै सु भागे, छुध तृपा काज लागे ॥ १७ ॥
प्रभु पाय जग परे हैं, फल फूल लै धरे हैं ।
नमि विनमि तहां आए, प्रभुको वचन सुनाए ॥ १८ ॥
सुत सरव भूप कीनें, हम क्यों विसारि दीनें ।
धरनेंद्र तहां आया, वामनका भेष लाया ॥ १९ ॥
तुम जाहु भरत पासैं, अब राज लेहु वासैं ।
तुझको कवन बुलावै, को भरत कौन जावै ॥ २० ॥
इनका कहा करैगै, इनहीके हो रहैगै ।
तब इंद्र भगति भीने, खगपती भूप कीने ॥ २१ ॥
प्रभु जोग पूरा कीना, आहार चित्त दीना ।
आए नगरके माहीं, विधि जानै कोई नाहीं ॥ २२ ॥
वन माहिं फिर सिधारे, समताके भाव धारे ।
दिन चार सै भए हैं, गजपुरमें तब गए हैं ॥ २३ ॥

नौ भौकों नेह जानौ, दाता श्रेयंस ठानौ ।
 लिया ईश्वरस नवीना, सुर पंचचरज कीना ॥ २४ ॥
 तब भरत भूप धाया, श्रेयांस भुवन आया ।
 मौनीकी बात जानी, क्योंकर तुम पिछानी ॥ २५ ॥
 कही भरतसाँ विख्यातं, भव आठकेरी बातं ।
 वज्रजंघ श्रीमतीका, सब कहा भेद नीका ॥ २६ ॥
 तब दान विधि बताई, सबहीके मन सुहाई ।
 तप कियौ बहु प्रकारं, भए वरस इक हजारं ॥ २७ ॥
 चहु करम तब भगाया, तब ग्यान भान पाया ।
 सुर कियौ समोसरना, सो कापै जाय वरना ॥ २८ ॥
 सुर नर असुरनै पूजा, तुही देव नाहिं दूजा ।
 बानी सु मेघ वरसै, सुनि सरव जीव हरसै ॥ २९ ॥
 गनधर भए चौरासी, बहु मुनि भए निरासी ।
 छावक अनेक कीनै, सबहीको वरत दीनै ॥ ३० ॥
 पसु नरकतै निकारे, सुर मुकति सुख विधारे ।
 सब देस करि विहारं, इक लाख पुव्व सारं ॥ ३१ ॥
 मुनि एक सहस संगं, भए अमर सुख अभंगं ।
 तन खिरा ज्यौं कपूरं, इंद्र भए सब हजरं ॥ ३२ ॥
 करि वंद वार वारं, नख केश संस्कारं ।
 रज सीस लै लगाई, भावना चित्त भाई ॥ ३३ ॥
 जे गुन तिहारे ध्यावै, पूजा करै करावै ।
 जे नामकाँ भजै हैं, सब पापकाँ तजै हैं ॥ ३४ ॥
 जे कथा तेरी गावै, जे सुनै प्रीति लावै ।
 जे चित्तमै धरै हैं, सब दुःखकाँ हरै हैं ॥ ३५ ॥
 तुम कथा है बहुतसी, मै कही है तनकसी ।
 यह चूक वकस दीजौ, दानतकौ याद कीजौ ॥ ३६ ॥

इति आदिनाथस्तुति ।

शिक्षापंचासिका ।

दोहा ।

राग विरोध विमोह बस, भ्रम जीव संसार ।
 तीनों जीते देव सो, हमें उतारी पार ॥ १ ॥
 धंधेमें दिन जात है, सोवत रात विलात ।
 कौन बेर है धरमकी, जब ममता मरि जात ॥ २ ॥
 नरकी सोभा रूप है, रूप सोभ गुनवान ।
 गुनकी सोभा ग्यानतैं, ग्यान छिमातैं जान ॥ ३ ॥
 आव गलै अघ नहि गलै, मोह फुरै नहि ग्यान ।
 देह घटै आसा बढ़ै, देखौ नरकी वान ॥ ४ ॥
 चेतन तुम तौ चतुर हौ, कहा भए मतिहीन ।
 ऐसौ नर भव पायकैं, विषयनमें चित दीन ॥ ५ ॥
 ग्याता जो कुकथा करै, पीछै, निंदै सोय ।
 मूरख ग्यान बखानिकैं, आदर करै न लोय ॥ ६ ॥
 त्याग करै त्यागी पुरुष, जानै आगम भेद ।
 सहज हरप मनमें धरै, करै करमकौ छेद ॥ ७ ॥
 बालपने अग्यान मति, जोवन मदकर लीन ।
 वृद्धपने है सिथिलता, कहौ धरम कब कीन ॥ ८ ॥
 बालपने विद्या पढ़ै, जोवन संजमलीन ।
 वृद्धपने संन्यास ग्रहि, करै करमकौ छीन ॥ ९ ॥
 जाहर जगत विलात है, नाहर जममुख माहिं ।
 ता हरकै हूजै सुखी, चाह रहै कछु नाहिं ॥ १० ॥
 भमता जीव सदा रहै, ममता रत परजाय ।
 समता जब मनमें धरै, जम तासौ डर जाय ॥ ११ ॥

(२१४)

लोभसैन विनसै भलौ, रमा विसन सविमार ।
जैत करन सुनरक तजै, रचा जगत मग चार (?) १२
जैसैं विपै सुहात है, तैसैं धर्म सुहाय ।
सो निहचैं परमारथी, सुख पावै अधिकाय ॥ १३ ॥
सोरठा ।

सम्यक अरु साचार, सज्जनता अरु सील गुन ।
मार्गें मिलैं न चार, पूरवले पुन्नो विना ॥ १४ ॥
जे न करैं दस चार, ते बारह पच-पन कहे ।
जे हैं छप्पन ठार, आठ आठ पद सिद्धकौ ॥ १५ ॥
दोहा ।

जैनधर्म सब धर्मपै, सोभै तिलक समान ।
आन धर्म लागैं नहीं, ज्यौं पेटबीजन भान ॥ १६ ॥
चौपई ।

विविध प्रकार राजकौ त्याग, जिन सिव साधी ध्यान समाज ।
भिच्छा मांगि उदर तू भरै, अपनौ काज न काहे करै १७
दोहा ।

चिंता चिता दुहू विपै, बिंदी अधिक सदीव ।
चिंता चेतनिकौ दहै, चिता दहै निरजीव ॥ १८ ॥
'देहु' वचन यह निंद है, 'नाहिं' वचन अति निंद ।
'लेहु' वचन सुभरूप है, 'नाहिं' महा सुभ इंद ॥ १९ ॥
जुगल राग अरु दोषकी, हानि करौ बुधवंत ।
रुकै करम सिव पाइयै, यह 'जुहार' विरतंत ॥ २० ॥

१ दूसरी तीसरी प्रतिमें 'रचा गमल (?) मग चार' पाठ है ।
२ जुगलू या खद्योत ।

यन यन होत न कल्पतरु, तन तन युय न अगाथ ।
 फन फन होत न मन सहत, जन जन, होत न साध २१
 सुगुन बढ़े अभ्याससौं, भाग बढ़े नहिं कोय ।
 कान बढ़ावे जोपिता, आंख बढ़ी क्यौं होय ॥ २२ ॥
 निसिका दीपक चंद्रमा, दिनका दीपक भान ।
 कुलका दीपक पुत्र है, तिहुं-जगदीपक ग्यान ॥ २३ ॥
 दोप बुरे सबके लगें, आतम दोष मुहाय ।
 धूआं सबहीका बुरा, अगर धूम सुखदाय ॥ २४ ॥
 घरकी सोभा धन महा, धनकी सोभा दान ।
 सोभै दान विवेकसौं, छिमा विवेक प्रधान ॥ २५ ॥
 एक समैमें सब लखा, ऐसा समर्थ सोय ।
 आगें पीछें सो लखै, जो दृगहीना होय ॥ २६ ॥
 पूरन घट बोलै नहीं, अरध भए छलकंत ।
 गुनी गुमान करै नहीं, निरगुन मान करंत ॥ २७ ॥
 मैं मधु जोख्यौ नहिं दियौ, हाथ मलै पछिताय ।
 धन मति संचौ दान दो, माखी कहै सुनाय ॥ २८ ॥
 कला बहत्तरि पुरुषकी, तामैं दो सिरदार ।
 एक जीवकी जीविका, दूजै जी-उद्धार ॥ २९ ॥
 सोम सुक्र गुरु चंद सुभ, मंद भौम रवि भान ।
 बुद्ध उभै सुर प्रात सुभ, कहै सुरोदय ग्यान ॥ ३० ॥
 घर बसि दान दियौ नहीं, तन न कियौ तप लेस ।
 'जैसे कंता घर रहे, तैसे गए विदेस' ॥ ३१ ॥

नर भौ पायौ धरमकों, किया अधर्म बनाय ।
 “विटते (!) कारन आनकें, पूंजी चले गमाय” ॥ ३२ ॥
 चलौ भविक तहां जाइयै, जहां वसत जिनराज ।
 दुःखनिवारन सुखकरन, ‘एक पंध दो काज’ ॥ ३३ ॥
 कर भाजन कूआ निकट, गुन विन लहै न नीर ।
 सो गुन क्यों नहिं धारियै, जो बुधि होय सरीर ॥ ३४ ॥
 तन बल धन बल कपट बल, टाल बांह-बल जोय ।
 अजस पापतैं ना डरै, पंच कहावै सोय ॥ ३५ ॥
 पंच परम पद नित जपै, पंचेंद्री सुख टारि ।
 पंचनके पीछै चलै, पंच वही सिरदार ॥ ३६ ॥
 एक कनक अरु कामिनी, ए दोनौं दिहु बंध ।
 त्यागै निहचै मोख है, और बात सब धंध ॥ ३७ ॥
 मान मुधा रस दूरि करि, दान छुधा रस देय ।
 ध्यान छुधारस ठानिकै, ग्यान सुधारस पेय ॥ ३८ ॥
 समरथ हैं ते मीत नहिं, मीत न समरथ कोय ।
 दोनौं बातैं कठिन हैं, औषधि मीठी होय ॥ ३९ ॥
 समरथ प्रीतम प्रभु बड़े, तिन सेवौ मन लाय ।
 इह पर भौ इन सम नहीं, मनवांछित सुखदाय ॥ ४० ॥
 कहूं सफल आदर विना, कहूं आदर फल नाहिं ।
 दोनौं लहियै धर्मतैं, वृच्छ सफल अरु छाहिं ॥ ४१ ॥
 क्रोध समान न सत्रु है, छमा समान न मित्र ।
 निंदा सम न गिलान है, प्रभुकी सम न पवित्र ॥ ४२ ॥

(२१७)

गोरठा ।

कहुं विन ग्यान विराग, कहुं ग्यान वैराग विन ।
दोनों विना अभाग, ग्यान विराग सहित सुधी ॥ ४३ ॥

चौपाई ।

देव धरम गुरु आगम मानि, चार अमोलक रतन समान ।
तजि मन क्रोध लोभ छल मान, भजि जिन साहिव मेरु समान
दोहा ।

पाप पुन्य दोनों वसें, दरव माहिं भ्रम नाहिं ।
'द्यानत' कीने पाप है, पुन्य अमानत माहिं ॥ ४५ ॥
बड़े वृच्छकों सेइयै, पूरन फल अरु छाहिं ।
जो कदाचि फल दे नहीं, छाहिं बहुत तप नाहिं ॥ ४६ ॥
ताड़ ताप छेदन कसन, कनक-परीच्छा चार ।
देव धरम गुरु ग्रंथसों, सम्यक परखौ सार ॥ ४७ ॥
दाना दुसमन हू भला, जो पीतम सनबंध ।
बड़े भाग्यतै पाइयै, 'सोना और सुगंध' ॥ ४८ ॥
धन जोरैतै ऊंच नहि, ऊंच दानतै होत ।
सागर नीचै ही रहै, ऊपर मेघ उदोत ॥ ४९ ॥
यह सिच्छा पंचासिका, कीनी 'द्यानतराय' ।
पढ़ै सुनै जे मन धरै, सब जनको सुखदाय ॥ ५० ॥

इति शिक्षापंचासिका ।

(२१८)

जुगलआरती ।

दोहा ।

(१)

पंचाचार छतीस गुन, सात रिद्धि चहुं ग्यान ।
गनधर पद बंदौं सदा, आचारज सुखदान ॥ १ ॥

चौपई ।

एक परम परतीति विख्याता, दो दिच्छा सिच्छाके दाता ।
तीन काल सामायिक धारी, चारौं वेद कथन अधिकारी ॥२॥
पंच भेद स्वाध्याय बतावैं, पट आवश्यक सब समझावैं ।
सातौं प्रकृति हनी दुखदानी, आठौं अंग अमल सरधानी ३॥
नौ विध प्रायश्चित्त सिखलावैं, दस विध परिगह त्याग करावैं ।
ग्यारै विधा जोग जिन मानैं, बारै अंग कथन सब जानैं ४॥
तेरै राग प्रकृति सब नासैं, चौदैं जीवसमास प्रकासैं ।
पंद्रै मोह प्रकृति सब नासी, सोलै ध्यान-रीति परकासी ॥५॥
सत्रै प्रकृति लखै उदवेली, ठारै खै उपसम विधि झेली ।
परनै जिन उनईस बखानैं, वरतमान वीसौं जिन मानैं ६॥
इकइस गनत भेद सब सूझैं, वाइस भाव दसम गुन बूझैं ।
भवनत्रिक तेईस बताए, कामदेव चौबीस सुनाए ॥ ७ ॥
विकथा नाम पचीस बखानैं, छव्विस गुन दरवाँके जानैं ।
क्रोध भेद सत्ताइस भाखे, अट्ठाईस विषै सब नाखे ॥ ८ ॥
रतनत्रै उनतीस प्रकारं, तीसौं चौबीसी निरधारं ।
करम भेद इकतीस सिखाये, खेत विदेह बतीस सुहाये ॥९॥
तेतिस देव इंद्रके थानं, चौतीसौं अतिसै परिमानं ।
पैंतिस धनुष कुंथ तन बंदै, छत्तिस गुन पूरन अभिनंदै ॥१०॥

(२१२)

दोहा ।

एक एक गुनमें कहे, हैं अनेक समुदाय ।

'ग्यानत' प्रभुकों बंदते, मोह धूरि झरि जाय ॥ ११ ॥

राजमल जैन

(२)

श्री. ए. श्री. टी.

कोरटा ।

ग्यारे अंग बखान, चौदे पूरव समझ सत्र ।

गुन पच्चीस प्रधान, उपाध्याय बंदों सदा ॥ १ ॥

चौपाई ।

पहला आचारांग बखानं, पद अठारै सहस्र प्रमानं ।
दूजा सूत्रकृतं अभिलाखं, पद छत्तीस सहस्र गुरु भाखं २
तीजा ठानाअंग सुजानं, सहस्र वियालिस पद सरधानं ।
चौथा समवायांग निहारं, चौसठि सहस्र लाख इक धारं ॥ ३ ॥
पंचम व्याख्याप्रगपति दरसं, दोय लाख अष्टाइस सहसं ।
छट्टा ग्यातकथाविस्तारं, पांच लाख छप्पन हजारं ॥ ४ ॥
सातम उपासकाध्ययनंगं, सत्तरि सहस्र ग्यार लख भंगं ।
अष्टम अंतकृतं दस ईसं, ठाई सहस्र लाख तेईसं ॥ ५ ॥
नवम अनुत्तर दस सु विसालं, लाख बानवै सहस्र चवालं ।
दसम प्रसनव्याकरण विचारं, लाख त्रानवै सोल हजारं ६
ग्यारम विपाकसूत्र सुभाखं, एक कोरि चौरासी लाखं ।
चार किरोर पंदरै लाखं, दो हजार पद गुरु सब भाखं ७
बारम दिष्टवाद अवधारं, तामै पंच बडे अधिकारं ।
प्रकरणसूत्र प्रथम अनुयोगं, पूरव अरु चूलिका नियोगं ॥ ८ ॥
चारौ पद छप्पन हजारं, तेरै कोड़ी लाख अठारं ।
पूरव प्रथम नाम उतपातं, ताके एक कोड़ि पद ख्यातं ॥ ९ ॥

पूरव अग्रनीय जुग नामं, लाख छानवै पद अभिरामं ।
 तीजा पूरव वीरजवादं, पद हैं सत्तर लाख अनादं ॥१०॥
 चौधा पूरव अस्त-नास है, साठ लाख पद बुध प्रकास है ।
 पंचम पूरव ग्यान प्रवीनं, एक कोड़ि पद एक विहीनं ॥११॥
 छडा पूरव सत्य बखानं, एक कोड़ि पटपद परवानं ।
 सातम पूरव आतमवादं, पद छविस कोड़ी सुख स्वादं १२
 आठम पूरव करम सु भाखं, एक कोड़ि पद अस्सी लाखं ।
 नौमा पूरव प्रत्याख्यानं, पद चौरासी लाख बखानं ॥१३॥
 दसमा पूरव विद्या जानं, पद इक कोड़ि लाख दस ठानं ।
 ग्यारम पूरव कल्यान बखानं, पद छविस कोड़ी परधानं १४
 द्वादस पूरव प्राणावादं, पद किरोर तेरह अविखादं ।
 तेरम पूरव क्रियाविसालं, नौ किरोर पद बहु गुनमालं ॥१५॥
 चौदम पूरव विंद त्रिलोकं, साडे वार कोड़ि पद धोकं ।
 साडे पञ्चानवै किरोरं, पंच अधिक पूरव पद जोरं ॥ १६ ॥
 इकसौ वारै कोड़ि बखाने, लाख तिरासी ऊपर जाने ।
 ठावन सहस पंच अधिकाने, द्वादस अंग सरव पद माने ॥ १७
 क्यावन कोड़ि आठ ही लाखं, सहस चौरासी छैसै भाखं ।
 साड इकीस सिलोक बताए, एक एक पदके ए गाए ॥ १८ ॥
 ए पच्चीसौं सदा विथारै, स्वपर दया दोनौं उर धारै ।
 भौ सागरमैं जीव निहारै, धरम वचन गुन धार निकारै ॥१९॥

दोहा ।

केवलग्यानि समान पद, स्तुतकेवलि जग माहिं ।
 उपाध्याय द्यानत नमौं, बढै ग्यान भ्रम नाहिं ॥ २० ॥

इति जुगलआरती ।

(२२१)

वैरागछत्तीसी ।

दोहा ।

अजितनाथ पद वंदिकैं, कट्टं सगर अधिकार ।
साठि सहस सुत आप नृप, सरव चरम तन धार ॥१॥

चौपादे ।

नगर अजुध्याकौ चक्रेस, सुर नर खग वस दिपै दिनेस ।
भूप गयौ वंदन जिनराय, परभौ मित्र मिल्यौ सुर आय ॥२॥
हम तुम हुते विदेह मझार, तुम थे मो भगनी-भरतार ।
तुमरै दोय पुत्र थे धीर, एक पुत्र खायौ जमवीर ॥ ३ ॥
दूजे सुतकौ देकरि राज, हम तुम तप लीनौ हित काज ।
उपजे सोलै स्वर्ग मझार, तहां कियौ था तुमौ करार ॥४॥
पहलै जा सो दिच्छा लेय, इहां रहै सो सिच्छा देय ।
सुतवियोग दिच्छा परनए, तातैं साठि सहस सुत ठए ॥ ५ ॥
भोगे भोग तृपति न लगार, दिच्छा गहौ न लावौ वार ।
समझ वृझ नृप लह्यौ लुभाइ, पुत्रमोह छोड़्यौ नहिं जाइ ॥६॥
सुर जानौ इसकै संसार, फिरि आयौ मुनिकौ व्रत धार ।
जोवनवंत काम उनहार, रवि ससितैं दुति अधिक अपार ७
चारन रिद्धि महा तपवान, नृप वंध्यौ चैत्याले आन ।
पूछै भूप तज्यौ क्यौं गेह, व्यौरा सरव कहौ धरि नेह ॥८॥
घर वंदीखाना सुत पास, नारी सकल दुःखकी रास ।
राजा सुनिकै रह्यौ लुभाइ, मोह उदैवस कलु न वसाइ ॥९॥
इक दिन सरव कुमारन आइ, कह्यौ भूपसौं वचन सुनाइ ।
तुमैं काम करना है जोय, हमकौं आग्या दीजै सोय ॥१०॥

भूप कहै मेरें यह काम, भोगौ भोग सरव सुखधाम ।
 गए विलखकै सरव कुमार, फिरि आए सब हूँ असवार ॥ ११ ॥
 हमको काम कहौ कुछ सार, हम तब ही करि हूँ आहार ।
 जब हम छत्रीकुल जगमाहिं, आप कमाई लछिमी खाहिं ॥ १२ ॥
 खंड छहौं मैं साधे सबै, मुझे साधना कुछ नहीं अबै ।
 कुमर कहैं अब होहि दयाल, हमें काम करि करौ खुस्याल ॥ १३ ॥
 भूप कहैं कैलास पहार, तहां बहत्तरि जिनगृह सार ।
 आगै काल होयगा दुष्ट, तिनकी रच्छा कीजै पुष्ट ॥ १४ ॥
 दंड लेइ ता खाई करौ, गंगा लाइ तासमें भरौ ।
 सुनत बचन सब चले कुमार, खाई करि जल भरि सुख धार ॥ १५ ॥
 इस औसर सुर हूँ फनधार, कियौ मूरछा सरव कुमार ।
 सुनी खबर मंत्रिनने सही, नृप सुत मोह जान नहिं कही ॥ १६ ॥
 तब सुर भयौ वृद्ध द्विजराय, मृतक पुत्र इक कंठ लगाय ।
 धर्मभूप तू दीनदयाल, मेरौ पुत्र हन्यौ है काल ॥ १७ ॥
 तेरे राज दुखी नहिं कोय, मम सुख होय करौ तुम सोय ।
 भूप कहै सुनि हो द्विजराय, जमसौं काहूकी न वसाय ॥ १८ ॥
 सिद्ध बिना सबहीकों खाय, काल गालमें है षटकाय ।
 जो तू जीता चाहै तेह, पुत्र मोह तजि दिच्छा लेह ॥ १९ ॥
 बांभन कहै सांच जो बात, तो सुनियै विनती विख्यात ।
 भूप कहै धोका नहिं कोय, दिच्छा विन जम नास न होय ॥ २० ॥
 मेरा सुत इक मारा सार, मारे तेरे साठि हजार ।
 जो तुम लखौ अधिर जग धाम, दिच्छा क्यों न धरौ नर स्वाम ।
 मेरा बैरी तनक कृतांत, तेरा बैरी बड़ा न भ्रांत ।
 तुम क्यों नहिं जीतौ जमराय, अमर होहु सब दुख मिटिजाय

(२२३)

दोहा ।

वात कहन भूपरि गमन, करन खड़ग खगधर ।
कथनी कथ करनी करै, ते बिरले संसार ॥ २३ ॥

चौपाई ।

सुन दूरछा नृपकौ भई, सीतल-दरव-जोग मिटि गई ।
भावै भावन चार, भौ-तन-भोग अधिर संसार २४

दोहा ।

भूप कहै संसार सब, कदली वृच्छ समान ।
केले माहिं कपूर ज्यौं, ल्यौं यामै निरवान ॥ २५ ॥
दुर्लभ नर भव पायकै, जो मैं साधौं मोष ।
तो मेरौ जीवन सफल, मिटै सरव दुखदोष ॥ २६ ॥
पुत्र मोह फांसी पर्यौ, मैं न लख्यौ हित काज ।
अव सब फांसी कटि गई, दियौ भगीरथ राज ॥ २७ ॥
जहां धरम दिढ़ जिन तहां, पहुंचे बहु नृप संग ।
दिच्छा लीनी भावसौं, सुर हरख्यौ सरवंग ॥ २८ ॥

चौपाई ।

गयौ जहां थे साठि हजार, किये सचेतन सरव कुमार ।
पिता बारता सबसौं कही, मैं तुम कुलकौ प्रोहित सही ॥ २९ ॥

सोरठा ।

धन्य हमारे तात, राज काज तजि वन वसे ।
हम हूं जाय विख्यात, पिता किया सोई करै ॥ ३० ॥

चौपाई ।

सब कुमारन तब दिच्छा लई, देव प्रगट है बानी चई ।
हम कीनौ अपराध अपार, छमा करौ तुम सब मुनि सार ३१

(२२४)

मुनि बोले सब जगत टटोय, तुम सम उपगारी नहिं कोय ।
भोग कीचतैं सर्व निकार, धरे भोखमें धनि तू यार ॥ ३२ ॥
मधुर कठिन दो बात बनाय, करै धरम उपदेस सुनाय ।
सो पीतम कहियै सिरदार, इस भौ पर भौ सुखदातार ३३

बोदा ।

नरम कहै करड़ी कहै, करै पाप उपदेस ।
सो बैरी तातैं बढ़ै, दोनौं जनम कलेस ॥ ३४ ॥
देव सुखी थानक गयौ, सब मुनि करि तप घोर ।
करम काटि सिवपुर गए, वंदत हौं कर जोर ॥ ३५ ॥
सगर-विरागछतीसिका, हेत भवानीदास ।
कीनी ध्यानतरायनै, पढ़ौ सबन सुखरास ॥ ३६ ॥

इति बैरागछतीसी ।



(२२५)

बाणी-संख्या ।

दोहा ।

बंदों बानी बरन जुग, बरग क्रिये पट जास ।
अच्छर एक घटाईके, अंग उपंग प्रकास ॥ १ ॥
'नेमिचंद्र' मुनिराजपद, बंदों मन वच काय ।
जस प्रसाद गिनती कहें, जैनवचन-समुदाय ॥ २ ॥

बीपड़े ।

अच्छर दोय गनतके काज, राखे भाखे स्त्रीजिनराज ।
तिनकौ बरग फलै विसतार, एक बरगसौं एक निहार ॥३॥
तातैं लीजै अच्छर दोय, बरग छहौं इस विध अवलय ।
पहला बरग चार परवान, दूजा सोलै बरग बखान ॥ ४ ॥
तीजा दोसै छप्पन अंक, भाखौ चौथा बरग निसंक ।
पैंसठ सहस पांचसै धार, छत्तिस अच्छर अधिक निहार ॥५॥
चार सतक उनतीस किरोर, लाख पचास एक कम जोर ।
सतसठि सहस दुसै छानवै, पंच बरग गिनती यह ठवै ॥६॥

दोहा ।

इक लख चौरासी सहस, चौसै सतसठि जान ।
इनकौ कोड़ाकोड़ि करि, आगैं सुनौ बखान ॥ ७ ॥
लाख चवालिस जानियै, सात सहस सै तीन ।
सत्तर एते कोर हैं, और कहें परवीन ॥ ८ ॥
लाख कहे पञ्चानवै, सहस एक पंचास ।
छै सै सोलै गनतका, छैठा बरग परकास ॥ ९ ॥

१ अंकोंमें यथा—१८४४६७,४४०७३७०,९५५९६९६ ।
ध. वि. १५

(२२६)

वीस अंककी दूसरी, गनती कहुं समुदाय ।
सावधान है कै सुनौ, सब संसै मिटि जाय ॥ १० ॥
शोरठा ।

बिंजन हैं तेतीस, आदि ककार हकार लौं ।
स्वर हैं सत्ताईस, ह्रस्व पुलत दीरघ नमौं ॥ ११ ॥
जोगवहा है चार, अं अः लख परगट वरन ।
चौसठि जैन मझार, आनमती भाखैं कभी ॥ १२ ॥
दीरघ ऋ लृ नहिं संसकृत, देस भापमैं जान ।
ए ऐ ओ औ ह्रस्व ए, प्राकृत भापा मान ॥ १३ ॥
मूल वरन चौसठि कहे, अरु संजोग अनेक ।
ते अच्छर पुनरुक्त सब, परमागम यह टेक ॥ १४ ॥
एई चौसठि वरनकौं, भिन्न भिन्न करि राख ।
इक इक पर दो दो धरौ, गुनौ परस्पर साख ॥ १५ ॥
चौपड़े ।

पहले दो दूजे दो चार, तीजे दो गुन आठ निहार ।
चौथे सोलै पांच छतीस, छठे चौसठि कहे गनीस ॥ १६ ॥
सात गिनौ सौ अट्ठाईस, आठैं दो सै छप्पन दीस ।
इस विध चौसठि लौं गिन सार, वीस अंक उपजै निरधार १७
दोहा ।

ईक वसु चौ चौ पट सपत, चौ चौ नभ सत तीन ।
सत नभ नौ पन पंच इक, पट इक पट गिन लीन ॥ १८ ॥
लीने थे दो एककै, पूरव गनती काज ।
सो या माहिं कमी करौ, यौं भाख्यौ मुनिराज ॥ १९ ॥

(२२७)

बीस अंक गिनती विपिन, छै सै सोलै अंत ।
एक घटा वाकी रहे, छै सै पंद्रै संत ॥ २० ॥
इक वसु चौ चौ पट सपत, चौ चौ विंदी सात ।
तिय सत नभ नौ पंच पन, इक पट इक पन ख्यात ॥ २१ ॥
अव इनके पद वरनऊँ, सो पद तीन प्रकार ।
प्रथम अरथ परमान विय, त्रितिय मध्य पद धार ॥ २२ ॥
जेते अच्छर जोरि कैं, कहैं परोजन नाम ।
धरम करौ यौं आदि दे, प्रथम अरथ पद धाम ॥ २३ ॥

सोरठा ।

नमः समयसाराय, आठ वरनतैं आदि दे ।
सो प्रमान पद गाय, भूपर परगट देखियै ॥ २४ ॥

दोहा ।

इक पट तिय चौ आठ तिय, नभ सत वसु वसु आठ ।
ए अच्छर ग्यारै करै, कह्यौ मध्यपदपाठ ॥ २५ ॥

चौपई ।

सोलै सै चौतीस किरोर, लाख तिरासी ऊपर जोर ।
सात सहस आठ सै वखान, अठ्ठासी अच्छर पद मान ॥ २६ ॥

दोहा ।

बीस अंक इक पांचलौं, इक पद ग्यारै अंक ।
भाग दिए कितने भए, पद गन लेहु निसंक ॥ २७ ॥
एक एक दो आठ तिय, पंच आठ नभ सुन्न ।
पंच सकल पद बंदना, कीजै लीजै पुन्न ॥ २८ ॥

१ यथा—१८४४६७४४०७३.७०९५५१ ६१५ ।

(२२८)

सौरठा ।

इक सौ बारै कोर, लाख तिरासी जानियै ।
सहस अठावन जोर, पंच अधिक पद होत हैं ॥ २९ ॥
वसु नभ इक नभ आठ, एक सात पन वरन बसु ।
वाकी राखा पाठ, यातैं हुवा न एक पद ॥ ३० ॥
आठ कोड़ि इक लाख, आठ सहस अरु एक सौ ।
पचहत्तर हू भाख, ए अच्छर वाकी रहे ॥ ३१ ॥
पदकै द्वादस अंग, कीनै गौतम स्वामिने ।
चौदैं भेद उपंग, ते वाकी अच्छरनिके ॥ ३२ ॥

चौपई ।

द्वादस चौदस अंग उपंग, भद्रवाहु जानैं सरवंग ।
नाम मात्र हूं वरननि करौं, अदभुत धीरज हिरदै धरौं ॥३३॥
पहला आचारांग प्रधान, तामैं जतिआचार विधान ।
सहस अठारै पद हैं तास, वंदन करौं क्रिया परकास ॥३४॥
सूत्रक्रान्त है दूजा अंग, धर्मक्रियाके सूत्र प्रसंग ।
पद छत्तीस हजार प्रमान, वंदन करौं जोरि जुग पाना ॥३५॥
तीजा ठानाअंग विसेख, तामैं दरव थान बहु पेख ।
एक जीव जग सिध द्वै भेद, उतपति वै धुव तीन निवेदा ॥३६॥
गतिसौं चार भावसौं पांच, चौ दिस अध ऊरध पट सांच ।
सात भंग वानीतैं सात, इस प्रकार बहु थानक वात ॥३७॥
पुदगल एक खंध अनु दोय, सरव दरव थानक यौं जोय ।
सहस वियालिस पद अवधार, वंदौं सुद्ध थानदातार ॥३८॥
चौथा समवायांग विसाल, तहां कथन सम बहुविध भाल ।
दरव खेत काल अरु भाव, जुदे जुदे वरनौं विवसाव ॥३९॥

दरवित धरम अधर्म समान, खेत पंच पैताले जान ।
 सरवारथ सिध सातम जान, तेतिस सागर काल समान ॥४०॥
 केवल ग्यान बराबर जान, केवल दरसन भाव समान ।
 पद इक लख चौसठि हजार, बंदों मनमें समता धार ॥४१॥
 व्याख्याप्रगपति पंचम अंग, ताके भेद कहीं सरवंग ।
 जीव अस्तिकौ क्यों करि नास, किह विध नित्य अनित्य प्रकास
 साठि हजार प्रसनके काज, सब उत्तर व्याख्यान समाज ।
 अट्ठाईस सहस द्वै लाख, पद बंदों उत्तर रस चाख ॥४३॥
 धर्मकथा है छद्म नाम, रतनत्रै दसलच्छन धाम ।
 पांच लाख छपन हजार, पद बंदों मैं धरम विचार ॥४४॥
 सातम उपासकाअध्यैन, तामैं स्नावककी विधि ऐन ।
 पूजा दान संब उपगार, ग्यारै प्रतिमा वरनन सार ॥४५॥
 अनाचार अतिचार विचार, घरकी सब किरिया विसतार ।
 ग्यारै लाख छपन हजार, पद बंदों स्नावकपदकार ॥४६॥

दोहा ।

अंतकृतंदस अष्टमा, अंग कहे पद तास ।
 तेईस लाख बखानियै, सहस अठाइस भास ॥ ४७ ॥
 इक इक जिन वारै भयौ, दस दस गुन उपसर्ग ।
 सहि सहि सब सिवपुर गए, कथन सकल रिपिवर्ग ॥४८॥
 अनुत्तरोत्पपाददस, नौमा अंग बखान ।
 लाख वानवै पद कहे, सहस चवालिस जान ॥ ४९ ॥
 दस दस मुनि उपसर्ग सहि, पहुंचे पंच विमान ।
 एक एक जिनके समै, तिनकौ कथन विनान ॥ ५० ॥

(२३०)

चौपई ।

प्रसन व्याकरण दसमा अंग, ताके भेद सुनौ बहु रंग ।
दूत प्रख सुनि भाखै बात, धन कन लाभ अलाभ विख्यात ॥५१॥
खुख दुख जनम मरन जय हार, और भेद सुनि चार प्रकार ।
अच्छेदिनी थपै निज धर्म, विच्छेपिनी हरै पर मर्म ॥५२॥
धर्मप्रभावक संवेजनी, भव दुख उदास निरवेजनी ।
लाख तिरानू सोल हजार, पद वंदौ संदेह निवार ॥५३॥
विपाकसूत्र ग्यारमा देख, कर्म उदैकी बात विसैख ।
तीव्र मंद सुभ असुभ सुभाख, एक कोरि चौरासी लाख ॥५४॥
ग्यारै अंग कहे समझाय, नाम अर्थ पद संख्या गाय ।
चार किरोर पंदरै लाख, दो हजार सबके पद भाख ॥५५॥
मिथ्यादृष्टी बहु विध जीव, झूठ धर्ममै मगन सदीव ।
जान तीनसै त्रेसठ जात, थोरे माहिं कहूं सब बात ॥५६॥
किरियावाद असी सौ जीव, अक्रियावादी चौरासीव ।
अग्यानवादी सतसठि दीस, विनैवादधारी वत्तीस ॥५७॥
सबकौं जीतै नै समझाय, विविध भांति बहु जुगति उपाय ।
सोई दिष्टवाद है अंग, द्वादसमा जानौ बहु भंग ॥ ५८ ॥

सोरठा ।

इक सौ आठ किरोर, अड़सठ लख छप्पन सहस ।
पंच अधिक पद जोर, कहे वारमै अंगके ॥ ५९ ॥
पंच भेद हैं तास, प्रथम परकरन सूत्र विध ।
प्रथमान जोग भास, पूरव गन अरु चूलिका ॥ ६० ॥
पंच भेद परकर्न, ससि रवि जंबूद्वीप भनि ।
दीप उदधि सुनि कर्न, व्याख्याप्रगपती सहित ॥ ६१ ॥

(२३१)

चौपदे ।

चंद्रप्रगपती सुनीं बखान, ससि ग्रह नछत्र तारे जान ।
आय काय गति उद्रे निहार, त्रत्तिस लाख पांच हजार ॥६२॥
सूर्यप्रगपती माहिं विचार, देवी देव सकल परिवार ।
सूरजविंशतना विस्तार, पांच लाख पद तीन हजार ॥६३॥
जंबूद्वीप प्रगपती जान, मेरु कुलाचल आदि बखान ।
तीन लाख पच्चीस हजार, बंदों चैत्याले सिर धार ॥६४॥
दीप उदधि प्रगपती सोय, असंख्यातकी कथनी होय ।
नाम मानि वरनन पद सार, बावन लाख छतीस हजार ॥६५॥
व्याख्याप्रज्ञप्ती है नाम, जीव अजीव दरव अभिराम ।
रूप अरूप विंश पद दीस, चौरासी लख सहस छतीस ॥६६॥

दोहा ।

प्रथम भेद परकरन यह, पद इक कोर बखान ।
लाख इकासी जानियै, सहस पंच परवान ॥ ६७ ॥

चौपदे ।

सूत्र भेद दूजौ परवान, जीव अबंध अकरता जान ।
सुपरप्रकासक बहु विध भाख, याके पद अठासी लाख ॥६८॥
प्रथमानजोग तीजा जथा, त्रेसठ पुरुष सलाका कथा ।
नाम काय थिति भेद प्रकास, पंच हजार कहे पद तास ६९
पूरव चौथा भेद बखान, ताके चौदै नाम सुजान ।
साडे पंचानवै किरोर, पंच अधिक सब पदका जोर ॥७०॥
प्रथम कह्यौ पूरव उतपात, एक कोरि पद कहे विख्यात ।
उतपत व्यय धुव तीनों काल, नौ विध दरव भेद बहु साल ७१

अग्रनीच दूजौ अभिराम, तहां सुनै दुरनै बहु नाम ।
भेद सात सै तिनके कहे, लाख छानवै पद सरदहे ॥७२॥
तीजा वीरजवाद विसाल, निजवल परवल जुग बल भाल ।
खेत काल तप भाव अपार, सत्तर लाख कहौ पद सार ॥७३॥
चौथा अस्तिनास्ति है नाम, तामैं सप्तभंग अभिराम ।
दर्व अस्ति साधनिकौ कहे, साठि लाख पद पंडित गहे ॥७४॥
पंचम ग्यानप्रवाद विधान, पांच ग्यान तीनों अग्यान ।
संख्या विपै रूप फल जोर, एक घाटि पद एक किरोर ॥७५॥
छठा सत्य परवाद विचार, द्वादस भापाकौ अधिकार ।
दस विध सत्य वचन तहं कहे, एक कोर पट पद सरदहे ॥७६॥

दोहा ।

आतम प्रवाद सातमा, पूरव सवतैं जोर ।
जीव भाव अधिकार बहु, पद छब्बीस किरोर ॥७७॥
चौपई ।

कर्मप्रवाद नाम आठमा, ग्यानावरनादिककी जमा ।
सत्ता बंध आदि बहु भाख, एक कोर पद अस्सी लाख ॥७८॥
नौमा पूरव प्रत्याख्यान, पापक्रियाकौ त्याग विधान ।
भेद संघनन पालन काज, पद चौरासी लाख समाज ॥७९॥
दसमा पूरव विद्या भाख, पद इक कोरि कहे दस लाख ।
लघु सात सै पांच सै महा, विद्या अष्ट निमित्त सब कहा ॥८०॥
कल्यानवाद ग्यारमा पेख, पंच कल्यानक कथन विसेख ।
पोड़सकारन भावन जहां, पद छैवीस कोर हैं तहां ॥८१॥
द्वादस पूरव प्रानावाद, इडा पिंगला सुपमना स्वाद ।
अंग उपंग प्रान दस भेद, तेरह कोड़ तास पद वेद ॥८२॥

(२३३)

तेरम पूरव क्रियाविसाल, कला बृहत्तरि कही रसाल ।
चौसठ गुन नारीके कहे, सील भेद चौरासी लहे ॥ ८३ ॥
गरभ आदि सौ आठ प्रकार, सम्यक भेद पचीस प्रकार ।
नौ किरोर पद जग व्योहार, जिनवानी सबतैं सिरदार ॥ ८४ ॥
विंद त्रिलोकसार चौदहां, लोक अलोक कथन है जहां ।
अकृत अनादि अनंत प्रकास, वारै कोरि लाख पंचास ॥ ८५ ॥

दोहा ।

पूरव चौथे भेदका, कह्यौ सकल व्यौहार ।
नाम चूलिका अब कहूं, पंचम भेद विचार ॥ ८६ ॥

चौपई ।

जल थल माया नभ अरु रूप, पंच भेद चूलिका अनूप ।
पद दस कोड़ि लाख उनचास, सहस छियालिस वरन्यौ तास

सोरठा ।

दो किरोर नौ लाख, सहस नवासी दोय सै ।
एक एकके भाख, पांचौके पद एकसे ॥ ८८ ॥

चौपई ।

नाम जलगता कौ आरंभ, जलमै मगन अगनकौ थंभ ।
अगनि माहिं परवेस निकार, मंत्र जंत्र अरु तंत्र विचार ॥ ८९ ॥
नाम थलगता कहियै सोय, मेरु कुलाचलमै गम होय ।
सीघ्र गमन भुवमै परवेस, मंत्रादिक किरिया उपदेस ॥ ९० ॥
मायागता नाम है तास, इंद्रजाल बिक्रिया प्रकास ।
मंत्र जंत्र तप भेद बखान, जिनवानी सबतैं परधान ॥ ९१ ॥
नाम अकासगता है तहां, व्योम गमन बहुविध है जहां ।
जप तप क्रिया अनेक प्रकार, उपजै चारनरिद्धि निहार ॥ ९२ ॥

रूपगता है ताकौ नाम, हयगय आदि रूप अभिराम ।
चित्र काठ अरु लेप अनेक, धातवाद रसवाद विवेक ॥९३॥

सोरठा ४

द्वादस अंग सरूप, पदसंख्या पूरा भया ।
वाहज अंग अनूप, सो चौदैं विध वरनऊं ॥ ९४ ॥

चौपई ।

इहां पदनिकी संख्या नाहिं, थोरे अच्छर हैं इन माहिं ।
आठ किरोर अधिक कछु भने, चौदैं वाहज अंगनितने ॥९५॥
पहला सामायिक है सोय, समभावनिमै आयक होय ।
नाम थापना दरवित भाव, खेत काल पट भेद लखावा ॥९६॥
दूजा स्तव कहिये है सोय, चौवीसौं जिनकी थुति होय ।
तीजा भेद बंदना जान, एक जिनेस नमन विधि ठाना ॥ ९७॥
चौथा प्रतिक्रम कहिये सोय, किया दोष निरवारै जोय ।
पंचम विनै पंच परकार, ग्यान दरस व्रत तप उपचार ॥९८॥
छट्टा कृतक्रम क्रिया विसाल, पंच परम गुरु भगत त्रिकाल ।
सातम दसवैकालिक कहा, मुनि अहार विध सुध सरदहा ९९
आठम नाम उत्तरार्धैन, सव उपसर्ग परीसै जैन ।
नौमा नाम कल्प व्यौहार, मुनि विधि गहन अवध परिहार १००
कलपाकल्प दसम लख लेहु, सिख्या कथन कहा गुन गेहु ।
दरवित खेत काल अरु भाव, मुनिकौ जोग अजोग लखाव
महाकल्प ग्यारम अभिधान, साध क्रिया उत्किष्ट प्रधान ।
पुंडरीक द्वादसम बखान, चउविध सुर उपजनि तप दान ॥
तेरम नाम महापुंडरीक, इंद्र उपजनि क्रिया तप लीक ।
चौदम नाम निपध परवान, दोष प्रमाद त्याग गुनखान ॥

(२३५)

दोहा ।

चौदौ वाहज अंग ए, अगले वारह अंग ।
बीस अंककी गिनतिका, पूरन भया प्रसंग ॥ १०४ ॥
मनपरजै मति औधिकी, केवल संग्या नाहिं ।
सुतकेवलि केवल कह्यौ, बड़्यौ ग्यान जग माहिं १०५
लिंगज सुत अच्छररहित; सवदज अच्छर रूप ।
दोय भेद सुत ग्यानके, सवदज सुत सुभरूप ॥ १०६ ॥

बाँपड़े ।

विकल चतुक एकेन्द्री माहिं, लिंगज सुतमें सम्यक नाहिं ।
चहुं गति सैनी सवदज ग्यान, उपजै सम्यक दरस प्रधान ॥
स्त्रीजिन गुन अनंत भंडार; ओंकार रूप धन सार ।
इच्छा विना अनच्छर झरै, अच्छरमै है संसै हरै ॥१०८॥
धुनि समझै गनधर भ्रम नाहिं, और सुनै निज भाखा माहिं ।
प्रभुकौ कथन समझ गनधार, सो गनती को लखै अपार १०९
जो गनधरने रचना करी, सो वहु हम कहं तक विस्तरी ।
वामै भूल चूक जो होय, बुध जन सोध लीजियै सोय ११०
रवि ससि दीपक तम नहि हरै, अंतर तमवानी छै करै ।
सो वानी नित करौ उदोत, हमै तुमै परमात्म जोत १११

दोहा ।

द्यानत वानी कथनतै, वडै ग्यान घट माहिं ।
ज्यौ नैननितै देखियै, घट पट धोखा नाहिं ॥ ११२ ॥

इति वानीसंख्या ।

(२३६)

पल्ल-पच्चीसी ।

दोहा ।

कलप अनंतानंत लौं, रुलै जीव विन ग्यान ।
सम्यकसौं सिवपद लहै, नमौं सिद्ध भगवान ॥ १ ॥
जो कोई पूछै इहां, एक कलपका काल ।
कितना सो व्यौरो कहौ, कहौं सुनौ तजि लाज ॥ २ ॥

चौपदे ।

एक कलपके सागर कहे, कोड़ा कोड़ बीस सरदहे ।
इक सागरके पल्ल वखान, कोड़ाकोड़ी दस परवान ॥ ३ ॥

दोहा ।

तीन भेद हैं पल्लके, प्रथम पल्ल 'व्यौहार' ।
दूजा पल्ल 'उधार' है, तीजा 'अद्धा' धार ॥ ४ ॥

सोरठा ।

प्रथम रोम गिन देह, दूजा दीप उदधि गिनै ।
तीजा भौ-तिथि एह, चहु गति जिय वस करमके ॥ ५ ॥

दोहा ।

प्रथम पल्ल व्यौहारकौं, कहूं जिनागम जोय ।
अंक पंच चालीसकी, गनती जातै होय ॥ ६ ॥

सवैया-इकतीसा ।

नभका प्रदेश रोकै पुद्गल दरव अनूं,
औधिग्यानी देखै नैनगोचर न सोई है ।
अनंत अनंत मिलि खंध सन्नासन्न नाम,
रजरैन त्रटरैन रथरैन होई है ॥

(२३७)

उत्तम भू मध्यम जघन कर्मभूमि बाल,
लीख तिल जौ अंगुल वारै रास जोई है ।
सन्नासन्न अंगुल्यौ वारै आठ आठ गुने,
जिनवानी जानी जिन तिन संसै खोई है ॥ ७ ॥

दोहा ।

भोगभूमि उत्तम विपै, उपजेके सिरवाल ।
जनम सात दिनके कहे, महामहीन रसाल ॥ ८ ॥
तिनसेती कूवा भरौ, जोजन एक प्रमान ।
अति सूच्छम सब कतरिकै, खंड होहि नहिं आन ॥ ९ ॥
भोगभूमि उत्तम मध्यम, जघन करम भुवि लीख ।
तिल जौ अंगुल आठ ए, भेद लेहु तुम सीख ॥ १० ॥
अंगुल हाथ धनुष कहे, कोस जु जोजन पंच ।
तीन भेद पांचौं लखे, संसै रहै न रंच ॥ ११ ॥
प्रथम नाम उत्सेध है, दूजा नाम प्रमान ।
तीजा आतम नाम है, अंगुल तीन बखाने ॥ १२ ॥

सवैया इकतीसा ।

बाल आदि गनती सो उत्सेध अंगुलतै,
चारौ गति देह नर्क स्वर्गके प्रसाद हैं ।
यातै पांचसै गुनेकौ अंगुल प्रमान तातै,
दीपोदधि सैल नदी जैनधाम आद हैं ॥
छहौं काल वृद्ध हानि आतम अंगुल तातै,
भौन घट रथ छत्र आसन धुजाद हैं ।
इसी भांति हाथ चाप कोस अरु जोजन हैं,
सबकौ लखैया जीव ताके गुन याद हैं ॥ १३ ॥

(२३९)

वीस लाख सत्तानूं सहस एक सौ बावन,
अंगुलके एते रोम दुह्रंकाँ फलाइए ॥
आठ कोड़ा कोड़ी पांच लाख तीस ही हजार,
सहस छत्तीस कोड़ि असी लाख गाइए ।
एही पंदरैकाँ धन किए अंक पैतालीस,
एते काल जीव भूम्यौ ऐसे भाव भाइए ॥ १६ ॥

अंकनाम, अडिल ।

चौ इक तिय चउ पांच दोय पट तीन हैं ।
नभ तिय नभ वसु दो नभ तिय इक कीन हैं ॥
सत सत सत चौ नौ पन इक दो इक कहे ।
नौ दो आगैं ठारै सुन्न सरव लहे ॥ १७ ॥

सवैया इकतीसा ।

चार सै तेरैकाँ पट वार कोटि पैतालीस,
लाख सहस छब्बीस सत तीन तीन जी ।
पंच चारि कोड़ि आठ लाख वीस हैं हजार,
तीन सत सत्रै चार चार कोड़ी कीन जी ॥
सतत्तर लाख सहस उनंचास सै पंच,
वारहकाँ तीन वार कोड़ा कोड़ी वीनजी ।
उनईस लाख वीस ही हजार कोड़ा कोड़ी,
पैतालीस हैं अनादि भाखे न नवीन जी ॥ १८ ॥

दोहा ।

इक इक रोम निकारिए, सौ सौ वरस मझार ।
जव जव खाली कूप है, यही पल्ल व्यौहार ॥ १९ ॥

(२४०)

समेया इकतीसा ।

सब रोमकों फलाय एक एक न्यारौ करौ,
असंख्यात कोड़ि वर्षके समै फलाइए ।
एती एती रोम एक एक रोम पर राखौ,
सबकी गनतीके उधार पल्ल गाइए ॥
कोड़ा कोड़ी पच्चीसके दीपोदधि राजू माहिं,
उद्धार रोम सौ सौ बरसमै गिनाइए ।
सोई अद्धापल्ल दस कोड़ा कोड़ीके सागर,
ऐसी धिति भोगिकै कपाय न घटाइए ? ॥ २० ॥

चौपई ।

चहुगति माहिं रुला तू जीव, अधापल्ल धिति लही सदीव ।
तेतिस सागर नरक मझार, इकतिस सागर ग्रैवक धार ॥२१॥
जगमै दुख सुख लहे अनेक, पायौ नाहीं ग्यान विवेक ।
सबमै बुल्लभ नर अवतार, आय सुघाट चलै मतिहार ॥२२॥

दोहा ।

इस गिनतीका हेत यह, जानि होय वैराग ।
जो सुनिकै समझै नहीं, ताके बड़े अभाग ॥ २३ ॥
कही सुनी भोगी लखी, जिन यह धिति बहु भाय ।
सो हम जान्यौ आतमा, रहूं तास लौ लाय ॥ २४ ॥
गोमटसार निहारिकै, भापी द्यानत सार ।
भूलचूक यामै कह्यौ, लीजौ संत सुधार ॥ २५ ॥

इति पल्लवचीसी ।

(२४१)

पद्मगुणी-हानि-वृद्धि-चीसी ।
दोहा ।

संख असंख अनंत गुन, भए वृद्धि पट हान ।
सुद्ध अगुरुलघु गुनसहित, नमों सिद्ध भगवान ॥ १ ॥
पुग्गल धर्म अधर्म नभ, काल पंच जड़रूप ।
छहों दरव ग्यायक सदा, नमों सिद्ध चिद्रूप ॥ २ ॥

सवेया इकतीसा ।

धर्म अधरम नभ एक एक दर्ब सव,
काल असंख्यात दर्ब चेतन अनंत हैं ।
पुग्गल अनंतानंत काहकी न आदि अंत,
परजै उतपात वै गुन धुववंत हैं ॥
जीव दर्ब ग्यायक सरीर आदि पुग्गल है,
धर्माधर्म दर्ब गति धिति हेत तंत हैं ।
व्योम ठौर देत काल नौ-जीरन भाव हेत,
ऐसी सरधासों संत भौ-जल तरंत हैं ॥ ३ ॥
एक एक दरवमैं अनंत अनंत गुन,
अनंत अनंत परजाय पेखियत है ।
एक एक गुन माहिं अनंत अनंत भेद,
एक एक भेद न्यारे न्यारे देखियत है ॥
केई भेद काहू समै वृद्धिरूप परनमैं,
केई भेद काहू समै हानि लेखियत है ।
अद्भुत तमासा ग्यान आरसीमैं प्रतिभासा,
दर्वित अलेख कर्मसेती भाखियत है ॥ ४ ॥

१ नवीन तथा जीर्ण (पुराना) करनेका कारण है ।

घ. वि. १६

(२४२)

दीक्षा ।

अस्ति अमूरत अगुरुलघु, दर्ब प्रदेश प्रमेय ।
वस्त अचेतन मूरती, चेतन दस गुन गेय ॥ ५ ॥

सवेया इकतीसा ।

दर्ब खेत काल भाव चारों गुन लिये अस्त,
परसंग वात सान(?) सदा गुन वस्त है ।
उतपात वै ध्रुव परनतसौं दर्ब तत,
गहै उड़े नाहिं सो अगुरुलघु समस्त है ॥
दर्ब गुन परजायकौ अधार परदेस,
आपकौं जनावै गुन परमेय लस्त है ।
मूरत अमूरत अचेतन चेतन दसौं,
गुन छहौं दर्बमाहिं जानै भ्रम नस्त है ॥ ६ ॥
जीव माहिं चेतन अमूरत ए दोन्यौं गुन,
पुगलमै मूरत अचेतन दो पाइए ।
अमूरत अचेतन ए दोऊ हैं तिहूं काल,
धर्माधर्म नभ काल चारोंमै वताइए ॥
अस्त वस्त दरवतै परमेय परदेस,
अगुरु लघु ए छहौं सबहीमै गाइए ।
तातै एक एक दर्ब माहिं आठ आठ सधै,
मुख्य गुन चेतनकौ ध्यान माहिं ध्याइए ॥ ७ ॥
जो तौ दर्ब गुरु होय भूमै वसि जाय सोय,
जो तौ दर्ब लघु होय उड़ जाय तूल ज्यौं ।
ताहीतै अगुरु लघु बड़ा गुन दर्ब माहिं,
जातै दर्ब अविनासी सदा मेरमूल ज्यौं ॥

ताही गुनका विकार ताके चार भेद धार,
 केवलीके ग्यानमें विराज रहे भूल ज्यौं ।
 तिन्हें कहि सकै कोय समझै सो बुध होय,
 किंचितसे भाखत हौं मिटै धर्म भूल ज्यौं ॥ ८ ॥
 जीवमें अनंत गुन तामें एक ग्यान नाम,
 मूल पंच भेद भेद उत्तर अनंत हैं ।
 दूजे गुन दर्सनके चार भेद मूल कहे,
 उत्तर अनेक भेद लोकमें भनंत हैं ॥
 तीजा गुन सुख सुखी चक्री जुगलिये जीव,
 फनी इंद अहमिंद सिद्धजी महंत हैं ।
 चौथा बल गज सिंघ चक्री देव जिनराज,
 ऐसैं ही अनंतकों जे ध्यावैं तेई संत हैं ॥ ९ ॥
 पुग्गल दरवमें अनंत गुन रुखा एक,
 ताके बहु भेद धूल राख रेत मान है ।
 दूजे चिकनेके भेद हैं अनेक रूप पानी,
 छरी गाय भैंसि जंटनीकौ दूध जान है ॥
 तीजा गुन कड़वा है भेद निंब इंद्रायन,
 विष और महाविष लोकमें निदान है ।
 चौथा गुन मीठा गुड़ खांड सर्करा पीयूष,
 ऐसैं ही अनंतनिसौं मेरौ ग्यान आन है ॥ १० ॥
 दर्बमें अनंत गुन एक जीवमें अनंत,
 एक अस्त भाय ताके चौदैं गुनधान हैं ।
 एक पुदगलमें अनंत वीस नाम कहे,
 एक फास बेल काठ हाड़ औ पखान है ॥

चारों दर्व माहिं तौ विभाव गुन जमा नाहिं,
सुध भाव गुन भेद साथें बुधवान है ।
आत्मके साधनकों साधन बताए सब,
वस्तु सिद्ध भए साध हेत दुखदान है ॥ ११ ॥
चार अंक भाग दोय गुण करै सोलै होय,
नव भाग तीन गुन एक असी धन(?) है ।
सोलहकौ भाग चार गुनतैं दोसै छप्पन,
पच्चिसका भाग पांच सवा छसै गुन हैं ॥
छत्तिसका भाग षट गुन वारै सै छानवै,
सौ भाग दस गुन दस हजार सुन हैं ।
संख्यात असंख्यात अनंत यौही भाग गुण,
षट वृद्धि षट हानि जानत निपुन हैं ॥ १२ ॥
वारै अंक दोय भाग षट तीन भाग चार,
चार भाग तीन षट भाग दोय जाने हैं ।
वारै दुगुने चौबीस तिगुने छत्तीस दीस,
चौगुने अठतालीस पांच साठ ठान हैं ॥
इसी भांति उतकिस्ट मध्यम जघन्य भेद,
भागाकार गुनाकार भावनमें माने हैं ।
आलसकों टारि नैक अंतर विचार देखौ,
परनाम भेद जान मिथ्याभाव माने हैं ॥ १३ ॥
अनंत-भाग-वृद्धि औ असंख्यात-भाग-वृद्धि,
संख-भाग-वृद्धि संख-गुन-वृद्धि थानजी ।
असंख्यात-गुन-वृद्धि औ अनंत-गुन-वृद्धि,
अनंत-भाग-हानि असंख-भाग-हानजी ॥

(२४५)

संख-भाग-हानि संख गुनहानि असंख्यात,
गुन-हानि औ अनंत गुन-हानि मानजी ।
एई परनामनके वारै भेद थूल कहे,
एक एक भेदमें अनेक भेद जानजी ॥ १४ ॥
काहू समै संख-भाग भावनिकी वृद्धि होय,
काहू समै संख-गुन भाववृद्धि रिद्धि है ।
काहू समै असंख्यात-भाग भाववृद्धि होय,
काहू समै असंख्यात-गुन-वृद्धि निद्धि है ॥
काहू समै अनंत-भाग भाववृद्धि होय,
काहू समै अनंत-गुन-भाव वृद्धि है ।
इसी भांति छहौं भेद हानिकौं लगाय लीजै,
धन ग्यान केवलमें सब बात सिद्धि है ॥ १५ ॥
जहां लौं गिनै सो संख्यात अगिन असंख्यात,
जाकौ अंत नाहिं सो अनंत ठहराया है ।
संख भेद संखके असंखके असंख भेद,
जाहीके अनंत भेद सो अनंत भाखा है ॥
जातैं भेद घाट होय भाग नाम कह्यौ सोय,
जातैं भेद बाढ़ होय सोई गुन गाया है ।
संख्यात असंख्यात अनंत भाग गुन पट,
वृद्धि हानि बारै भाव सूधा समझाया है ॥ १६ ॥
ग्यान गेय माहिं नाहिं गेय हू न ग्यान माहिं,
ग्यान गेय आन आन ज्यौं मुकुर घट है ।
ग्यान रहै ग्यानी माहिं ग्यान विना ग्यानी नाहिं,
दुहं एकमेक ऐसैं जैसैं सेतपट है ॥

भाव उतपात नास परजाय नैन भास,
दरवित एक भेद भावकौ न घट है ।
द्यानत दरव परजाय विकल्प जाय,
तव सुख पाय जब आप आप रट है ॥ १७ ॥
निहचै निहार गुन आतम अमर सदा,
विवहार परजाय चेतन मरत है ।
मरना सुभाव लीजै जीव सत्ता मूल छीजै,
जीवरूप विना काकौ ध्यान को धरत है ॥
अमर सुभाव लखै करुना अतीव होय,
दया भाव विना मोखपंथ को चरत है ।
अविनासी ध्यान दीजै नासी लखि दया कीजै,
यही स्वादवादसेती आतमा तरत है ॥ १८ ॥
पट गुनी हानि वृद्धि भाव हैं सुभावहीके,
सुद्धभाव लखैसेती सुद्धरूप भए हैं ।
सरवथा कहनेकौ आप जिनराजजी हैं,
आचारज उवज्ञाय साधु परनए हैं ॥
कुंदकुंद नेमिचंद जिनसेन गुनभद्र,
हम किस लेखे माहिं सूधे नाम लए हैं ।
द्यानत सवद भिन्न तिहूं काल मैं अखिन्न,
सुद्ध ग्यान चिन्न माहिं लीन होय गए हैं ॥ १९ ॥

दोहा ।

बुद्धिवंत पढ़ि बुधि बढ़ै, अबुधनि बुधि दातार ।
जीव दरवकौ कथन सव, कथननिमैं सिरदार ॥ २० ॥

इति पद्मगुणी हानिवृद्धि ।

(२१७)

पूरण-पंचासिका ।

सवेया इकतीसा ।

नाथनिके नाथ औ अनाथनिके नाथ तुम,
तीनलोक नाथ तातें सांचे जिननाथ हौ ।
अष्टादस दोष नास ग्यानजोतकों प्रकास,
लोकालोक प्रतिभास सुखरास आथ हौ ॥
दीनके दयाल प्रतिपाल सुगुननि-माल,
मोखपुर पंथिनकों तुमी एक साथ हौ ।
द्यानतके साहव हौ तुमही अजायव हौ,
पिंड ब्रह्मंड माहिं देखनिकों माथ हौ ॥ १ ॥

चौबीसा-छंद (आठ रगण)

भान भौ-भावना ग्यान लौ लावना,
ध्यानकों ध्यावना पावना सार है ।
स्वामिकों अच्चिकै कामकों वच्चिकै,
रामकों रच्चिकै सच्चकों धार है ॥
सल्लकों भेदिकै गल्लकों छेदिकै,
अल्लकों वेदिकै खेद खैकार है ।
रोपकों नट्टकै दोषकों भट्टकै,
सोपकों लट्टकै अट्टकों जार है ॥ २ ॥

सवेया इकतीसा ।

चाहत है सुख पै न गाहत है धर्म जीव,
सुखकौ दिवैया हित भैया नाहिं छतियां ।
दुखतैं डरै है पै भरै है अघसेती घट,
दुखकौ करैया भयदैया दिन रतियां ॥

(२४८)

लायी है बबूलमूल खायी चाहे अंघ भूल,
दाहजुर नाशनकी सोवै सेज ततियां ।
द्यानत है सुख राई दुख मेरकी कमाई,
देखौ रायचेतनिकी चतुराई ततियां ॥ ३ ॥

सबैया तेईसा ।

को गुरु सार वरै सिव कौन, निसापति को किह सेव करीजै ।
कौन बली किम जीवनको फल, धर्म करै कव क्या अघ छीजै ॥
कर्म हरै कुन कौन करै तप, स्वामिकौ सेवक कौन कहीजै ।
द्यानत मंगल क्यों करि पाइयै, पारस नाम सदा जपि लीजै ॥
कौन बुरा तम कौन हरै, तजियै न कहा किहकौं तजि दीजै ।
क्या न करै किहकौं न धरै, किहसूं लरियै किहमें न रहीजै ॥
का सहुभिन्न चलै कि नहीं, व्रत स्वामिकौ देखिकै क्या उचरीजै ।
द्यानत काम निरंतर कौन सो, पारस नाम सदा जपि लीजै ॥
का सहु दान कहा उपजै अघ, को गृह ऊपर काहि पड़ीजै ।
कौन करै थिर कैसे हैं दुर्जन, क्यों जस कौन समान गनीजै ॥
का कहु पालियै धर्म भजै किम, धर्म बड़ा कहु कौन कहीजै ।
द्यानत आलस त्याग कहा सुभ, पारस नाम सदा जपि लीजै ॥

सबैया इकतीसा ।

निज नारि खोय पूछै पसुपंछी वृच्छ सव,
तुम कहीं देखी सु तौ तीनलोक ग्याता है ।
हर्नाकुस पेट फाख्यौ कंस जरासिंधु माख्यौ,
ताकौं कहैं कृपासिंधु संतनिकौ त्राता है ॥
बैल असवार दोय नार औ त्रिसूल धार,
गलमें वधंवर दिगंबर दिख्याता है ।

(२४९)

ऐसी ऐसी बात सुनि हांसी मोहि आवत है,
सूरजमें अंधकार क्यों करि समाता है ॥ ७ ॥
चारों गति भाव यार सोलहों कपाय 'सार',
तीनों जोग 'पासे' ठारै दोष 'दाव' परें हैं ।
जीवै मरै कर्म रीत सुभा सुभ 'हार जीत'
संयोग वियोग सोई मिलि मिलि विछरें हैं ॥
चवरासी लाख जोनि ताके चवरासी भौन,
चारों गति विक्रामें सदा चाल करें हैं ।
चौपरके ख्यालमें जगत चाल दीसत है,
पंचमकौ पाय ख्यालकौ उठाय धरें हैं ॥ ८ ॥
सुनि हो चेतन लाल क्यों परे हौ भवजाल,
वीते हैं अनादि काल दीसत कंगाल हौ ।
देखत दुख विकराल तिन्हीसों तेरो ख्याल,
कलु सुध है संभाल डोलत बेहाल हौ ॥
घरकी खबरि टाल लागि रहे और हाल,
विष गहि सुधा चाल तज दीनी बाल हौ ।
गेह नेहके जंजाल ममता लई विसाल,
त्यागिकै हूजै निहाल द्यानत दयाल हौ ॥ ९ ॥

सवैया तेईसा ।

संग कहा न विपाद बढावत, देह कहा नहिं रोग भरी है ।
काल कहा नित आवत नाहिं नै, आपद क्या न नजीक धरी है
नर्क भयानक है कि नहीं, विषयासुखसौ अति प्रीति करी है ।
प्रेतके दीप समान जहानकौ, चाहत तो बुधि कौन हरी है १०

क्रोध सुई जु करै करमोंपर, मान सुई दिहु भग्न (?) बनुवै ।
 माया सुई परकष्ट निवारत, लोभ सुई तपसों तन तवै ॥
 राग सुई गुरु देवपै कीजियै, दोष सुई न विपै सुख भावै ।
 मोह सुई जु लखै सब आपसे, ग्यानत सज्जन सो कहिलावै ११
 पीर सुई पर पीर बिडारत, धीर सुई जु कपायसों जूझै ।
 नीति सुई जो अनीति निवारत, मीत सुई अघसों न अरुझै ॥
 औगुन सो गुन दोष विचारत, जो गुन सो समतारस बूझै ।
 मंजन सो जु करै मन मंजन, अंजन सो जु निरंजन सूझै १२
 ध्यान सुई कछु चिंत करै नहीं, ग्यान सुई कछु बात न गूझै ।
 दान सुई जु विवेकसों दीजियै, जान सुई दुख जानकै ऊझै ।
 वानि सुई सुभ ग्यान बढ़ै घट, ग्यान सुई परमै नहिं मूझै ॥
 मंजन सो जु करै मन मंजन, अंजन सो जु निरंजन सूझै १३

मालिनी ।

कर कर नर धर्म परम सर्म प्रदाता,
 हर हर नर पाप दुःख संताप भ्राता ।
 यह जिन उपदेसं सर्व संसार सारं,
 भवजलनिधि धारं जान चढ़ि (?) होहि पारं ॥ १४ ॥

वसंततिलका ।

तूही जिनेस करुनाकर दीनबंध,
 स्वामी त्रिलोकपति ईसुर ग्यानखंध ।
 वंदौ त्रिकाल जगजाल निकाल मोहि,
 दाता महंत भगवंत प्रसन्न होहि ॥ १५ ॥

सुन्दरी ।

रहित दोष अठारै देव हैं, गुरु सदा निरग्रंथ सु एव हैं ।
 धरमश्रीजिनभाख प्रमान है, मुक्तिपंथ यही सरधान है १६

(२५१)

भुजंगप्रयात ।

सहे दुःख नर्क निगोदं अपारं,
अजो नहिं छाड़ंत अश्रं विकारं ।
सुहृंके विवेकी भए जात वारे,
भले जी भले जी भले प्राणप्यारे ॥ १७ ॥

करसा (सबे लवु) ।

अधिर सब जगत वन तनक नहिं कहिं सरन,
चतुरगति दुख धरन हरन साता ।
इक सु अघ उरध भुव अन सु तन अन सु तव,
असुच पुदगल अधुव तजत ग्याता ॥
ममत असरव करत निरममत सवर रत,
सुहित निरजर भरत धरत ध्याता ।
मुनत त्रिभुवन अचल गुनत अवगम अटल,
दुलभ अनभव अमल सिव प्रदाता ॥ १५ ॥

सवैया तेईसा ।

भूख लगै दुख होहि अनंत, सुखी कहियै किम केवल ग्यानी ।
खात विलोकत लोक अलोककौं, देखि कुदर्व भखै नहिं प्राणी
खायकै नीद करै सब जीव, न स्वामिकै नीदकी नाम निसानी
केवल ग्यानी अहार करै नहिं, सांची दिगंबर ग्रंथकी वानी १९

जिनगुणसम्पत्ति व्रतके तिरेसठ उपवास, छप्पय ।

पोड़सकारन जान, ठान पड़िवा व्रत सोलै ।
पंच कल्यानक सांच, पांच पांचै अघ छोलै ॥
दस जनमत दस ग्यान, वीस गुन वीसौ दसमी ।

(२५२)

चौदौ गुन सुरकुल्य, बार दस चौदस धरमी ॥
गुन आठ प्रातहारजनिके, आठ अष्टमी कीजियै ।
द्यानत त्रेसठ उपवास कर, तीर्थकर पद लीजियै २०

विश्रान्तपातभावलाग, सबैया इकतीया ।

भूमि कहै मोपै गिरि सागरकौ वोझ नाहिं,
कौलसेती टलै दुष्ट ताकौ महा भार है ।
दसरथ बोल सार रामकौ दियौ निकार,
राजनीति लंघी बात लंघी न करार है ॥
नख सिख अंगनिमें एकै मुख गुनकार,
सांच वचन प्रभुजीकै भयौ ओंकार है ।
ऊंट वाड़ गाड़ी पाड़ चलता ही भला कहै,
ऐसे वे सरमके जीवनकौ धिकार है ॥ २१ ॥

धैर्य भाव ।

अंजनी सुसर सास मात तातनै निकास,
सीता सती गर्भवती रामजीनै छारी है ।
प्रदुमन सिला तलै धख्यौ पाप ताप भख्यौ,
रामचंद्र वनवास महा त्रासकारी है ॥
पंडवा निकलि गए कैसे कैसे कष्ट भए,
सिरीपाल कोटी भट सह्यौ खेद भारी है ।
द्यानत बड़ोंका दुःख छोटनिकौ सीख कहै,
दुखमाहिं सुख लहै सोई ग्यानधारी है ॥ २२ ॥
दर्शनविसुद्धि विनै सदा सील ग्यान भनै,
संवेग सुदान तप साधकी समाधजी ।

(२५३)

वैयावृत अरहंतभक्ति आचारजभक्ति,
बहुश्रुतभक्ति प्रवचनभक्ति साधनी ॥
पट आवस्यक काल मारगप्रभाव चाल,
वातसल प्रतिपाल सोलहों अराधजी ।
तीर्थकर कारन हैं कर्मके निवारन हैं,
मोखसुख धारन हैं टारन उपाधजी ॥ २३ ॥
उनसठि लाख सहस सत्ताईस चालीस,
कोड़ाकोड़ि वर्ष आदिनाथजीकी आव है ।
तीन कोड़ाकोड़ि ग्यारै लाख चौ सहस कोड़,
एते वर्ष ब्रह्मा आव लोकमें कहाव है ॥
उन्नीस लाख पचपनसै पचपन ब्रह्मा,
आदिनाथ आवमें हुए मुए फलाव है ।
एक कोड़ाकोड़ि बहन्न लख असी हजार,
कोड़ि वर्ष बाकी रहे जानौ धर्म न्याव है ॥ २४ ॥

सवैया तेहेसा ।

इंद्र अनेक विवेककी टेक, तुही प्रभु एककौ सीस नवावै ।
मौलि महा मनि नैन दिखै धन, लाल सुपेद नखों महि आवै ॥
पाटल वन रमाघर चर्न, सरोज उभै गुन प्रीति बढ़ावै ।
भौरज नाहिं धैर जड़भाव हरै, सुमरै सुख क्यों नहिं पावै २५
बुद्धि कहै बहुकाल गए दुख, भूर भए कवहूं न जगा है ।
मेरौ कह्यौ नहिं मानत रंचक, मोसौ विगार कुनार सगा है ॥
देहु री सीख दया तुम जा विध, मोहकौ तोरि दे जेम तगा है ।
गावहुंगी तुमरौ जस मैं, चलरी जिसपै निज पेम पगा है २६

चिंतामन जान कहीं पारस पाखान कहीं,
कल्पवृच्छ धान कहीं चित्रावेलि पेखियै ।
कामधेनु रूप कहीं पोरसा अनूप कहीं,
बनी है रसायन जवाहर विसेखियै ॥

नृपकौ प्रताप कहीं चंद भान आप कहीं,
दीपजोति व्याप कहीं हेमरासि लेखियै ।
फैलि रह्यौ ठौर ठौर भेख गह्यौ और और,
एक धर्म भूप सब लोक माहिं देखियै ॥ २७ ॥

रतनोंकी खानि कहीं गंगाजल पानि कहीं,
सीत माहिं घाम पौन सीतल सुगंध हैं ।
बड़े वृच्छ फल छाहिं अतर गुलाब माहिं,
मेघकी भरन परै बहु मेवा खंध है ॥

तंदुल सुवास कहीं आभूपन रास कहीं,
अंबर प्रकास अति मोहकौ निबंध है ।
एक धर्मसेती सब ठौर जै जै कार होय,
ताही धर्म विना घर बाहरमैं धंध है ॥ २८ ॥

नर्क पसुतैं निकास करै स्वर्ग माहिं वास,
संकटकौ नास सिवपदकौ अंकूर है ।
दुखियाकौ दुख हरै सुखियाकौ सुख करै,
विघन विनास महामंगलकौ मूर है ॥

गज सिंह भाग जाय आग नाग हू पलाय,
रन रोग दधि बंध सबै कष्ट चूर है ।

(२५५)

ऐसी दयाधर्मकी प्रकाश ठौर ठौर होहु,
तिहुं लोक तिहुं काल आनंदको पूर है ॥ २९ ॥
इधें कोट उधें बाग जमना बहै है बीच,
पच्छमसौं पूरवलों असीन (?) प्रवाहसौं ।
अरमनी कसमीरी गुजराती मारवारी,
नरोंसेती जामें बहु देस वसें चाहसौं ॥
रूपचंद बानारसी चंदजी भगोतीदास,
जहां भले भले कवि ब्यानत उछाहसौं ।
ऐसे आगरेकी हम कौन भांति सोभा कहें,
बड़ौ धर्मथानक है देखियै निवाहसौं ॥ ३० ॥
सहरमें नहर है ठौर ठौर मीठे कूप,
बाजार बहुत चौरा बसती सघन है ।
आन देसोंसेती जहां स्रावक अधिक बसें,
सुखी सब लोग अति ही उदार मन है ॥
दान नित देत पूजा भावसौं परम हेत,
साख सुनै हैं सचेत होत जागरन है ।
इंद्रपथ नाम बन्यौ इंद्रहीकौ सांचौ धाम,
दिल्ली सम और देस माहिं नाहिं धन है ॥ ३१ ॥
आगरेमें मानसिंह जौहरीकी सैली हुती,
दिल्ली माहिं अब सुखानंदजीकी सैली है ।
इहां उहां जोर करी यादि करी लिखी नाहिं,
ऐसे भाव आलससौं मेरी मति मैली है ॥
आगरेमें बड़े उपकारी थे बिहारीदास,
तिन पोथी लिखवाई तब थोरी फैली है

दिल्ली माहिं लागू होय पोथी पूरी लिखवाई,
 ऐसी साहिवराय सुगुननकी थैली है ॥ ३२ ॥
 दिल्लीमें नहरि आई तैसें यह कविताई,
 धाम धाम जल ठाम ठाम यह वानी है ।
 केई पूजा पढ़ें केई पद रागसेती रटें,
 सुनि सुख बढ़ें बहु धर्मबुद्धि सानी है ॥
 बहुत लिखावैं बहु साख्रकों वचावैं सदा,
 लिख लेय जावैं बहु सांच प्रीत ठानी है ।
 दिल्ली माहिं सब ठौर ग्रन्थ यह फैलत है,
 तैसें सब देस फैलौ सबै सुखदानी है ॥ ३३ ॥
 आगरौ गुननिकौ जहानावाद रहै कोय,
 सुधरूप धरमविलासकौ प्रकास है ।
 धरमविलास धर्मके कियैं सदा विलास,
 धर्मकौ विलास यह धरम विलास है ॥
 धर्मकों करै है कोय आपहीमें धर्म होय,
 वस्तुकौ सुभाव सोय कभी नाहिं नास है ।
 निज सुद्ध भावमें मगन रहौ आठौं जाम,
 बाहज हू हेत बड़ौ ग्रंथकौ अभ्यास है ॥ ३४ ॥
 पूजा बहु परकार दानके कवित्त सार,
 चरचा अपार पट दर्बकौ विचार है ।
 भगतिकौ अधिकार पदनिकौ विसतार,
 अध्यातमकौ निहार वानीकौ विथार है ॥
 अखर बावनी धार लोकालोक निरधार,
 कोप भाव निरवार कथा हू उदार है ।

(२५७)

धरम विलासमें अनेक ग्यान परकास,
सब माहिं भगवान भगवान भगवान तार है ॥३५॥
अग्र नाम तपसी बसेसों अगरोहा भया,
तिसकी संतान सब अग्रवाल गाए हैं ।
ठारै सुत भए तिन ठारै गोत नाम दये,
तहांसों निकसिकें हिसार माहिं छाए हैं ॥
फिर लालपुर आय व्यैक 'चौकसी' कहाय,
गोलगोती वीरदास आगरेमें आए हैं ।
ताहीके सपूत स्यामदासके द्यानतराय,
देस पुर गाम सारे साहमी कहाए हैं ॥ ३६ ॥

छप्पय ।

पुरनि माहिं आगरौ, आगरौ आन नाहिं तुल ।
अगर सुवास प्रकास, तास सम अगरवाल कुल ॥
वीरदास महावीरदासतैं, नाम धख्यौ जन ।
नेमिनाथ तन स्याम, दासतैं स्यामदास भन ॥
धन द्यानतदार विचारिकैं, द्यानत नाम प्रवानिया ।
कवि नगर नाम दादा पिता, निज नामारथ आनिया ३७

सवैया इकतीसा ।

सत्रहसय तेतीस जन्म व्याले पिता मर्न,
अठताले व्याह सात सुत सुता तीन जी ।
छयाले मिले सुगुरु बिहारीदास मानसिंघ,
तिनों जैन मारगका सरधानी कीन जी ॥
पछत्तर माता मेरी सील बुद्धि ठीक करी,
सतत्तरि सिखर समेद देह खीन जी ।

ध. वि. १७

(२५८)

कछु आगरेमें कछु दिखी माहिं जोर करी,
अस्सी माहिं पोथी पूरी कीनी परवीनजी ॥ ३८ ॥
छप्पय ।

गाय हंस उतकिष्ट, मधम मृतिका सुक जानौ ।
चलनी छाजं पखान, फूटघट महिष प्रवानौ ॥
जोंक वोक फनधार, और मंजार उलू हूव ।
ए दस भेद जघन्य जान, स्रोता चौदह धुव ॥
जो जो सुभाव धारक सहज, सो सो नाम धरावई ।
सो धन्य पुरुष संसारमें, धरम ध्यान मन लावई ३९

सवैया इकतीसा ।

सात विस्त्र त्याग वारै व्रतसौं कियौ है राग,
कंदमूल फूल साग सब त्याग करे हैं ।
वैगन करोंदे तूत पेठा बेर तरवूज,
जामुन गौंदी अंजीर खिरनीसौं टरे हैं ॥
चामघीव तेल जल हींग वासी पकवान,
विदल अचार मुखेसौं (?) थरहरे हैं ।
जल छान लेत रात पानी नाज तजि देत,
दर्सनसौं हेत ऐसे ग्याता गुन भरे हैं ॥ ४० ॥

छप्पय ।

आप पढ़ा कछु होय, सुना कछु होय जथारथ ।
समझ ग्यान वैराग, क्रिया नित करत मुक्त पथ ॥
नई उकति नहिं धरै, जुगत बहु विध उपजावै ।
पिछले आगम देखि, कठिनकाँ सरल वनावै ॥
सुभ अच्छर छंद प्रगट अरथ, परमारथ वरनन करै ।
द्यानत ममता त्यागी सुकवि, जब जस बानी विसतरै ४१

रावेया इकतीसा ।

कोयलकौ बोल जहां काक हू कलोल करै,
 मोरनिकौ धोर तहां मंडककौ सोर है ।
 तूतीकौ सबद उहां तीतुर हू बोलत हैं,
 पानी माहिं मच्छकौ न मछलीकौ जोर है (?) ॥
 खग विद्याधर खग पंछी नभ गौन करै,
 वनमें मृगेंद्र मृग चाल ताही ओर है ।
 तैसैं बहु कवि तामैं मैं भी लघु कवि तामैं,
 गुन लीजौ दोष मति कीजौ लखि खोर है ॥ ४२ ॥
 भानके प्रकास दीपके उजास दीसैं वस्तु,
 राह माहिं वारी माहिं गज दिष्टि आवै है ।
 उरदू बाजार छोटे बड़े हैं दुकानदार,
 थोरा व्रत बहु व्रत व्रती नाम पावै है ॥
 राजा परजाकैं सुतका उछाह एक सा है,
 नौ ग्रहमें (?) हीरा अरु मूंगा हू कहावै है ।
 तैसैं कविताकी गिनतीमें हम कविता है,
 वचन विलाससेती न्यारौ आप भावै है ॥ ४३ ॥
 घातिया करम नास लोकालोक परकास,
 सरवग्य कैसौ ग्यान हम कहां पायौ है ।
 संसकृत प्राकृत न भाषा हू अल्प बुद्धि,
 नाममाला पिंगल हू पूरा नाहिं आयौ है ॥
 इस माहिं कवि चातुरी कछु करी है नाहिं,
 सूधा धर्म मारगकौ उपदेस गायौ है ।
 भूमंडल माहिं रविमंडल ज्यौं उदै करै,
 धरमविलास सबहीके मन भायौ है ॥ ४४ ॥

(२६०)

छप्य ।

अच्छर मात्रा छंद, अरथ जो अमिल बखाना ।
जान अजान प्रमाद, दोपतैं भेद न जाना ॥
संत लेहु सब सोध, बोधधर हो उपगारी ।
वालक ऊपर कटक, कौन धारै मतिधारी ॥
इस सबद गगनमें सुकविखग, अपना सा उद्यम गहै ।
पावै न पार सुभ धान वसि, परमानंद दसा लहै ॥४५॥

सवैया इकतीसा ।

अकबर जहाँगीर साहजहाँ भए बहु,
लोकमें सराहैं हम एक नाहिं पेखा है ।
अवरंगसाह वहादरसाह मौजदीन,
फरकसेरनैं जेजिया दुख विसेखा है ॥
द्यानत कहां लग बड़ाई करै साहवकी,
जिन पातसाहनकौ पातसाह लेखा है ।
जाके राज ईत भीत विना सब लोग सुखी,
बड़ा पातसाह महंमदसाह देखा है ॥ ४६ ॥
जैनधर्म अधिकार दीसै जगमाहिं सार,
और मतके फकीरसेती जती सुखी है ।
सब मत माहिं रात दिन पसु जेम खाहिं,
स्वावक विवेकी निसत्यागी गुरुमुखी है ॥
जल अनछानेसौं नहारू आध व्याध होय,
पानी पीयै छान कभी होत नाहिं दुखी है ।
सांच धर्म सब लोक जान जान सुखी होय,
सांच वात कही, नाहिं कही आप रुखी है ॥ ४७ ॥

(२६१)

चैत सब मास माहिं उत्तम वसंतसेती,
सर्व सिद्धा त्रोटसी कहें हैं सब लोकमें ।
सतभिखा है नछत्र सतको कथन अत्र,
सुभ जोग महा सुभ धर्मके संजोगमें ॥
गुरु पूजनीक गुरुवार कृष्ण पच्छ धार,
सेत हैं हे तीन वार आगम प्रयोगमें ।
सत्रहसै अस्सी सोलै भाव रीत चित्त वसी,
ग्रंथ पूरा कीना हम सुद्ध उपयोगमें ॥ ४८ ॥
एक सुध आतम सधै है सात भंगनतैं,
आठौं गुनमई परभावनसे सुन है ।
यही सुभ संवतके सोलै सब आंक भए,
सोलै भावसेती वधै तीर्थकर पुन है ॥
इसमें अधिकार भी उनासीके सोलै आंक,
सोलहौं कपाय नासकारी महा गुन है ।
जातनमें ग्यान जात वातनमें ध्यान वात,
धातनमें वड़ी धात जैसें हेम हुन (?) है ॥ ४९ ॥

छपय ।

जबलौं मेर अडोल, छोड़ि भ्रम रुचि उपजाऊ ।
जबलौं सूर प्रताप, पाप संताप मिटाऊ ॥
जबलौं चंद्र उदोत, जोति सबके घर भासै ।
जबलौं स्त्री जिनधर्म, सर्वकौ सुख परकासै ॥
जबलौं भुव मंगल गगन धिर, तबलौं ग्यान हिये धरौ ।
इस धर्मविलास अभ्याससौं, सब ही भवसागर तरौ ॥ ५० ॥

कथा देखी आदिनाथजीके दस परजाय,
 वृत्त संध निकीडत चंद्रामन भेव है ।
 गनती अनंत विरलन देय औ सलाक,
 दीपोदधि नाम गिनौ आवै नाहिं, छेव है ।
 जीव कर्म दर्ब तरुव ग्यान पूजा ठानी लोक,
 सबै बहु भेद भाखै तीर्थकर देव है ।
 भोग चक्रवर्तिजीके समोसर्नकी विभूति,
 जैनधर्मके समान जैनधर्म एव है ॥ ५१ ॥
 बुद्धिका निवास होय सुद्धता प्रकास होय,
 मुद्धता विनास होय उद्धता प्रभावना ।
 दानकी पिछान होय ग्यानका निदान होय,
 ध्यानका विग्यान होय मानका मिटावना ॥
 इंद्री सब जेर होय मन जैसें मेर होय,
 मोहका अंधेर खोय जोतिका जगावना ।
 जगतेँ निकास लेह मोख माहिं करै गेह,
 धरमविलास ग्रंथ आगमकी भावना ॥ ५२ ॥

सावन जल विन दियै, मैल गुनका सब खोवै ।
 जाका डर अवधार, कवित निरदूखन होवै ॥
 जो दुख देय न सोय, कौन सम ताकौ जानौ ।
 दोष विराने चूरि, आपने सिरपै ठानौ ॥
 यह दुष्ट पुरुष जैवंत जग, चार बड़े उपगार हैं ।
 दुरजनकाँ सज्जन सम लखै, ते ग्याता सिरदार हैं ॥ ५३

(२६३)


कंदलिया ।

अच्छरसेती तुक भई, तुकसां हूए छंद ।
छंदनसां आगम भयीं, आगम अरथ सुछंद ॥
आगम अरथ सुछंद, हमीनिं यह नहिं कीना ।
गंगाका जल लेय, अरघ गंगाकां दीना ॥
सबद अनादि अनंत, ग्यान कारन विन मच्छर ।
मैं सबसेती भिन्न, ग्यानमय चेतन अच्छर ॥ ५४ ॥

छपय ।

धन धन श्री जिनराज, काज सब जियके सारौ ।
धन धन सिद्ध प्रसिद्ध, रिद्ध सब विध विसतारौ ॥
धन धन हौ तुम सुर, सूर दुखकौ निरवारौ ।
धन धन हौ उवझाय, लाय अमृत विष डारौ ।
जग धन्न धन्न सब साधु तुम, वकता स्रोता सुख करौ ।
ग्यानत हे माता सरसुती, तुम प्रसाद सब नर तरौ ॥ ५५ ॥

इति पूरण पंचासिका ।



जैनग्रन्थरत्नाकर कार्यालयमें मिलने-
वाली कुछ पुस्तकें ।

बनारसीविलास—बनारसीदासजीकी समस्त कविताओंका संग्रह
और उन्हींका लिखा हुआ जीवनचरित सहित १-८-०

वृन्दावनविलास—कविवर वृन्दावनजीकी कविताओंका
संग्रह ०-१२-०

प्रद्युम्नचरित्र—सरल हिन्दी भाषामें २-१२-०

सप्तव्यसनचरित्र—सात व्यसनोंके सेवन करनेवालोंकी क्या
क्या दुर्दशा होती है यह सरल हिन्दी भाषामें विस्तारके
साथ दर्शाया है ०-१४-०

चर्चाशतक—सरल हिन्दी टीकासहित १२-०

न्यायदीपिका—मूलसंस्कृत और सरल हिन्दी
टीका सहित ०-१२-०

मोक्षमार्गप्रकाश—वचनिका पं० टोडरमलजीकृत १-१२-०

ज्ञानसूर्योदय नाटक—श्रीवादिचन्द्रसूरिके संस्कृत ग्रन्थका
सरल हिन्दी अनुवाद ०-८-०

इनके सिवाय और भी सब जगहके छपे हुए जैनग्रन्थ संस्कृत,
हिन्दी, मराठीके हमारे यहां मिलते हैं । सर्व साधारणोपयोगी
उत्तमोत्तम पुस्तकें भी विक्रीके लिये हर समय मौजूद रहती हैं ।
बड़ा सूचीपत्र मंगाकर देखिये ।

• मिलनेका पता—जैनग्रन्थरत्नाकर कार्यालय

हीराबाग पो० गिरगांव—बम्बई.